




15,410.

Uc. 8230



REINOLDI  
HEIDENSTEINII  
SECR: REGII, DE  
BELLO MOSCOVITICO  
Commentariorum

*LIB: SEX.*



C R A C O V I A E  
In Officina Lazari, Anno Domini,  
M. D. LXXXIII.



SIGISMUNDO BATTORI  
DE SOMLIO, PRINCIPI  
TRANSILVANIAE,

REINOLDVS HEIDENSTEINIUS.



*HISTORIAM SVIS LEGIBVS scribere Sigismunde Princeps Illustrissime, & maiorem utilitatem communi hominum vitæ affert, quàm cuiusquam oratione explicari potest; & maius quiddam esse videtur, quàm non modò ab eo expectari debeat, qui inter continua negocia in aula versetur; verùm etiam quàm vulgò homines opinantur. Qua enim in re singulis ætatibus plurimi homines doctissimi, ac non modò doctrina atq; ingenio, verùm ocio etiam abundantes elaborarint, quod tamen paucissimi in ea præstiterint; quis non summam difficultatem in causa esse dicat? sed tamen historiarum non vnum idemq; genus est: diuersitas in sola tractandi ratione, ac orationis ornatu posita videtur; ab eadem autem re difficultas omnis esse. cæteris enim rebus omnibus fere inter se conueniunt; hac sola summus historicus à mediocri, seu vt rectius dicam, historicus à narratore differt. Nam & res dignas cognitione hominum quælibet historia scribere se profitetur; & eas ad veritatem quàm maximè scribere existimari vult: easdem verò sententiarum grauitate, & verborum luminibus exornare, ac non modò rebus ipsis, verùm sententijs etiam & verbis magistrum vitæ agere, præclarum quiddam est; nec tamen omnis historiæ proprium. Nam vt de cæteris taceam, ei, quam commentarios vocari iam obtinuit, quæ iustæ historiæ quasi subserviens, ea quæ illa exornet, simpliciter*



VHs 1164532



PRAEFATIO.

*pliciter ac nudè scribit; quis nescit iure ab omnibus pro-  
pmodum concessum iam esse, ut etiam sine ullo orationis  
ac præceptorû ornatu, quam verissimè saltem quæ gesta  
sunt, narret. Hoc igitur scriptionis genere, bellum, quod à  
patruo tuo Stephano Poloniae Rege, cum Ioanne magno  
Moscouiæ Duce gestum est, à me pertextum, non tam ut  
ab historico, quam à qualicunq; narratore, ad te nunc mit-  
to. Quanquam minimè hic quidem me fugit, huius etiam  
generis commentariorû propriam quandam esse elegan-  
tiam ac dignam homine erudito puritatem. quæ nisi ma-  
xima difficilimaq; essent, minimè, qui princeps in hoc ge-  
nere est, Cæsar tantam laudem consecutus commentarijs  
suis fuisset, ut ne imitatione quidem à quoq; exprimi posse  
iudicentur. Verùm hæc quoq; quæ ego quidem ipse in me  
requiro, si quis alius præterea in commentarijs hisce re-  
quirenda putabit; is vellem perspiceret, quam non modò  
breui tempore, sed quam alieno etiam ac impedito, inter q;  
quot aliarum rerum occupationes in aula non solum ne-  
gociosissima, sed & quæ nullo certo in loco consistens per-  
petuis quodammodo profectioibus circumfertur, scri-  
bendi mihi fuerint. Id certè consequar, ut quò minùs à  
me ad hæc res scribendas studij allatum videbitur; eò  
libentiùs alij, qui possunt, ad easdem ornandas se conse-  
rant. Reliquis duabus rebus, quas historiæ propositas  
esse supra ostendi, rerum gravitatem, ac narrationis veri-  
tatem, videor mihi non debere dubitare, cumulatè omni-  
bus eos satisfacturos. Non enim indignam eius belli co-  
gnitionem iudicaturos homines opinor: quod cum eo ho-  
ste gestum est, cuius potentia non vicinis modò nationibus,  
verùm remotioribus nonnullis formidolosa iam erat; quæ-  
que qui etiam non metuebant, antequam victus esset, vix  
tamen vinci posse iudicabant. Tibi quidem Sigismunde  
Illustrissime vel iucundissimam futuram certò iam mihi  
promitto. Accedunt ad bellicas, domesticæ res: quæ ut  
tempo-*

PRAEFATIO.

*tempore ac natura ferè cum bellicis coniunctæ fuerunt; ita  
à me etiam disiunctæ non sunt. Verùm potissima ac pro-  
pria cuiuscunq; historiæ laus veritas est: de hac nihil  
neceffe est me dicere. Primum enim minimè de remotis  
à memoria nostra rebus scribo, in quibus vel errare fa-  
cile possim, vel fingere, si quid velim, nullius memoria  
iam refellente: sed edo hæc ijs cognoscenda, qui ijs ipsis  
rebus, de quibus scribo, interfuerunt; ut res per huius bel-  
li tempus gestas, ijs, qui ab illis abfuerunt, eorum, à qui-  
bus administratæ sunt, viuorum & præsentium memoria  
teste commendem. qua in re vtrunq; fuit, ut & ego fa-  
cilimè ea à multis, qui ijs interfuerunt, cognoscere potue-  
rim; à veritate autem vlla in re recedere non potuerim,  
tot hominum conscientia constrictus. Accedit hæc, ut  
publicorum actorum, quibus res, quæ hisce libris com-  
prehenduntur, magnam partem testatæ sunt, pro eo lo-  
co, in quo sum, summam facultatem habuerim. Ita quæ  
singula, si alicui obtigerint, magnum momentum ad co-  
gnoscendam veritatem attulisse ei videantur, ea mihi  
vniuersa ferè fuerunt. Habes de re: nunc cur ad te po-  
tissimum eos mittam. Primum Sigismunde Illustrissi-  
me, cum de rebus à patruo tuo clarissimo Rege gestis scri-  
berem, cui rectius dicere eos debebam, quam tibi, nullum  
reperiebam: ad quem nimirum non modò magna pars  
gloriæ huius propinquitatis iure, ac quasi hæreditate per-  
tinere videbatur; verùm quem ad similitum rerum glo-  
riam iam incensum non minori contentione ipsum etiam  
olim aspiraturum omnes exspectarent. Itaque iam ante  
mea sponte tui obseruantissimum, ad hanc tamen volun-  
tatem meam non minus summa quoq; de virtute tua ex-  
spectatio me adduxit: qua caue existimes quicquam illu-  
strius esse. Tantum enim in omni optimarum artium ge-  
nere studium, tantaq; indoles, quanta ea in te esse novi-  
mus minimè vel obscura cuiquam esse possunt, vel Transil-*



PRAEFATIO.

*uana tantum finibus se tenere. Ab hoc igitur tuarum  
laudum fonte, ut aliquam meo etiam huic labori laudem  
hominem illarum studiosissimum haurire non moleste me  
feras: singularis vero erga te obseruantiae meae qualem-  
cunq; hanc significationem ut gratam tibi esse patiaris, ita  
te rogo; ut quamuis pro summa tua humanitate tua  
sponte id facturum te non dubitem; ego  
tamen maximi beneficii loco ac-  
cepturus id sim.*



REINOLDI

R. HEIDENSTEINII  
SECR: REGII, DE  
BELLO MOSCOVITICO

*Commentariorum*

LIBER PRIMUS.



STEPHANVS REX, QVO  
confirmata foris cum finiti-  
mis omnibus pace ac ami-  
citia, dissidia ex electionis  
studijs inter partes exorta  
facilius componeret, ac in  
tranquillo statu remp: col-  
locaret; ad plerosq; vicinos  
Principes literas dedit; qui-  
bus more inter principes recepto regnum sibi delatum,  
suamq; & in illos beneuolentiam, & cum omnibus pa-  
cis studium declarabat. In hisce ad Ioannem Basilij fi-  
lium, magnum Moscouiae Ducem, Stephanum Grud-  
fenscium Polonum, & Leonem Bukouiecium Lituaniũ  
cum literis mittit: se prouidentia diuina ac ordinum stu-  
dijs ad regnum ascitum: id ita gerere instituisse; vt cum  
omnibus principibus Christianis pacem & amicitiam  
coleret: eodem animo erga illum quoq; vt finitimum  
& christiani nominis principem esse: si quae inter ipsum  
ac regnum Poloniae magnumq; Ducatum Lituaniae a  
maioribus vtriusq; traditae controuersiae intercederent;  
de ijs ex aequo & bono amice inter eos agi posse. Re-  
spondit Moscus: & si audierit Maximilianum Impera-  
torem in Regem electum: quod minus tamen cum ipso  
quoque gratia ac amicitia sibi essent, non se recusare:



placere sibi, vt maiores legati more maiorum mitterentur: interim ab iniuria & maleficio vtrinque abstineretur. Rex responso hoc accepto, ad domesticas res componendas, maximeque Gedanensium motus sedandos totus conuersus, Thoruniæ conuentum habet: in eodem legatos etiam in Moscouiam pacis tractandæ causa mittendos ex Senatus autoritate decernit. Fuere ij Stanislaus Kriscius Masouia, Nicolaus Sapieha Minscensis Palatini, Theodorus Skuminus Palatij Lituanici quaestor. Quibus rebus perfectis, dissensionibus ac in iisdem perseverantia Gedanensium permotus, armisque ciuitatem persequi coactus, primum copiis illorum vrbe egressi ausis per Ioannem Sborouium aulici militis praefectum, quem ad exercitum cum imperio reliquerat, ad Dirfauiam fusis, ad urbem castra promouet. Quo tempore Moscus occupandæ Liuoniæ tum maxime oportunitatem se nactum ratus, ad vim atque arma astum adiungit. Regebatur Liuonia sub nomine administratoris à Ioanne Chodkeuicio: in praesidiis pauci Poloni, plerique Lituanici nominis praefecti erant. à quibus immoderatus indigenæ habitus, simulque non satis in illis praesidij contra potentiam Moscouiticam existimantes, ad res nouas ferè spectabant. Non ignarus harum rerum Moscus miserat in Liuoniam Magnum Holsatiæ Ducem, quem cum iam antè ad se transisset, promissis, ac affinitate deuinctum tenebat. Rumorem de eo tradit, fore, vt si vltro Liuones se dedant, ad exemplum Ducis in Prussia beneficiario iure Liuoniam regendam ei traderet, vt autoritas ac administratio omnis penes Magnum, penes se nomē collati beneficij ac maiestas Imperij essent. quibus rebus adducti prouinciales, hinc odio seu tædio externi imperij, illinc spe & nimia cupiditate eiusdem linguæ ac nationis magistratus, simul à factiosis quibusdam ac nouarum rerum cupidis impulsis, praesidia ex

arci-

arcibus & opidis ferè omnibus eiciunt: ipsi Vendam, vbi tum Magnus erat, confluunt: nomen insigniaque regia illi circumdant: inque verba eius sacramento se adiungunt. Moscus interim maximo exercitu coacto, in Liuoniam nullo impediante, praesidiis omnibus pulsis, ac plerisque arcibus à Magno occupatis penetrat: acceptisque in deditioem Marienhausio, Rosittenio, Ludsenio, Duneburgio, Kokenhausio, Ascherotum usque sine maleficio, vt initio rerum gerendarum clementiæ fama colligeretur, progreditur. Confluxerat Ascherotum magnus vtriusque sexus, ac omnis conditionis hominum, maxime autem matronarum ac virginum, numerus: erat ibidem Landmarschalcus, vir ætate, & summis olim in prouincia ea gestis honoribus venerabilis. Moscus omnibus, qui arma ferrent, promiscuè trucidatis, imbellem sexum Tartaris constuprandum obiicit. Inde Vendam recta proficiscitur: qui ibi erant fama tantæ immanitatis perterriti portas clausuram. Egressus pro illis deprecator Magnus, composito ad humilitatem habitu, ac genibus illius supplex in genua prouolutus adrepes, conuicio ac verberibus ab ipso Duce in os ingestis excipitur. Cum tantum abesse ab eo intelligerent, vt Magni autoritate salui esse possent, vt ne ipse quidem periculo vacaret, hostili fraude circumuentos se videntes, ira, metu & desperatione incensi, puluerem tormētarium fundamentis subdunt; quo succenso magna vtriusque sexus, omnisque ætatis & conditionis hominum multitudo, ac flos ferè eius, quæ reliqua adhuc erat nobilitatis Liuonicæ, absumptus fuit. Accepta ita in potestatem Venda ac Rumburgo, quod Vendæ imminet, eodem tempore per deditioem positus iam vniuersam Liuoniam, Reualia & Riga, paucisque circa eas castris exceptis, in potestate habebat. Per nauiam siquidem post discessum Henrici interregni eo tempore interceperat: Veissensteinium nobile castellum opere



opere ac natura munitissimum de Suecis: Naruam verò Derpatum, Felinum, ac Marienburgum aliáque nonnulla iam multo ante partim de Episcopo Derpatensi, partim de Marianis Liuonicis ceperat; ab iisq; primum initiis profectus, cum continuas deinde impressiones in prouinciam faceret, vt in Sigismundi Aug: ac regum Polonię fidem ac ditionem prouinciales tum se conferrēt, plurimis detrimentis eos adegerat. Eaq; res, cum ad superiores controuersias, quas de Russię locis quibusdam cum Magnis Ducibus Lituanię habebat, accessisset, perpetua deinde inter ipsum ac Reges Polonię belli causa fuit: quod aliquando quidem per inducias positum, vt plurimum tamen varia fortuna, tam in Liuonia, quam Lituania gestum, in hunc vsq; Regem transmissum fuerat. Cæterum Moscus abducto secum Alexandro Polubenscio Chodkeuicij legato, cæterisq; præfectis, in Moscouiam se recepit. Ex itinere literas ad Regem dat: quibus vt á Liuonia omninò abstineat, Regi præscribit. iisdem ad Prussum quendam Augusti Cæsaris fratrem, nulli ante hac cognitum, qui Koinicij & Marienburgi quondam, & in reliqua Prussia late imperitasset, genus suum referebat, quo ad ipsos Prussię fines ius Imperij extenderet. Legati, qui ad tractandas pacis condiciones mittebantur, iter cœptum nihilominus prosequerentur: nouis in itinere mandatis acceptis; vt de iniuriis induciarum ostentatione factis quererentur: satisfactionemque postularent. Dum ad Gedanum Rex castra facit, exercitum in Liuonia Lituaniq; per ostentatam pacem, maxime autem propter difficultates ærarij, quæ initia regni eius exceperant, nullum parauerat: sub ingruentis tamen hostis famam, nobilitatem Lituaniçã literis euocauerat, militareq; per ducatum eum imperium Nicolao Radiuilo Palatino Vilnensi, Gregorio Chodkeuicio qui antè illi præfuerat defuncto, tradiderat.

rat. Hic non exigua cum voluntarij militis manu, Seelburgum peruenerat. Interim verò & Gedanenses ad humiliores æquioresq; condiciones multis malis victi, & maiora timentes descendere cœperant: cumq; electores duo, alijq; Germaniæ Principes quidam suas pro illis preces per legatos interponerent, recepit Rex in fidẽ ciuitatem; tum verò ad bellum Moscouiticum, quod iam multò antè animo agitarat, totum se conuertit. Ad quod suscipiendum, secundum acceptas iniurias, ac Liuonię recuperationem multæ causæ illum hortabantur: quarum hæc vel iustissima, quòd egregio aliquo facinore, non modò de sui regni hominibus, verum tot aliis, quibus Imperium Moscouiticum summa cum immanitate coniunctum, vel formidolosum erat, vel graue, bene mereri; eamq; ad posteros nominis sui famam propagare studebat, ex qua omnes non modò Regem, sed dignum etiam regno fuisse cognoscerent. Præterea verò ad maiores res, quas cogitandas susceperat, & de quibus misso in urbem Paulo Saionskouio cū Gregorio XIII. Summo Pontifice communicarat, si prius Mosci potentiam fregisset, aditum se habiturum sperabat. Hoc animi proposito, in mensem Ianuarium Varfauiam comitia edixit. Agebatur autem tum annus septuagesimus septimus, supra Millesimum Quingentesimum. Rediit interim in potestatem Duneburgum à Borissio Saua, ac Vilhelmo Platero receptum. Hi in omnes occasiones intenti, cum cōmeatus inopia laborare præsidarium militem animaduenterent, per speciem officij ac comitatus militaris esculentorum, ac poculentorum nonnihil, ac in his vini cremati, quod inopia veri maximo apud Moscos in honore est, vas ei miserant: de quo cum ad ebrietatem Mosci bibissent, illi, qui id futurum cogitarent, noctu scalis admotis, in vallum, quo solo castrum cinctum est, & in ipsum castrum euadunt: Moscos



feos ex fomno & mero vix se colligentes deturbant: castro potiuntur. Non multo inde tempore interiecto, Vēda etiam huiusmodi ratione recuperata fuit. Erat sub Matthia Dembinio ex rusticis Lotfinis fabrilis artis peritus quidam, qui sororem Vendæ in Moscorum potestate habebat; per cuius visendæ speciem & rusticorum commerciorum libertatem cum sepius Vendam venisset, oportunitatem nactus, ceram clauibus opidi impreferat, adq; eiusdem exemplum alias parauerat. rem ita instructam ad Dembinium detulit. Cumq; is die constituto, quem festum Mosci agebant, sub opidi portas cum Ioanne Buringio, ac tumultuaria militum manu accessisset, ab vna parte scalas Buringio admouente, ac à Lotfinis ipsis, qui Vendæ erant, concursu facto, reliquos portis reclusis in opidum immisit. Dum Varfauiam ad comitia Rex contendit, nuncium in itinere accepit, ab iis rebus, quas tum agitabat, alienum. Limes regni Polonici & magni Ducatus Lituanici magna ex parte Borystenes est; qui in Moscouia ortus modico in occidentem flexu, in meridiem deinde & Pontum Euxinum magnam aquarum vim trahens fertur: superior fluminis pars, ad Lituaniam pertinet: ad inferiorem diuersarum gentium confinia concurrunt: præter Moscos & Polonicæ ditionis Russos, nonnullæ Turcicæ præfecturæ attingunt: non longo etiam interuallo Valachi ei iminent. In hac tot nationum nec fatis pacatarum coluuiæ, non potest adhuc quamuis à tot seculis pax consistere. Itaq; immensa ibi camporum spacia, multi agri inculti, ac deserti ob latrociniâ vel metum iacent. Confluere huc ad prædas ex hostico agendas solent; cum ex aliis gentibus, tum Polonis quoq; & Lituanis, vt quisque est egentissimus, vel rerum capitalium damnatus, quosq; vel fortuna eorum, vel leges in patria esse non sinunt. superioribus tamen temporibus, cum publicè bellum

bellum non esset, etiam ex primaria iuuentute quidam loca ea petebant, odio quietis, ac ne situ, ac ocio torperent, virtutis exercendæ causa. Magnam partem in aquis ac flumine piscatu ac latrociniis viuunt: hostemq; vt ex quoque plurimum prædæ sperant, ducentes, barbaris tamen, vt maiori inter eos Christianorum numero, ac Tartaris præsertim infestiores sunt, magisq; Poloniae regibus operam nauant. quòd infimam Poloniae partem, quæ ad flumen pertinet, tenent, à loco Nisouij appellantur: interq; reliquos Kosakkos: ita enim communi nomine vocantur omnes tam equites, quam pedites, qui ad latrociniâ in finibus exercenda, incurfionibusq; hostiles ditiones vexandas priuato instituto, ac voluntaria militia cocunt: hi & numero & virtute plurimum ferè valent. Inter hos cum vixisset aliquandiu Ioannes Podkoua, natione Valachus obscuro alioquin loco natus; sed corporis viribus præstans, & qui soleis equorum ferreis manu dirumpendis nomē inuenisset; partim vitæ ac studiorum similitudine, partim promissis facile homines ex præda viuentes ad inuadendam vnâ secum Valachiam, imperiumq; eius sibi tradendum adduxit. Petrum Palatinum Valachiae nihil tale expectantem occupant, & prius sede Imperij exuunt, quam ille vlla arma imminere sibi suspicari potuisset. Quod cum Rex intellexisset, & præterquam, quòd sine auctoritate sua alieni fines bello tentati essent; Petrum, cuius dignitati fauebat, restitutum vellet, cum per Poloniam, tum in Transiluaniam ad fratrem Christophorū principem, vt auxilio suo Petrum iuaret, literas misit. qui cum alas aliquot equitum & peditum cohortes Stephano Battoreo Andreae fratris filio duce auxilio ei misisset; Podkoua Nimirouam Polonicum opidum recipere se coactus in Nicolai Sienuij Castellani Kamenecensis, qui finitimæ in Russia militiæ præerat, potestatem



statem venit : ab eoq. ad Regem missus fuit. Postquam ad comitia ventum fuit, primo die soleñi sacro peracto, altero de rep : sigillatim de Mosci & Tartari iniuriis ad ordines Rex fert : bellumq. ne cum his, aut cum vtro horum velint, rogat. Cum Mosco bellum iustum, cum Tartaro in præsens dilatum. Hic sub discessum Regis Henrici, sollicita ac in omnia alia intenta repub: fines incurfarat, populationibusq; ac rapinis, omniq; immanitatis genere vexarat : obsidionis Gedanensis tempore magna manu facta prædas egerat : illis ipsis comitiorū diebus, fama nuptiarum, quas Constantinus Ostrogiaæ Dux Palatinus Kiouiensis, propinquæ suæ faciebat, exitus, in Voliniam excurrerat : Ducemq; Ostrogiaæ obsederat. Pacato tumultu Gedanensi, exercitum, quem sub Gedano habuerat, in Russiam Rex ad fines tuendos miserat; iamq; aliquot turmæ in Voliniam peruenerant. quarum imperium cum de Tartarorum excursionem rumor interim allatus esset, Joanni Sbarasso Palatino Braslauensi, extra ordinem tradiderat. Ex iis quidam non longè Torcino in agmen hostium, vt aduentu exercitus nondum cognito, incuriosius prædas agentium inciderant, prælioq; subito contracto superiores discesserant. vnde de appropinquantibus copiis certior Tartarus factus, cum delectos ab exercitu contra Sbarassum misisset, qui ex instituto eorum, quid virium, ac animi hostis haberet, explorarent: liq; ad Ciaflauiam in nostros incurrisserat; fortiter impetu eorum à nostris excepto, mox se receperant; Tartarusq; pactus inter cætera à Duce, vt de amouendis à finibus Nisouiiis apud Regem laboraret, quorum latrocinia solam bello causam obtendebat, recesserat. in præsens tamen hæc dissimulari placuit. Ex hoste enim inope & vago quemnam magnopere fructum expectari? Cum arma potius Turcica ad ipsius iniurias prouocarentur: qui solum in quo insiste-

insisterent, suum: ipsos fiduciaros possessores esse diceret. Ex Mosco quò maior eius potentia fama, eò maiorem gloriam in præsens, nomen ad posteros parari: vrbibus ac opibus florentissimam olim prouinciam Liouoniam, & cum aliis oportunitatibus; tum maris commodis affluentem victoria præmium peti. Ita contra Moscum susceptum bellum, simulq; vt in hostico exercitus haberetur, scitum, priori intra fines continendi militis, ac propulsandi hostis ratione domesticis incommodis, ac superioris ætatis exemplis refutata. Proxima huic cura de pecuniis fuit. Delecti fuerunt è Senatu primores, qui quanto in bellū milite, quanto in militem stipendio opus esset, dispicerent. scitum tributū in singula iugera floreni vnus: cereuifiale item in opidis & vrbibus, quo in singulas tonnas duo de vigesima cuiusque precij pars exigeretur. Maius id fuit, quàm vllum ante hac quisquam meminisset: consensere tamen omnes præterquam Krakouiensis, Sandomiriensis, & Siradiensis Palatinatum legati; quòd nulla eius tributis sciscendi mandata se à suis habere dicerent. Noluerat nobilitas vel bellum vel tributum sciscere; nisi de iudiciis simul, quæ iam Sigismundi Augusti temporibus postulare cœperat, in interregnis autem ipsa sibi sanxerat, perfecisset. Antiquitus à iudiciis municipalibus ad conuentus Palatinatum, ad quos quodque municipium pertineret, inde ad Regem in comitia prouocatio erat. Cum à Sigismundo Augusto propter tenuiorem valetudinem infrequentius iudicia haberentur, vt ex suo corpore constituere sibi iudices liceret, nobilitas petierat: Restitit Augustus, dum vixit. vnde illa à Rege id impetrandi spe deiecta, tempore interregni priusquam in Regem Henricum eligeret, inter alias hanc quoq. de translatione iudiciorum conditionem ei tulerat, isq. acceperat. Post discessum igitur Henrici, nobilitas per singulos



gulos Palatinatus, ut cuique; maximè expedire visum fuerat, ex suo ordine, qui causas appellationis iudicarent delegerat. qua ex re cum, quod euenire necesse erat, magnam omnium rerum perturbationem consequi Rex animaduerneret, in causa minime amplius sibi integra, pro re nata optimum ratus, si ad vnam formulam omnia reuocaret, sanxit hic, ut non per singulos Palatinatus iudicia haberentur; sed in singulis Palatinatibus maioribus bini, minoribus quibusdam singuli è nobilitate quotannis delecti primùm à Martini vsq; ad Pascatos Poloniae maioris nobilitati Petricouiae: minoris deinde à Pascatos vsq; ad messem Lublini ius dicerent; itaq; omnia priuatarum rerum iudicia penes nobilitatem deinceps essent; publica, iuris item Regij atq; fisci iudicia, in eo quo antea statu fuerant, penes Reges manerent. quemadmodum & earum terrarum, quae suis legibus, ac diuerso à cæteris iure vterentur. Moram huic rei nonnullam afferebat, quod nobilitas à munere iudicandi senatorium ordinem exclusum volebat: hi contra tenderent, iniquum esse, dignitatem suam, quae commodo sibi esse debebat in iniuriam suam verti; & qui alios in nobilitate, honore anteirent, à communi nobilitatis corpore in re publici iuris, & ad omnes pertinente seiungi. obtentum tandem, ut tam ex Senatoribus, quam reliqua nobilitate, pro arbitrio nobilitatis rebus iudicandis praeficerentur. Inter Regem quoq; & nobilitatem controuersiae nonnihil fuit, quòd nobilitas regias quoq; vrbes rebus à se iudicatis teneri vellet, superioribus etiam temporibus quasdam causas earum iudicasset. remisit nobilitas: inuentaq; ratio fuit, ut quia iam causas aliquas huiusmodi iudicasset, easdem in iudicium vocatas denuo in iisdem comitiis Rex cognosceret. Cumq; magistratus quoq; ac praefectos regios ad iurisdictionem suam pertinere nobilitas vellet, quòd

quod cum ij fere res iudicatas exequerentur; frustra sibi iudicia tribui diceret, sine vlla in eos, qui res à se iudicatas exequerentur, iurisdictione. assensit Rex, ut quatenus rerum iudicatarum executio à magistratibus cæterisq; officiis peteretur, authoritati iudicum parerent. supererat certamen inter ecclesiasticum & ciuilem ordinem: cum hic eodem, quo reliquam nobilitatem, ecclesiasticos iure vti vellet: illi iudicia hæc nobilitatis, quæ cum diuersæ religionis hominibus communicari intelligebant, multis nominibus suspecta sibi esse, obligariq; se illis nolle confirmarent. Ostendit his Ioannes Samoscius Cancellarius, non maius periculum eos suscipere, si in iurisdictionem consentiant, quam si cum obtemperare ei nolint, pœnis deserti vadimonij, & contumaciæ coërceri se patiantur: quod in Palatinatum iudiciis eò vsq; factum antea fuerat, ut præter alios Archiepiscopus in maiorem fere centum quinquaginta millium condemnaretur: Addidit consilium, ut quoties ecclesiastica res in iudicium veniret, ad sex ex nobilitate ecclesiastici ordinis totidem, qui pari authoritate de ea cognoscerent, adiungerentur. quorum si pares sententiæ extitissent, ad Regem in comitia ampliaretur. Res per aliquot dies ducta, eum tandem ad modum composita fuit. Agitatum in hisce comitiis & de proscriptionibus fuit. Moribus gentis Polonicae, qui creditarum cæterarumque priuatarum rerum condemnantur, iis si sententiæ iudicis non pareant, multa dicitur: quæ si spreta fuerit, priori triplo maior dicitur: si ne tum quidem obtemperatur, manu militari in bona missio decernitur; contra quam si quis se opponat, à praefectis proscribitur. Quod olim accerrimum contra decoctores telum fuerat, luxuria temporum, per eamque multitudo obæeratorum labefactauerat. itaque vulgo contemnebatur, resq; magis multorum sermonibus ia-



ctata fuit, quam noua remedia vlla ei allata. Auditis deinde externorum principum legatis Georgius Fridericus Marchio Brandenburgensis ad valetudinarij agnati sui Alberti Friderici, Alberti Prussiae Ducis filij curam admissus fuit. inuestitura, quam vocant accepta, solenne iuramentum Regi praestitit. Aduere ei in caerimoniis iis Saxonie Electoris, & Wirtembergici principum legati. Brandenburgensis Electoris legati cum principis sui nomine tanquam ad simultaneam inuestituram ius pertinentis vexillum contingerent, nobilitatis nuncij contra protestati, quod primis illis inter D. Sigismundum & gentem Brandenburgicam conuentionibus ea Marchionum Brandenburgensium stirps feudo comprehensa non esset, quae postea priuata auctoritate & ordinibus insciis acta essent, rata se non habere ostendebant. Aderant & Pomeraniae Ducum legati, principumque suorum nomine in Bithouiensis Leoburgensemque tractum ius maiestatemque regni agnoscebant, literasque inuestiturae accipiebant. Legati interea, quos ad Moscum missos supra demonstraui in Moscouiam peruenerant, a quo Mosco suo ipsius ingenio feroci, tum ob rem in Liuonia prospere gestam multo etiam superbiore, contumeliis ludibrioque excepti indignissime habebantur: multa in nomen Polonicum & Lituanicum contumeliose ab eo dicta factaque fuere: cumque ex instituto vtriusque gentis laetitia vtrinque legatis, qui missi fuerint, prebeantur: emere vitum, nec moris sit, nec si velint, in Moscouia possint: non nisi sordida ac vilissima quaeque cibaria per summam indignitatem iis ministrari iussit. In colloquiis deinde cum legatis non nisi de induciis agendi mandata se habere significassent, trium annorum inducias iis dat: literas autem quas legati obsignare debebant, sine vlla conditione pure perscribi iubet: alias deinde, quas ipse legatis traderet, sub signo suo subiicit: in iis haec conditiones adie-

cerat

cerat; vt vniuersa Liuonia vna cum Riga & Churlandia, quae in potestate Regis adhuc erant, & quidquid usque ad fines Prussiae pertineret, Rex sibi cederet: Liuonem nullum praesidium suum implorantem, multo minus ciuitatem vllam reciperet, vllaue ope auxilio suo iuaret. Haec cum ex more iureiurando placita confirmare deberet, a motis iis, in quas legati ante iurauerant, solas profert: iureiurandoque in eas se obstringit: atque ita nullo amplius de his tractandi loco relicto, ex Moscouia abire legatos iubet. nouisque eodem tempore in Liuoniam copiis missis acerrime Vendam oppugnat. quae sub exitum comitorum audita omnium animos ad bellum Moscouiticum iam conuersos ira, ac indignatione eo magis accenderunt. Venda tamen a Moscis frustra oppugnata fuit. Nam cum per aliquot dies tormentis vehementer muros verberassent, aliquam etiam partem muri diruissent; Dembinus ob exiguitatem praesidij vrbi metuens, cohortatus suos, vt eam secum ingrederentur, cum tenere non potuisset, quod illi propter inopiam comituum, & non exoluta stipendia minus prompti ad pericula suscipienda essent; & quia magna ex parte equites erant, minus etiam virtutis suae locum in praesidio fore putarent; tandem vt propius saltem secum accederent, si forte excubias & castra hostium turbare possent contendit. quod cum impetrasset, noctu silenti agmine eos ducens, paulo ante lucem sub portis vrbis sistit: ostenditque quod ab hostibus iam videri coepissent, a tanta hostium multitudine facile circumueniri posse: itaque potius vt viros fortes ac militares deceret, urbem ingrederentur, virtuteque sua urbem contra hostem, & vrbe se tuerentur. ita urbem ingressi eidem saluti ac praesidio fuerunt. Muris enim quae diruti ab hostibus erant, magna cura subituario opere noctu expletis, omnibus in locis fortissi-

B 4 me



mè hosti occursum fuit. Itaq̄. vere iam imminente Mosci soluta obsidione, præmissis primùm tormentis discesserunt. quos Alexander Chodkeuicius præfectus Grodnensis, cuius Ioannes Chodkeuicius patruelis vicaria in administranda reliqua Liuonia opera utebatur, quam uis minus commoda valetudine esset, contractis tamen vndiq̄. ad Seeualdum copiis aliquandiu persecutus, adipisci tamen haud potuit. Sub idem ferè tempus Magnus Dux Regis fidem secutus, à Mosco discessit. Adolefcens hic summo genere natus cum Churoniæ & Osi-liæ Episcopatum in Liuonia teneret, perditis quorundam consiliis, ac promissis Mosci & adolescentia adductus, cum per ætatem ipse rebus suis consulere non posset, ad Moscum transferat. Ab eo fratris patruelis filia in matrimonium ei tradita, speq̄. iniecta fore, vt suo beneficio totius Liuoniæ regno potiretur, ad Reualiam obsidendam magno cum exercitu missus fuerat. à qua infecta re discedere coactus, tempore obsidionis Gedanensis iisdem cum promissis in Liuoniam, quemadmodum supra dictum est, remissus fuit. vbi territus crudelitate Mosci, quodque ademptis ei, quæ tenebat in Liuonia castellis ad fines Scythiæ deportare eum in animo haberet, per indicium cognito, cum quanto in periculo versaretur cogitaret: transeundi ab eo consilium cepit: paulatimq̄. è potestate eius se subducens Lempsaliam, indè propius Rigam ac fines regios se recepit: Regemq̄. per Ducem Churlandiæ crebrosq̄. internuncios ac literas, vt in fidem se reciperet sollicitabat. Rex in earum rerum incertitudine, cum & varia de discessu eius iactarentur, vt neq; an fratri eius Regi Daniæ, cæterisue propinquis ipsius consilium id eius probaretur, aut fortunæ eius curæ omninò essent perspectum habere posset, de deditioe nihil quidem tum cum illo constituit: fide tamen publica versari eum in Liuonia se passurum

furum ostendit. Postea profecto in Liuoniam Nicolao Radiuilo Palatino Vilnensi, eidem vt cum Duce Magno, quod in re præsentis è repub: esse perspexisset, ibidem constitueret, permisit. Hic cum in Churlandiam venisset, ad eumq̄. Magnus accessisset, in fidem illum cum omnibus ditionibus eius regio nomine recepit, inq̄. verba regis sacramento adegit. conditiones deditiois hæ fuerunt; vt quas teneret possessiones, eo quo alij beneficiarij principes sua possiderent iure, à Rege ei permitterentur: aut pro illis aliæ non deteriori conditione pro amplitudine generis & familiæ eius aliquo alio in loco darentur. Vbi de euentu legationis Rex certior factus fuit, mittit statim ad Moscum Georgium Haraburdam, qui non aliter induciis iis teneri se velle Mosco renunciaret, quàm si de Liuonia conditionem, quæ nec à legatis accepta esset, remisisset. Moscus retento Haraburda, legationem interea ad Regem, quæ ad rata habenda pacta induciarum, iuramentoq̄; confirmanda eum adduceret, destinat. ac præcipitante iam æstate exercitum alium multò priore validiorem, maioriq̄; apparatu instructum, ad Vendam, quam à nostris interceptam ab eoq̄; postea obsessam supra ostendimus, mittit. Priusquam vltèrius progrediar, pauca hoc loco de principum Moscorum origine, potentia, moribus gentis, totiusq̄; imperij statu præmittere placet. Antiquissima Imperij Russici sedes primùm Nouogardiæ, inde Kiouie, posterioribus verò temporibus priusquam Moscouiam transferretur, Vlodimiriæ etiam fuit: cuius hanc ob causam hodie adhuc titulos Moscouiæ titulis Dux antepōnit. Genus principum ad Varagos annales Russici referunt: gentem vt plerèq̄. prisce, nunc obscuram: sed tamè quam vltra marinam fuisse iisdem annales testètur. Ex ea tres fratres ascitos primò à Nouogardiensibus, qui Slauiam tum fuerint receptos, imperium Nouogardiæ condidisse,



didiſſe, eiſque Ruricum natu maiorem fratrem præfu-  
iſſe, reliquis duobus alias Ruſſiæ partes Bialoieſeren-  
ſem, & Isborienſem obtigiſſe tradunt: Ruricus ex Ol-  
ga Pleſcouienſi Suentolaum deinde filium habuit. Hic  
magno cum exercitu in Bulgariam ad Danubium uſq;  
progreſſus, deuictis Bulgaris & Græcis, quibus tum Bul-  
gari parebant, cum agros & cultum, & copias provin-  
ciæ adamafſet, ſedem imperij in ea ſibi delegit. Iaropol-  
cho filio Kiouiam, alteri Olego Dreulanos adminiſtran-  
dos reliquit; Nouogardiam Vlodimiro Malci cuiuſdã  
Lubkani, ut annales habent, filio ex ancilla Olgæ Ple-  
ſcouienſis ſuſcepto conceſſit. qui cum à Iaropolcho re-  
gno pulſus trans mare fugiſſet, auxiliis maritimis com-  
paratis reuerſus, cum que primæ obiectæ ei fuerant ditio-  
nes, tum Kiouiam deiecto Iaropolcho occupauit, tenuit-  
itq;. Ab hoc omnes deinde principes Ruſſiæ, profecti tra-  
duntur. Nam cum duodecim filios reliquiſſet, diuiſa in-  
ter eos omni Ruſſia imperium ac domicilium imperij Ki-  
ouiam maiori natu Suentopolcho tradidit. Huic ſine li-  
beris mortuo, duo alij fratres Iarolaus, & Iſolaus ordi-  
ne in regno ſucceſſerunt; Poſt eos Vlodimirus Mono-  
machus Vſeulodi Vlodimiræ Ducis filius, cuius hodie  
adhuc magnum apud Ruſſos nomen eſt, ex eadem  
ſtirpe potitus imperio fuit, quod interpellatum qui-  
dem interim ab Vſeulodo Suentolaui ex Olgo nepote,  
& Igoro pronepote qui auitum regnum recuperare  
conatus fuerat, penes Vlodimiri poſteritatem nihilo-  
minus remanſit; ſequentibusque temporibus Andreas  
Dux Suſdalienſis ab eadem Vlodimiri ſtirpe profectus,  
fœdere cum vndecim alijs cognatis Ducibus inito, de-  
iecto Miciflao, qui ex Monomachi poſteris regnum  
Kiouix tenebat, Miciflaum filium ei impoſuit. hic pri-  
mus ſedem imperij Volodimiriam, principatumq; in  
Suſdalienſium domum tranſtulit, quem qui tenebat,  
etſi

etſi imperiũ in reliquos agnatos Duces non habebat;  
magni tamen Ducis nomine utebatur, dignitateque  
ac honore cæteris, qui comiter quaſi maiestatem eius  
colebant, antecedebat. cumq; honor is antea vel ſuc-  
ceſſione, vel reliquorum omnium ſtudijs vni deferre-  
tur, nonnunquam vi ac armis occuparetur; poſtea-  
quam in Tartari poteſtatem conceſſerunt, ab eo peti  
cœpit. Imperij autem Tartarici circa annum ab orbe  
condito VI. M. DCC. XXXII. quemadmodum  
Ruſſi annos numerant, à nato autem Chriſto ducente-  
ſimo vicesimo quarto, ſupra milleſimum in annalibus  
eorum mentio fit. quo Tartari contra Cottianem Du-  
cem Polouſciorum cum exercitu progreſſi, Ruſſiam va-  
ſtarunt. cumq; Cottian Miciflaum Romani filium Du-  
cem Siernouienſem ſeu Kiouienſem: utroq; enim no-  
mine in annalibus appellatur: qui filiam eius in matri-  
monio habebat, & complures alios Ruſſicos Duces in  
auxilium euocaſſet, die xvij. Menſis Iulij ad Kalkam  
magno prælio eos Tartari ſuperârunt: vndecim Ruſſi-  
cos Duces: Heroes, ut annales appellant, equitum for-  
te genus quoddam, ad ſeptuaginta interfecerunt: mul-  
tos captos egerunt. Reuerſi deinde Batti duce tredecimi  
anno poſt quadrageſimo quinto nimirum ſupra VI.  
M. DCC. ſubiugatis primum Roſanenſibus & Vlo-  
dimirienſibus, cæterisq; ferè omnibus Ducibus, vniuer-  
ſam Ruſſiam ſibi ſubiecerunt: & quamuis non raro de-  
inceps quoq; bello cum iis Ruſſi contenderent; tribu-  
tariam tamen ſemper ferè inde habuerunt. Ab eo igi-  
tur tempore magni etiam Duces à Tartaris Ruſſiæ dari  
cœperunt. Dabantur autem ferè quemadmodum oſtẽ-  
dimus è Suſdalienſibus. Moſcorum Ducum, atq; ipſi-  
us adeò ciuitatis æqualis temporum Batti ac vaſtatio-  
nis, quæ ab illo Ruſſiæ illata eſt, memoria in annalibus  
eorum extat. Inter alias enim vrbes Moſcouiam quo-  
que



que à Batti expugnatam, ibidemq; Philippum quendam Palatinum & Vlodium Georgij magni Ducis filium captum à Tartaris tradunt. Anno ab orbe condito XII. S. VI. M. DCCC. Andrea Alexandri filio magno Duce mortuo inter Michaëlem Iaroslai filium Tuerensem, & Georgium Danielis filium Moscouiæ Ducem, de principatu magnoq; Vlodiiriæ Ducatu contentio fuit: quem cum vterq; à Tartaro peteret, Tartarus primò Michaëlem retento penes se Georgio, inde aliquo tempore interiecto xxv. anno supra VI. M. DCCC. Georgium regno confirmavit: indeq; ad hoc vsq; tempus, quamuis aliquando Russi vniuersi Suddalensem iterum dari sibi à Tartaro peterent, perpetuò tamen in Moscouiæ Ducum familia honoris permansit. ex quibus cum proauus huius, qui nunc rerum potitur, Basilius Basilij filius post patrem & patruum Constantinum imperasset, conspiratione à Demetrio Georgij filio cognomento Siemacha Duce Seueriensi, Ioanne Andreae filio Mosaiscense, Borisso Alexandri filio Tuerense Ducibus contra eum facta, regno ab iis exutus, luminibusq; à Georgio Seueriense orbatus fuit: verum à Nouogardiensibus adiutus regnum recuperavit, pacateq; deinde id obtinuit. Successit huic Ioannes filius; qui primus eam ad quam nunc excreuerunt, potentiam fundauit. Ducem Tuerensem, quamuis vxorem ex ea domo haberet, regno pepulit, principatumq; obtinuit; haud multò post & Nouogardia magna per fraudem capta, in seruitutem eam redegit, & alios principatus tentare cœpit; eoque potentia peruenit; vt cæteris ducibus metu concedentibus, nemo qui cupiditati eius resistere auderet, reperiretur. Idem Tartarorum iugum primus excussit, coniugis Sophiæ Græcæ Palæologorum genere, quam mortua Tuerense super induxerat, ingentis spiritus mulieris vocibus impulsus.

pulsus. Haud dissimili deinde ratione filius eius Basilius potentiam, cuius pater fundamenta iecerat, in immensum ferè auxit. Ad ea quæ pater pepererat, Smolenscen. Ducatum maximum, ac quicquid Seueriensi ditionis reliquum erat, adiecit: Kasanos mari & terra tentauit; principes omnes agnatos ditionibus suis exutos, tum Plefcouensem ciuitatem maximam in seruitutem redegit. Successit ei in imperio hic, qui nunc rerum potitur, Ioannes. qui & ipse regnum amplissimum à patre acceptum, fortuna ac industria adiutus multò id fecit amplius. Kasanense & Astrakanense regna à patre summis viribus oppugnata cuniculorum et puluerum maximè; quos cuniculis in vrbiū oppugnationibus subiecerat, nouo ijs temporibus apud illas gentes artificio adiutus, in ditionem redegit: mariq; omni Caspio vnà cum ijs in potestatem accepto, ad Persidem ferè imperium protulit: Liouoniæ maximam partem per dissensiones Liouonum occupauit: Suecos multis sepè cladibus affecit: Polotiam temporibus Sigismundi Augusti cepit; cumq; Selymus Turcarum imperator Tanaim flumen cum Rha flumine maximo, quem Russi Volgam sua lingua hodie appellant coniungere statuisset, vt classe ex Ponto Euxino aduerso Tanai in Rha inuectus, Astrakanum in ostio fluminis Rha, quo in mare Caspium influit, situm, ac per id vniuersum mare Caspium potestatis suæ faceret, Turcæ quoque victi fama ei quæsitæ fuit. Nam cum Selymus à Sigismundo Augusto per Ibraimum Chausium, qui ex nobili Strassorum familia in Polonia natus, à pueritia impietate Turcica imbutus, ac maximis deinde præmijs ob ingenij elegantiam affectus fuerat, per ditiones eius transitum exercitui postulasset, is verò à Sigismundo Augusto negatus ei fuisset, Selymus nihilominus per Tartariam ad perfodiendum spacium Isthmi, quod inter duo hæc flumina angustissimum



simum est, iamq̄. Moscouitico solo continetur, exercitum misit. qui cum per vastissimas solitudines iuisset, Tartaris ipsis inuitis negocium administrantibus, ac antè viarum incommodis attritus Moscici obiectus fuisset, nullo operæ precio perfecto discedere coactus fuit. Ita repente collecta potentia non finitimis modò omnibus, sed remotioribus etiam quibusq̄. nationibus terrori Moscici iam erat; eoq̄. factus in tanta finium, ac rerum gestarum amplitudine processerat, vt omnes alios principes præ se contemneret; nullamq̄. gentem esse existimaret, quæ opibus ac potentia contendere secum posset. Cum ante hac Knesiorum, Ducum scilicet nomine, magni cognomento, quo eos, qui ipsis parebant, præirent addito, vsi essent; Pater huius Basilii repetito ex interpretibus Slauicis sacrarum literarum nomine, primus Ciarium, quod Regem eorum lingua significat, appellari se voluit: eoq̄. à Maximiliano eius nominis primo Imperatore appellatum se iactabat. Ad religionem Christianam à Basilio quodam Archiepiscopo Constantinopolitano nomen Ruscicum perductum, sacrifq̄. Christianorum initiatum ipsorum annales, ac Byzantina etiam historia habet. Ita q̄. vt primo religionis authore Græco, ac frequentibus deinde inter Græcos & Russos per Mæsiam ac Illyrium, quæ à Slauonicis eiusdemque linguæ gentibus tenebantur, tum Kiouiam, quæ per Borystenem cum Ponto Euxino coniungitur, commercijs, cum literas Græcas tum ritus à Romanæ ecclesiæ institutis diuersos magna ex parte retinent; vt non pauca tamen ex illis ipsis cum tempus, tum Metropolitanarum ac aliorum Episcoporum principi suo obsequendi studium deprauarit. Leges quibus vtantur, paucas admodum habent; eamq̄. ferè solam, vt principis voluntatem pro lege obseruent. De eo ita illis persuasum est, Metropolitanis maximè opinio-

nem

nem hanc eorum iuuantibus, per principem tamquam interpretem Deum secum coniungi: ac prout de Deo meriti sint, ita principem vel benignum in se vel asperum esse. Ita q̄. voluntati eius non secus ac diuinæ, seu turpia seu honesta, seu mala, seu bona iubeat omnibus in rebus parendum pro fidei decreto habent: illeq̄. vitæ ac necis omniumq̄. rerum summam in suos potestatem obtinet. Quod vt ad potentiam comparandam conficiendaq̄. bella maximum habet momentum: vnum omnibus rebus summa cum authoritate præesse: omnia imperia solum administrare: eundem & consiliorum dominum, & rerum omnium authorem esse: exiguo temporis spatio copias quàm maximas cogere posse: fortunis ciuium ad potentiam suam stabilendam pro suis vt: & quemadmodum iis rebus maximè authoritas ac opes Moscici creuerunt; ita crudelitas quoque eius ac dominandi asperitas vehementer confirmata est. Ita q̄. cum infinitos penè varijs cædibus sustulit: tum maximè Andream fratrem patruelem, ob nouarum rerum suspiciones quasdam cum liberis omnibus ac vniuersa familia, vna sola filiola quam Duci Magno deinde locauit, relicta exquisitissimis cruciatibus necauit: nobilitatem Nouogardiensem amplissimam, quam fratris rebus studuisse suspicatus fuerat, funditus penè excidit: popularium quacumque incederet sæpè magnam stragem fecit; cum vt turbæ hominum miserorum gratiam ac misericordiam eius implorantes illi sese obtulissent, à satellitibus minutim eos concidi; vel maximo numero sub glaciem, qua magnam partem anni lacus ac flumina consistunt, mergi iuberet. de quo cogitanti eò magis mirum videri necesse est, quomodo quæ à cæteris principibus indulgentia ac obsequio in suos vix parari soleant, in tanta nihilominus immanitate singularis erga cum

C 2

populo-

*Absoluti  
mini esse*



populorum charitas atque incredibilis, quæ eorundem in principes suos est fides, existere possint; ac non modò seditiosè nihil ferè cōtra eum ab iis suscipi, sed & in præfidiis tuendis incredibilem constantiam præstari: paucosq; omninò ab eo transfugere: non raros autem repertos hoc ipso bello, qui vel maximis præmiis propositis fidem tamen erga principem vel cum periculo suo iis anteposuerint. Huius rei cum aliæ non nullæ causæ sunt, tum maximè præter eam, de qua supra dictū est, duplex religionis opinio. Nam & omnes, qui in religione ab iis dissentiunt, etiam eos, qui Romanæ ecclesiæ ritu vtuntur, barbarorum loco habent, ac tamquam pestem aliquam detestantur; nihilq; omninò cum iis commune habere fas ducunt. ex qua existimatione illud quoq; profectum est, vt Princeps quoties externos legatos audit, in pelui aquam admotam habeat, qua manus quasi illorum contagio pollutas subito abluat. Et suæ religionis institutis eandem, quam Deo, principi suo fidem se debere edocti, nō minus vel constantiam eorum laudant, vel relictis corporibus animos in cœlum protinus emigrare, ac cœlesti beatitudine frui prædicant, qui fidem erga principem suum ad extremum vsq; spiritum retinuerint, quàm qui ex discipulis seruatoris nostri in singulari erga illum pietate atque fide ad mortem vsq; perstiterunt. Superstitionem alunt imperio suo principes; dum ad nullas exterarum nationes, nisi si quos in legatione atq; ita quidem mittant, vt singulis legatis singulos custodes ponant, nec cuiquam remoto custode cum aliquo colloqui liceat, quemquam commeari: aut externos etiam promiscuè commercia cum suis agitare patiuntur. Ita fit, vt quasi perpetuis ignorationis tenebris oppressi aliarum gentium humanitate non perspecta nec percepta omninò dulcedine libertatis, præsentia melioribus, cognita du-

biis an-

biis anteponant. Accedit ad hæc metus amorq; ac cura cuiusq; suorum, quæ magnos etiam animos, libertatiq; assuetos facile debilitant. Quos enim exercitibus aut præfidijs præficit, aut vlli omninò muneri adhibet, eorum coniuges, liberos, propinquos, & quæ charissima quisq; habet, obsidum loco semper retinet: in eosque omnia cruciatus exempla edit, si quis illorum ab eo descuerit, aut si qua res non ad nutum, aut voluntatem eius facta sit. De rebus tamen creditis, contractibus, alijsue priuatis rebus pauca quædam apud ipsos iura scripta sunt. Pœnarum tria omninò genera ijs nota sunt. Mortis, cuius infinita fœdaque genera: multarum & fustium; quæ tamen in immensa principis potestate, non minus frequenter, quemadmodum dictum est, pro libitu eius, quàm pro merito plerisque irrogantur: carcerem ad custodiam magis quàm pœnam habent: exilia planè ijs ignota sunt. senatum, cum pro libidine omnia administret, in speciem magis habet. Magnam is partem ex Knesijs constat; quo nomine Duces, vt ostensum est appellant, primæuorum Ducum à Moscouiæ principibus oppressorum posteritatem, aut quos princeps pro cuiusq. meritis, aut sua in quenq. gratia in nomen vel ordinem cum legit. Nobiliores cum alijs insignibus à vulgo distinguuntur, tum quòd patris nomen titulis alijs ad exemplum Principis soli præscribant. magnificum hoc apud illos, eoq; ad æquales, aut inferiores solum vtuntur: ad principem non modò patris nomine vsurpando abstinent, sed ne suum quidem nisi propria linguæ eius enunciatione quodammodo corruptum, quo non modò seruos eius sed quasi homunciones non homines cum illo comparatos se significant, ponunt in exercitu paruum tympanum ad ephippia singuli item suspensum gerunt; quo quoties agmen sisti vsus est, à primo impulso, sonoque

C 3



noq. à proximis excepto & cæteris deinceps tradito, exiguo temporis momento totus exercitus consistit. Metropolitæ senatum non ingreditur: consilio tamen eius quoq; nonnunquam utitur; aut quo maiorem sibi apud populares venerationem conciliet, vti saltem se simulat. Militiam more cæterarum gentium ex equitatu & peditatu compositam habet: equitibus tamen Tartaris Nohaiensibus maximè utitur. Nulli sanè rei magis quàm munitionibus fidit. Itaq; & oportunissimis locis intra lacuum aut fluminum ambitus pleraq; fitas habet; præfidiisq;, apparatu, comœatuq; & omnibus rebus necessariis diligentius ferè quàm quisquam alius princeps eas instruit. Ei rei iam ab eo tempore studere cœpisse videntur, quo humilibus adhuc rebus eorum non multum viribus contra potentiores vicinos poterant: sed locorum vt plurimum oportunitatibus sese tuebantur; iisdemq; intercipiendis crescebant: postea quòd semper, quoties prælio cum vicinis maximeq; Polonis decertassent, inferiores suos discedere animaduertent, nec multum in prælio virtuti suorum credere se posse re ipsa edocti essent, necessariò retinuisse. Castellula ferè omnia, vt in magna lignationum copia ex materia multis ingentibusq; trabibus congestis exstructa apud ipsos sunt: quæ eadem cespite nonnunquam vestire: omnia autem crebris propugnaculis ac turribus distinguere, fossis præterea, quibus natiuæ defunt, manufactis, valloq; ac ceruis circumdare solent. quæ res efficit, vt non solum opus ad speciem inelegans non sit, sed ante hoc bellum, quo pleraq; candentium globorum incendiis à Rege expugnata fuerunt, ad defensionem etiam tutius, maioremq; quàm lapis oportunitatem habere crederetur; quòd tormentorum ictibus facilius & resistat materia, et si quando iis pateat, non tamen, quod in saxo accidere solet, magnam muri stragem secum ferat.

rat. quæ tamen ad Liuoniam pertinent, ex lapide etiam muros habent. Præfidia nobilitati singulis annis pro arbitrio indicit. Ex ea descriptos perq; munitiones distributos non longius anno in vno præsidio continet. Adiungit his pixidarios ex plebe stipendiarium militem. Præfecturæ item annuæ sunt. Præfectos ternos plerunq; designat, primum qui præcipuam curam munitionum gerat; cuiq; nullum omninò in casum extra munitionem egredi, ne dum pernoctare licet: reliquos duos primo custodes ponit. quorum alteri, si id vsus postulet, in eamq. rem mandata à principe habeant, excursiones facere, munitionesq; excedere permissum. Eos sua lingua ad Polonicorum Palatinorum exemplum, quamuis nec perpetuus is honor sit, & vnus saltem castris imperio, eoque inter plures communicato terminetur, Voiuodas tamen quasi belli Duces appellant. Aurum, argentum, cæteraq; metalla naturane an quærendarum rerum earum inscitia illorum iis negarit, non facile affirmarim: vtuntur sanè omnibus hisce importatis. è Perside sericum, vestem pictam, gemmas, vnionesq; habent: cum Germania aliisque remotioribus occidentis oris arma, tormenta, puluerem tormentarium, argentum etiam atq; aurum suis mercibus, pellibus pretiosis, quibus maximè abundant, lino præterea, cera & corio magnam partem permutant. eius negociationis Naruam, postea quàm in potestatem eius peruenerat, posterioribus temporibus sedem Moscus constituerat. Angli etiam Noruegiam, Lappiamq; ac totum quasi septentrionem circumuecti per mare glaciale viam sibi patefecerunt, qua Voloda fluuius ex penitiori Moscouia se effundens, portum D. Nicolai eo in mari efficit. In moribus gentis præter fidem in principem, laborum inediæ cæterorumque incommodorum, quorum est tolerantissima, patientiam, mortisq; ipsius contemptum probes. homines



cæteroquin in libidinem proni sunt, nec fœminarum solum amoribus dediti, quam ob causam & impuberes ferè matrimonia contrahunt, sed & puerorum: ingenio fallaci, adq; dolos ac fraudem praua consuetudine versutissimo: non minùs fortassis ad bonas artes prompto futuro, si qui iis imbuat, extiterit. Rex Varfauia digressus ad Russicas res componendas Leopolim contendit. Antequàm discederet Krakouiensis, Sandomiriensis & Siradiensis Palatinatum, quos in sciscendo tributo à reliquorum omnium consensu se seiunxisse suprà ostendimus, conuentus edixerat. In itinere cognoscit Siradiensem Palatinatum mox assensum: reliquos duos in recusando tributo perstare. Subsistit hanc ob causam Sandomiriæ: eoq; minoris Poloniae senatores omnes euocat. Ex horum sententia Palatinatum eorundem denùo communem conuentum Korcini habet. Assensu hic tandem & ij fuerunt, remittente Rege de tributo cereuisiali, vt vbi duodevigesima à regis, & ecclesiasticis, vicecima quarta à nobilitatis subditis exigeretur. Leopoli Tartaricas legationes Rex audiit: ad eas rogatu Tartari Turcarum Imperator suum legatum adiunxerat. Facta cum Tartaro pax fuit ijs conditionibus, quibus sub prioribus regibus eam habuisset. attulerat literas à principe suo scriptas, in quas pacem postulabat: in ijs de finibus non nihil adiecerat, & de Nisouijs accuratius sibi cauerat. Rex non receptis literis, ijsdem quibus maiores sui legibus eam coluissent, se quoque pacem cum eo obseruaturum, donatiuaq; ab illis darsi solita daturum verbo respondit. Ita per totum Moscouitici belli tempus pax à Tartaro fuit. Ne verò à Nisouijs quoq; per absentiam suam quid turbaretur, exemplo & metu continendos existimans de Podkoua capitis supplicium sumit: Amurathe Turcarum Imperatore vt sibi dederetur, per legatos deposcente. Illud autem

tem vt faceret, eò grauiores causas habere se videbat, quòd Kosakki prioris expeditionis successu nondum ab instituto deiecti, eiusdem Podkouæ minori natu fratre Alexandro in Valachiam reducto Petrum Palatinum denùo non sine proprio periculo deturbârant. Alexander enim cùm viuus in hostium potestatem venisset, palo suffixus: Nisouiorum pars à Turcis intercepta Constantinopolim in catenis missa fuit. Idem tamen Petro quoque tamquam per ignauia ac fœcordiam toties deiecto calamitosum postea fuit. Etenim sublato è medio Mahomete Bassa, qui principem inter purpuratos locum tenuerat, Achmetis, qui in eius locum successit, studio de principatu amotus, inq; eius locum Iancola quidam è Saxonib. Transiluanicis oriundus, sed qui non modò nationem Valachicam, verùm genus etiam principum Valachiae ementitus fuerat, prouinciæ impositus deinde fuit. Compositis hunc in modum reb. Russiæ, Cracouiam Rex proficiscitur. Venit eòdem Moscouitica legatio. eius ætate atq; dignitate princeps in itinere morbo extinctus fuerat. Reliqui, missis obuiam qui exciperent, ex more in urbem atq; hospitium, indè ad Regem deducti, verbum se facturos negarunt, nisi prius Rex aperto capite assurgens de valetudine & statu principis sui percontatus se esset. Rex cùm præter rei indignitatem non committendum sibi arbitraretur, vt ad hostis barbaro fastu elati, & qui tantos iam spiritus atq; arrogantiam sibi sumpsisset, vt vix ferri posset, superbiam obsequio aliquo suo quid adderet: illi verò in sententia perstarent, ac potius infecta re discessuros se confirmarent; permisit vt inauditi in hospitium, indè in Lituaniam lentis agminibus se reciperent. Animaduersum indè fuit, tributum quod in Comitibus Varfauiensibus sancitum fuerat, non modò prædicatione nonnullorum inferius, sed ipsi bello in cuius

vltus



usus ab ordinibus deputatum fuerat, par non fore. Rex quòd nec comitia eo tempore habenda sibi censeret, ne si nihil rerum gessisset, inani belli simulatione pecuniæ quàm maximæ cogendæ rationes quærere à nonnullis iactaretur; nec priuatos nobilitatis conuentus cogendos; ne illud roties præter instituta maiorum usurpari à se nobilitas queri posset; cum iudicia tum à nobilitate obirentur, per eos interim conuentus, quid de tributo illo polliceri sibi posset, necessariò nobilitati proponendum existimabat; quòd non deessent, qui magnitudinem tributi eius in immensum oratione augerent. Indè ad omnes vicinos principes legatos designat; qui & amicorum erga se beneuolentiam magis, firmitusq; sibi adiungerent; vel maleuolorum consilia distinerent. Præcipuè cum Augusto Saxonix ac Ioanne Friderico Brandeburgensi principibus Electoribus consilia belli communicat. Hi indignè ferentes barbara crudelitate tandiu in nomen Germanicum à Mosco sæuiri, ad bellum pro Liuonibus suscipiendum, quibus illi tanto terrarum interuallo ab illis oris disuncti minus adesse possent, amicè eum hortabantur. à Brandeburgensi bellica etiam tormenta quædam dono ei missa fuerunt. Ad Turcam ubi legati venissent, Mahometes prudentissimus trium orientis Imperatorum consiliarius, & in Regem haud malè animatus, cum de instituto Regis intellexisset, fauere se conatibus eius dixit, faustaq; ac felicia ei precari: magnam tamen rem suscipi: magnas vires esse Moscouiticas: neq; secundum suum principem vllum in orbe terrarum potentiorum eo principem se existimare. Dimissis legatis ad domesticarum rerum curam Rex conuersus fuit. Institutis regni non posse prorex creari dicebatur: itaque si quid per suam absentiam in hostico accidisset, cum primoribus è senatu se communicaturum pronunciauit. pacem publicam

cam seuerè sanxit; maximè Kracouix; ne quod alijs temporibus acciderat, inter dissentientes de religione tumultus aliquis oriretur. Edixit si quis in vrbe opido-ue insolentiùs quid fecisset, præsertim si dubitationem iuris cognitio habitura esset, ad suum aduentum in custodia haberetur: cum alias ordinaria iuris publici ratione in recentibus criminibus vis vnà cum præfectis, magistratus vr bani cognoscere, interq; eos si non conueniat, Rex consuli soleat. Dum Kracouix Rex est, nuncius partæ à nostris ad Vendam victoriæ allatus tanquam totius belli omen secum attulit. Obsederant eam denuò, quemadmodum supra demonstrauius, Mosci longè maioribus quàm antea copiis & quatuor præcipuæ authoritatis Palatinis, Petro Tatouo, Basilio Voroncio, Petro Chorossino, Andrea Scholkanouo ad eam missis. Dum per aliquot dies frustra urbem oppugnant, nostris sui colligendi, & cum Succix militie præfecto Georgio Boiie consilia communicandi spatium dederunt. Confluunt Stropam, ubi Buringius tum erat, Andreas Sapieha earum, quæ tum in Liuonia erant, copiarum legatus, Matthias Dembinus; ex Liuonibus præter Buringium, Nicolaus Korffius, Platerus, ac alij nonnulli cum equitum aliquot manu. iis ad Gouiam flumen medio inter Volmariam & Vendam loco Suecicæ copix se adiungunt. Indè digressi hostem instructa acie sub signis ad Vendam expectantem adoriuntur. Cum accerrimè à nostris pugnaretur, Polonis, Lituanis, ac Succis ad vlciscendas hostis iniurias: Liuonibus ad libertatem: omnibus ad laudem & gloriam inter se cohortantibus, hostium equitatus pellitur, Tartaris maximè in fugam effusis. sub noctem Palatini militem ex fuga colligere; castrisq; continere cœperunt: hortari-que vt pro inueterata gentis gloria, & ratione sacramenti militaris extremam potiùs fortunam experirentur.



tur, quàm castra apparatusq; bellicum à principe suo fidei eorum commissum desererent: verum augente periculo ac nocte metum, eademq; pudorem ac flagitium tegente, ob eaq; non patiente se contineri multitudine, Palatini duo Petrus Chorossinus & Andreas Scholkanoſus, qui equitibus præerant, vnà cum equitatu in fugam se eiecerunt: reliqui duo, quibus tormenta commissa fuerant, soli ferè in castris relictis insigniora tormenta bellica amplexi, vt castra & instrumentum militare, fidemq; erga principem suum ad extremum spiritum retenta à se testarentur: itaq; à nostris postridie summo mane castra ac munitiones irrumpentibus inuenti, viui in potestatem cum castris munitionibusq; ac tormentis ad triginta deueniunt. Aliud documentum fidei non minus insigne, qui onerandis tormentis præerant, pixidarij dederunt. Apud Moscos hæc administrandorum tormentorum ratio est. tormenta terra defodiunt, ante ea atq; os adeò tubi iustæ altitudinis fossam ducunt. in hac qui onerandorum curam habent, deliteſcunt: ad os tubi funis aptatur: hoc cum implenda sunt in fossam deprimuntur, cum exoneranda rursum laxantur. Erant tormenta maximè insignia vnum lupi: alterum accipitris: virginum duo: totidem falconum imaginibus atque nomine: quædam præterea Sueco adempta cum eiusdem insignibus. Horum qui administrationi præerant, cum plerisque suis interfectis, cæteris dilapsis nostros tantum non castrorum potitos viderent, cum spe tuendorum tormentorum vitæ simul amore abiecto, collo funibus, quos à summitate tuborum dependere ostendimus, inserto, vltro mortem sibi consciuerant. Insignis ea victoria fuit: hostium multi cæsi, capti non pauci fuerunt, exigua omninò nostrorum iactura. Tormentis, quæ diximus, amissis, iisdem insignibus & nominibus alia & complu-

complura præterea conſlari mox Moscus iussit; ad potentiam suam ostendendam pertinere existimans, nihil à fortuna ademptum sibi videri, quod non breui à facultatibus suis insigni cum accessione expleri posset. sub idem tempus Reualiensis opem ac misericordiam Regis implorantes, vt aliquo numero frumenti se iuua- ret, a Rege petierunt: in maximas angustias tot annorum bello ab hoste redactos: commercijs ferè omnibus exclusos: intra mœnia compulsos ab agricultura longo iam tempore se prohiberi. His centum frumenti onera donat. Priusquam Cracouia Rex discederet de Duce exercitui præficiendo cum senatoribus delibe- rat; qui cum ostenderent, vel in perpetuum munus hoc alicui eum deferre posse, vel extra ordinem vnum aut plura bella mandare; plerisque tamen, vt in id saltem bellum aliquem legeret, placeret, Cracouia Varſauiam discedens Nicolaum Milecium Palatinum Podoliæ, eò ad se euocat. Hic cum paulò ante excessum Sigismundi Augusti Bochdanum in Valachiam reduceret, ac præter opinionem à Valachorum Turcarumque maximis copijs circumuentus fuisset, exercitum magna cum laude incolumem in Poloniam reduxerat, indeq; magnam virtutis & scientiæ rei militaris gloriam sibi pararat. Milecius valetudine, qua tenui vteretur, & alijs quibusdam difficultatibus se excusabat: tandem in eam saltem expeditionem imperium accepit. Itaq; constituto cum eo, quos quotque turmarum præfectos ac centuriones scribi vellet, domum vt se pararet, Rex eum dimisit. Indè Grodnam mouit. maxima autem afficiebatur Rex difficultate, quòd & pro magnitudine suscepti belli pauca omninò pecuniæ ex tributo collectæ adhuc erant, & vt maximè integræ conferrentur, minimè tamen tanto bello pares fore videbat. Iis omnibus rebus quanto potest studio occurrit: pecunias partim mutuo  
D sumit



fumit, partim quas in fisco habebat priuatim suas, exponit. Militem passim per Poloniam scribi iubet: mittit ad fratrem Christophorum Principem Transiluanie, vt Vngarorum veteranorum cohortes aliquot & alas equitum scribat. Christophoro Rosdrascuio & Ernesto Veiero in Germania militis conquirendi negotium dat. Lituanici proceres, cum de difficultatibus ijs cum illis communicaret, prout quisq; opibus maximè valebat, voluntarium militem offerebant; quotq; singuli adducturi essent, edebant. quorum numerus cum ad decem millium ferè accederet, non parum ea re, atq; alacritate Lituanorum recreatus, eò maiori animo ad reliquas res administrandas aggressus fuit: constitutisq; ita pro tempore rebus ijs Vilnam accessit. Palatinus Vilnensis, Nicolaus Radiuilus, cui imperium militare in Lituania à Rege traditum antea fuerat, postea etiam abdicata à Ioanne Chodkeuicio Leopoli administratione Liuoniae, eiusdem prouinciæ cura ad tempus demandata, Christophoro filio pocillatori regio, & aulicæ militiæ per Lituaniam præfecto exercitum, qui in Liuonia fuerat, tradiderat. Is cum ad Derpatum excursionem facta, agrumq; hostium longè lateq; populatus, Kirempesium per excursionem cepisset, euertissetque, sub hoc tempus ad Regem & patrem Vilnam venit. venientem exercitus emerita stipendia flagitans sequutus fuit. Ibidem alia, quæ vsui bello essent, apparare Rex instituit: tormenta bellica ad modum quendam, quem ipse vsu atq; experientia accommodatissimum cognouerat, fundi iussit. Kaunæ pontem fieri imperat, quo in sequentibus expeditionibus vtatur. Is ex singulis nauibus componebatur; quæ deinde tabulatis ita inter se coniungebantur, vt quoties opus esset, separari, curribusq; singulis vnà cum tabulatis impositæ, binis iumentorum iugis non incommodè in quemcunque locum transf-

transferri possent. simul quod neq; copiæ omnes conuenissent, nec frigora, quæ in regione Trionibus exposita eo anno vltra solitum ad Ioannis permanserant, vt nec vllæ herbæ ad id tempus se effunderent, recessissent, Lituanicis causis, quæ in longiorem iam diem prolatae erant, cognoscendis operam dedit. Inde Basilium Lopatinscium cum literis ad Moscum mittit: ijs iustum bellum illi indicit: causas belli hæc denunciat; quòd ostentatione pacis prouinciam Liuoniam bello ac incendio vastasset: legatos suos contumeliosè habitos, ad extremum duplicibus induciarum literis elusisset: eodem tempore nouis in Liuoniam copijs missis Vendam oppugnasset: sua legatione ad priores iniurias nouam contumeliam ac ludibrium adiunxisset. Remisit sub idem tempus Moscus Haraburdam, quem hæctenus retinuerat, nullo alio responso, quàm quod paulò post suum hominem ad Regem missurus esset, qui ijs de rebus ageret. Itaq; sequutus eum mox cum literis quidam fuit. Postulabat hic, vt inducias, quæ antè perscriptæ essent, Rex obseruaret: de Liuonia si quid controuersia superesset, de ea amicè per arbitratore, quos vtrinq; nominassent, secum conueniret. Negabat Rex, quemadmodum iam antè fecerat, posse se huiusmodi inducias vlla ratione admittere. Nam de Liuonia quod adijceretur, amicè de ea inter ipsos disceptari posse, frustra & ridiculè adijci: semel enim receptis iuramentoq; firmatis inducijs, in quib. omni Liuoniæ iure cederet, nihilq; amplius petiturum se eius profiteretur, si postmodum de ea ageret, cui dubium esse posset, contra proprium iuramentum se venturum: & vel eam ipsam ob rem causa cadere debere. Quòd si in Lituania Russiaq; pacem sibi cum Rege esse vellet: in Liuonia armis de iure disceptari: nouam quidem hanc induciarum rationem sibi videri: ac etsi intelligeret temporibus Sigismundi



Augusti atq; interregnum obtrufas aliquando huiusmodi ab eo inducias fuiſſe; ſe tamen cum faciendæ nouæ ſibi ſint non niſi iuſtas facere velle: neminem tam barbarum aut imperitum rerum eſſe, qui non videat, ſi conſtitutis melius rebus ſuis per Liuoniam, in Lituania bellū redintegrare velit, per huiusmodi inducias, quandoq; illi integrum id futurum, quibus de ceſſione Liuoniæ conditionem adieciſſet; qua bello in Liuonia gerendo à Rege violata, nunquam illi belli in Lituania inſtaurandi cauſa deeſſe poſſet. Nuncio hoc dimiſſo Tartari poſtulata cognita fuerunt. Hic ſub idem tempus ad Regem legatos miſerat, quòd bellum contra Moſcum ſuſcipi intellexiſſet, ex foedere, quo Regibus Poloniae operam ſuam contra quosuis hoſtes, vnico Turcarum imperatore excepto nauare tenetur, ab altera parte irruptionem in Moſcouiam facturum ſe oſtendebat: petebat donatiua: Niſouiorum iniurias coërce-ri poſtulabat. Reſponſum huic fuit, quòd operam ſuam contra Moſcum polliceretur, facere eum officium ſuum; donatiuum datum iri: Dantur autem aliquot aureorum millia & certus veſtimentorum numerus: Niſouios colluuiem ex varijs nationibus collectam nec in poteſtate Regis eſſe: atque ex ipſis Tartaris & Turcis non raros ſeſe illis aggregare: datum nihilominus operam iri, quantum eius fieri poſſit, vt iniuriæ illorum prohibeantur. à bello tamen cōtra Moſcum contra quam promiſerat omninò abſuit, alio contra Perſam, quod à Turcarum imperatore tum gerebatur, auocatus. Aderat & Gottardus Churlandiæ & Semigalliæ Dux, confirmationemque feudi ſui & inueſtituram petebat. Eum Rex Diſne ſiſtere ſe iuſſit, interim ad ſenatum ea de re retulit. Exercitus inde vt ſub principiū mensis Iulij Suirum conueniret edixit. Venerat iam Vilnam Vngaricus peditatus Chriſtophori Tranſiluaniae Principis Regis fra-

gis fratris miſſu: eiſdemq; delectus iuſta equitum ala. Polonicum militem Milecius, qui & ipſe ſub idem tempus ad Regem redierat, cum ſegnius à quæſtoribus ac exactoribus expedita re pecuniaria, ob auctora-menta tardiùs accepta moræ nonnihil à milite interponeretur, vt quàmprimùm ad edictum conueniret, acriter vrgebat.

## R. HEIDENSTEINII

SEC. REGII DE BELLO

MOSCOVITICO

*Commentariorum*

## LIBER SECUNDVS.



VILNA PRIDIE CALENDAS Iulij Rex profectus Suirum inde venit. Ibi Lituani equitatus partem vidit; qui cum vniuersus omnibus rebus eſſet ornatiffimus, tum maxime, qui à gente Radiuila, & Ioanne Kiska ſtructore regio adducebatur. Ibidem de ſumma belli conſtituendum ratus, quas potiffimum partes cum exercitu peteret, ad conſilium retulit. Lituani omnes ferè Pleſcouiam per Liuoniam eundem arbitrabantur; quòd & propter vr- bis amplitudinem atq; nomen dignam iudicarent, quæ etiam maximo cum labore, ac periculo peteretur: & quòd minus contra vim munita putaretur: muri vetuſtate neglecti: nihil vt loco tutiffimo ac à metu belli remoto in ea prouiſum, non magno labore ac periculo potiturum ea Regem ſperarent. Rex con-

D 3

tra exi-



trà existimabat. Nam cum vnum id potissimum bello hoc agendum sibi proposuisset, vt Liuoniam ab hoste in libertatem vindicaret; intelligebat, si in terram Liuoniam bellum transtulisset, præterquam quòd in regione crebris vrbibus & castellis munita, eademq; tot annos vastata propter commeatus inopiam ac frequentes obsidiones, difficiliore tardioresq; progressus belli futuri essent, non modò prouinciam, cuius liberandæ causa bellum suscepisset, hosti ac suis denuò vastandam se obiecturum: verum Lituaniam etiam, quæ ad Borystenem pertinet, in ea loca omni vi belli conuersa, præsidio nudatam hostilibus incursionibus interim se expositurum. Alia etiam via per hosticum Plescouiam si iret, contra rationem rei militaris iudicabat, tot hostilibus præsiidiis à tergo relictis per infesta omnia atq; in uia tam longè in hosticum progredi; vbi nec si quid offensum esset, facilem receptum, nec è propinquo subsidium habiturus esset. Polotia oppugnanda vtrunq; consecuturum se præuidebat, vt, cum ea ad Dunam flumen posita esset, proximosq; ad Liuoniam & Lituaniam aditus haberet, & ordinem seriemq; rerum gerendarum secutus vltèrius deinceps in Moscouiam promotis armis ac quasi circumita Liuonia, omni ab ea hoste intercluso, integra potiretur: nec simul à Lituania longius discederet; ac vtriq; tam Liuoniæ quàm Lituaniæ contra excursions hostium præsidio esset. Accedebat huc, quod cum secundum Liuoniæ recuperationem vel maximè animo Rex agitare, vt Dunæ fluminis navigationem, qua sola portus Rigensis continetur: quæque & ad tuendam Liuoniam excludendumque ab ea hostem magnam oportunitatem, & commerciorum negociorumq; exercendorum facultatem insignem habet, Lituaniis Liuonibusq; expediret; id si Polotia potiretur, magna ex parte effecturum se videbat: ab eius præsi-

præsidio maximam partem Dunæ infestari: indè auxilia commeatusq; Kokenhausium aliaq; in Liuoniæ castella summitti: excursions fieri: Vilnam Rigamq; mercatura prohiberi. Quod deniq; nuperrimè ab hoste Polotia capta esset, quò recentior in animis hominum cladis eius memoria obuersaretur, èò ex commutatione rerum præsentiorè lætitiàm, maioremq; gloriam recuperatæ fore. Alij Polotiensem oppugnationem difficiliorem prædicabant, quàm vt initio rerum gerendarum suscipi debere videretur: esse eam & loci natura ac opere munitissimam: commeatu, tormentis, puluere, omniq; bellico apparatu vt arcem finitimam, & quam primos belli impetus excepturam hostis non dubitasset diligentissimè prouisam: Plescouiam nec ad resistendum vires eas habere, & quò à metu belli remotior esset, èò omnia in illa neglectiora. Multum autem in ipsis initiis momenti esse, quibus in vtranuis partem facile homines impellantur: plurimumque ad totius belli opinionem, & futurarum rerum spem pertinere ab initio non offendere. Rex nihil cum existimaret esse quod non virtute superari posset; quò maiores difficultates propositas intelligebat, èò & bene gesta re ad cetera belli persequenda alacriores omnes futuros confidebat: et si quæ incidissent difficultates, longè tamen minoribus iis, omnibus à tergo pacatis, & domesticis opibus propinquis, se occursum. quibus de causis cum prius consilium omittendum non existimaret, intelligeret quæ famam susceptæ expeditionis longè late quæ ad diuersas nationes perlatam; exercitum præterea ex variis gentibus collectum haberet; ac verò non bellum modò, sed causam etiam belli omnibus probatam vellet, edictum, latine prius scriptum, inque Polonicam, Vngaricam & Germanicam linguas translatum, quòd ex iis ferè gentibus exercitus constabat, proponit;



quo Mosci in se iniurias, quibusq; causis permotus bellum aduersus eum susciperet commemorat. quod diuersis in locis typis deinde editum vulgo extat. Præmittere indè aliquem cum parte copiarum placuit, qui ex instituto rei militaris, quò ad reliquus exercitus subsequeretur, hostem compulsus intra muros contineret, viamq; reliquo agmini patefaceret: quòd autem præcipua auctoritas ac vis imperij penes Polonicum Ducem in castris esset: neque dum omnes copiae Polonicae conuenissent, retento ad exercitum Milecio, Raduillum cum filio Christophoro ac Lituanicis copiis quibusdam Polotiam præmisit. cum eodem Gasparem Bekesium cum equitatu Vngarico & cohortibus aliquot ire iussit. Suiro deinde Disnam mouit: ea agminis ratione, vt cum imminerent viæ à dextra Krasna, Susa, Turoulia hostilia præsidia ab ea parte Milecius cum exercitu Polonico: in primo agmine Ioanne Sbarasso ire iusso, tenderet: Rex læua iter faceret. In itinere aliorum Lituanorum procerum Trocensis maximè & Polotiensis Palatinorum, Castellani item Polotiensis, quorundamque priuatorum elegantissimè ornatae copiae Regem affectæ, censæ ab eo fuerunt. Fuerant per aliquot dies continuos profusæ pluuia: eæ tantam grauioris belli instrumenti, ac tormentorum præcipuè ducendorum difficultatem attulerant, vt iumenta quibus in propriis curribus Rex utebatur, remittere necesse haberet, quo eo celerius promouerentur. quæ res initio expeditionis oblata illorum, qui Plescouiam tam longo itinere cundum censuissent, opinionem vel tacitè refutabat. Disne equitem ac militem Polonicum, qui tum ferè omnis conuenerat Milecius elegantissimè in speciem instructum, & in turmas cohortesque distributum sub signis decurrentem Regi ostendit. Equites thorace & galea ferrea tecti, præterq; hastam, acinace, veruto, ac binis sclo-

scloppetis ad ephippia aptis omnes armati erant; ita vt decurrentes non minorem quàm ipsi pedites, quorum propria arma sclopeti sunt, fragorem ederent. Eodem quæ nondum conuenierant, Lituanicæ copiae venerunt: in his Ioannis Chodkeuicij Castellani Vlnensis, qui grauissimo morbo tum tenebatur, quo non multis diebus post extinctus est, nongenti lectissimi equites: Ioannis item Chlebouicij Castellani Minscensis & aliorum. venit sub idem tempus cum Christophoro Rosdraseuio, & Ernesto Veiero Germanus etiam miles; cuius & si publicè scribendi facultatem non habuissent, ac raptim saltem nomina dantes quosdam adduxissent; erant tamen ij & animo omnibus pares: & genere armorum atque vsu rei militaris reliquis non multò inferiores. Erant omninò vniuersæ copiae cum genere & numero hominum, tum exercitatione armorum eæ, vt Milecius pro ratione suscepti belli aptius ferè compositum, meliusque instructum exercitum eum confirmare non dubitaret, quàm quenquàm alium vidisset eorum, in quibus vel imperitandi, vel domi, ac foris parendi stipendia fecisset; ac ab vna aliqua parte velequitatu vel pediatu plerunq; laboratum animaduertisset. Censis copiis Churlandiæ Duci, quem Disnam dilatatum supra ostendimus, possessio Churlandiæ Semigalliæq; Ducatus solenni more confirmata, ipseque in clientelam & fidem receptus fuit. Consulti de eo senatores Lituani, quorum magna pars aderat, & qui ex Polonicis præsentibus erant, omnes vt correctis conditionibus, quæ cum Sigismundo Augusto Rege pro eius temporis ratione non satis commodè tractatæ existimabantur, res finiretur, censebant. In eandem sententiam à maioris Poloniae, Russiae item, Prussiae, ac Masouiae senatoribus absentibus per literas responsum fuerat. Minoris Poloniae senatores plerique, qui tum fortè Lublini iudiciorum cau-



sa conuenerant, quò deo tempore appellationum iudicia, de quibus supra dictum est, prima tum ibi habebantur, in comitia rem differendam censuerant; veriti, ut videbatur, ne in Polonorum senatorum paucitate contra Lituanos iuri in eum Ducatum regni satis caueretur. sed & indignum Regi videbatur, diutius eum ducere, cuius post semel datam fidem nunquam dubium animum: semper eximium studium, obseruantiamque; erga se perspexisset: neque principis hostibus finitimi in illo Liuoniae statu ius, suumque beneficium in suspensio relinquere satis tutum arbitrabatur. Itaque perfecta res iis potissimum conditionibus fuit, ut illo fidem obsequiumque suum Regi pollicente, iusque; iurandum in verba Regis praestante, quo nullius alterius quam Regum Poloniae maiestatem se culturum profiteretur: Rex è contra patrocinium ac tutelam eius contra omnes illi reciperet. de iurisdictione, quam in suos habet, ut ad conuentum Liuoniae, quem si reliquam Liuoniam Rex adiungeret, instituturus in ea esset, prouocatio ab eo esset, cautum fuit. Tendenti ad castra Milecius obuiam misit, qui intra tentorium eius illum deducerent: apud quem aliquantisper dum vocatur, moratus, inde ad tribunal adductus, signis militaribus ac vniuerso exercitu circumfuso, solenne iusiurandum Cancellario Regni in verba ei praecunte Regi praestitit. Hostis interim Plescouiam cum exercitu progressus partem copiarum in Liuoniam praemisit. Hæ Duna flumine ad Kokenhausium, quo ut supra ostendimus, potitus fuerat, raptim transmissio, ac centum quinquaginta circiter Ducis Churlandiae equitibus, qui cis Dunam in statione erant, repentina excursione reiectis; Seelburgenseque; Ducis Churlandiae, ac Birsensi Christophori Radiuili agro vastato properè trans Dunam se receperunt. exercitum qui in Liuonia fuerat, Christophorum Radiuili Vilnam

nam stipendiorum causa secutum supra demonstraui-  
mus. Interim Ioannem Taluossium Castellatum Sa-  
mogitiae, cum iis, quas raptim contrahere poterat, co-  
piis in Liuoniam Rex misit. Philonem Kmitam, qui Or-  
fae praerat, ad Borystenem, ne quid ex ea parte ab ho-  
ste detrimenti acciperetur curare iussit. Iam exercitus  
cum Palatino Vilnensi Polotiam praemissus Dunam pon-  
te Kaunae ex nauibus, ea, qua dictum est, ratione facto  
ad Disnam transmiserat; nihil hoste contra suscipiente,  
quo transitu eum prohiberet; vel quòd ex instituto di-  
sciplinae Moscouiticae sine mandato principis ex praesi-  
dio miles egredi non audeat: vel quòd superiorum tem-  
porum successu elatus, exercitus, qui Suirum conueni-  
re dicebatur, famam contemserat. Duna paulum pro-  
gressum continuæ siluae aliquandiu moratae fuerunt.  
Nam ex quo Polotiam Moscus ceperat, sedecim ferè an-  
norum spatio, quo in potestate eius fuit, eam partem a-  
gri, quæ a Duna flumine atque Disna Polotiam tenden-  
tibus prima occurrit, desertam ac incultam reliquerat;  
vnde frequentes densissimaeque arbores ut in solo fer-  
tili interea temporis enate fuerant. Verum peditatu Vn-  
garico securibus siluas cedere instituite, ac celeriter  
opus perficiente, exiguo temporis spatio difficultates  
eas superauit. Polotia antiquitus suos Duces habuit,  
subque annum à nato Christo DCCCC. LXXX.  
vel ut Russi tempora numerant à condito mundo CC  
CC LXXX VIII S. VI. M. Rochuoldo Duci pa-  
ruit, qui à Vlodimiro magno ob negatam ei in matri-  
monium filiam Rochmedam, ut Moscorum annales ha-  
bent, bello petitus, vitam pariter cum duobus filiis ac  
imperio amisit. Inde in Monarcharum & principum  
gentis Russicae potestatem concessit; quorum extincta  
stirpe ea, quæ in Australi Russia regnabat; Lituanis, ut  
quædam aliae ditiones Russiae cessit. Iagellone apud Li-  
tuanos



tuanos primùm, indè apud Polonos regnante, cum Andreas frater eius Polotiæ dominatum, sub idem ferè tempus, quo Jagello Cracouiæ insignia regni accipiebat, arripuisset, copiis aliquibus missis recepta mox fuit; continueq; indè in fide Regum Poloniæ, magnorum que Ducum Lituaniæ ad annum LXIII. S. clo lo. permanfit. quo à Ioanne Basilij filio Moscouiæ Duce capta expugnataq; fuit. Regio Polotiensis ad centum quinquaginta circiter millia passuum in longitudinem, totidem in latitudinem patens cum vbertate glebæ, tum fluminum atque lacuum copia nulli cedit. Fluios nauigabiles complures habet, præcipuè Dunam; qui in Moscouia non procul à Turopecia ortus Rigensem portum efficit, omniumq; Septentrionis fluminum amænissimus ferè ac pulcherrimus est. secundum eum Dryssam, Vsuiatam, è Moscouia: Disnam, Vlam è Lituania: à Smolensco Casplam in eundem Dunam omnes influentes. Plerorumq; Lituanicorum & Russicorum castellorum is ferè positus est, vt ad ostium aliquod humilioris fluminis, quo cum maiori coniungitur, sita sint. quæ ita sita sunt, quòd maioris fluminis propinquitas pluribus communis est, à minoribus fluminibus ferè omnia nomina indita habent. Hinc Polota non magnus alioquin fluuius arci atque vrbi: vrbs regioni nomen dedit. Antequàm in Mosci potestatem veniret, vna arce atq; vrbe Polotia & castro Ieseriscia tota illa regio continebatur; cæteroquin opidis & pagis non infrequens. Polotiæ opes propter summam oportunitatem Dunæ fluminis eousq; excreuerant, vt Vilnam caput Lituaniæ diuitijs antecederet. Ieseriscia versus Moscouiam in lacu, ex quo fluuius Obola oritur, sita, ab vna sola parte angustissimum aditum, & quo vix expedito iter fit, habet. Postquàm à Mosco occupata fuit, vtrinq; castella aliquot excitata, præsi-

præsidiaq; constituta fuerunt. partim agri fluminisque ac nauigationis vel retinendæ vel turbandæ hosti causa; partim ad excursions, quæ vt in dubia vtrinq; possessione frequentes fiebant, prohibendas. A Rege Sigismundo Augusto Disna ad eiusdem nominis fluuij ac Dunæ confluentem: Voronecium ad flumen Vsaciam: Lepelium in insula lacus, qui à Lepelio fluuiio efficitur, versus Lituaniam conditum fuit. Quoniam autem ad hunc locum ventum est, non alienum videtur, pauca de natura situq; eius narrare. Tendunt per eam Lituaniæ partem duo diuersa flumina: quorum vtrunque nauigabile est; ita inter se coniuncta, vt non plus millium passuum quinq; interuallo distent; eademq; in duo maxima ac longissimè distantia maria exitum habent. Lepel, de quo diximus, in Vlam fluuiū itidem nauigabile exonerans, cum eo in Dunam indeq; ad Rigam in mare Balticum effunditur: alter Beresina in diuersam partem raptus cum Borystene in pontum Euxinum deinde erumpit; ita vt si pacatæ gentes essent, in quarum potestate fluminum horum cursus sunt, in tanta eorum propinquitate, transportandarumq; ex vno in alterum mercium, cōiungendorum deniq; eorundem facultate, Septentrio vniuersusque Occidens facillimè cum Oriente commercijs iungi posset. sed Dunam Mosci antehac: Borystenem ijdem Mosci ac Tartari cæteri; de quibus supra dictum est, infestum nunc faciunt. Cæterum Sigismundus Augustus Vlæ quoque ostium castello munire aggressus, Veneto architecto quodam vnà cum operis ab hostibus interfecto, non sine detrimento deiectus fuerat; cumq; hostis eundem locum munire instituisset, ac Augustus magnis à Radouicio summissis copijs, ac summa vi diu frustra eum oppugnasset, tandem sequenti æstate per Romanum Sangusconem Palatinum Braslauiensem, dum Moscus

E

vetus



vetus præsidium noui inducendi causa deducit, receperat: superiorem verò eius partem Lepeliq; fluminis cum Vla confluentem imposito castello Ciasnicia iam antè communierat. simili ratione Moscus vltra Dunam quinq; castellis exstructis, totius orè eius possessionem sibi firmauerat. Sokolum in via Plefcouienfi in fluminum Dryssæ & Nyssæ penininsula quadam Lituanicis castellis Disnæ & Dryssæ opposuerat. Niscerdam ad lacum cognominem triginta à Sauolocia passuum millibus: Sitnum in Lucensi via ad superiorem Polotæ partem. Kossianum deinde loco ab Obola flumine velut circino circumducto: Vsuatam ad fluuium itidem cognominem ac nauigabilem in Dunam ad Surassum ex aduerso Casplæ fluminis influentem: illud contra Vlam, hanc contra Vitepscium & Surassum excitârat. Cis Dunam Turouliam, ad cognominis amnis caput, quo in Dunam influit. Sussam verò singulari consilio Lituaniam versus in lacu, qui Turouliam emittit, loco munitissimo, aquisque vndique circumdato, agitando iam animo bellum Lituanicum, Vilnamque opinione præcipiens sedem bello futuro posuerat; itaq; natura antè munitissimam opere communierat, omniq; apparatus bellici genere instruxerat, pauca, vt præsidia instructiora eo haberet. His Krasnam superadiunxerat, superiori in loco itidem ad Lituaniam spectante. Kosakki igitur Lituani Francisco Suko duce ad belli suscepti famam in finibus globo facto Krasnam noctu repente scalis admotis adorti præsidio munitionibusq; ac fatis magna commeatus copia vnâ cum castello potiuntur. Ab altera parte Kossianum vltra dunana arx simili euentu repentina excursione Kosakkorum capitur & deletur. Palatinus interim Vilnensis Polotiam cum ijs, quas circa se habebat, copijs peruenerat. quas hostes conspicati subitò copias suas extra mu-

tra munitiones productas sub portis instructas ostendunt; nullaq; iusta pugnandi facultate data intra munitiones se recipiunt. eques tamen pugnandi auidus sub ipsa moenia in eas prouectus vnum atq; alterum hastis transfixit. Eodem tempore Vngari & Lituani Sitnum, via quæ Plefcouiam ducit, subitò Polotia excurrentes, vt re improuisa & repentina eam incendunt. Cùm Polotiam Rex iret, à læuaq; Sokolam castrum hostile haberet, veritus ne maioribus à Plefcouia subsidijs summissis, commeatui ac subuectionibus nostris incommodi aliquid ex eo hostis afferret, an ad id oppugnandum ex itinere diuerteret, cum Milecio deliberabat: verum postea sapè maiorum rerum gerendarum oportunitatem in minutioribus oppugnationibus consumi cogitans; ac ad Polotiam caput prouinciæ properans, celeriter consilium omisit: ternisq; castris, quem admodum Milecius cum expedito equite præcurrens ea designârat, Disna Polotiam peruenit. Dum Polotiam exercitus contendit, Mosci Polonos & Lituanos, quos à multis annis in squalore & compedibus habuerant, cum cruciatu interfectos adq; trabes alligatos secundo Duna terrorem venientibus id allaturum rati, obuiam demittunt. Rex Ioanne Samoscio Cancellario & Gaspare Bekefio solis assumptis, Milecio interim exercitum curante priuato cultu, subsidijsq; contra eruptiones loco oportuno dispositis, urbem circumuectus situm loci cum ijsdem cognoscit; simulq; eodem in loco, à qua potissimum parte oppugnatio instituenda sit, deliberat. Constabat Polotia duabus arcibus, vna in editiori loco posita, eademq; media: altera quam sclop-petariorum sua lingua Mosci appellabant: & opido Sapolotta. A meridie Dunam habet, qui modico versus Occidentem flexu, recta indè Rigam tendit, ad eamque mare influit. Polotta recto è Septentrione cursu



paulum versus Orientem sub arce scloppetariorum, inde rursus in septentrionem declinans, radicesq; collis, in quo superior arx posita est, complexus, eandemq; ab opido separans in meridiem versus paulo infra eum locum cum Duna commiscetur. Media, quam diximus, arx in colle altissimos despectus habente posita, à meridie, ut ostensum est, Duna flumine: à septentrione & ortu Polotta fluuiio opidoq; Sapolotta: ab occidente sole scloppetariorum arce, vndiq; monte, cui imminet prærupto, altissimisq; fossis ac vallo, quouis ferè artificio factis firmioribus continebatur: muros & propugnacula ex aliquot inter se deuinctis validissimorum roborum ordinibus firmissima habebat. scloppetariorum arx inferiori loco occasum versus in colle tamen modicè accliuu posita ab oriente breui ponte cum superiori arce coniungebatur. Opidum cum olim cis Polottam sub colle, quem scloppetariorum postea arce Moscuscus communiuit, fuisset, deletum in oppugnatione ab hoste fuerat. postea cum confirmata iam possessione propter commerciorum usum, quorum loco tam oportuno summa facultas est, restaurare id institueret, quod ab illa parte maximè oportuna oppugnatio ei fuerat, veritus ne inde rursus nostris pateret, trans Polottam fluuium atq; summam arcem in locum inter vtrunq; flumen medium transtulerat: ut positu eius quasi triangulari, vnum latus Duna, alterum versus summam arcem Polotta fluuius, tertium fossæ turreq; tuerentur. Regi dubitandum non videbatur, quin à media eademq; summa ac munitissima arce ordianda oppugnatio esset; propterea, quod quicquid in reliquis oppugnandis laboris ac temporis sumeretur, suprema salua, nec receptu hostibus nec obsidionis ex ea sustinendæ spe defutura nulla de causa sumtum iri appareret: ea verò expugnata occupato loco superiori, eodemq; munito,

acin

ac in quem omnis com meatus apparatusq; bellicus collatus ab hoste esset, opidum quoq; ac alteram scloppetariorum nullo negotio in potestatem peruentura. Accedebat huc, quod ab opido difficiliorem deinde arcis oppugnationem transitus fluminis Polottæ, qui radices collis, in quo arx posita erat, complecteretur, facturus videretur. Bekesius nihilominus opidum Sapolottam, quod secundum Dunam flumen euntibus primo loco occurrerat, prius tentandum censebat; quo expugnato, & si in arcem deinde hostes se reciperent: tamen præterquam quod incommoda obsidionis omnibus in vnum locum compulsis ea res auctura esset; spem præterea illis, nostris laborem minuturam, animosq; addituram: nec difficiliorem multò, quam ab ijs partibus futura esset, ab opido oppugnationem futuram; cum flumen Polotta, quod impeditam eam facturus videretur, omnibus ferè locis vado vix crurum tenuis transfiri posset; atq; erat sanè ea humilitas fluuii id temporis. Regem ut in sententia perstaret, Samoscus cum primis vrgebat; quod cum iterum cognoscendi situs causa solus propius sub eum locum, in quo opidum antea fuerat, & quem Posar illi sua lingua ab incendio opido tanquam bustum vocabant, successisset; longè inde faciliorem ascensum, neque fossarum & collis eam altitudinem, quæ ab alijs partibus erat, esse animaduertat; arcemque scloppetariorum in colle ab imo accliuu ita positam, ut à summitate collis, quæ ad exteriorem partem pertinebat, tanquam gibbus aliquis enatus telorum commodè adijciendorum ijs, qui in arce erant, facultatem præpediret. Dum cum Milecio, & senatoribus reliquis amplius deliberare Rex vult, Germanus miles priuato consilio Polottam transgressus, locum ab opido auersum contra summam ac scloppetariorum arces ad Dunam castris capit.



Veritus hinc Rex, ne ex æmulatione nationum dissidij aliquid oriretur, vt ad opidum, quo loco Bekefius cum Vngaris constiterat, munitiones agerentur, permisit. In dè regiis castris trans Polottam flumen medio inter eum & lacum quendam spatio, infra locum, quem à Germanis occupatum diximus, locus deligitur. eoq; binis castris exercitus à Milecio traducitur. Vniuersorum castrorum totiusq; obsidionis hæc ferè erat facies. secundum flumen à Disna Polotiam euntibus versus opidum Sapolottam ad Dunam flumen primi Vngari confederant, loco ad comneatus excipiendos, cum primis oportuno; quòd inferior fluminis pars pacata erat, omnesq; subuectiones in eum ferè locum concurrerent, tum Duna etiam ponte nota ratione ex nauibus composito ibidem stratus esset. Infra Vngaros cis Polottam Nicolaus Radiuilus Palatinus Vilnensis cum Christophoro filio, subq; eorum imperio stipendiariæ copię Lituanicę, indè diuersæ voluntariorum, quicquid reliqui erat spatij Polottam vsq; diuersis castris compleuerant. Ultra Polottam inter flumen & lacum quendam, quemadmodum ostendimus, regia castra erant. In his senatores ac equites Poloni magna ex parte erant: præter hos Nicolaus Christophorus Radiuilus Marschalcus palatij Lituanici, quiq; tum per absentiam Marschalci Polonici comitatus vniuerso regio præerat. Medium castrorum locum principia senatorumq; tentoria amplexa erāt; quorum vt quisque potestate & honore antecederet, ita locum Regi proximum ceperat. Hęc cum terni tentoriorum ordines ambientes binorum vicorum paribus inter se spatiis distantium seriem efficerent: bini etiam ad eosdem aditus portæque relictæ fuerant. totidem castrorum portæ erant excubiis stationibusque militum firmatæ. Exteriorem castrorum partem currus circumiecti, catenisque ferreis inter se deuincti more gentis Polonicæ

munie-

muniebant. ad quos in maioris impetus aut periculi expectatione fossam etiam ducere, egestumque aggerem curribus obicere, atq; ita munitissimi opidi faciem castris circumdare solent. Supra regia castra Germani loco, quo antè ostendimus, confederant. Ad Polotiam exercitu iam existente à Marchione Georgio Friderico in Prussia duce quingenti lectissimi pedites superuenere, qui quemadmodum ipsi voluerant, inter Germanos loco iis assignato, iisdem cum Germanis castris recepti fuerunt. In eadem causa alij quoq; fuerunt, è Podolia aliisq; extremis regni finibus; qui cum propter locorum longinquitatem maturius adesse non potuissent, ad Polotiam reliquum exercitum assecuti sunt; in his è voluntariis, Constantinus Constantini Ostrogia Ducis filius cum lecta equitum ala; ac alij quidam. Bekefius interim Sapolottam opidum oppugnare cœperat, actis que ad mœnia vineis, tormentis iam quatiebat. Mosci desperata opidi defensione, & quòd in omnes casus hæc à principe suo, qui in præsidiis sunt, mandata accipiunt, omnibus rebus exportatis opidum incendunt, ac in summam arcem se recipiunt. Proferuntur munitiones ad arcem flumenq; Polottam, quod radices montis, in quo arx posita est, ambire supra ostendimus, magna Vngari militis virtute; vt est summi genus laboris ac tolerantia; cum per partem opidi opus institueretur, ac sæpè in sepulchra atq; cloacas, aliaq; fœdissima que que incurreret. Ita instituta oppugnatio erat, vt Vngari ad dextram ab ea parte, qua opidum fuerat; modico ab his interuallo Poloni: indè Litvani pedites, quos Stephanus Sbarassus Palatinus, Eustachius Volouicius Castellanus Trocenses ac alij quidam voluntarij adduxerant, oppugnarent. medio inter hos loco inferius aliquantò non longè à flumine Polotta ducenti lectissimi Vngari pedites à Samoscio scripti excubabant, eo ferè

E 4 positu,



positu, vt reliquo Polonico & Vngarico peditatu supra eos duobus locis inter se oppositis collocato, ducenti hi tanquam summum angulum trianguli tenere viderentur. ab altera arcis parte trans Polottam, qua sclopetariorum arcu coniungitur, Germani, quos eo loco confedisse dictum est, è suis castris munitiones versus arcem agebant. Bekefius primò tormentis quater arcem instituit; quod vbi minus succederet, propterea, quia cum ex materia constarent, potius perforarentur aliquibus in locis muri, quàm sternerentur; candentes globos iacere cœpit. Genus id est incendiorum in superiorum temporum dissensionibus ciuilibus Vngariæ à Rege ipso institutum: cum ea, quæ ab aliis ex diuersis incendiorum nutrimentis excogitata essent, magis ad speciem & terrorem comparata, quàm magnam ad inflammandum vim habere videret. Globi igni excocti dum planè eum imbiberint, ita in tormenta mittuntur, vt inter eos & puluerem tormentarium, iustum spatium arena aut cinere primùm, inde recenti ac humida herba compleatur, ne puluis ignem ex globis rapere, ab iisq; inflammari possit: itaq; in aduersos muros eiciuntur. quæ res quòd globi lignis impacti diutiùs lateant, eandemq; ob causam non tam faciliè, atq; flamma opprimi possint, magnum ad incendia excitanda usum habet: eaq; ratione Pharam Gedanensium Rex exusserat. Hic tamen hac etiam minùs proficiebatur, propterea quòd cum altiùs aliquantò iacti essent, eadem ratione muros tantùm peruaderent: cum in inferiorem locum ad fundamenta murorum, vt hæere possent, adigerentur, in cliuum ferè, qui arcem sustinebat, quiq; ita prominebat, vt aduersus locum, in quo tormenta regia erant, & si & ipse non humilis, inferior illo tamen esset, impingebant, soloque accipiebantur. Simul Zephyro vento per complures dies flante continui ac effusissimi

imbres

imbres erant. ex his Polotta amnis tantum aquarum conceperat, vt qui antea pedibus non incommodè transiretur, tum ab equite sine periculo, transmitti non posset: pontes autem omnes ferè, qui inter bina castra erant, interromperet. Vnus tamen ab initio statim, postquam accessum ad Polotiam fuisset, à Ioanne Bornemissa ad molendinum quoddam exustum sub publicis aliquot sub aqua repertis, trabibusq; aliis super eas iniectis, inter munitiones ipsas ac propugnaculum, quòd oppugnabatur subitario opere factus perstiterat. Cum que per vnum pontem non satis commodè miles ad oppugnationem iturus videretur, Bekefius cymbis aliquot piscatoriis depressis nouum in eo pontem effecit. Verùm eo etiam paulò post continuis tormentorum iectibus in eum directis ab hostibusmerso, vnus relinquebatur is, de quo dictum est. quem & pars aliqua molendini ab incendio relicta à tormentis hostilibus tutabatur. Bekefius igitur cum et tormenta & globos candentes frustra admoueri animaduerneret, vt quisq; maximè impiger in proximo constiterat, præmiis maximis propositis, vt facibus ignem muris subiicerent, hortatur; perq; pontem ac aduersum collem rectà ad arcem mittit: iis ex Polonorum Lituanorumque munitionibus alij mox summittuntur. Occurrebat singulari militum nostrorum virtuti omnibus locis eximium hostium in defendenda arce studium. Inprimis magno incommodo nostros afficiebant ingentis molis trabes in superiore parte muri, cuius latior ambitus, quàm inferioris erat, iam antè in eum casum ab hostibus constitutæ; que leui impulsu in nostros deturbatæ, ac per cliuum prouolutæ magna cum strage, vt quosq; arripuerant, secum ferebant. tantus verò in restinguendis ignibus omnium ardor erat, vt non etate confecti, non mulieres, non pueri, vel laborem vel periculum recusarent; quò minùs &



nus & magna copia aquam aliaq; opprimendæ flammæ suis supportarent, & in succedentes nostros profunderent. cumq; omnibus ex partibus, directis in arcem ac propugnacula tormentis, à nostris peterentur; accidit, quod dignum admiratione visum est, vt non pauci extra muros funibus demitti se paterentur, aquasq; ab aliis subministratas superiori ex loco pēdentes ad restinguendos ignes, qui foris admouebantur, defunderent: iisq; certissimis nostrorum tormentorum ictibus sublatis, non deessent toto illo tempore oppugnationis, qui priorum in contemnendo periculo virtutem imitarentur, inq; locum eorum, qui exanimati fuerant, succederent. Inter hæc pluuia ac tempestates, de quibus dictum est, adeo obsessis erant secundæ, vt vulgus militum carminibus, quibus aliâs gens ea praua superstitione dedita existimatur, motas crederet; quæ & incendia morabantur, itaq; fossas omnes compleuerant, ac solum inundauerant, vt nusquam ferè consistendi locus militi daretur. Desiderati in oppugnatione hac sunt aliquot viri fortes, ac in iis Michaël Vadasius, qui multis in præliis fortiter versatus, ac ob virtutem militi Vngarø præfectus fuerat, dum ad tormenta Polonicarum munitio- num cum Stanislao Penkoslauiø ac aliis præfectis Polonis consilia communicat, globo traiectus fuit. Non leue tamen hostes etiam incommodum acceperunt. cum quoties ad restinguendum incendium conferti vnum in locū concurrissent, tormentis, quemadmodum dictum est, in eum directis, crebræ in illos eiaculationes fierent; ac non globis modò frequentes interimerentur, sed fragmentis etiam lignorum ac trabium, quæ globi secum rapiebant; quæq; maiorem ferè quàm globi ipsi stragem edebant, non pauci opprimerentur. Ad oppugnationis difficultates accedebat summa commeatus & subuectionum angustia; quæ à sola  
ferè

ferè Disna, & ab inferiori parte fluminis sustentabantur. Vilnam enim versus, quæ amplius ducentorum viginti quinque millium passuum spatio indè distat, Postouam vsq; quæ paribus inter Vilnam & Polotiam ab utraq; interuallis sita est, omnia hostis vastarat. tum verò propterea etiam minus commodè subuechi indè poterat, quòd Susa in potestate hostium adhuc erat; cuius in præsidio qui erant, superioribus diebus Kosakkos Litu- nicos, quos Krasnam interceptisse supra ostendimus, securius agentes noctu oppresserant, castrumq; incensum solo æquarant: & tum vias subuectoresq; nostros Vilna venientes infestabant. A superiore parte fluminis propter Turouliensè præsidium nullam etiam in partem liberæ frumentationes pabulationesue erant. Excurrebat cum leuioribus tormentis aliquot eò Franciscus Sukus, spe magis terrore, quàm vi eius potiundæ: sed Polotia integra satis fiduciæ spirituumq; hoste habente re infecta discesserat. Ex aliis partibus versus Plefcouiam & Lukos per centum ferè millia passuum densissimæ ac inuia siluæ erant. Ad hæc Moscus, quem cum exercitu ad Plefcouiam peruenisse supra demonstraui- mus, cum obsideri Polotiam intellexisset, lectissimam totius exercitus partem Borisso Seino, & Theodoro Seremeto ducibus subsidio obsessis miserat. qui cum tuto Polotiam in omnes vias nostris intentis peruenire se non posse existimarent, Sokolæ substiterant; ac & si Polotiam non accederent, ad Disnensem tamen viam excurrebant, frumentatoresq; ac pabulatores nostros excipiebant. Miserat initio contra eas copias Rex Christophorum Radiuilum cum lectis aliquot equitum alis; ei Ioannes Chlebouicius Castellanus Minscensis se adiunxerat; cumq; hostis aut intrâ munitioes, aut suo loco se contineret, nec iustam pugnandi facultatem daret; nostri tamen in eos inuecti sub mœnibus equestre præ-  
lium



lium cum ijs fecerunt. quo vtrinq; aliquot cæsis, ac ex nostris Nicolao Kamenscio nobili equite interfecto, captiuis aliquot Moscicis abductis, ad Regem reuertunt. qui ibi quoque maioribus copijs rem gerendam ratus finem oppugnationis Polotiensis expectandum statuit: in præsentia equitum stationibus aliquot contra eas collocatis. Augebantur incommoda hæc, quòd viæ largissimis continuisque imbribus ita corruptæ erant, vt iumenta cum eluctari è luto non possent, pleraque labori immorerentur, omnesq; viæ cadaueribus equorum complerentur. Ita enim solum pingue ac per se humidum, omniaque adeò aquæ penetrarant, vt ne sub pellibus quidem in ipsis procerum tentorijs locus, in quo confisti posset, relinqueretur. Quibus rebus fiebat, vt cum vndique à comœatu interclusi nostri essent, nec mercatores etiam initio hoc rerum in eam vastitatem castra frequentes secuti essent, eò vsq; annona ac pabulum potissimum excreceret, vt quod inauditum antea in Polonia maximè fuerat, singuli modij auenæ denis taleris emerentur, qua generosiores saltem equi sustentarentur; reperirenturq; ex Polonis & Vngaris, qui mortuorum equorum carnibus vesci non dubitarent. quod per se nouum & insolitum, non tamen tam mirum videbatur, quàm quòd corpora eorum morbo ex ea causa tentari non animaduertentur. In communibus omnium angustijs maximè premebantur Germani; non modò quòd inter frequentes vrbes bellum gerere assueti minùs à necessarijs rebus ad eas difficultates parati accesserant; sed quòd eo etiam loco castra faciebant, ad quem vltimò comœatus perueniebat; in fronte Vngaris, inde Lituanis, ab ijs regijs castris positis. ad quos vt propiùs Disnam versus quique horum confederant, comœatum indè venientem primo loco peruenire necessè erat. Prussici tamen, qui à Marchio-

Marchione missi fuerant, vt in maiori earum regionum necessitatumq; peritia cum curribus, tum comœatu alijsq; necessarijs rebus optimè à principe suo instructi erant. In hac omnium rerum difficultate summa tamen erat constantia Vngari præsertim militis. ante alios Bekefius, qui alioquin grauibus articulorum doloribus, ac ventriculi imbecillitate vehementer conflictabatur, minimè ob hæc animo fractus, nunquam melius se valuisse iactabat: semper apud tormenta esse: ibi cibum sumere: ibi quiescere: itaq; inter pericula se versabat, vt qui proximè circa illum obuersabantur, ac in his Ioannes Kurofius, tam propinquo è loco, vt sanguine suo illum aspergerent, non pauci interimerentur. Polonicus etiam peditatus & si nuper admodum scriptus erat, nihilò seciùs tamen animo nec ipse se demittebat. Cum tantum vndiq; difficultatum circumstaret, eamque ob causam ad consilium, quid deinceps facto opus esset, Rex retulisset, huiusmodi plerèq; sententiæ dicebantur, vt quod iam antè sermonib. à plerisq; agitatum fuerat, corona facta omnibus ex partibus vniuersi exercitus omnib. viribus oppugnatio tentaretur. Id ea de causa Rex non probabat, quòd si id frustra susceptum esset, in quo summam spem omnes ponerent, vt deinde tanquam omni ea consumpta, præter discessum nihil reliquum haberent, verebatur. Itaque alia prius omnia tentanda existimabat. Vngarum militem maximis præmijs propositis, vt muros denuò subeat, excitat: equitem vt quisq; maximè manu strenuus erat, vt vnà cum pedite, missò equo, muros succederet, hortatur: cum primis eius rationem habendam docet, ne quem admodum antea fecerant, priusquam vires planè incendia sumerent, se reciperent: sub muris deniq; telisq; hostium mortem pro gloria gentis opinioneq; fortitudinis militaris oppetere præstare, quàm infecta re ab-



oppugnatione discedere, contumeliamque hanc accipere. Ita miles magno ardore sub mœnia arcis tædas, quæq; in eos vsus iam antè preparata erant, alia præ se ferens succedit. Et cùm tanquã inclinante fortuna pluuię sub id tempus paulum quieuisent, ignis fundamentis illatus, murorum latus id mox corripuit: idemque longè latèque amplexus, totum eum diem cùm extinguere non posset, populabatur. Erat hic Augusti vicefimus nonus. Interim cùm incendium excitatum latissimè colluceret, verereturq; Rex, ne ex vicinis locis maximè autem Sokola, vbi lectissimam partem exercitus Plescouiam à Mosco coacti confedissee supra ostendimus, hostes ipsis ignibus exciti, ad liberandam ab incendio arcem atq; suos concurrerent: ac ex arce simul eruptio tentaretur, exercitum vniuersum castris productum, iusta peditum manu præsidio castris relicta, sub signis in campo constituit. Ipse aulico equitatu præsidio assumpto, quò melius in omnes partes animo occurreret, Polottam transgreditur; quòd & Sokolensis via illac duceret, & eruptio si qua tentaretur, ab illa parte maximè timenda esset. Territi his rebus Mosci de deditioe agitare cœperunt: decemq; de muris se deijcientes ad nostros transfugiunt. Eos dum Bekesius ad Regem mittit, Vngarus miles, vt cæteros à deditioe deterret, ne per eam expugnatę arcis gloria victorięque fructu ac omni laborum suorum præmio priuaretur, trucidat. Præter cætera enim, cùm arcis tam famosæ, tum præcipuè ædis D. Sophiæ, quæ in illa est, vetustissimarum opum, argentearum statuarum, amplissimorumq; prisorum Russiæ principum donariorum, quæ in illa fuisse dicebantur, fama ingentis prædæ spe militum animos compleuerat; qua illi incensi omnes acerbitates, quò ea potirentur, æquissimo animo perferrebant. Cùm iam aduersperasceret, magni & laboris & periculi

periculi videbatur, in tam præruptum collem per flammam euadere: durabat enim adhuc incendium, nec nisi per id vlla alia via militi in arcem patebat; hanc ob causam in sequentem diem rem differri placebat. Interim dum in castra Rex se reciperet, ex Vngaricis stationibus nonnulli inter se ipsi cohortati globo facto, per pontem, de quo dictum est, in aduersum collem contendunt, perq; flammam nondum restinctas semiambusti in arcem euadunt. His Poloni pedites non pauci exemplo inuitati se adiungunt. contra eam partem, in qua incendium excitatum erat, subitario opere fossam Mosci duxerant, per eamq; minoribus tormentis dispositis in omnes casus se communierant. à quibus nostris reiectis, perque flammam indè, quò temerè progressi erant, recedere coactis, Mosci hoc successu elati, longius eos insecuti sagittis à tergo feriebant. Interim ducenti Samoscij pedites, qui præsidio, vt dictum est, ponti erant, per quem in arcem ibatur, repulso conspicati, auxilio nostris accurrunt, Moscosque se recipere cogunt. Rex cùm paulum versus castra progressus fuisset, ac interim irruptionem hanc militis conspexisset, ad ferendam munitionibus opem, in Sokolensem potissimum viam intentus, quæ vsui sint, disponit. Idem Milecius facit: equoque descendens, ac multos è nobilitate, qui idem fecerant, secum trahens, munitionibus tormentisque præsidio accurrit. Non deerant sibi eo tempore hostes, exq; altioribus turribus, præsertim verò mediæ arcis vt longè cæteris altioris, creberrimas in omnes partes ei aculationes faciēbant. ab ijs dum Rex cum Samoscio fortè colloqueretur, vterque non leue periculum adiit. Nam cùm fortè Samoscius à colloquio eo equi mutandi causa se conuertisset, ac eques quidam in ipsius locum incautiùs se intulisset, globo penes ipsum Regem exanimatus concidit. Motum hunc nox



suppreffit, insignemq; simul animorum mutationem attulit, vt de maxima spe, quam ex diei illius incendio conceperant, in aduersum casum deiectorum. querebantur omnes hostium animos hoc successu auctos, nostrorum imminutos. indè inter nationes quoq; defensiones orièbantur, cum Poloni in Vngaros culpam temeritatis conferrent, ab ijsq; initium factum dicerent: & postquam in arcem perruptum fuisset, non satis animosè altera ab altera rem gestam diceret. Has ob res sequentis diei antemeridiano tempore solo ad confirmandos militum animos dato, iterum oppugnationis coepta fuit. Pridie Mosci, quemadmodum ostensum est, ex propugnaculo, quod conflagrarat, se subduxerant: cumque is positus eius esset, vt in summo duorum coniunctorum laterum, que vtrinque quasi tutabatur, angulo collocatum esset: Mosci angulo, & quod inter duo proxima opposita inter se propugnacula, ad quæ ignis nondum peruenerat spatij intererat, omni deserto, propugnacula eadem inter se coniunxerant: interim verò spatium ad eundem locum, quem antea reliquerant, recipiendum nactos se rati, repetere eum coeperant. Hac re ad Regem delata, qui nullum sui rursus ibi communiendi tempus ijs dari volebat, mox militem sub vallum rursus succedere, hosteq; deiecto locum occupare iubet. Ita pars ea montis subito Vngarorum impetu capitur. ab ea deinde quemadmodum iussi erant, secundum proximum latus munitiones proferunt: Petroq; Racio nobili equite Vngaro ijs præeunte, propugnaculo, in quod primum incurrerant, ignem iniiciunt. ex quo cum incendium ortum per totam noctem duraret, nostri maioribus etiam aliquot scloppetis, quibus hostes infestabant à fronte dispositis, eousq; per totam noctem continuo opere fossas perduxerant, vt sub auroram ab hostium munitionibus non multum ab-

tum abessent, adque inferiorem loci eius angulum, in quem nimirum fossa ab hostibus pridie ducta definebat, ferè pertingerent: latera autem hostium ita nudarentur, vt ne intra præsidia quidem sua tutò consistere possent. His rebus ab omni defensionis spe hostes interclusi ad deditiois conditionem redeunt: mittuntur communi omnium Boiarici generis, ac militum nomine legati, qui vitam ijs, qui in arce sint, paciscantur. Impetrant, vt singulis cum vestimentis, quò quisq; velit se recipere posset. Episcopus, quem Vladicam illi vocant, Cyprianus, & Palatini, qui in arce erant, soli deditiois dissuaserant; mortemq; subire præstare, quam viui in potestatem hostium se traderent, contendebant. iamq; ante pulueri tormentario ignem subijcere, communiq; incendio arcem seque & omnes, qui in arce essent, absumere conati, à militibus prohibiti fuerant: & tum sententia eorum communi reliquorum omnium metu repudiata, illi tamen in D. Sophie se contulerant, non prius quam vi inde abstraherentur, decessuri. Rex retentis apud se legatis, mittit qui Episcopum & Palatinos ad se adducerent. Adducti in faciem procidentes more suo Regem salutant; vnus præterea Petrus Volnscius alterum ex ijs Basilium Mikolinscium accusabat, quòd opera eius ad principem suum delatus, inque vinculis habitus fuisset. Rex non cognitionis tempus hoc esse ostendens Laurentio Voinæ quæstori Lituaniæ, qui curam eorum haberet, tradi eos iubet. Mittit indè, qui arcem accipiant, partim Polonos partim Vngaros. Altero die cum rei diuinæ operam dare ante omnia Rex vellet, proq; obtenta victoria grates Deo agere, fætoe proietorum passim cadauerum, quæ insepulta hæctenus Mosci reliquerant, arcem ingredi prohibitus, Moscos, qui in arce ad hoc tempus remanserant, educi iussit. Eirei præponuntur, qui ab iniurijs



militis eos defendant. decedentibus duplex locus assignatus fuit. in alterum, qui in regis ditionem atque fidem venire: in alterum, qui in Moscouiam redire vellet, concedebant. Vtrisque liberum de se commodisque suis statuendi arbitrium permittebatur. maior pars reditum in patriam & ad principem suum eligebat; insigni in vtrunque fide ac perseuerantia; cum eorum nemo esset, qui non ad certissimam mortem, & exquisitos cruciatus proficisci se existimaret. Pepercit tamen ijs Moscus; seu quod extrema necessitate adactos existimaret; seu quod aduersis rebus, ut de animo, ita de crudelitate remiserat: perque vicina praesidia Lukos, Sauolotiam, Neuelam, Vsuiatam, eos distribuit; in quibus deditiois Polotiensis ignominiam virtute delerent. Ne à milite iniuriam acciperent, summam Rex curam adhibuit; itaque accidit, ut cum inspectante Rege ex arce digredientes, quidam in tanta multitudine facile latitatum se ratus, aliquos spoliaret, eum Rex ipse claua in illum inuectus, notaret. Ea res tantam illi venerationem in animis hostium faciebat, ut quò magis clementia atque fides ignota hominibus durissima seruitute oppressis essent, eò magis in illo virtutes hasce admirarentur. Reperiebantur per aream arcis dispersa corpora nonnullorum militum nostrorum; quos illi, quod in tanta victus atque omnium rerum inopia euenire necesse erat, in subiectis arci sclop petariorum hortis herbas, quibus extremam famem tolerarent, legentes oppreiserant; ac intra munitiones suas abstractos immani cruciatu lacerarant. Maximè in Germanorum vnum atque alterum crudeliùs, quàm in cæteros saeuitum ab illis animaduertebatur. Crurotenus lebeti impositos igni circumiecto feruenti aqua viuos coxerant, manibusque eorum fune per lacertos trajecto à tergo reuinctis, ventrem totumque corpus

eorum

eorum crebris in longitudinem per id factis vulneribus ad scissi thoracis modum foedissimè laniant. Fremebatur passim hanc ob causam à militibus. Rex tamen fidem semel hosti datam nulla ratione violandam ratus, ijs qui in Moscouiam redibant, duas alas equitum, qui ab iniuria eos tuerentur, adiunxit. Postridie supplicationes ob rem prosperè gestam, cum in arce eam, quam diximus, ob causam haberi non potuissent, in castris habitæ fuerunt. in Poloniam etiam de iisdem habendis edicta missa. Præda minor expectatione ac fama tam opulentæ arcis reperta fuit. Repererat in ea Moscus auri argentique non modò publici ac sacri, sed priuati etiam maximam vim; quam nobilitas mercatoresque Polotiensis sub periculum oppugnationis in eadem ad summum congefferant; sed capta vrbe gazam omnem paucis donariis relictis in Moscouiam secum auexerat. Omnis militi concessa minimè tamen spei eius satisfecit. Non minori ferè in pretio, quàm reliqua præda, bibliotheca ibidem inuenta apud homines literatos habebatur. Erant in ea præter annalium libros, plerique Doctores ecclesiastici Græci, ac in ijs Dionysij Areopagitæ de hierarchia cœlesti & ecclesiastica libri Slauiica omnes lingua; quorum plerosque à Methodio & Constantino in eam linguam è Græca traductos ipsorum annales tradunt. In ecclesiasticis enim institutis à cæteris ferè eiusdem etiam ritus gentibus hoc vel maximè Mosci differunt; quòd conciones apud populum, quibus is erudiat, à Sacerdotibus nullas haberi patiuntur; sed quæ à veteribus doctoribus Græcis tradita sunt, in suam linguam hanc ob causam traducta, studioseque conquisita è scripto publicè pronunciant; seu quòd homines nullis literis eruditi suo ingenio minus confidant; seu verò, quòd propius vero videtur, ne curiositate ingenij humani noua inueniendi studio ab

F 4

anti-



antiquitate ac veritate recedatur. Apparatus bellici maximè autem pulueris tormentarij tantum reliquum fuit, vt licet per omne id obsidionis tempus magna eius pars absumpta fuisset, nihil tamen adhuc ad longissimam quamuis obsidionem tolerandam defuturum iis fuisse videretur. commeatus etiam atq; pabuli satis magna copia inuenta ex labore & inopia exercitum breui refecit. Sed dum è tot incommodis sibi quisque primò prospicere contendit, iurgia inter nationes Polonicam & Vngaricam orta eò vsq; proruperunt, vt cuneo facto strictis vtrinq; gladiis mutuò in se irruituri confisterent. Iam antè miles Polonus circulari: fremere totis castris: contemni virtutem suam ab Vngaris: eos omnibus se anteferre: fructus victoriæ prædamque omnem solos interuertere: pro illorum laude & commodis bella suscipi. Inter quas gregarij militis dissensiones, senatorij etiam ordinis, ducumq; ipsorum offensiones nonnullæ existebant. Nam & Milecio cum Palatino Vilnensi etsi arctissima necessitudine coniuncti inter se essent, ex communione muneris alienationis non nihil intercessisse videbatur: interq; eundem & Samoscium, & si non minor necessitudo inter eos intercederet, ne satis tamen alter ab altero amaretur, dubitatio suborta videbatur; cum hic si quid ad rationem muneris eius spectans attingeret, offensum eum iri existimaret: Milecius pro mutua necessitudine non satis auctoritatem muneris sui iuuari à Samoscio arbitraretur. Angebatur maximè animo ea dignitate atq; auctoritate vir, quòd à Bekesio aliisq; exteris non satis maiestas tanti magistratus, cuius in regno hoc summa semper auctoritas fuisset, obseruari putaretur: imperiique militaris maiestatem in se imminutam videri molestè ferebat. Acuebantur dissensiones hæ à magistratum, qui defuncto Ioanne Chodkeuicio amplissimi vacabant, petitoribus; qui

qui vt à quoq; vel iuuari vel destitui se existimabant, ita alios in eum animabant. Militi quòd dissidia inter eum tolleret, quòd præda expectationi eius non responderat, donatium Rex dedit. Tenebantur adhuc in agro Polotienfi præsidiis hostium Sokola, Turoulia, Susa, aliaq; castella quædam; quæ nisi prius quàm indè discederet, deiecisset, pacatam se regionem eam obtinere non posse Rex intelligebat. Maximè à Sokola & Turoulia timebat; quorum cum illa à læua ad Pleseouiensem viam pertineret, & iam antè summissis indè copiis firmata fuisset, ne id posthac rursus fieret, maioribusq; copiis indè aliquid tentaretur, verebatur. hanc quòd ad Dunam flumen posita esset, itidem magnam totius eius regionis infestandæ oportunitatem habere videbat. Sokolam Milecium mittit. Hic equitatum peditatumq; Polonicum, & militem Germanum secum sumit. Turouliam Bekesium cum Vngaris mittere in animo habebat: interim cum Martinus Kurcius cum Kosakkorum manu Palatino Vilnensi operam suam detulisset, is adiuncto ei Constantino Lukomscio præfecto Vlenfi missus eo fuit. Mosci, qui in præsidio erant, quòd per eos dies tormenta atque ignes cessare animaduertissent, id quod erat, Polotiam in potestate Regis esse coniectura existimantes, ne quicq; retinentibus eos præfectis per auersam portam se eiiciunt, fugaque castrum deserunt. Palatini qui in eo remanserant, ad Regem adducuntur. Sussam, quòd omnium esset munitissima, in eaque Moscus maximum apparatus belli, commeatusq; haberet: & tamen citius Dunam in solo Lituanico posita præsidiis aliis excisis, omniq; commeatu intercluso, vtrò in potestatem ventura videretur, in præsentia tentare non placebat. quibus rebus perfectis, quæ ad statum prouinciæ stabiliendum, diuinarumque rerum curam pertinerent, administrare Rex instituit. Templum arcis



arcis & si satis amplum esset, pro captu etiam loci magnificè ex lapide constructum, quòd tamen à Græci ritus hominibus teneretur, quorum & magna multitudo esset, in eoque ius ac possessio antiquissima videretur, eius formulæ Episcopo Ruffico, qui antè iam templi eius titulum Vitepsciæ ipse agens vsurpabat, permisit; maximè verò quòd eius quoque rei rationem habendam sibi existimaret, vt cum longius bellum in Moscouiam proferre in animo haberet, intelligeretq; quantum ad animos hominum in omnes partes permouendos religio posset, ne religionis amore, si eam relinquendam existimarent, à deditionibus absterrerentur. Ad Romanæ ecclesiæ vsus nouum designat. Huic agros & possessiones, ex iis quæ maximè vicinæ erant, amplissimas addicit: certisque prouentibus annuis ad perficiendam fabricam ac sacerdotum vsus, dum ager è vastitate ad culturam perduceretur, è portorio interim assignatis, Societatis Iesu sacerdotes in eo collocat: quorum & pietatem, & in reducendis ab errore hominibus diligentiam probabat; quamque eò magis necessariam futuram ibi iudicabat; quò maior in hominibus illis ac maximè agrestibus non modò diuinarum rerum omnium ignorantia, sed impietas tanta esset, vt cum ad colendos agros hominibus non abundarent, plebs rusticana moribus suis ad proprias vxores, communes alias filiis infantibus duceret, cum his, quò pluribus liberis domum complerent, interim concumbebant, filiisque de inde, postquam ad iustam ætatem ij peruenissent, eas tradebant. fossas munitionesque ab exercitu institutas Vngarum militem complere iubet. Murorum partem deiectam, quomodo restitui velit, arcemque ipsam qua ratione muniri, demonstrat. Pecuniam, quæque alia vsui sint ad eam rem designat: præfectos constituit. Regebatur Polotia antiquitus, quemadmodum & Kiouia à

uia à legatis regiis: Palatinorum honore ac dignitate, cum per vniuersam Lituaniam non plures quam duo Palatini, Vilnensis ac Trocensis, totidem Castellani essent, carebat. Postea amplificato senatu Lituano, non modò Polotiæ & Kiouia ducatus, sed & Vitepscia digna visa est, que à Palatino administraretur. Polotiæ Palatinus erat, cum à Mosco caperetur, Stanislaus Douoina; qui cum vxore Petronia è domo Radiuilorum in Moscouiam abductus, cum per aliquot annos in seruitute & compedibus vitam traxisset, non prius inde rediit, quam ab Sigismundo Augusto, vxore eius in captiuitate mortua, aliquot aureorum millibus redimeretur. Cum de coniunctione inter Polonos ac Lituanos sub Sigismundo Augusto conuenisset, ac quò Lituanicorum senatorum numerus Polonicum æquaret, complures per Lituaniam Palatini ac Castellani creati fuissent; quia agri Polotiensis nonnihil in potestate adhuc erat, ad Palatinum Castellanus etiam adiectus fuit. quo tempore in illa Mosci ex eorum temporum successu non in factis modò, verum dictis etiam insolentia id quoque non irridiculè ab eo dictum percrebuit: nihil Augustum Regem ex capto Palatino incommodi accepisse, qui pro vno quinque iam haberet: decem pro duobus habiturum, si ad priorem palatinum alterum ei auferret. Douoina quòad vixit, titulo ac dignitate Palatini vsus interregni tempore decesserat. Cum in regnum Rex venisset, annitentibus Lituanis, ne suorum senatorum numerus minueretur, Nicolaum Dorohostaisium Palatinum Polotiensem crearat. Eidem nunc Polotiam administrandam commisit: Horodnicium quem illi magistratum vocant: qui que arcis munitio- num curam habet, Francisco Suko tradit. præsidium ex equitatu pediatuque qui quotque permanere debeant, describit. Sigismundus Augustus nobilitati Ducatus Polotiensis, que



que bonis exuta à Mosco fuerat, aliis in locis bona possidenda ea lege dederat, ut si quando recuperatus ager is ab hoste foret, iis rursus cederent: Rex bonis eorum illis restitutis, hæc ad sexennium nihilominus, dum sua ab hoste vastata rursus excolerent, permisit. Milecius interim Sokolam cum exercitu, ut dictum est, contendens in itinere cum viarum proximis pluuiis inundatarum, tum commeatus maximis difficultatibus afficiebatur. Tormenta Rex Dunam secundo flumine Dryssam usque; ad cognominis castello illi fluminis cum Duna confluentem demiserat; ab eo loco per Dryssam Sokolam usque trahebantur. Cum ad Sokolam fluuius Dryssa etiam nonnihil exercitum moraretur; quod ponte, quem Kaunæ ex nauibus factum supra ostendimus, alter ad Polotiam exercitus in transuehendis commeatibus vteretur, nec alterius tam subito expediendi ratio iniri posset, Ioannes Sbarassus Palatinus Braslaviensis cum parte equitatus flumen tranat, aversaque à Sokola parte Pleseouiam versus in excubiis confidet. ad reliquum exercitum traducendum Nicolaus Vrouecius claro loco natus equitum præfectus operam suam Milecio detulit, rateque ex robustissimis trabibus, iisque catenis ferreis aliisque firmissimis vinculis inter se deuinctis ab eo effecta, exercitus transductus fuit; nihil aliud hoste moliente, cum non difficulter transitu impeditos prohibere potuisset, quam quod excubiæ eorum more suo ad terrorem nostris faciendum obequitantes diuersarum gentium, quæ sub imperio Mosci sunt, Kafanorum, Astrakanorum, aliarumque nationum copias suo quasque nomine citarent. Propter viarum malignitatem & iumentorum proximis ad Polotiam incommodis amissorum inopiam currus miles nullos secum deuehere potuerat. Itaque non metatis castris, fixis tantum secundum Dryssam flumen

tentor-

torioriis confedit. Germanicus peditatus secundum Dryssam, Polonicus versus Nissam fossas munitionesque, quæ diuersis locis cœptæ deinde committerentur, ad castrum agere instituit. Hostis, quod nostrorum non adeo magnum numerum videret, & cum superioris obsidionis tum itineris incommodis debilitatos: suos omnibus rebus integros, simulato metu, quemadmodum ex captiuis postea cognitum fuit, intra munitiones per noctem se continere, curatisque interim corporibus omnibusque rebus ad eruptionem paratis ante lucem eos adoriri in animo habebat. Fortè accidit, ut Dobrosolouius, qui tormentis à Milecio prepositus fuerat, tres globos candentes, quorum supra rationem demonstrauimus, experiretur. Ex his duo cum incendium fecissent, ab hostibus suppressi fuerunt: unus cum imo fundamento adhæsisset, non animaduersus haud multo post, quod muri ex abiete & arida materia facti essent, latissimum incendium sustulit. Quod cum Milecius conspicatus signum tuba, quo ad arma capienda omnes conuocarentur, mox dedisset, Mosci inopina re turbati, simulque nostros irrupturos existimantes, cum restinguere incendium non possent, ac tantum repentini periculi obiectum esset, diuersis portis trepidi se effundunt. Seremetus cum parte equitatus Pleseouiam versus se recipiens in Ioannem Sbarassum Palatinum Braslaviensem, qui ab ea parte hostem obseruabat, incidit. Viuusque cum iis, qui circa illum erant, in potestatem eius peruenit. Qui ab altera parte cum Borissouo Seino se eiecerant, in Germanos inciderunt. Hi cupiditate ulciscendi tot annorum iniurias, quibus in nomen Germanicum crudelissimè Moscus sæuisset, cuiusque recens exemplum nuper capta Polotia vidissent, omnes in iisque Seinum interficiunt. Qui reliqui in arce erant, supplices vitam rogare cœperunt: sed irrumpente milite

G

Germa-



Germanico ac omnes promiscuè cædēte, desperata salute cataractam, quæ ex superiori loco portæ imminebat, demittunt: conclusosque in arce ad quingentos milites Germanos interficiunt. Interim Rosdraseuius Germanique quidam ac Poloni impigrè portam effringunt. qua patefacta tum verò pars cæsa fuit, pars rerum omnium desperatione adducta vltro in ignem se præcipitans conflagrauit. Magna vbiq; cædes fit; vt multi, ac præter ceteros Veierus veteranus præfectus, cum se multis prælijs interfuisse dicerent, nusquam in vllius prælij loco densius strata constipataq; inter se cadauera se vidisse confirmare non dubitarent. Multi inter occisos obeso corpore erant: ijs focariæ Germanorum apertis corporibus ad notas vulnerum medicationes, ac in his Seino quoq; adipem detraxerunt. Hinc Moscum epistola quadam sua, de qua infra dicemus, ad Regem scripta, inter alia cum hoc, tum quòd candentibus globis in oppugnando se vsus esset: alterum tanquam immane crudelitatis facinus, alterum quasi non virtute atq; acie, sed artificio quodam contra se niteretur, Regi exprobrat. Etiam in præda operæpretium factum fuit; argentiq; signati apud plerosq; Boiarici generis referti loculi reperi, militem superioribus incommodis attritum non refecerunt modo, sed & locupletârunt. Milecius cum exercitu ad Regem reuersus magnum captiuorum numerum, quorum partem publice Regi, partem amicis donauit secum attulit. Rex præfectis plerisq; centurionibusq; ac militibus etiam, quorum paulò insignius facinus extitisset, cum præfecturis, quæ tum vacabant, tum alijs militaribus donis ob virtutem donatis, quæ in quæq; statiuâ copiæ ducendæ essent, præscribit. Indè Disnam proficiscitur. Hic quod vltèrius in Moscouiam proximo anno bellum promouere constituerat, tormenta omnia, præter ea, quæ refectione opus haberent, relin-

relinquit. Indè literas ad Moscum mittit; quibus ipsius instituto, quo ille post Liuoniam vastatam vsus fuerat, de successu expeditionis certiozem eum facit. Hæ eo tamen argumento scriptæ erant; vt non tam successu rerum secundarum efferri, quàm tot hominum innocentium clade commoueri se testaretur; eiusq; rei causam omnem in Moscum ac illius in se iniurias conferret. Dum ad Polotiam Rex erat, legatio ab Henrico Ordinis Teutonici magistro eum conuenit. Initio regni cum huiusmodi nonnullæ difficultates Regem exceperent; quæ quominus in tempore bello Liuonico occurreret, prohiberetur eum viderentur; Radiuilus Palatinus Vilnensis, qui tot annos tanto cum sumptu ac periculo sine vllò fructu in Liuonia bellum geri videret, Adolphum Holsatiæ Ducem excitârat, qui fiducia suo seu feudi iure Liuoniam à Rege peteret, defensurumq; se in ea bellum contra Moscum polliceretur. Huius æmulatione Ioannes Chodkeuicius Castellanus Vilnensis Magistro ac ordini militiæ Marianæ Teutonice idem ostentarat; missusq; ab eo Ioannes Taubius Liuo illi persuaserat, si peteret, traductis in sententiam per largitiones primarijs aliquot senatoribus, non magno negotio eum assecuturum. Rex primò Vilnam legatis reiectis, in comitijs hisce de rebus agendum ijs ostendit: mutui interim mentione extra conditiones iniecta, quod in bellum hoc princeps eorum conferret: qua de re cum illi mandata nulla se habere dicerent, ad principem autem suum relatuos se recepissent, Varfauia deinde missione flagitata, nulla alia re acta discesserunt. Rex consensu Disnæ nauigio, secundo Duna non parum fluminis eius amantate delectatus Druccam: indè terrestri itinere per Braslauiam Lituanicam Vilnam venit. Accedenti Andreas Caligarius legatus Pontificius tum complures ex nobilitate obuiam pro-



fecti fuerunt. Ciuitas Vlnensis tota in gratulationem effusa, compositaq; oratione illum excipiens, duobus è locis maximè ante hac securitatem ac negotia sua interpellata commemorabat; vno à Polotia, altero à Kokenhausio. illud incommodum benignitate diuina, ac virtute sua Regem amouisse: alterum quoque vt à ceruicibus suis remoueret, se illi precari. Inter alios Moscici quoque dediticij obuiam ei progressi panem ac salem, quibus suum principem venerari in more habent, ei offerebant. Moscus nuncio amissæ Polotiæ ac præsidij Sokolensis cæsi accepto, Plefcouia in interiorem Moscouiam se recepit; ac re ipsa fortè tum perspiciens, vnicum regni robur fortes ac fideles populos esse, ex itinere ad eos, qui Susæ in præsidio erant, literas præter morem eius scriptas misit, easq; diuersis perferendas dedit: Intellexisse se Polotiam ac Sokolam Dei permissu in hostium potestatem peruenisse: qua re cum vndiq; eis interclusis non facile subsidio veniri possit; hortari vt tormentis præsertim ac puluere reliquoq; belli instrumento, quod secum deferre non possent, corrupto: imaginibus & sacris, ne à barbaris: eo enim ille numero omnes, qui in religione ab eo dissident, habet: ludibrio habeantur, in terram defossis, quacunq; tuta ratione se recipiant; non quòd de fide eorum dubitaret, sed ne virtutem eorum, quam ad maiora superstitem esse velit, fortunæ ac hostium crudelitati obijciat. Peruenerunt hæ literæ ad Milecium, qui de tormentis potissimum ac apparatus bellico sollicitus, qui ad deditiōem hostes hortaretur, misit. Eadem autem cum in Palatinum Polotiensē etiam incidissent, ipse quoq; eò accurrit. Hostes pacti, vt singulis cum vestimentis discedere sibi liceret, castrum tormentaq;, & quicquid in eo apparatus bellici erat, tradiderunt. quibus rebus perfectis Milecius in tres partes exercitum distributum in hiberna deduxit.

deduxit. Primis Christophorum Niscicium legatum: alteris Martinum Kasanouium: tertijs Sigismundum Rosnium præfecit. Iam antè Constantino Ostrogia Duce excursionem in ditiones hostiles, quæ ad Borystenem pertinent parante, Nicolao Seniauo stationum Russicarum præfecto, Rex mandârat, vt cum ijs copijs, quæ in Russiæ finibus sub imperio eius excubabant, cum illo se coniungeret; inq; hosticum à Kiouia transgredetur: verum Seniauo longinquitate locorum impedito, & adulto iam autumno, non præmittendum id gerendæ rei tempus Dux ratus, collectis ex clientibus suis, quorum satis magnam copiam habet, aliquot millibus hominum, alijsq; ex iuuentute compluribus se ei adiungentibus, cum filio Ianusio & Michaële Visnouecio Castellano Braslauiense Borystenem transgressus fuerat: expeditissimisq; quibusq; turmis præmissis, ac his longè lateq; vagari, & terrorem in omnes partes circumferre iussis: ipse cum reliquis copijs Cernkouiam vsq; excurrerat: quam castris metatis magna vi oppugnare aggressus, cum præsidio firmo eam teneri, idq; & animis & omnibus rebus alijs ad defendendum locum paratum esse videret, se à peditatu tormentisq; imparatiorem accessisse: reliquas copias maximis itinerum & tempestatum incommodis afflictas, missa obsidione vicina circum loca omnia diripuerat, totaq; Seueriensi ditione vastata, ac populationibus ad Starodubam, Radehostiam, Pociopouiam vsque per leuiores equitum turmas factis, præda ingenti acta discesserat. Simili successu Ioannes Solomirecius, qui post mortem patris extra ordinem Micislauiensem præfecturam administrabat, Iaroslauum opidum, pagosq; complures diripuerat. Philo etiam Kmita præfectus Orfanensis, cui turmæ aliquot equitum assignatæ erant, coacta ad eas non mediocri finitimis è locis cuiusq;



iufq; generis hominum manu in ditiones hostiles transfressus, duobusq; circiter millibus pagorum incensis, ac ad Smolenscam populationibus prouectus, præter agri solum nihil ijs in locis reliquum fecerat; indeque magna cum omnis generis præda, nullo detrimento accepto suos reduxerat. Rex cum alijs necessarijs de causis maximè verò vt bellum persequeretur, comitia habenda sibi intelligeret, eaq; iam in ante diem vicesimam tertiam Nouembris Varfauiam indixisset: interim, quæ ad Lituaniæ securitatem pertinerent, quæq; in omnes casus contra hostium impressiones opponenda iudicabat, cum senatoribus Lituaniæ constituit. qui eorum præsidio prouinciæ domi remaneant, qui comitia obeant, inter eos comparat. Vilnæ Radiuilum Palatinum Vilnensem, qui cum imperio militari erat, relinquit. simul magistratus, qui vacabant, distribuit. Quibus Radiuilos præ cæteris complexus ad Episcopam Vilnensem, quæ Georgio Radiuilo designata iam antè erat, Palatinatumq; ac imperium summum militare, alterum item prætorij militis, quorum illud Nicolaus pater, hoc Christophorus filius obtinebant, Christophoro Castellatum Trocensem, & sigillum minus adijcit: Noouogrodensem Palatinatum alteri Palatini filio Nicolao; vtrunq; præterea Marschalchatum, Nicolao Christophoro maiorem, minorem Alberto alterius Nicolai, qui ante hunc Palatinus Vilnensis fuerat filijs: Castellatum Vilnensem Eustachio Volouicio, qui Castellanus Trocensis fuerat vnà cum sigillo maiori dat: abdicante se eo Palatino Vilnensi, vt minus quod Volouicius habuerat, filio Christophoro traderetur. Præfecturam Samogitiæ quæ ardentibus multorum studijs ambiebatur, Ioanni Kiskæ confert. Vilna indè Grodnam mouet; vbi venationibus, quo vno voluptario labore ex alijs laboribus maximè reficere se solet, dies aliquot

dat.

dat. Moritur ibidem Gaspar Bekefius, de quo supra dictum est, non minùs inimicitijs, quas cum Rege acerri-  
mè olim exercuit, quàm virtute sua clarus. Natus hic in Transilvania, ac in familia Petrouicij nobilis Baronis educatus, adulta postea etate Ioanni Sigismundo Transilvaniæ principi ad eò gratus extitit, vt cum sine hærede decederet, hunc successorem designare non dubitaret. Cum Rex popularium studijs, prælatus ei fuisset, æmulatione inter eos exorta, dum statum Transilvaniæ turbat, Fugarassio atque alijs castellis à Rege exutus ad Maximilianum Imperatorem in Germaniam se contulerat: vbi copiis aliquot coactis vi deinde ac armis inuadere principatum conatus fuerat. Verùm profligatus à Rege iterum in Germaniam se receperat. Postea cum ad Regnum Poloniæ æmulum ascitum, iamq; extra omnem inuidiam altiorem in locum virtute conscendisse intellexisset, conscius sibi magnitudinis animi eius, vnum elegerat; cui & maximè se crederet, & à quo comoda ornamentaq; omnia expectanda sibi statueret; suamque illi fidem atque operam vltro detulerat. Rexque non modò omnem erga illum offensionem ex animo deposuerat, sed benignè susceptum, opibus etiam ac dignitate amplificauerat. Moriens coniugem & duos impuberes filios Regi ac Samoscio commendauit. Dum hæc geruntur, in Polonia non iidem omnium sensus, variiq; ac diuersi animorum motus esse. Erant non pauci, qui cum amplissima quæq; à Rege polliciti sibi fuissent, ac verò in tanta publicarum rerum difficultate non posset vel effusissima Regis liberalitas omnium expectationi satisfacere, quòd quæ sperauerant, non consequerentur, alieniori ferè animo ab eo erant. Cum que quilibet è nobilitate in electionibus Regum suffragium ferat, magna erat multitudo eorum, qui quòd suffragio suo in adipiscendo regno Regem subleuassent,

G 4



sent, ipsum Regnum debere eum sibi arbitrabantur: videntesq; Radiuolos tot honoribus auctos: Milecio summae authoritatis magistratum traditum: ijs Samosci-um necessitudine coniunctum: tot honores ac dignitates coniunctis inter se affinitate hominibus congestas, angebantur animo, eaq; in suam perniciem comparata interpretabantur; & quod beneficio non afficerentur, iniuriam rati, summa in ea rep. facultate, in qua quæ quisq; sentit, pari libertate dicere possit, omnia suspecta facere, cunctaq; vel præclara facta Regis sinistrè interpretando corrumpere conabantur. Iam ab initio cum Leopolum Russicarum rerum causa proficisceretur, non deerant, qui collecta gaza à Sigismundo Augusto relicta tædio presentium in Transiluaniam recipere se eum in vulgus fingeret: postq; Suirum diem exercitui edixisse eum intellexissent, nihil horum gerendi quicquam contra hostem animo suscipi, cuius potentia maior esset, quàm ut ullius viribus labefactari posset: sed quæri colorem tributarias pecunias, quas in immensum oratione tollebant, interuertendi iactabant. Nonnulli altius prouecti Reginae animum tentare cœperant: ostendere sperni ætatem eius à Rege: diuortium ab eo agitari: missum ea causa Petrum Volscium Episcopum Plocensem ad summum Pontificem: non minus eius regnum esse, quàm Regis, ut quæ & ipsa tanquam vetustæ Iagellonicæ stirpis ac de regno optime meritæ prosapia iisdem comitiis Regina appellata, iisdemque regni sacris initiata fuerit; quò illa in partes traducta gratiosum ad vulgus nomen naçti, eò maiorem facultatem reimperturbandi, ac consilia regis impediendi haberent. Querebantur ferè, non satis fieri conditionibus à Rege, cum regnum ei defferretur, in Transilvania acceptis: homines aduenticios in honoribus & præfecturis collocari; Bekesium potissimum, cui Landskoro-

nensem

nensem præfecturam Rex contulerat, notantes. Ad hæc Ducem Churlandiæ non suo loco & tempore deterioribusque è republica conditionibus quàm antea, possessioni Ducatus eius confirmatum traducebant. Quæ cum pleraque tempus refutasset: maximeq; Leopoliensem profectionem, Suiensemque expeditionem falsissimè in inuidiam vocatas aperuisset, literis de comitiis allatis, iurgia inter nationes Polonicam & Vngaricam exorta in maius exaggerabant: externos homines induci: à quibus contemni imperium militare: vim summi magistratus eneruari: Iam capta Polotia noua tributa Regem in conuentibus & comitiis petiturum: sed ut omnis Moscouia in potestatem ditionemque veniret, in tanta amplitudine finium, quàm tantæ molis administrandæ rationem, quam vtilitatem fore, cum interim longè magis necessariam præstabilioremq; reip: vulnera curationem requirerent? Quidam ut tres partes prouentuum capitanealium à præfectis exigeret, Augustanæ cuiusdam constitutionis, quam illi in eam sententiam interpretabantur, autoritate postulandum censebant; cum si id fieret, perpetuò finem tributis id allaturum dicerent. quæ cum in vulgus moueri Rex animaduertisset, ac liberius omnibus, quàm antea occurrendum arbitraretur, primo, quo agi de rep: poterat, comitorum die Ioannes Samoscius Cancellarius, accommodata ad rem præsentem oratione: si vllum tempus fuisset, quo pro maximis in reip: beneficiis numini diuino gratias agerent, id hoc potissimum esse docet, quo tam præclaram victoriam ab eo hoste adepti sint, quem propter summam potentia, virtutis bellicæ, victarumque ab eo gentium opinionem, formidassent omnes: nemo vinci potuisse existimasset. Contigisse id tamen singulari benignitate diuina: hostem non modo victum: sed prouincia Polotia, quæ victoriæ huius

perpe-



perpetuum monumentum futura sit, ac superiorum victoriarum eius dignitate spoliatum penè esse: omnes eius triumphos, quos per tot annos de Liouonibus & Suecis, quos de Kafanis & Astrakanis subactis, quos de Tartaris, de Turcis denique Tanaim & Volgam iungere Caspiumque mare in Euxinum Pontum immittere tentantibus, de què tot aliis bellicosis & barbaris nationibus habuerit, hac victoria ei detractos in hoc de illo triumpho prælatum iri. Quæ cum quanta sint, inquit, erga nos Dei beneficia intelligamus omnes, eadem nisi constantia ac virtute tueamur, inertia nostra fructus ex iis percipiemus nullos, ex quibus si rectè benignitate hac diuina vtamur, maximos percipere possumus. Magnum est, quodque superioribus temporibus vix sperandum nobis videbatur, amplissimum agrum ab hostibus tot annorum spatio possessum, & quo maxima ex parte opes Lituanicæ quondam niterentur, receptum: hostem tot prosperarum rerum successu elatum in perpetuo victoriarum cursu repressum: auersa arma eius in vastitatem ac perniciem ditionum harum intenta. Omnia hæc nisi reliqua, quæ restant, belli eius perficiamus, vereor, vt non modò utilitatis nihil nobis attulisse, sed ne optanda quidem tanto cum labore ac sumptu fuisse videantur. Hostem habemus potentissimum: cuius quæ quantæque opes sint, & nemo ignorat nostrum, & tot deuictæ ab eo nationes testantur. Hunc moderatène vel hanc amissæ provincie contumeliam ferre vel quieturum putamus? Fremit ille iam, & tamquam fera aliqua intra septa conclusa omnes amissa recuperandi, & acceptas iniurias vlciscendi exitus ac rationes quærit. Demus huic vel cunctatione nostra vel pace cum eo facta, colligendi sui, acceptaque incommoda ac domestica vulnera, atque inscientiam eius, quæ hoc bellum nudauit, sanandi spatium; quis

quis omnium tam securo est animo, qui non multò maioribus viribus ad farcienda incommoda irruiturum in nos prospiciat; quem nec propter potentiam difficultas vlla à bello reuocare: nec in pace propter perfidiam vlla iurisiurandi religio retinere possit? Serò nimirum resistendi ei rationes tum quæremus, quem iam trepidum & perculsum si non leui momento impellere, facilius certè superare possumus. Quod vt non esset nobis verendum, illumque accepta iniuria vel omninò quieturum, vel nihil ab eo periculi expectandum nobis esse Deus nobis fidem faceret: Quis enim alius tantæ rei idoneus author existat? at nonne tanta gloria bello hoc parta, quæ deinceps de nobis hominum existimatio futura sit, commouebimur? aut vlla ratione opinionem bello hoc collectam tueri nos posse, si in tantas res gerendas ingressi in medio earum cursu destituere eas videamur: quenquam deniq; futurum existimabimus, qui non fortunæ potius successus hosce, quàm virtuti tributurus sit? Sunt enim quæ virtute ac ratione administrantur, cum exigua iis fortuna interueniat, eorum & media primis & exitus vtrisque consentanei: fortunæ vt cæci sunt impetus, ita vltima rarò primis respondentia. Quòd sunt, qui in tanta ditionum amplitudine difficultatem earum administrandarum verentur, nec expetendum latius imperium putent, quod sumptu ac labore magno partum, reip: vsui nulli esse possit; mirum sanè videri debet, eo in rep. animo quenquam esse, quo in sua sit nemo. Quis enim omninò est, qui non decem possessiones, quàm vnam malit? grauiora sunt onera amplæ rei familiaris: eadem maioribus commodis oportunitatibusque pensantur. Reipu: verò nostræ ego hanc rationem esse video, vt si neruos rerum gerendarum habere, si statum hunc ciuitatis tueri velimus, notum omninò regnum necessariò ei adiungendum sit. Nam



Nam cum ditiones omnes, quæ ad eam accesserunt, in ciuitatem iisdem legibus receptæ sint omnes: nulla in prouinciæ formam redacta: nulla tributaria facta: itaque in pari omnium libertate, onera etiam exæquata sint inter omnes; iis si leuari volumus, quàm eius rei facultatem habebimus, nisi instituto maximorum quorumcumque imperiorum, nos etiam nouum ei imperium adiiciamus; in quod tributis vectigalibusque in eo constitutis, grauior communium onerum pars deriuari possit. Erat Russia antè, cum primum armis victa esset, tributaria: non parum tum subsidio eius subleuata respub: fuit: Lituaniæ quoque magnum Ducatum, cum antiquis legibus à Regibus Poloniae regeretur, plurimum per seipsum ad submouendum Moscum, Tartarumque valuisse meminimus: coniuncto eo cum regno, quantum ad publica onera accesserit, sentiendo vnusquisque experitur. Quòd si qui inopiam ac familiaris rei angustias inertiae suæ prætendendas existimant; ij si voluptatibus, luxuriæque modum faciant, ac quos in inanes vel perditas res sumptus prodigunt, in meliores vsus conuertant, vel præclarissimarum quarumcumque rerum gerendarum necessariis adminiculis minime se destitui re ipsa perspicient. Alios, qui domesticas res constituendas arbitrantur, non reprehendo: si tamen cogitent iidem, præterquam quòd intestinorum incommodorum sanatio semper potestatis eorum futura sit, oportunitatem belli aduersus Moscum, qualem nunc habeamus, non semper nos habituros; potiore etiam salutis quàm aliarum rerum curam esse debere. Sunt & qui minus hæcenus satisfactum sibi existiment. Habent ij nunc campum cum virtutis suæ illustrandæ tum demerendi Regis: proficiscantur in bellum: operam studiumque suum reip: præstent; àque virtutis amantissimo Rege amplissima quæque expectent:

etent: si vel ætas, vel valetudo, vel fortuna cuiusquam id non permittunt, non desunt rationes in togata etiam ac ciuili vita bonis artibus emergendi: obtrectionibus, ac præposteris reimp: turbandi studiis nemo, quæ vir tute, ac bonis artibus debentur, præmia consecuturum se speret. Hac oratione habita, & si minime nuncij dubitabant, quin & bellum & tributum vltèrius sciscerent; quòd in priuatis conuentibus victoriæ hoc successu læta, ac in spem futurorum erecta, frequens in eam sententiam nobilitas inclinaret: tamen vt aliorum de se opinioni satisfacerent, ex iis, quæ publicè iactari animaduertissent, cum de aliis quibusdam tum de conditionibus, quibus non satisfactum à Rege diceretur, & de ære præfertim alieno publico dissoluendo mentionem inferunt. Docebatur, si quas antea in regnum pecunias ad tuendum, dum veniret, regnum Rex præmisisset: quas secum attulisset: quas in militem, qui ante aduentum eius meruerat, erogasset: in sedandos motus Gedanensium: in hoc ipsum denique bellum de priuata sua infumisset, expenderent: si quid deinceps facere institueret, considerarent, vt nihil nimirum priuatum, nihil à publico secretum haberet, verum omnia sua, ac vitam ipsam reip: impendere non dubitaret, facile constiturum, rectè ne quid in illo resp: desideraret. Nam quòd ad vectigalium quorundam luitionem pertineret: si priuati commodi sui fructum aliquem sequeretur, satis perspici, longè maiori cum emolumento eius futurum, si in eas res, quarum proventus non exiguus sit, redimendas, quàm in bellum pecunias conferret: verum ita animo paratum esse, vt in præsentis reipub: periculo, priuatum emolumentum publicæ utilitati ac dignitati postponere mallet. De tribus capitanealium prouentuum partibus ab initio cum proposuissent, responsum fuit, non contineri id verbis constitutionis Sigismundi Augusti, nec

H      contra



contra leges publicas, quibus à verbis constitutionum recedere prohiberemur, in eam sententiam verba trahenda, quæ nobilitatem omnibus virtutum præmiis spoliata in agros atque familiaris rei studia cogeret. Quem enim posthac fore, nisi iis præmiis ad virtutem excitetur, qui operam suam in bello, in legationibus, in publicis muneribus obeundis reip: præstare velit; qui nullis commodis propositis, dignitati ornamentisq; patriæ seruiat? Cùm & de militaris imperij imminutione exterorumq; honoribus agitatum fuisset, ostendit Rex, nulla se in re magistratus eius authoritati derogatum voluisse: præfecisse se Bekefium Vngaris, non ut sua authoritate bellicarum rerum quid administraret: sed ut Ducis imperio subesset, interpretisque munere ad militem Vngarum apud ipsum fungeretur: externo milite necessitate adductum in bello hoc usum, quòd regnum hoc ut equitatu non modò comparari cum cæteris regnis posset, verum plerisque ferè præstaret: ita à pediatu minus instructum adhuc esset: aliorum exterorum opera in Transiluanicis rebus, ac priuatis ministeriis se vti. Multa de hoc genere, utendùmne opera exterorum esset, cùm inter nuncios nobilitatis disputata, tum à senatoribus ipsis multa in eam sententiam dicta fuerunt, non esse improbandum, si qui pro aliena reip: periculum ac laborem suscipere, sanguinemque pro laude ac dignitate eius profundere velint: non esse sapientis, quòd exterorum periculo consequi possit, ciuium sanguine quærere velle: hac ratione maxima imperia primùm coaluisse: indeq; ad summam amplitudinem prouecta esse: hoc ipso in regno multas primarias familias ab exteris profectas esse: inter alias clarissimam Tarnouiorum domum ad externos originem suam referre: alliciendos potius, qui suam virtutem ad reip: dignitatem aggregare velint: posseq; id commodo reip: fieri:

mo-

modò id prospiciatur, ne vel legibus vel magistratibus à ciuium corpore se sciungant, sed iis vtrisque vnà cum reliquis ciuibus pareant; vel eò potentia excrescant, ut ciues ipsos opprimere possint; vel honores iis mandentur: sed illi quidem in priuatis ministeriis versentur, publicis honoribus, ac magistratibus soli ciues præsent; quodq; in aliis rebus: obseruatum sit, agris ac eius generis commodis virtus eorum interim remuneretur; in honoribus capiendis ciuium præcipua conditio sit. Silentium indè ea de re fuit: peditem quidem externum nemo erat, qui necessarium esse negaret. De Churlando ostensum, Ducatum eum à Sigismundo Augusto Rege: cùm Liuania primùm ad regnum se adiungeret, longè grauioribus è reip: conditionibus Duci collatum fuisse: rectè atque ordine, quòd priorum regum auctoritate iam antè affectum fuerit, meliori reip: lege à Rege transactum; quod diploma ipsum prolatum testaretur; itaque nihil alienum à moribus & exemplis maiorum factum. quibus omnium temporum receptum fuisset, ut quæ à superioribus regibus feuda constituta iam essent, ea posteriores, si nihil in iis mutarent vel adicerent: noua etiam, si quæ ipsi adiunxissent iniussu ordinum senatus consilio adhibito conferrent. Legationis Episcopi Plocensis cùm in senatu mentio facta esset, causa eius vulgata, quæ iam in prioribus comitiis in senatu proposita fuerat, suspicionem diuortij agitati & ipsam sustulit. Ita nullo repugnante, quod priori anno sancitum fuerat, in hunc denuò tributum iubetur. Præfecti consilio inter se habito redituum præfecturarum suarum alteram quartam, qualis Rauam in ærarium publicum inferretur, vtrò Regi detulerunt; conditione adiecta, ne authoritas perscriberetur, vel in exemplum deinceps traheretur. Postulatum inter alia à Rege fuerat, ut per legatos bellum gereret, ipse à periculo ar-

H 2

morum



morum abesset; quod cum animi sui magnitudine indignum Rex iudicaret, ostensum præterea fuit, quò plures voluntarij, si in conspectu regis operam nauaturi essent, inuitarentur; ac ad minuendas controuersias, quæ ex Polonicorum & Lituanicorum magistratuum emulatione existere possent, præsentiam eius non modò utilem sed penè etiam necessariam futuram. Leges in comitiis hisce cum alijs de rebus, tum quæ ad feuda beneficiariorum principum, ad imperium militare, pœnasq; scelerum pertinerent, à delectis ex utroque ordine conscriptæ quædam, non tamen perlatæ fuerunt. Id solum Nisouiorum in officio continendorum causa, literis quibus tributum promulgabatur, adiectum fuit, vt vsq; ad futura comitia extra ordinem animaduertendi in eos potestas Regi esset. Constitutum superioribus comitiis fuerat, vt qui reipub: causa in bello abessent, iudicia interim in illos nulla redderentur; nisi contra quos vel rerum iudicatarum executio peteretur: vel qui vim fecisse dicerentur: aut qui ad certam diem de pecunijs non solutis iudicium se suscepturos cauissent. Exceptiones hæc varijs calumnijs in perniciem reorum nonnulli conuertebant: modò maiorum lites in eos, quos arripuerant, torquendo: alias longissimi temporis spatio penè intermortuas suscitando. Itaque interpretatio in hisce comitijs adiecta fuit; cæ vt causæ rei iudicatæ atque vis solæ exceptæ intelligerentur, si quæ recens iudicata aut facta diceretur: obligationes autem in diem certum conceptæ, quæ intra proximum decennium interpositæ essent. A comitijs Rex Milecium, qui ab ijs abfuerat, vt ad sequentem expeditionem se paret, operamque in bello eo nauet, per literas hortatur: ille excusat. Dum Varfauia Rex est, nuncium redactæ in potestatem Niscerdæ, de qua supra diximus, accipit. Moscus cum primò Polotiam cepisset, nobilitatem, atque

ex agris plebem omnem in Moscouiam deportarat: postea inueterata iam agri eius possessione, spatio temporis amorem pristini dominij exuisse eos ratus, nonnullos, ac in his Kossonium quendam non corpore modò, verum animo etiam ultra agrestem valente, cum filiis fratribusque itidem robustissimis hominibus pristinis sedibus reddiderat. Hic statim ac in potestatem Regis Polotiam rediisse intellexisset, quomodo cum aliquo munere ad prius imperium rediret, cogitabat. Kosakkis Polotiensibus, quo statu hostium res Niscerdæ essent, ostenderat. cumq; hi eo, quod illis constituerat, tempore, missu Palatini Polotiensis Niscerdam accessissent, munitionesque, quemadmodum à Kossonio acceperant, nec dum perfectas reperissent, sine negotio potiti ea fuerant. Kossonius nihilominus more suo inter Moscos fortuitum Kosakkorum aduentum existimantes, sine vlla suspitione versatus, Sauolociam eadem ratione tradere nostris voluerat. Iisdem Kosakkis diem, quo ad Sauolociam accedant, præscribit; seque turrim incendurum, ac dum ei rei Mosci intenti sint, in arcem eos inducturum, constituit. Sed re interim detecta cum duobus filiis in conspectu Sauolociæ palo suffixus fuit. Sub idem tempus in Vfuia repentina excursionem opprimendæ spem Kosakki adducti fuerunt. Iis Nicolaus Sebridouius Floriani, qui Castellanus Lublinensis & prætorij exercitus præfectus olim fuerat, filius, cum hibernorum Vitepscensium otium ferre non posset, se adiunxerat, relictoque equite fallendi hostis causa, per notas semitas à Kosakkis ductus eò excurrerat: præsidium custodijs & omnibus rebus firmatum repererunt. Hostes nihilominus subito aduentu eorum exterriti, subiectum arcis opidum incenderunt.



R. HEIDENSTEINII  
SEC. REGII DE BELLO  
MOSCOVITICO

*Commentariorum*

LIBER TERTIUS.



ARSAVIA GRODNAM PRO-  
ficiscenti Regi, ac in futuram expe-  
ditionem omni iam curā incum-  
benti duæ potissimum difficulta-  
tes occurrebant: rei pecuniariæ al-  
tera, quæ tardius expediebatur: al-  
tera delectus. prioris enim expedi-  
tionis incommodis afflicti, iumentisq; ac instrumento  
omni per tempestatum & itineris iniurias privati, diffi-  
cultates tam longinquæ militiæ pleriq; præ oculis ha-  
bebant, ac ob id pauci omninò nomina dabant. qui e-  
tiam ex his minùs à bello abhorrere se videri volebant,  
temporis tamen angustia, quo minùs ad id parare se  
possent, excludi se arbitrabantur. Pecunia vitur partim  
priuata sua, partim à priuatis mutuò sumpta, quæ ad  
certam deinde diem solueretur. De delectu Samoscius  
sibi curæ futurum promisit. Hic quamuis in togato  
munere versaretur; tamen quòd patrem Castellani  
Chelmensem Prætoriano exercitui præfuisse, reliquos  
etiam maiores suos plerosq; bellicis rebus claruisse me-  
minisset, quòd gloriam à maioribus traditam retineret,  
ac domestica hæc studia ipse quoq; non intermitteret,  
& ante hac semper, & in superiore expeditione mili-  
tem aluerat; fortesq; viros aliquot circa se habuerat,  
& tunc communicata re cum Rege equitem peditem-  
que scri-

que scripturum se professus fuit. Re vulgata, magna  
multorum animis alacritas innata fuit: passimq; à plu-  
rimis nomina data: Ad hos Vngarum militem à fratre  
Christophoro Transiluanix principe scribi curat. Cùm  
ante hac peditatu non multum Polonia vteretur, pro-  
pterea quòd nobilitas ferè omnis equis merebat; pe-  
destrem militiam, quæ laboris plus, dignitatis minùs  
haberet, negligeret: atque ita peditatus omnis ex opi-  
dana plebe, ac operis præsertim constaret, genere ho-  
minum non modò rei militaris imperito, verum otio  
etiam opidano ad perferendum laborem belli corrupto:  
externus autem peditatus sine maximo sumptu ali  
non posset; superioribus comitijs ratio quædam paran-  
di peditatus agitata fuerat, vt ex regiarum possessio-  
num asscriptitijs vicesimus quisque in militiam recipe-  
retur; qui ita in militiam venissent, ab oneribus operis-  
que rusticanis ipsi posterique eorum immunes essent.  
Hoc delectu iam vti visum fuit, missiq; per agros cen-  
turiones præfectiq; passim fuerunt, qui robustissimum  
quemque ac labori militari ferendo aptissimum lege-  
rent. Grodnæ ex propinquo iam consilia belli agita-  
re Rex instituit; ac Vilnæ interim tormenta, præter ea,  
quæ reparanda erant, noua suo modo alia fundi iubet.  
Propendebat iam Rex animo in magnorum Lukorum  
oppugnationem, quòd tamen quò diutius hostem ce-  
laret, ex instituto Ciasniciam diem, quo conueniret, ex-  
ercitui, edixit. Nam cùm id opidum secundum flumen  
Viam in capite duarum Lucensis & Smolenscensis via-  
rum ita situm sit, vt paribus ab vtraque vrbe spatius di-  
stet, ac Lukos quidem indè tendentib; vsuiata flumen:  
Smolenscam euntibus Kaspla se offerat, ad hostem an-  
cipiti cura distinendum cùm primis oportunum id vi-  
debatur. Suprà demonstrauimus missum à Rege cum  
literis, qui de euentu obsessionis Polotiensis certiore[m]  
H 4 Moscum



Moscum faceret. Humanius hic acceptus ab illo, quam quisquam ante eum, mensæ etiam adhibitus, ac bombycina veste donatus fuit. Eum autem priusquam dimitteret, à duobus legatis suis Ioanne Theodori F. No-uogrodia. Mikita Georgij F. Micislauienfi ducibus, & Romaniuicio Sacharino ad Nicolaum Radiuillum Palatinum Vilnensem, & Eustachium Volouicium Castellatum Trocensem literas dari iubet: cum controversiæ duorum summorum principum eò progressæ sint, vt suscepto bello Polonia Rex Polotiam expugnaret: magnus Moscouiæ Dux vicissim ad vlciscendam hanc iniuriam toto animo exarserit; se cum reliquis primoribus ad principis sui pedes se proiecisse: omnibus precibus ab eo petiisse, ne in sanguinem Christianum sæuire velit: ijs illum permotum à bello adhuc sibi temperare: nunc idem ipsis atque aliis Regis Poloniae consiliariis apud suum Regem contendendum esse, vt ad pacem stabilem cum magno Moscouiæ Duce constituendam eum flectant: inprimis ei persuadeant, vt & ipse cum milite regrediatur, & militi tam in Lituaniæ quam Liuoniæ finibus imperet, ne maleficio aut iniuria vlla Moscos laceat: eadem magnum suum Ducem recipere: reuersurum ad sedes suas, suosque à vi & iniuria vbique cohibiturum: interea vtrinque elaborandum, vt missis oratoribus, pacéque & concordia constituta, depositis à principibus armis metu omnes liberentur. In extremo literarum excusant, quamobrem Basilius Lopatinscius, per quem bellum Rex Mosco denunciaret, adhuc detineatur: operam se duros ostendunt, vt quam primum ad sedes suas vterque reuersus fuerit, cum mandatis de pace sine mora ad Regem remittatur. Fecerat hoc Moscus exemplo Sigismundi Augusti temporibus à Lituaniis introducto; qui si quando legatos Rex ad Moscum mittere destinasset, ad Moscouiticos

cos proceres literas prius dabant, quibus vt à suo principe fidei publicæ literas oratoribus, qui venturi essent, conficerent, postulabant. Re deliberata, in hanc sententiam ab senatoribus, quos diximus Lituaniis, respondetur: diligenter se de pace Regem appellasse: illum vt Christianum principem pacem atque concordiam inter vicinos, ac Christiani præsertim nominis principes omnibus rebus potiolem habere: bellum tamen cum id maximis illius in se iniuriis prouocatus non nisi pacis causa suscepit, tamdiu etiam dum æquæ pacis potestas à magno eorum Duce sibi fiat, gerendum sibi intelligere: legatos verò, vt quos ad principem eorum mittat, causam nullam ei videri: potius non committendum sibi censere, vt quos ex suis quemadmodum antè fecerit, iniurijs atque ludibrio eius obiciat: si ille legatos ad Regem mittat, patienter Regem quæ dicant, auditorum, atque æquo cum responso eos dimissurum. Haud multò post Moscus ipse cum eiusdem argumenti literis alium ad Regem nuncium mittit. Dimittitur is cum eodem responso, quod prior à senatoribus antè acceperat. Mittit nihilominus denuò aulicum suum Ioannem Nafsokinum cum iisdem postulatis; qui cum & ipse in eandem sententiam publicè iam responsum accepisset, ostendit postea, alia se præter superiora mandata habere, quæ priuatim exponat. facta potestate commemorat, principem suum moueri plurimum clade hominum innocentium christianorum: qua de causa & si sciat contra suum maiorumque suorum morem id à se fieri: constituisse tamen de dignitate sua publicæ concordie id dimittere, vt de pace ipse legatos ad Regem mittat: id vnum postulare, vt induciæ interim sint, nec vltèrius cum exercitu Rex progrediatur: legatos Vilnæ expectet; quòd id à maioribus quoque ipsius magnorum Moscouiæ Ducum honori semper



semper datum fuerit, vt non nisi in regni ipsius, aut magni Ducatus Lituanię sede oratores eorum audirentur. Rex eodem omnia illa pertinere intelligens, vt tempus gerendę rei extraheret, respondit: si quos legatos mittere velit, dicendi quę velint, potestatem libenter se ijs facturum, benigneq; auditurum. Quò certo in loco expectari à se legatos velit, nullo id cęterorum principum Christianorum exemplo peti. qui quocumq; vsus sit, quemcumque in locum legatos mittant: commune vbique esse ius legatorum, nec certo loco finiri: posse se vbicumq; futurus sit, vel in castris ipsis, in quibus inter strepitum armorum, vel maximè legatis opus sit, adiri. Detecta sub huius aduentum res fuit, quę omnium animos vehementer in se conuertit. Gregorius Oscikus claro loco natus & antè iam sub interregni tempus consilia cum Mosco agitarat: & tum per literas communicare cum illo non intermittebat. Attulerat ad hunc literas à Mosco Nassokinus, quas cum ille per speciem pellium, aliorumq; mercimoniorum Moscouiticorum licitandorum aditu ad Nassokinum quęsito accepisset: frequens præterea eadem causã interposita, ac secreto nonnumquam petito cum eo fuerat. E-nunciata hæc res à Mireuio quodam ministro Oscici Martino Ribinio fuit, qui Andreę Sebridouio Pocillatori regio nomen in militiam dederat. Is rem ad magistratus, magistratus ad Regem detulit. Mireuius, quòd præsentem Rege res accidisset, ad Albertum Radiuilum Palatij Marschalcum, statim vocatus, custodię traditus fuit; vtrò indicat, quę cum Ribinio antea communicarat: eorum omnium Bartholomæum quendam ministrum Oscici conscium ostendit. Rex quatuor solis primariis consiliariis adhibitis rem deliberat. Ex ijs Palatinus Vilnensisprehendendi eius, si in vrbe sit, negotium suscipit. Ille Trocis tum esse dicebatur. mittuntur mox

tur mox eò frequentes aulici, qui comprehensum retrahant. adducto in Marschalci ædibus libera custodia circumdatur. Datur aliis negotium, qui diuersorum ac res eius perquirant. reperiunt in arca quadam alba diuersorum senatorum anulis signata, nominibusq; scriptura eorum ementita, subscripta: plerorumq; item signa senatorum ad verum expressa; quibus ille maioris fidei faciendę causã, quò cum aliis proceribus consilia ista miscere videretur, apud Moscum utebatur. Alij Kouareskum in prædium ipsius duob. à Vilna milliariibus, vbi tum Bartholomæus is erat, missi, materiam, malleos, ac cętera cudendę monetę instrumenta, referunt. Bartholomæus consilia cum Mosco illum sociare, literasq; ab eo accipere, & iam ante interregni tempore bis ad Moscum missitasse fatetur. His de rebus cum senatores nonnulli ad eum missi essent, proditorem negabat: signis alienis ad contractus subiiciendos, & priuatum quęstum in iudiciis se vsurum fatebatur: monetę crimen in Iudæum quendam, cuius opera & signa illa sculpta haberet, conferebat. Adductus in iudicium ipsisq; proditoris & rei monetarię instrumentis in iudicio exhibitis, respondere iussus fuit. Negabat defensor eius respondere eum teneri communi nobilitatis iure, quo in quemquam ex nobilitate, nisi legitimè prius in ius vocatum, quæri vetetur. Cum varię res hæc à senatoribus acciperetur, ac quidam non minuendam exemplo libertatem nobilitatis censerent: apud plerosque plurimum tempus valuit, vt Rege in belli administratione, ac castris ferè versante, non tam ordinarij quàm militaris iuris cognitio videretur. ad hæc eos solos præscriptione hac iuuari posse, qui integra fama essent, ostendebatur. quorum scelus in tot flagitiis & propria confessione manifestè teneretur, eos vita sua priuilegio nobilitatis, ac ipsa adeò nobilitate se ipsos indignos



indignos fecisse. Itaque iussus respondere, libellum, quem ante in hunc casum composuerat, publice recitandum dat. In eo consilia se cum hoste agitasse: eidem spem per occasionem Regem interficiendi fecisse falsus eò decurrebat, ut egestate, ac æris alieni magnitudine impulsus id spectasse se diceret, ut ab hoste pecuniam aliquam hac ratione emungeret: supplexque veniam petebat. De confesso supplicium more maiorum, ac de iudæo item sumtum fuit: ministris ob indicium vite gratia facta. Venerat interim Vilnam Vngaricus peditatus. Hunc Rex Postouam terrestri itinere ire iussus, ibidem cum tormentis, & reliquo grauiore belli instrumento nauibus impositum secundo flumine Disnam; inde cum aliis tormentis, quæ Polotia rediens antea ibi reliquerat, per aduersum Dunam Vitepsciam præmisit. Vilnæ Paulus Vchancius, qui ad summum Pontificem à Rege missus fuerat, ad Regem reuersus, ensen notis carimoniis dedicatum à Summo Pontifice Regi obtulit. Profectus inde Vilna, ad Scidutum villam quinq; cis Ciasniciam millibus passuum, octaua circiter Mensis Iulij die peruenit, reliquisque copiis per vicinos agros sparsis, ipse eo, qui demonstratus est, in loco, consedit. Ibi dum copie aliæ, quæ expectabantur, conuenirent, de belli administrandi ratione, ac quò potissimum hac expeditione cum exercitu se conuerteret, ad consilium retulit. Tres potissime hac de re diuersæ sententiæ erant, cum alij Plescouiam: Smolenscam alij: tertij Magnos Lukos eundum censerent. Prima quæ Plescouiam, iisdem quibus antea, cum ad Polotiam iretur, rationibus ducebat: iisdem etiam, quibus tum impugnata fuerat: quòd iter in hosticum longinquius: quòd terga tot castellis hostilibus nullo in propinquo præsidio relictis nudarentur: quòd Lituania hostibus obiiceretur: maximè quòd à Plescouiensi via longius iam recessum esset; iterum non tam

repu-

repudiata quàm in aliud tempus dilata fuit. Qui Smolenscam eundum censebant, loci imprimis celebritate, & amplitudine: rerum eo loco gestarum fama: instituto denique belli res ablatas repetendi mouebantur; & quòd eo præsidio adiuncto, tota Seueriensis ditio longè amplissima vnà in potestatem ventura esset. Dicebantur contra hæc ab ijs, qui Lukos petendos suadebant, à Dunna flumine, atque Liuonia, quorum liberandorum causa bellum hoc potissimum susceptum esset, Smolenscam eundo longissimè recedi: cum Liuonia præterea Seueriensem ditionem nec urbium frequentia, nec loci atque maris opportunitatibus, nec vicinarum gentium cultu, comparandam: Lukos sitos in præcordio quasi Moscouiæ, loco & ad hostiles ditiones quascunq; postea petere visum esset, infestandas: & siue per Smolenscam Lituaniam, seu per Plescouiam Liuoniam ingredi hostem volentem pari intervallo vno solo exercitu ibi collocato prohibendum opportunissimo: pares enim ad Smolenscam & Plescouiam aditus habere: vnde ipsum Ducem magnum huc plerumque exercitus suos cogere solere; quòd in omnium circumiacentium ditionum pari vicinitate eam deinde quæ opportunissima ei videretur commodissimè ex hoc loco inuadere posset. Rex, quem admodum ostensum est, iam antè in hanc sententiam inclinabat. quòd autem tanto ante temporis intervallo referendum publicè hac de re non existimarat, ea de causa acciderat; quòd ne quæ vel ad hostem consilia interim emanarent, aut tempus vel res aliqua noua interueniret, quæ mutandæ consilij causam adferret, præcauendum sibi intelligebat. Hinc studiosè Ciasniciam diem ad conueniendum exercitui edixerat; ut ibi & in re præsentis, loco ex quo tam Smolenscam quàm Lukos commodissimè ac paribus ferè spatiis perueniri posset, cum consilio constitueret: & hostem quàm posset ma-

I

ximè



ximè ab hac cogitatione auerteret. quam ob causam in literis etiam, quæ ad illum scribebantur, præter Liuo- niæ ac Polotiæ, Smolenscæ quoque titulum, tamquam quæ regij olim iuris fuisset, accuratè eximebat; vt dum ab ea parte hostis timeret, illam quam Rex potissimum patere sibi volebat, neglectam relinqueret. Dimisso consilio eo, copiis recensendis, operam dare Rex cœpit: primòque equitum Polonorum, qui ad Gedanum, ac Polotiam meruissent, atq; proximè in hibernis fuissent, turmis vocatis, cum Rex præter superiorum tempo- rum consuetudinem, maiorem quam ante hac in re- censendo milite diligentiam adhibuisset, perque angu- stum pontem transgredientes in proximum collem sub ductus singulos ipse spectasset; paucissimis tamen e- qui adempti fuerunt; cum vniuersæ, & militum, equo- rumque & armorum genere essent ornatissimæ. Post hæc quæ tum primùm nouo delectu in militiam no- mina dederant, productæ fuerunt. Inter eas, quæ à Sa- moscio, quemadmodum supra ostensum est, cum equi- tum tum peditum copiæ scriptæ fuerant. Erant in iis senatorij ordinis nonnulli; alij euocati, qui militiam, cui magnam ætatis partem studuerant, longo iam tem- pore intermissam repetierant: qui exercitus ipsi pro le- gatis rexissent: non pauci, qui magistratus, præfectu- rasque: alij qui officia ac honores in aula gererent: ma- gna verò primariæ iuuentutis multitudo. Equitum du- plex genus erat, alterum grauioris armaturæ Husaro- rum, ea qua supra ad Disnam vti illos ostendimus: Ko- fakkorum alterum leuioris. Hisce loco pharetræ, & Co- ryti bicubitalia scloppeta ad humeros aptarat, breuiora ex cinctu suspendenda dederat, acynace ad latus si- nistrum & venabulo ex veteri instituto relictis. Peditem maxima ex parte è finitimis Vngariæ locis, nonnullum etiam Varadino remotioribusq; locis, aliquem præter-

ea ex

ea ex Polonis, qui superioribus proximis bellis iam sti- pendia fecissent, plerosque tamen nouo delectu con- traxerat. Cumque ad famam benignitatis, qua pedita- tum ex iisdem locis Vngariæ superiore anno stipendijs suis scriptum ad Polotiam habuerat, sub idem tempus plures indies confluerent, separatim his quoque per Io- annem Thomam Droicuium præfectum Premislien- sem necessarium suum stipendia descripsit. quæ cum om- nes copiæ cultu etiam à cæteris diuerso ac habitu ar- misque atratis in duplici ducis luctu, qui ad vxorem Christinam Radiuilam vnica ex ea filiola orbatus fu- erat, ab omnibus iis veste mutata vterentur; fiebat vt hac quoque re præcæteris conspicuæ essent. Pridie quam Ciasnicia Rex moueret, quòd eum diem legatis, qui Vilnæ apud eum fuerant, ad quem expectaturus il- los esset, Rex præfinierat; summa celeritate nuncius à Mosco venit; nec expectato solenni ornatu, qui obeun- tibus legationes ex thesauro Moscouitico præberi so- let, quòd is cum impedimentis subsequeretur, ne dies antè exiret, communi cultu præter morem gentis eius legationum Rege salutato literas reddidit. Quando Regem adduci non posse intelligeret, vt legatos pacis causa ad se mittat: se de iure moreq; maiorum suorum & suo concordia causa discedere: Oratores primarios homines suos iam mittere: ante quintam aut summum sextam decimam Augusti diem affore: postulare, eos Rex Vilnæ expectet. Nam vt alio loco, quam in ipsa aut regni aut magni Ducatus Lituaniæ sede oratores sui Re- gem adeant, recepto superiorum temporum omnium more refutari. Responsum, Regem legatos, quos alter superior nuncius quam primùm missum iri confirmas- set, adhuc expectasse: vt Vilnæ audiantur, multis sibi no- minibus integrum non esse, longiùs iam Vilna ad exer- citus suos progresso; quibus cum, quod militem sine

I 2

ma-



magno suorum detrimento intra fines suos habere non posset, quò videretur, moturum; si quo tamen loco oratores Mosci ad se peruenissent, quæ dicerent non grauatè auditurum. Hoc nuncio tali cum responso dimisso, postridie Rex è statiuis, quæ in agro Ciasniciensi habebat, Lepelam, indè Vlam castella propinqua excurrit: vt in re præfenti munienda né an delenda essent, statueret. Exercitum dimensis antè itineribus Vitepsciam mouere iubet; ad eumque biduo post, in secunda à primis statiuis castra recurrit. Aliæ eo die à Mosco ad Regem literæ afferuntur, eodem penè quo superior proxima epistola fuerat, argumento: legatos se summa cum potestate de pace agendi mittere: postulare, vt pro more maiorum Vilnæ audiantur; quòd si impetrari non possit, tamen intra fines vt expectentur. Responsum ad hanc etiam epistolam fuit: cum oratores venissent, quæ dicerent, Regem cogniturum: si iusta atque æqua atulissent, neque in ipso belli ardore fidæ iustæque paci non locum relictum iri: Interea cum exercitu Regem progressurum; ipse quid sibi de legatione sua faciendum esset videret: se vnum præstiturum, & oratoribus eius, & eorum orationi si iusta foret, quocumque in loco conueniretur, locum apud se fore. Adiuncta regijs literis altera ad nuncium, quem Ciasnicia apud Regem habuerat, epistola à Mosco fuerat: quam cum resignandam alij existimarent, Rex integram ad hostem remisit. His castris ac deinceps plerisque proximis cum Rex de belli administrandi ratione quotidie ad consilium referret, & castra hostilia duo Velisium ad Dunam flumen, Vsuiata ad amnem cognominem sita ad Lukos hærenti à tergo in hostis potestate relinquenda regi non viderentur; eoque magis, quòd iam antè Dunam omnem potestatis suæ facere cupiuerat; ante omnia Velisium, vt rebus omnibus firmissime, & ad omnia

nia momenti maioris oppugnandum ratus, Samoscium cum iusta exercitus parte eò mittit. Huic ad copias, quas ab eo ipso adductas antè expositum est, maiores alias cum Polonorum Vngarorumque equitum ac peditum, tum Germanorum equitum scloppetariorum, ac in his Georgium Farensbekium Daniæ Regis Marschalcum, qui patriæ Liunia operam nauandi studio cum aliquo equitum ac peditum Germanorum numero sub idem tempus ad Regem venerat, attribuit. Deposcebant easdem sibi partes Lituani. Respondebatur ab altera parte, quòd nullus esset Polonicus Dux, Lituanicum penes Regem manere oportere: quòd ad limitanei militis Ducem pertineret, ita moribus maiorum comparatum esse; vt militiæ imperium summum penes Ducem exercitus, domi iurisdicatio omnis circa Regem penes Marschalcum regni esset: absente exercitus Duce partes eius Marschalcus in castris exciperet: Cancellarij munus in consilijs publicis, iudicijs legationibusque; introducendis, precibus ac meritis singulorum ad Regem referendis versaretur; ad eundem, quoties Marschalcus abesset, eius quoque potestas omnis rediret: limitaneæ militiæ præfecti non tale munus esse, vt cum illis magistratibus comparari posset; quòd ab initio priuatim à Ducibus introductum, deinceps etiam commendatione Ducum conferatur. Diremit controuersiam; quòd res celeritate opus habebat: qui autem ex Lituamico exercitu ire eò debuerant, nondum aduenissent: Samoscius non modò copias suas instructas iam haberet, verum ab omnibus alijs etiam rebus esset paratissimus. itinerum enim ac locorum, in quæ iretur, difficultates animo prouidens, cum fabrorum aliorumque opificum, qui bello vsui essent, ac tormentorum campestrium non exiguum numerum adduxerat: tum pulueris tormentarij, commeatus ac pabuli maximam



vim compararat; iamque antè è Præfectura Knissinensi vnum in locum omnia comportata secundo Memela fluuio Kaunam, atque indè aduerso Vilia flumine Michaliscos: Michaliscis terrestri itinere Postouam, indè Disnam, & mox Duna flumine Vitepsciam præmiserat. Iisdem temporibus à Themefvariensi Bassa, qui quòd per totam Vngariam, fama belli peruagata erat, & in proximo Vngarorum delectus haberentur, ne aliò quàm fama ferret, id erumperet, subueritus fortè fuerat, legati nullis certis cum mandatis speculandi tantùm causa ad Regem venerunt. Vitepsciam Samoscus cum venisset, biduum ibi commoratus, militem omnem eò contrahit. Interim quæ ad disciplinam militarem tuendam adq; itineris rationem pertinebant, constituit, edictisque sanxit. Simul tormenta, quæ à Rege acceperat aduerso Duna flumine cum reliquo grauiore belli instrumento præmittit. His præsidij causa Stephanum Lazarum cum pedite, cui præerat, Vngaro laua ire iubet: tormentorum ac reliqui apparatus bellici Stanislao Kostkæ Succamerario Culmensi cura demendata. Primo agmini Lucam Dzialinium Koualensem, Brodnicensemque præfectum affinem suum præficit. Huic Nicolaum Vrouecium, quem primò à patre suo disciplina militari imbutum in proxima expeditione Polotienfi sub Milecio cum ala equitum militare iusserat; nunc quòd non modò in periculis obeundis animi magnitudinem eius, sed & ad quosuis militares labores tolerandos promptitudinem perspexisset, circa se habere instituerat, adiungit. ea itineris ratione præscripta, vt iusto interuallo reliquum agmen præcederent. cum reliquo exercitu medius ipse incedebat: Stanislao Solkeuio, postea Palatino Belfense sibi legato; qui & antea in Podolia sub Nicolao Seniauiio Palatino Russiæ contra Tartaros pro legato exercitus rexerat. Il-

lum

lum impedimenta sequebantur. quæ agminis pars maiorem ferè, quàm reliquæ difficultatem habebat; propterea quòd si in tanta carrorum & seruitiorum multitudine, qua in regionibus vastis carere exercitus non poterat, mutuò ea inter se implicarentur, vehementer eam rem exercitum morari necesse erat. Huic rei ita occurrit, vt vniuersorum impedimentorum agmen in tres ordines distribuere: & quo quæque turmae aut cohortes ordine incederent, eodem impedimenta, vt quorum quæ essent, incedere iuberet: singulis carrorum ordinibus à fronte & à tergo iusta peditum manu præsidio attributa. quod quò diligentius obseruaretur, nec inter se currus implicarentur, cum procederent impedimenta, initio in pacato ad Vitepsciam à se facto, indè ordinum ductoribus tradito, per vices binos semper inspicere iubebat. Extremum carrorum ita incedentium agmen selectissimæ cohortes peditum atque vltimo loco alæ aliquot equitum claudebant. Matura iam in agris, quæ exercitus iter faciebat, frumenta, ac maximè pabulum erat. cum autem Regem Samoscus cum reliquo exercitu eadem via subsecuturum sciret, in partes certas vniuersum agrum eum, per quem iter erat, descripsit; quarum vnam exercitui, qui cum illo erat metendam permisit: reliquas sequenti alij exercitui integras seruari iussit; quæ res diligentissimè à milite obseruata fuit. Regi eadem die, qua Samoscus mouerat, Vitepsciam venienti Lituanicæ copiae tam stipendiariæ quàm voluntariæ se obtulerunt, eo & numero & ornatu, vt superioris anni detrimenta nemo agnosceret. simul Polonicæ copiae nonnullæ quæ è longinquiorebus regni locis tum primùm ad exercitum peruenerant, vtriusque item generis tam voluntariæ quàm stipendiariæ censæ fuerunt. Samoscus Surassum interim, quod extremum regiae ditionis opidum erat, subitario opere

I 4

per



per Kasplam flumen ponte facto peruenit. Hic vt tormenta, quæ aduerso Duna tardiùs subsequebantur, expectaret, militemque ex itinere reficeret, ac de reliquo itinere consilium caperet, diem vnum substitit. Velisium frequentissima olim vrbs fuisse, nomenque à magnitudine, cuius hodie adhuc indicia amplarum fossarum vestigia quædam ab accolis ostenduntur, accepisse putatur. Sub Lituorum imperio per pagos totus ille ager habitabatur; postquam Moscouiæ Duces alibi occupatis Regibus Poloniæ ditionis suæ regionem eam fecissent, castro etiam Velisio veteri nomine retento, contra præsidium Vitepsciense eum communierant, ex instituto præterea suo cum ab alijs partibus, tum maxime cis Dunana, à qua tam Velisium quam Vitepscia, & quod postea conditum fuit, Surassum sita sunt, quòd eam minimè patere vellent, inuiarum siluarum obiectu impediuerant. More enim suo agrum hosti proximum per aliquot millia passuum studiosè incultum ac desertum vt plurimum Mosci relinquunt: quòd crebrarum arborum, quas in solo vacuo enasci interim necesse est, densissimarumque siluarum tamquam vallum hosti obiciant; ita se maxime tutos contra hostiles incursiones existimantes, si vndique quam vastissimas solitudines sibi circumdederint. Surassum temporibus Sigismundi Augusti Stephanus Sbarassus Palatinus tum Vitepsciensis, nunc Trocensis, veritus ne Vsuia & Kasplæ, quibus in Dunam influunt, capita ad coniungendam Smolenscensem & Lucensem ditionem munitione aliqua hostis occuparet, quòd ea flumina ita ex aduerso in Dunam exonerant, vt Vsuia Lukos, Kaspla Smolenscam pertineat, præueniendum eum ratus subitario opere communierat. Hoc in ipsum quasi initium siluarum incurrit. Samoscius cum duas omninò vias secundum vtramque Dunæ ripam propositas sibi videret,

ret, intelligeretque si vltra Dunana progredere, bis flumen transeundum: pontem alterum sub Velisio in conspectu quasi hostis faciendum; etsi de altera querendo reperiebat, non difficilem modò transitu esse; sed vix singulari homini iter per eam esse: exercitum post Vitoldum Ducem centum sexaginta annis neminem ea duxisse; ea tamen ire constituit. In siluam ipse se infert: locisque per quæ patefacienda via erat, perlustratis, ac inde peditum aliquot cohortibus immisissis, partim securibus siluas cædere, ferròque viam aperire: reliquos opere occupatis præsidio scloppetis expeditos esse, operisque & excubandi vices partiri inter se iubet. Erat magni laboris res, primùm arbores, quæ in solo vbere tot annorum spatio in immensum se effuderant, excindere; easdem deinde de via, quæ instituebatur, comportare. Eum alius excipiebat non multò leuior, cum præcipitia aut palustria loca pleraque essent, vel ponte ea sternendi, vel cratibus ac virgultis exequandi. singulari tamen militum ac Nicolai præsertim Vroueicij studio, per viginti millia passuum ea die via patefacta, postridie illac iter exercitus faciens, ad locum Verschouinum appellatum, in quo pagus olim fuerat, totidem à Velisio passuum millibus peruenit. Propinquum Verschouino locum Vitoldi pontem etiamnum Kosakki nominant; quòd fama acceperint, isthac ponte effecto Vitoldum aliquando copias duxisse; eodemque tum etiam per latissimam paludem, paucarum horarum spatio celeriter ponte effecto, postridie minus emensus, quod montes crebri interiecti iter morabantur, decem à Velisio passuum millibus, summo silentio consedit; nulloque ne pabulandi quidem causa excurrere permisso, sequenti die oppugnandi præsidij consilium cepit. Obijciebatur hoc loco noua difficultas; quòd hostis, quò is locus castro propior erat, eò diligentius



gentius muniendum ratus, incisus arboribus, iisque ex aduerso deiectis ac inter se commissis, aliisque insuper coaceruatis, per aliquot millium passuum spatium, omni muro firmiore munitione se seperat; siluaque quæ ne perspicere quidem posset, etiam media die nocturnum aliquem horrorem ingredientibus incutiebat. Dat iterum negotium pediti, ut iter explicet. Eodem die Mikitam & Birullam notos Kosakkorum Duces, qui excursionem in ditionem Smolenscensem superioribus diebus facta, ab ea ad exercitum venerant, longo ambitu trans Dunam flumen ad obsidendam viam, quæ ad Lukos pertinet, mittit. Excipitur ab his Kudrauus nobilis Moscus: qui cum duobus comitibus egressus fuisset, vnus eorum à Kosakkis interfectus, alter elapsus fuerat. Ex hoc postridie in castra perducto quale præsidium Velisij sit, deque Kosakkorum manu aliqua allatam fuisse ad præsidium famam, tantum in propinquo exercitum ignorari cognoscit. quibus rebus cognitis, relictis in loco cum præsidio certarum turmarum & cohortium omnibus impedimentis, præmissisque peditibus atratis, & Vibranouiana cohorte, ac reliquo peditatu ipse ad extremum siluæ propinquo à Velisio intervallo subito excurrit; quod ea loci natura erat, ut si hostis aduentu eius cognito, aditu prohibere eum voluisset, exigua hominum manu intra siluam cum plerisque aliis, tum eo maxime loco eum morandi summam facultatem haberet: simul si forte fama aduentus sui ad hostem nondum perlata, per incustoditas portas irrumpere, ac repente præsidium opprimere posset. Vix extra siluam eo egresso, hostes tormento exploso aduentus eius signum dant: eodemque momento accolis omnibus intra munitiones receptis, quicquid circa eas ædificiorum erat, incendunt. Samoscius militari nihilominus clamore sublato, subita equitum peditumque

excur-

excursione obiri munitiones iussit. Est Velisium spatium satis amplo, turribusque nouem munitum. ad meridiem atque orientem Duna flumine, à septentrione riuo quodam, qui per lacum in Dunam ibidem infra castrum illabatur, ab omnibus partibus maxime vero ab occidente altissimis fossis ambitur. Castris à septentrione metatis, munitiones à superiori Dunæ parte Vngaros agere iubet; infra eos medio loco Polonos: Vrouecium cum atratis cohortibus ab occidente curare: Ultra Dunam Lukos versus Kosakkos in excubiis collocat. Perfecto paucis diebus magna celeritate opere, tormentis quater muros instituit. Ea tum nostrorum tormentorum, quemadmodum ex captiuis & tormentis ipsis fractis cognitum postea est, felicitas fuit; ut nullus ferè globus mitteretur, quin ex illorum tormentis aliquid corrumperet. Inde ignitos globos Bornemissæ, quem Vngarorum munitionibus Samoscius præfecerat, periclitari placuit: incendioque ex Vngarorum munitionibus excitato, ac mox oppresso, idem Vrouecius cum tentare cœpisset, pars pontis interscissi, quæ reliqua ad portam castelli erat, ab atratis exusta fuit. simul duabus diuersis è turribus altius fumus tolli conspiciebatur. re hac animaduersa hostes primum repentino nostrorum aduentu, cum à qua re maxime tutos se fore crediderant, tam inuias siluas exiguo temporis spatio superatas à nostris intelligentes, nihil deinceps sibi tutum, nihil nostris difficile futurum iudicarent: simul operis perfecti celeritate, tum vero præsentis periculo territi, deditionem fecerunt. Moscus Polotensium præsidiorum expugnatione commotus, similem casum in aliis castellis, quæ Lituaniam versus ex materia omnia facta erant, veritus, cespitem muros eorum tegere instituerat. qua re, quod cum per cespitem subitario opere non satis altè congestum ad parietem globi penetrassent,



sent, tanto & firmius hærent, & restinguendi sui facultatem ferè nullam relinquerent, vel maximè tum lædebat. Commeatus, pabuli, pulueris tormentarij apparatusque bellici tantum repertum fuit; vt recreato omnibus rebus his exercitu, quantum præsidio fatis esset, nihilominus relinqueretur. Rex Surassi, quò interim peruenerat, dum in Duna pons componeretur, & de euentu oppugnationis Velisiensis cognosceret, subsistere constituerat: nuncio hoc cum præfectis, qui in præsidio fuerant, à Samoscio accepto, eò lætior, quòd de ea gratulatione, castri, quod maximè integrum in potestatem suam peruenire cupiebat, detrimento nihil fortuna diminuerat, dum pons ex lintribus nota ratione componitur, ad videndum Velisium excurrit: moxque Surassum se recipit. sub idem tempus literæ à Mosco afferuntur, quibus demissius, quam vt non simulata ab eo humilitas videretur, significabat, iam se legatos de pace cum idoneis mandatis, quibusque controuerfias minui posse existimaret, contra & suam & maiorum suorum consuetudinem dimisisse. quia fieri tamen possit, vt minus adhuc mentem Regis perspexerit, ideoque nondum omni ex parte ea Regi satisfaciant: petere se, vt aut Rex suam de his sententiam planius per literas aperiat, aut legatis suis id facere permittat: cum primis autem antequam legatos audiat, intra fines exercitum reducat, abque omni in suos iniuria prohibeat. sub finem literarum à crudelitate, locorum scripturæ sacræ nonnullorum autoritate, more suo ac solito maiori laudandæ, quam obseruandæ eius studio Regem dehortabatur. Rex in eadem simulatione, qua antè vsus fuerat, persistere eum videns, tribus pontibus vniuersum exercitum in vltiorem Dunæ ripam mox traduxit. Postridie iter facienti iterum literæ à Mosco redditæ fuerunt: Legatos suos maximis itineribus progredi: ex-

di expectaret venientes, ne tridui moram magno detrimento rebus suis futuram cogitaret. Regem nihil de celeritate consueta remittere cupientem tardabat difficultas viarum; quòd Moscus, eo, de quo antè diximus, instituto à Lukis etiam Lituaniam versus centum & viginti ferè millium passuum spatio densissimas silvas aluerat. Itaque hinc quoque siluestria erant loca, vix singulis peruia: propter crebras autem paludes interiectas magna præterea ex parte cœnosa, per quæ agrè iumenta eua-derent. Accedebat huc, quòd à primis omni pabulo, si quod fortè erat, consumpto, apud maiorem exercitus partem magna eius quoque rei inopia laboraretur. Itineris ordo obseruabatur, vt in primo agmine Lituani sub Palatino Vilnensi Duce & Christophoro filio limitanei militis præfecto proficiscerentur: Hos Ioannes Sborouius Castellanus Gnesnensis aulici militis præfectus, qui iam tum ad Regem venerat, sequeretur. Post illum Vngaricus tam equitatus quam peditatus incedebat. Hos Rex cum robore exercitus sequebatur. Regem Ioannes Sbarassus Palatinus Braslauensis cum equitatu Polonico: Vltimum agmen Nicolaus Seniauius Russicarum copiarum præfectus claudebat. qui quòd pacatis tum Tartaris nihil tumultus ab illis expectaretur, itidem ad Regem se contulerat. tormenta aliusque bellicus apparatus omnis vnà cum eo, quem Samoscus ab oppugnatione Velisiensi ad Regem remiserat, per Vsuiatam aduerso flumine trahebantur. Cum Lituani ferramentis ad silvas cédendas ac aperiendam viam idoneis destituti tardius procederent; Rex delectos ex Vngarico peditatu trecentos ad explicandam celerius cum Lituanis viam præmisit. à quibus magna celeritate via expedita primum Lituorum agmen xvij. Kal: Septemb: ad Vsuiatam peruenit: Rex decem ab ea millibus passuum confedit. Vsuiata in modico colle, intra duos la-



cus ac flumen Vſuiatam ſita, ab occidente Vſmiana lacu, ab oriente altero Vſuiata, à meridie flumine eiusdem nominis, qui per vtrumque lacum decurrens ad Suraffum in Dunam influit, clauditur. Cœperat ad arcem admouere munitiones iuſſu Palatini Vilnenſis cum Lituaniſ Georgius Sokolinſcius. Huic cum Vngari ſe adiunxiſſent, atque vna nocte admirando labore ad portam tam propè, vnde telum adiici poſſet, foſſa perducta, continenti ſcloppetorum ictu neminem in aduerſa turri conſiſtere paterentur; nomine ſimul & aduentu regio, quem ex latis caſtrorum ſpatiis ab caſtello in omnes ſubiectos campos deſpectum habente cognouerant, territi, qui in præſidio erant, deditiōem eodem die fecerunt. Rex ab Vſuiata Lukos verſus tendens principio eadem rurſum viarum aſperitate, perpetuis ſiluis denſiſſimè, quemadmodum antè oſtendimus, inter ſe implicatis, ad hæc ſolo cœnoſo & impeditiſſimo exceptus fuit. Poſt commodiore aliquanto via uſus fuit, aridior ac arenoſo penè ſolo. Vbiq; tamen vt per loca inculta ac deſerta magnam commeatus inopiam exercitus perpetiebatur. Reliquerat Rex ad tormenta, quæ ab Vſuiata terreſtri itinere tardiùs ſubſequebantur, Nicolaum Seniauium cum Ruſſicis copiis: apud hæc eò etiam vehementiùs laboratum fuit, quò eæ propter impedimenta tardiùs incedebant. Subleuata tamen deinde aliqua ex parte à priuatis Samoſcij nauibus fuerunt: quas cum vltèrius terreſtri itinere trahere ſecum non poſſet, Vſuiatam commeatus ac pabuli plenas dimiſerat. ſub idem tempus Volminſcius à Chriſtophoro Radiuilo Lukos præmiſſus, aliquot ab vrbe millibus cum ſtationibus hoſtium prælio commiſſo, aliquotq; captis, cæteros in fugam vertit. Samoſcius, quòd pons, quo aliàs in tranſmittendis fluminibus exercitus utebatur, penes Regem erat, rate, quali ad Sokolam exerci-

tum

tum traductum oſtendimus, ad Velifium quas ſecum habebat copias traduxit. Accidebat autem, vt cum Velifio, quemadmodum dictum eſt, naues, quibus commeatus exercitui ſupportabatur, Vſuiatam ab exercitu dimiſiſſet, tyrones plerique, qui nuper nomina in militiam dederant, nec magnum reimilitaris uſum habebant, quòd ab eo præſidio, quo maximè conſidebant, relinqui ſe videbant, anguſtias itineris ac ſiluarum, per quas duci ſe audiebant, magnitudinem veriti animis ferè conciderent, compluresq; paſſim diffugerent; in quorum vnum atque alterum deſertorum grauiori pœna conſtituta, reliquos facilè Samoſcius retinuit. Proſciſcebatur via militari, quæ Smolenſca Lukos ducit; vt dextrum latus Regis teneret. qua via cum Moſcus quoque exercitus ſuos ducere ſoleat, quos quemadmodum ſuprà dictum eſt, Lukis ſemper cogebat: omni ea pontes maximis ac robuſtiſſimis extrabibus facti erant; quia tamen vetuſtate plerique vitium fecerant, non exiguus in illos ipſos reſciendos labor militi impendendus erat. Excubabant ad Lukos & præta Oranenſia Tartarorum Nohaienſium turmæ aliquot; quas Vlanecius è principum Tartarorum genere in Moſcouia natus ducebat. Eas Chilchovus ſub primam oppugnationis famam Velifium miſerat. Cum Bobroiedovum quinquaginta à Velifio paſſuum millibus accepto iam in poteſtatem à Samoſcio caſtro, veniſſent, ac ab agreſtibus, quo loco res eſſet, cognouiſſent, Toropeciam verſus ſe recipientes, indè agmen noſtrum ex itinere obſeruare inſtituerunt. Scripſerat Rex ad Samoſcium, vt quàm primum cum eo ſe coniungeret: qua de cauſa cum à Smolenſenſi via ad læuam Samoſcius iter conuerteret, Tartarus interim, qui iam antea ſemel à fronte ad Polonam flumen reiectus fuerat, iterum recurrerat; ſi quos lenitiùs inſequentes extremum agmen obſeruando excipere

K 2

re for-



re fortè posset. Sed præterquàm quòd ea ratione, quem admodum antè ostensum est, copiæ incederent, vt extremum agmen lectissimæ cohortes, ac turmæ aliquot equitum clauderent, Kosakkos etiam, quoties eius rei facultas daretur, post agmen in insidiis confidere Samoscus iusserat: quibus si qui vestigia exercitus legerent exciperent. Id cum fortè ab ijs, qui sub Vincentio erant, factum fuisset, ac in campum quendam è siluis acciem agmen nostrum explicaret, Vlaneciusque, cum Tartari signa conspicati retro cederent, ipse ante alios progressus, vt se sequerentur, suos hortaretur, in Kosakkos incidit; ab iisdemque circumuentus captus fuit; reliquos Tartaros fugientes siluæ texerunt. Samoscus cum ad Oranensia prata quinque circiter millium passuum interuallo à reliquo exercitu confedisset, mox ad Regem indè accessit. Præmissi de exercitu Lituano à Radiuilo antecursores Lukos versus fuerant; qui cum ad Louatum fluuium progressi, itineris duce, qui vadum illis commonstraret, destituti ad arcem peruenire non potuissent, Mosci interim, qui in præsidio erant facultatem nacti Demetrium quendam, qui in Lituania diu versatus tum ab exercitu Lukos transfugerat, cum literis ad principem suum mittunt. deque aduentu exercitus, & quòd pridie iam copiæ nonnullæ sub munitonibus se ostendissent, certiozem eum faciunt. Exercitu per angustias siluarum in aperta omni traducto, non parum iam ad summam rei profectum, ac quasi ad vniuersam Moscouiam aditus patefactus existimabatur. Constabat enim inter omnes, si Moscus ad prohibendum transitu exercitum se conuertisset; plerisque locis, vel exigua manu nullo negotio eum distinare, atque re frumentaria in tam inuis siluis, per quas viginti dierum spatium hæsisset, interclusum incommodo etiam afficere potuisse. Rex cum ad arcem rectà ducere con-

stitu-

stituisset, Samoscium, qui situm naturamque loci cognosceret, præmisit. Vielkoluki, ac si magna prata diceret, ab amplitudine ac frequentia vrbis, circumiacentis regionis totius amœnitate, atque cultu nomen acceperunt. Arcis in modicum tumulum subductæ, qui omnibus ferè ex partibus lacu, altissimaque valle, quæ lacum vndique ambit, continetur, à meridie & oriente, à qua vna sola parte lacus non coit, imam partem Louatus fluuius ambit: angusta omninò semita inter lacus & suas ripas relicta, quæ eodem, quo arx ac flumen ipsum, flexu in longitudinem sinuatur. vallo tum circumdata erat altissimo, qui non modò priuatorum ædificiorum, sed templorum ipsorum, quæ frequentia in ea sunt, pinnaculorum conspectum accedentibus eripiebat. Ad has munitiones, turres Germani cuiusdam artificis opera scienter dimensas complures: vnam, verò à fronte, qua ab oriente inter lacum ac flumen patet, omnium firmissimam ac amplissimam adiecerat. Omnes autem cespite altissimo: maior quidem hæc viginti duos circiter pedes lato vestitæ erant. Louatus supra Ieserisciam ex lacu quodam deriuatus, à meridie, quemadmodum ostensum est, arcem perstringit: indè in septentrionem versus, relicta arce, vrbeque in duas partes scissa recto cursu per lacum Ilmenum sub Nouogardia, priori nomine in Volchouam commutato, in finem Finlandicum se exonerat; nauigationisque hac opportunitate maximè Lukos locupletauerat. Urbem amplam atque ab vtraque fluminis ripa latissimè arcu circumiectam, quamuis mœnibus ac turribus ligneis, fossis etiam satis amplis munitam, quinto antè die, quam castra Rex ei admoueret, instituto suo omnibus prius rebus in arcem comportatis præsidarius miles incenderat. Samoscus iusta equitum peditumque manu ac militaribus aliquot viris assumptis in viam, quæ ad To-

K 3 ropeciam



ropeciam atque vltiorem Moscouiam pertinet, pro-  
 uectus, ab ea ad arcem rursus deflectens Moscis se o-  
 stendit. Hostes conspicati, primò suas copias Torope-  
 cia venientes rati, extra arcem progressi, mox signis a-  
 gnitis summa celeritate se receperunt. quidam tamen  
 ac in his Farensbekius subito in eos inuecti aliquot af-  
 secuti interfecerunt. Samoscus ab omnibus partibus  
 diligenter situ loci perlustrato, ad Regem se recepit. Ius-  
 serat sequi se ab exercitu alios quosdam, qui diuersa via  
 excurrentes, ea qua venturus esset, sibi occurrerent.  
 Hos à superiore arcis parte flumen transgressos Mosci  
 conspicati, insidias ab ea parte posuerunt: itaque cele-  
 riter eæ coortæ fuerunt, vt Ioannes Bornemissa summe  
 inter Vngaros virtutis præfectus, cum in turba ab irru-  
 entibus manus iniectæ ei fuissent, equusque loco humi-  
 do hæreret, veste relicta recipere se coactus fuerit. Mo-  
 seus etsi suspicabatur Smolenscam potius Regem se  
 conuersurum: in hanc tamen quoque partem præ cæte-  
 ris intentus, ad Toropetiam exercitum Chilchovo Du-  
 ce contraxerat: qui seu Smolensca seu Luki peterentur,  
 quò opus esset, suppetias suis ferret. Mandata his in om-  
 nes casus dederat, vt à prælio omninò abstinerent: in  
 singulos modò, si quos ab exercitu digressos, aut per  
 agros palantes nancisci possent, intenti essent. Iphis Lu-  
 kis Knesium Theodorù Obalenscium Lichovum cum  
 summa autoritate, secundum eum Michaëlem Chaf-  
 finum & Oxachovum præfecerat: quòdque ijs ipsis,  
 quos constituerat, præfectis non satis salutem arcis ex-  
 ercitusque crederet, Ioannem Viechovum primarium  
 cubiculi ministrum, qui Lichovum cæterosque in præsi-  
 dio: Dementium Ceremissam, vt Chilchovum, qui ad  
 exercitum erat, obseruaret, per eos dies miserat. Perspe-  
 cta loci, quemadmodum dictum est, natura, Rex qua à  
 meridie fluuius arcem alluit, cum exercitu pulcherrimè  
 instructo

instructo sub signis accessit: abque altera parte Samo-  
 scio reliquas copias item latissimè expansas adducen-  
 te, horribilem speciem is vniuersi exercitus vno tempo-  
 re accedentis, inque tot acies explicati despectus hosti-  
 bus præbebat. Postridie legati Moscouitici, nullis ad-  
 huc versus arcem munitionibus directis, in castra vene-  
 runt. Hi cum Smolensca Surassum venissent, quod Su-  
 rasso regium imperium finiebatur, ijs qui deducendo-  
 rum causa pro more obuiam illis missi fuerant, nolle se  
 vltiùs progredi, nec in Principis sui ditione mandata  
 sua exponere se posse ostenderant. Cum illi id in ipso-  
 rum potestate fore respondissent: se quidem ad Regem  
 redituros: ipsi si ad Principem suum reuerti vellent, ne-  
 minem impediturum; tandem, vt ergo vi se pertrahe-  
 rent, hortati comites fuerant. risu excepti, neminemque  
 vllam ijs vim allaturum edocti, ipsi sibi consilium ca-  
 perent, ridiculè ad extremum vi tamen adactos se se-  
 qui attestati, secuti fuerant. Consilio pridie Calend. Se-  
 ptemb. iis dato, eadem, quæ ante dixerant, iterarunt:  
 negarunt posse se vlla de re agere, nisi prius Rex vniuer-  
 sum exercitum intra fines reduxisset. Rex legatione tam  
 absurda repudiata, eodem in consilio Samoscio, vt que  
 cum illo de ordianda oppugnatione communicaret,  
 administraret, mandat. Rediit sub idem tempus in ca-  
 stra Drobisus. Missus hic paulò ante à Radiuilo Toro-  
 peciam versus, in turmam equitum à reliquo exercitu  
 digressam inciderat. quæ cum paucis excubitoribus a-  
 liquot collocatis, quieti se dedisset, tanta celeritate im-  
 petum Lituani in excubitores dederunt, vt vnà cum  
 fugientibus ad cæteros quiescentes delati, priusquam  
 ab illis sentiri aut arma capi possent, eos occuparent,  
 nonnullos cæderent: quosdam caperent: reliquos in fu-  
 gam conuerterent. Samoscus militem, quem penes se  
 habebat, primò per annum non admodum altum, sed  
 K 4 vligine



vligine valde impeditum, & ad Louatum restagnantem inter crebras hostium iaculationes, quæ eò pertinebant, ponte; indè Louatum infra arcem duobus vadibus traduxit: adq; riuum è regione arcis manantem castra more Polonico curribus circumiectis communiit. Ad eas, quas antè habebat, copias reliquum peditatum omnem tam Polonicum quàm Vngaricum Rex illi attribuit. Vngari cum Ioanne Bornemissa & Stephano Carolo, qui Michaëli Vadasio successerat, statim transire: locoq; occidentem versus capto, quo ire se iuberet ad Samoscium miserunt. Cùm ille exteris præ cæteris indulgendum ratus, ipsi sibi locum legerent, se permittere ostenderet: illi rursus ad eius arbitrium rem reicerent; ratus eum, quem institissent, locum maximè ab illis probari, eundem, vt retinerent, munitionesq; ab eo ad arcem agerent, Bornemissa tormentariæ rei præposito, mandat. Interim, quòd Polonicum quoque peditatum citius subsecuturum arbitrabatur, ad inferiorem fluminis partem, qua vrbs antea fuerat, subitò nōnullos disponit, qui fossas munitionesq; ab ea quoq; parte instituerent. Verùm cùm quòd alios viminum ad corbes militares petendorum causa dimisisset, impedimenta eo die omnia traducere non potuisset, atratas cohortes aliquot præsidio illis relinquere necesse habuerat: præterea reliquus etiam Polonicus peditatus tardaue-  
rat: qua re fiebat, vt pauci omninò in opere essent; ijq; cùm maius nihilominus pro numero suo opus ea nocte perfecissent, accidit, vt tyrones quidam ex ijs negligentius sub arce versarentur, in quos postridie Mosci eruptione facta, priusquàm subsidium eis ferri potuisset, vnum interfecerunt, alterum ceperunt; signoq; militari, quod lentius signifer proferebat, abrepto, in arcem propere se receperunt. Haud multò post reliquæ cohortes cum impedimentis, vniuersusq; Polonicus peditatus

tatus aduenit; opereque summa celeritate perfecto, sequenti nocte & à Polonis & ab Vngaris tormenta constituta fuerunt. Eadem nocte interuallum, quod inter Louatum flumen atq; lacum orientem versus exiguum intercedere diximus, perfodere Samoscio visum fuit. quod cùm lacus fossæ vicem arci præstaret, si deriuatus fuisset, multò commodius per ficcas fossas ad oppugnationem iturum militem iudicabat. Peditatui vniuerso Polonico ac atratis cohortibus Nicolaum Vroecium præfecerat: præterea verò inter primores quosdam compararat, vt cùm ipse ad alia opera abesset, eorum aliqui in vices ad munitiones curarent. Euenerat tum fors ea Petro Kloceuio Castellano Sauichostenfi; qui vt homo ad militaria munia promptus, dum ipse ad opus inter frequentes tormentorum ictus, qui continuo ex arce in intentos operi dirigebantur, contendit, globo traiectus interiit. Sub hæc Rex Louatum ipse transgressus, vt oppugnationem inspiceret, quòd per tam altum eumque recentem cespitem non posse penetrare globos videret, ne iis iaciendis tempus eximi patretur, Samoscium monebat. Itaque in pinnacula, è quibus sedilia tormentorum, quæ per vallum disposita erant, dirigebantur, iaculationibus ab Vngaris conuersis, incensa mox ea fuerunt. Etsi autem vltèrius ignis non progredetur, quod sedilibus, quæ diximus, exustis, in aggerem mox desinebat; illi nihilominus incendium conspicati, manu statim facta ad vallum successerunt: iustoq; temporis spatio sub eo versati, cùm tandem hostis collecto animo ad repellendos concurreret, illiq; nihil eorum, quorum causa in eum locum progressi fuerant, succedere sibi viderent; sub noctem ad munitiones suas per lacum se receperunt. Legati interim qui in castris erant, incendio hoc in metum adducti, iterum admitti se petebant. cuius rei altera die potestate



testate iis facta, quòd ignis iam conquieuerat, illique metu iam liberati sibi videbantur, eadem qua antea simulatione vsi primò Churlandiam & Rigam Regi offerebant; his deinde Polotiam adiciebant; tandem pro captiuis Vsuatam & Ieserisciam; ex quibus Ieseriscia sola in potestate Mosci tunc erat. multis vltro citroq; verbis factis summa hæc fuit, vt spem facerent, posse ad æquiores conditiones pacis causa Principem suum adduci, si tabellarium cum literis hac de re ad illum mittendi potestas sibi fieret: Rexq; ipse non acquiescere se conditionibus à legatis propositis per literas ei ostenderet: interim ab oppugnatione abstineret. id vt illis permitteretur, senatores quidam Lituani persuadere Regi conabantur. quòd cum omnia tam diu frustrari viderentur; omnibus incommodis belli se potissimum, apud quos sedes eius esset, expositos, periculoq; proximos cogitarent; ac si capta arx esset, defendendæ eius onus, quod in tot hostilium præsidiorum vicinitate, siluarum à Lituania interiectarum magnitudine maximam difficultatem habiturum intelligebant, ad se potissimum rediturum. Rex etsi ad omnia potius descendere paratus erat, quàm oppugnationem dimittere: vrgentibus tamen illis, Samoscius qui ad munitiones tum versabatur, assiduusq; in opere erat, vt de statu oppugnationis, quemadmodum postularum à Lituanis fuerat, ex eo cognosceret, accersit. Duobus primariis senatoribus Lituanis adhibitis, quid à legatis petatur ostendit: quærunt ex eo senatores ij, quid de successu oppugnationis polliceatur: nisi certam spem potiundæ arcis afferat, satius esse petentibus iam dari, quod haud multò post difficultatibus ipsis cogentibus maiori cum ignominia tribuendum foret. Respondet Samoscius, vt in re, quemadmodum omnia sint belli, incerta nihil certi promittere possit; ita bene ta-

men

men potius cum consilio atque fortuna Regis, tum virtute militum fretum sperare: præsens verò oppugnationis tempus eximi pati, quem alium exitum habiturum quàm vt si qua nunc expugnandæ eius facultas sit; ea postquam anni tempore in autumnum iam vergente consuetæ regionibus iis tempestates, effusique imbres ingruerint, nulla prorsus relinquatur? Rex quemadmodum antè in animo habebat, inducias dandas non iudicabat: vt suum interim negotium vtraque parte, ea qua antè ratione administrante, literas legati ad Principem suum darent, permisit: iis suas addidit, quemadmodum petitum à legatis fuerat, quibus diem certam intra quam rescriberet, illi præfiniebat: simul Vngaros vallum subire, abque ima parte eius, cuniculum aperire, huicque puluerem subiicere iubet. Itaque ponte ab eo loco, quo angustior lacus erat, subitario opere strato, reliquoq; opere vna nocte perfecto, puluis sub crepusculum subiectus, ac à meridie demum incensus, turrim, quæ ab ea parte erat, corripuit; cespitemque disiecto parietem propugnaculi nudavit. quem cum Vngari mox incendissent, Mosci incendium, quod maximum exortum erat, restinguere conarentur; nec nostri à continuis in Moscos ex omni tormentorum genere iaculationibus, nec illi à conatu restinguendi ignis, magno cum incommodo suo, prius cessarunt, quàm nox interueniens & nostris scloppetorum vsum eriperet, & illis opprimendæ flammæ spatium daret. Ab altera parte munitiones hostium, quas per maius, quod demonstratum est, propugnaculum egerant, vineæq; intra quas tormenta constituerant, quàm maxima nostrorum tormentorum vi de vallo proturbantur: cumque impigrè tormentis res administraretur, vineæ omnes ferè de vallo deiectæ fuerunt, hostesq; se ac tormenta subdixerunt. Plerisque cuniculum indè ad propugnaculum agendum



gendum existimantibus, Samoscio ea de causa minùs id probabatur, quòd in solo humido ac palustri, intra flumen atq; lacum medio vix cuniculo locum fore iudicabat. quòd verò propugnaculum id vltèrius nonnihil quàm reliquæ turres, ita prominere animaduertèret, vt nulla ab aliis propugnaculis tormenta rectis ictibus per frontem eius dirigi posse: omnesque qui à lateribus in eam partem acciderent, tranuersi ferri viderentur, si ad eum locum miles succederet, quòd à tormentis ledi non posset, vel per ipsum cespitem multò faciliore ac commodiore ratione ligonibus ad turrìam viam patefieri posse sibi videri ostendebat. Itaq; fossam versus propugnaculum duci iubet. quam rem Luca Syrneo cum atratis cohortibus impigrè curante, cum vltèrius progredi vellet, palis, quos iusto spatio ante vallum ingentis magnitudinis confertissimos in terram defixos obiecerant, prohibitus fuit. Postridie vineis ac tormentis hostium, quemadmodum dictum est, iam antè summitis, nonnulli ex nostris inter se cohortati nullo imperio ad propugnaculum excurrentes, scalis admotis, vallum scandere cœperunt. His à Moscis partim à fronte deiectis, partim per auersam portam, quæ ad Louatum ab oriente pertinebat, erumpentibus circumuentis, quidam ex iis grauissimè vulnerati relictì fuerunt. Samoscus, qui alia tum ad castra curabat, cum de irruptione ea nostrorum cognouisset, subitò ad eas munitiones se retulit: conspicatusque vulneratos, quos diximus, aureis aliquot nummis depromptis, quos vt tyronum animos ad maturandum impigrè opus præmijs inuitaret, ad tormenta semper expositos habebat; certam pecuniam si qui vulneratos retulissent, pronunciat: quibus relatis, vt leui initio successum eius, quod animo proposuerat, periclitaretur, ligone vni dato, præmioque proposito, quid fieri velit, ostendit: interim si primo successisset, qui

qui eum sequerentur, paratos esse, ac ad fossam inferiorem procurrere, ibique se continere, & signum expectare iubet. Contra eruptiones hostium Vibranouium opponit: eum cum scloppetariis aliquot secundum ripam fluminis propius versus propugnaculum, atque auersam portam, per quam erupturi hostes erant, succedere: Veierum præterea ex munitionibus diligenter tormenta in erumpentes emittere iubet. Ille, quemadmodum iussus erat, accepto ligone, per fossam intra munitiones nostras ad palos vsque, quos ostendimus, peruenit: indè summa celeritate per crebras hostium eiaculationes ad vallum procurrit, eique se applicans iam extra tormentorum hostilium ictum, cespitem ligone scalpere incipit. Hostes à diuersa parte circumueniendi eius causa se effundunt. His Vibranouius, qui ad ripam fluminis, quemadmodum dictum est, cum scloppetariis aliquot collocatus fuerat, à tergo se ostendit; cumq; creberrimis præterea tormentorū ictibus, qui ab omnib; partibus ex munitionibus in eos dirigebantur, peterentur; reiecti fuerunt: Vnus verò ex iis Sabinus Nossouus strenuus manu inter Moscos, & qui è præsidio Susensi magnis incommodis nostros affecerat, duobus globis frontem à Vibranouianis perstrictus, vnoque à Veiero emisso sub pedibus eius transeunte percussus ad stationes à nostris pertractus fuit. vbi se collegisset, interrogatus de statu præsidij omnia dicebat, quibus spem potiundi eius nostrorum minueret: non eius generis arcem esse, quæ cum superioribus à nostris expugnatis comparari posset: vallo crassissimo cingi: turres latissimo cespite protectas nec tormentorum ictibus, nec incendiis patere: propugnaculum illud vnum munitissimæ arcis instar esse; ternis ingentis magnitudinis trabum ordinibus singula eius latera reuincta: altissimo cespite vestitum: ne cuniculis quidem ten-



tari posse, cum propter soli palustris humiditatem, tum quod fundamentum ex firmissimis palis, ac ingentibus solidisque faxis subiectum haberet. Hæc Samoscium omnia magis in sententia confirmabant. Nam & quod cuniculo antè aggressus eam non fuisset, benè cecidisse intelligebat: & quò maior lignorum vis vnum in locum congesta esset, eò & citius incendium tolli posse, maioresque vires sumpturum iudicabat. Postridie aliam fossam secundum flumen, qua Vibranouius antea constituerat, duci iubet: subsidia in hac contra eruptiones collocat: tormenta item trans flumen contra auersam portam transducit: simul magnam materiæ vim comportatam, stupa inuolutam, sulphureque ac pice oblitam, Stanislai Kostkæ opera ad futurum incendium præparat: quibus rebus perfectis summo mane, eodem, quo antè modo ligone dato, alterum rursus immittit: ei mox alios summittit, vt crescente tandem multitudine concurrentium, vnaque cum ea opere, iam triginta circiter hominibus capiendis os in cespitem patefieret: ac ad turrim ipsam perueniretur. Fortè eo loco fenestra olim fuerat, priusquam terra obtegeretur. per hanc Moscici scloppetis nostros, nostri item Moscos mutuò arcebant, simulque excussis ignibus, ligna, quæ secum attulerant, inferebant: Moscisque hastis tandem per fenestram gerere rem instituentibus, eas arreptas illis extorquebant. Samoscus interim ad alia castra paululum se receperat, veritusque ne perperam quid administraretur, ne se absente ignes inferrentur, vetuerat. Postquam admoueri ignem sensit, statim accurrit, iamque eò rem progressam videns, vt strenuè eam vrgeret, militem hortatus, tædas iam antè eum in usum præparatas, quàm frequentissimas subiici iubet. Multorum hic è nobilitate etiam cum aliorum, tum præcipuè Christophori Rodrascuij præfecti Lanciensis, qui sub ipsum illati ignis

gnis principium, absente Samoscio, ad extremam fossam ac palos procurrens, omniaque pericula magno animo excipiens, promptissimè rem adiuuabat, singulare studium enituit. Non deerant sibi tanto in periculo Moscici: coriisque madefactis, & quibuscunq; aliis poterant rebus incendio occurrebant. Magna tædarum atque ignium vi toto die continuò in turrim coniecta, nullum tamen adhuc incendium erumpebat. qua de re variis in consilio sententiis dictis, cum quidam adhuc cuniculos tentandos arbitrarentur, Samoscus, etsi in ancipitem curam ex diei eius euentu coniectus erat, nondum tamen planè de suscepta incendii spe deiectum se ostendebat: posse & paruam scintillam in magnum incendium tolli: suspicari se tantum ignis atque tædarum huiusmodi lignorum ac aridorum præsertim strui admotum non sic abiturum. quod si minus tamen nunc successisset, sequenti nihilominus die denuò ignes inferri iussurum: omniaque interim maiori diligentia præparaturum. Ab altera parte Vngari irruptionem, quæ ab ipsis aditus in vallum patefactus erat, flagitabant. Samoscus, quòd arduus indeque præceptus locus erat, ad Regem se relatuum ostendebat: interim in omnem casum, quis ordo irruptionis seruari deberet, si tentanda Regi videretur, disponebat. Moscici interim in tam ancipiti discrimine versari se videntes, contra os, per quod Vngaros irrupturos metuebant, crebra tormenta collocabant: ab altera parte incendio quibuscunq; poterant modis contraueniebant. sed nulla omninò restinguendi eius ratio ostendebatur; quòd vt quisque ad opprimendam flammam turrim ingressus fuerat, foetore atque fumo protinus exanimabatur. Cum quò diutius ignis suppressus esset, eò maiores vires cõcepisset, de secunda vigilia magna flammaram vi per cespitem subitò erumpente incendium sublatum ædem saluatoris, quæ proxima pro-



pugnaculo erat, corripuit; indeque per pinnacula per-  
 uagatum reliqua priuata ædificia populari cœpit. Sa-  
 moscius, quòd exercitum hostiũ in propinquo esse scie-  
 bat, excubias aliis nouis de exercitu adiectis mox fir-  
 mat: præsidia equitum supra Vngarorũ & Polonorum  
 munitiones disponit: in mediis castris in equis omnes  
 consistere iubet: ad easque Stanislao Solkeuio relicto,  
 ipse ad Vngarorum munitiones se confert. Interim vt  
 & tot hominum vitæ parceretur, nec munitiones, tor-  
 menta, ac apparatus bellicus reliquus, præda deniq; mi-  
 liti debita incendio corrumpere, ad deditiõem Mo-  
 scos hortabatur. Obsessi in extremo rem suam versari  
 videntes, primario ad illum sacerdote misso conditio-  
 nes nihilominus, tamquam integris rebus, propone-  
 bant. Samoscius retento penes se sacerdote, Paulum  
 Iulanum cum Ioanne Christophoro Droiuio ad eos  
 mittit, qui quo loco res eorum sint doceant, vnamque  
 deditiõis conditionem esse, vt clementiæ Regis se per-  
 mittant. Inter hæc cum illuxisset, simul Rex ac plerique  
 fenatores ex superioribus castris accesserunt. Confluxit  
 & lixarum ac calonum ad spem prædæ non exiguus  
 numerus; iamque pars per vallum nitebatur. quod con-  
 spicatus Vngarus miles, fremens expertes laborum ac  
 periculorum oppugnationis ad prædam conuolare:  
 tandemque ab hoste quoque crudelitatis ac sæuitiæ  
 pœnas exposcendas, illiusque etiam sanguine tot com-  
 militonum mortibus, multorumque sæuissimè ab illo ex-  
 cruciatorum suppliciis parentandum dicens: dum in-  
 ani clementiæ studio iam toties illi parcitum sit: dimis-  
 sum ad Polotiam, Susam, Velisium, Vsuatam, per alia  
 præsidia distributum: vires eius auctas, crudelitatem-  
 que magis confirmatam, in arcem irrumpit: promi-  
 scue omnes interficit. Idem Polonus miles facit. Mife-  
 rat iam antea Samoscius, qui Palatinos primariosque  
 præfe-

præfectos deducerent. Adducti ab ijs fuerunt præfecti  
 tres, Ioannesque Viechovus, de quo supra dictum est.  
 de eo cum vt homine magna apud Ducem gratia, se-  
 cretorumque omnium conscio diligentius Samoscius in-  
 terrogasset; ille more Moscouitico ad supplicium & cru-  
 ciatum se queri existimans, longius è conspectu Samo-  
 scij versus castra productus, conspicatus in proximo  
 Georgium Farensbekium, cum quo in Moscouia noti-  
 tia illi intercesserat, ad eum vitæ deprecandæ causa se  
 proripuit. Id fugam Vngarus miles interpretatus, subi-  
 to in eum impetu factò, nullo opem ei ferre valente e-  
 um interfecit. Iam ignis ad fornices, in quibus pulue-  
 res tormentarij asseruabantur, peruenerat. quo pericu-  
 lo oblato pars se subducebat, nonnulli à præda & cæ-  
 de nullo periculi metu auocari se passi in arce remane-  
 bant. inter quæ subito ingenti fragore edito, puluis in-  
 census fuit; magnamque cum vicinorum ædificiorum,  
 tum hominum tam nostrorum, quam captorum stra-  
 gem fecit. Eo igne tormenta simul, & quicquid in arce  
 armorum erat, quorum ex Liuonicis manubiis magnũ  
 numerum eò Moscus congefferat, instrumentumque mili-  
 tare, ac reliqua præda omnis partim exusta, partim cor-  
 rupta fuit. Ex maioribus tormentis vnum solum acci-  
 pitris imagine, ac circa id minora nonnulla, quæ loco  
 inferiori dirutis ædificiis contra os, per quod Vngari ir-  
 rupturi erant, disposuerant, reliqua ignis fecit. Mortu-  
 os, quorum passim magni acerui iacebant, à lixis sepeli-  
 ri: fossas è quibus oppugnata arx fuerat, à milite sup-  
 pleri Rex iussit. Indè arcis restaurandæ muniendæque,  
 quòd sine ea regionem agrumque ab hoste captum nul-  
 la ratione retinere se posse videret, summam curam su-  
 sciendam sibi intelligebat. Itaque adhibito archite-  
 cto Italo Dominico Rodolphino Camerte, secundum  
 eam rationem, qua ipse opus dimensus erat, in Polonos,



Vngaros & Lituanos, æmulatione nationum eò citius perfectum iri existimans, id partitur. Erat, quemadmodum supra ostensum est, exercitus hostium ad Toropeciam; qui, quemadmodum iussus erat, prælio dimicare in animo non habebat: in singulos saltem, si quos forte ab exercitu frumentandi, aut pabulandi causa digressos, excipere posset, intentus erat; Regeq; obsessione ad Lukos occupato, quinquaginta circiter è nostris earatione oppresserat. Huic rei cum obsidione iam finita occurrendum Rex existimaret, primum Georgium Barbelium Vngarorum equitum alæ præfectum, Polonis aliquot, ac Vngaris equitibus, scloppetariisq; ei attributis, contra hostem mittit. postea præstare ratus, si iustas copias mitteret, quæ pugnandi potestate ab hoste facta, occasione data fortunâ tentarent, Ioannem Sbarassum Palatinum Braslaviensem cum delectis ex omni Polonorum, Vngarorum, & Germanorum equitum numero mittit. Huic mandat, ut assumpto Georgio Barbelio, & qui cum illo præcesserant equitibus, propius ad hostem accedat: ac si qua rei gerendæ opportunitas detur, prælium comittat. Sbarassus sub vesperam castris egressus per totamque noctem itinere continuato, postero die Barbelium assequitur: communicatoq; cum illo ac Farensbekio consilio, quem Samoscius tunc aduersa valetudine impeditus, cum præcipua iuuentute ex comitatu suo miserat, relictis eo die ex labore iumentis sub noctem Albertum Kiralium, cum certo equitum Polonorum & Vngarorum numero de secunda vigilia præire: eum vnus miliaris intervallo cum ala equitum Barbelium sequi iubet: cum reliquo agmine mox ipse subsequitur. Kiralius noctu progressus in hostium excubias incidit, quas ad pontem, circa quem scloppetarij aliquot hostium in insidiis confederant, persecutus; ijs relictis, quòd intempesta nocte non ulterius progredi-

grediendum sibi statueret, eo loco se continuit. Mane Barbelius, ac paulò post reliquus exercitus cum consequitur. Adiectis aliis nonnullis levis armaturæ militibus denuò Kiralius præmittitur. Exercitus interim hostium, delectis ex omni suo numero quater mille circiter, qui nostros insequentes morarentur, ac demum ipsi quoque subsequerentur, Toropeciam versus, & in Moscuiam se recipiebat. Vltimi cum de aduentu exercitus nostri cognouissent, territi, continenter & non minus celeriter ipsi quoq; eundo faciebant, ut fugæ consimilis profectio videretur. Antecedebant exercitum ex nobilitate quadraginta circiter equites, & ad Kiralium iam peruenerant. Hostes flumen iam transgressi erant, instructaq; acie, si nostri flumen transirent, ut prælio cum illis decertarent, expectare videbantur: mille equitibus cis flumen relictis, qui nostros distinerent, ac in suum locum pertraherent. Hi partim velitando, partim cedendo ad flumen eos pertrahunt. in cuius aduersa ripa scloppetarios longo ordine disposuerant. Illis à Stanislao Sabocio, ac equitibus Germanis, qui sub illo merebant, deiectis, nostri transmissio flumine, reiectisq; hostium scloppetariis, à latere in aciem hostiû invehuntur. Illi primum ad resistendum se comparantes, mox alia signa ac maiorem exercitum aduenire conspicati, ne vnum quidem impetum eorum tulerunt: pars Toropeciam fuga petiuit: nonnulli via regia Moscuiam versus fugerunt; alij in proximas paludes se abdiderunt. Nostri, etsi nox iam appetebat, per quindecim tamen ferè millia passuum ultra Toropeciam hostem insecuti, ultra quingentos in fuga ea conciderunt: ducentisq; captis, ac in his maximè insignibus Demetrio Ceremessino, de quo supra dictum est, ac Ioanne Nassokino Offanasi filio, quem paulò ante discessum Regis Vilnam pro legato ad Regem missum fuisse ostensum



est, paucis è suis desideratis aut vulneratis ad exercitū redierunt. Toropecienfes præfidiarij cū propiūs accedere nostros vidissent, rati ad obsidendos se venire, more suo statim opidum exusserant; omnibusq; rebus comportatis in arcem se receperant. Interim Philo Kmita Palatinus Smolenscensis non exigua leuis armaturæ equitum manu coacta, in agrum Smolenscensem excurrerat, secundisq; populationibus aliquot inuitatus Smolenscam longiūs progressus fuerat. Sed cū ad decem millium exercitu coacto vehementer eum hostis premeret, captiuis, quos circa se habebat, interfectis, & leuioribus aliquot tormentis relictis recipere se Orsam coactus fuerat. Iam cū Vsuata Rex esset, Nicolaum Dorohostaiscium Palatinum Polotensem ad Neuelam oppugnandam, miserat; quod ea via à Lukis regredi constituerat; Dorohostaisciusq; ipse ac pro eo Lituani partes eas deposcerent. Sita Neuela est supra Lukos Lituaniam versus in complexu lacus, ex quo eiusdem nominis fluuius se deriuat, iam antè sub Sigismundo Augusto Polonorum cum Moscis pugna nobilitata. Cū pro numero præsidij non satis multi milites, iique in hoc genere belli nunquam ante hac versati conuenissent, ab eaq; parte qua lacus castrum alluens difficiliorem oppugnationem faciebat, loco minùs opportuno obsidere eam instituisent; hostis etiam continentibus iaculationib. & eruptionibus paucitate eorum contempta, acriter se defenderet, huc usq; obsidio ducebatur. Lukis in potestatem redactis, primùm ex atratis quingentos eò Rex misit: haud multò post etiam Ioannem Bornemissam cum Vngarorum cohortibus, & maioribus tormentis aliquot: tandem sollicitus de euentu obsidionis, quòd iter, quemadmodum dictum est, facere illac constituerat; Samoscium cum ijs quas habebat copiis ire eò iussit. Hic, cū aliquot

aliquot iam millia progressus fuisset, nuntium redacti in potestatem præsidij in itinere accepit. Bornemissa enim, postquam eò venisset, ex priori nostrorum paucitatis contemptione hostibus erumpentibus, manu ipse cum ijs congressus, nonnullisq; interfectis intra munitiones eos compulerat: Inde magna diligentia in oppugnationem incumbens, ab ea parte qua cum continente coniungitur, proximè hostium munitiones maximo militis labore fossas promouerat: veteres, à Lituano milite propiūs institutas, auxerat. cumq; continuo militis labore ad fossam, quæ à continente castrum ambiebat, opus promouisset, progressu in validas contignationes transversis lignis confibulatas incurrerat; quibus decem pedes in latitudinem ab ima parte ad summum vsq; superiniecta humo labrum fossæ hostes munierant; indefessoque studio securibus materia tandem amota, tanto silentio ad munitiones hostiū peruenerat; vt non prius ab illis sentiretur, quàm miles ad incendendum parietem missus, mœnibus ignem subiiceret. Qua re ita hostes perculsi fuerunt, vt subitò ne quicquam reclamantibus præfectis deditioem facerent: Itaque oppresso mox incendio integra in potestatem venit. Tormentorum ac reliqui instrumenti militaris pro captu castelli iustus apparatus: pulueris tormentarij præter diligentiam Moscouiticam prouidendorum præsidiorum, quod in nullo adhuc euenerat, non plus dimidiato vase repertum in eo fuerat. Rex nuncio hoc deditioem accepto iam de discessu suo ac de statu Prouinciæ captæ constituendo cogitans, ex itinere Samoscium reuocat. Duo omninò è propinquo præsidia, Toropecienfe, ac Sauolocienfe imminebant, quæ vniuersæ ditionis eius possessionem turbare ei poterant. Plebe præterea rusticana, vt in nouo imperio infida: Lituaniam versus maximis ac vastissimis solitudinibus interiectis, Toropecio



ropecio & Sauolocia infestis relictis, præsidium ipsum vndique ab hostibus & difficultatibus obsessum, ab omniq; subsidio interclusum non satis tutò ibi futurum intelligebat. Sauolocia præterquam quòd Lucensi præsidio maximo incommodo futura erat, cogitanti iam de futuri anni expeditione, necessariò etiam occurrebat. in insula enim lacus, ex quo Velika fluuius se deriuans primò Opockam, indè Ostrouiam, ac deinceps rectà Plescouiam, atque infra eam in lacum Pelbam influit, tanquam in capite viæ Plescouiensis sita, Plescouiam, quod suscepti belli series postulare videbatur, eunti, non exiguam moram obiectura ei videbatur. Quod eò magis præcauendum illi erat, quòd si per continuas rursus filuas Polotia Plescouiam contendentem hostis, quod hætenus omisisset, itinere fortè prohibere institueret, eum locum magnam ad eam rem facultatem illi præbere: eo verò si potitus fuisset, nihil Plescouiam ferè vsque præter Ostrouiam futurum intelligeret, quòd iter eius morari posset. Occurrebat omnibus hisce reb. cùm oppugnationis difficultas, quæ summa proponebatur; quòd Sauolocia maximo lacu vndiq; circumfusa, nullos omninò è terra nisi per pontem vnum accessus habebat: tum anni tempus ipsum, quod iis in locis mense iam Octobri aliàs pluuium eò maiores tempestates atque incommoda allaturum existimabatur, quòd minùs imbrium proxima ætas habuisset. Mittit nihilominùs Samoscium huiusmodi cum mandatis, vt consilium ipse pro tempore capiat: ac potiendæ quidem eius spe oblata, exercitum ei ad moueat; ab omni spe deiectus, itinere supra se à dextera capto Lituaniam versus se recipiat. Illi aucto tormentorum numero ad reliquas copias, quas habebat, quingentos pedites Vngaros, & alam equitum quam Gabriel Bekefius Gasparis defuncti frater ductabat, attribuit.

attribuit. Perfecta interim munitione arcis Lucensis, cùm Rex consuetudine sua ipse semper ad opus esset, militesq;, ne quod tempus ab opere intermitterent, hortaretur: eaq; tormentis, commeatu, ac omnibus ad defensionem necessariis rebus prouisa: descriptisq; qui in præsidio manere debebant, tam equitibus, quam pedibus ternis castris Neuelam inde Rex peruenit. Secuti Regem Neuelam fuerunt legati Moscici; qui excidii Lucensis ipsi spectatores fuerant, & tum ad literas, quas scriptas supra ostensum est, responsa à principe suo expectabant. Neuelæ per aliquot dies, vt Sauolocensis oppugnationis euentum expectaret, Rex substitit. Interim tabellarij & Regis & legatorum ab obsidione Lucensi in Moscouiam missi reuertuntur. Qui à Rege missus fuerat, longissimas literas attulit, in quibus superiorum literarum omnium argumento, more suo longa oratione repetito, quia Liuoniam à rege vniuersam repeti intelligeret, vt quo à se iure possideretur, ostenderet, à Suentoslaò quodam Micislai filio, genus suum deducebat. Eum antequàm sacro baptisinate Christiana religione initiatus fuisset, Iurg vocatum: ab eoq; Iurgo Horodum, quam arcem & urbem aliàs Derpatum Germani appellarent, conditam: indè cunctam Liuoniam ad se vnicum Micislai eius hæredem longa successione pertinere. Priores Poloniae reges fratres appellare solitus fuerat: hunc non nisi vicinum: Inter alias condiciones, quas ad Lukos à legatis eius propositas supra ostendimus, fraternum quoque nomen Regi detulerat. Responderat tum Rex, fraternitatem eius se non morari: Liuoniam, pro qua bellum suscepit, solam petere. Iam hisce literis fraternam illi necessitudinem deferebat, ac etiam eò inuito nomen hoc ad illum vsurpaturum se ostendebat. summa hæc erat, vt publicæ concordie causa titulum Liuoniae cum rege se com-



se communicaturum, quatuor præterea castellis eius, in quibus Kokenhausium præcipuum erat, cessurum se illi demonstraret, si Rex vicissim Lukos, Velisium & Neuelam vetustæ ditionis suæ, nuper sibi adempta redderet: ampliora mandata se legatis suis perscripisse. Hi postridie ad Regem adducti, cum senatoribus agendi potestatem dari sibi petierunt. ter cum iis congressi tribus proximis diebus, alia sex ad priora quatuor castella adiecerunt; in quibus Runeburgum potissimum, cætera ignobilia castella erant. Nulla alia mandata deinceps iis proferentibus, re infecta à colloquio recessum, permissumque illis fuit, ut in Lituaniam, inde in Poloniam Regem redeuntem sequerentur; dum noua à Principe suo mandata acciperent. quod ipsis vltro petentibus eò libentius Rex permisit, quòd sibi quoque interim, quis ordinum de futuro bello animus futurus esset, cognoscendi spatium dari non molestè ferebat. Captis Lukis & Neuela, Ieseriscia, quindecim à Neuela millibus passuum, tamquam sinu nostrorum præsidiorum vndique cincta relinquebatur. Qui in præsidio erant ab omni defendendi sui spe interclusos se videntes, deditiois spem Regi fecerunt. Itaque missus eò Radiuilus Palatinus Vilnensis, antequam Neuela Rex discederet, in deditioem eos accepit. Interim Sauolociam cum exercitu Samoscius peruenit. Totus autem ille tractus, cum per apertos ac patentes campos frequentissimasque villas iretur, non mediocri voluptate omnes affecit. Moscouitica enim ditio ut finitima, quemadmodum ostensum est, siluestris pleraque est; ita mediterranea bonitate agri, glebæ vbertate, fluminum ac lacuum plerisque in locis opportunitate, villarumque frequentia nulli cedit. Lucensis verò ager rebus iis cæteris ferè omnibus etiam præstat: vnde dum ad Lukos exercitus erat, in summa omnium rerum copia erat,

Oppi-

Opidum Sauolocia, quod ad Pleseouiensem Lucensemque viam fuerat, sub primum Regis ad Lukos aduentum præsidarius miles more suo deleuerat; pontemque qui ab arce ad opidum pertinebat, interciderat. Arx sita, quemadmodum antè demonstratum est, in lacu est. qui à Velika fluuio effusus, abque omnibus partibus latissimè restagnans, latissimas tamen ab oriente & occasu aquas habet; quòd inde ex alio superiore lacu flumen erumpens, occasum versus exitum habet. quæ angustissimus est; non minùs trecentos passus in latitudinem patet. Samoscius præmissis Christophoro Rosdraseuio cum alis aliquot equitum in Pleseouiensem viam, alteram que ad Neuelam pertinebat, Lucam Dzialinium, ac Nicolaum Vrouecium obsidere: ac si qui ex Neuelanis dediticiis ad præsidium id, quemadmodum facere solebant, adiungere se vellent, id ne faciant, ac in vltiorem Moscouiam se recipiant, adigere eos iubet. Ipse ab exercitu Sauolociam præcurrens ambitu capto, abque omnibus partibus arce circumita, reperit notum versus, aliam eodem in lacu contra castrum insulam esse; quæ à plerisque partibus lacu, ab aliis vliginoso amne ac natiua fossa defenderetur: eadem breuissimum ad arcem traiectum esse. Itaque cum si eò exercitum traduceret, vtrumque se consecuturum intelligeret, ut & contra quasuis vel maximas copias hostium tutissimo loco consideret: & eodem ex loco maximam oppugnandæ arcis facultatem haberet, quàm latissimè ad maioris exercitus speciem hosti obiciendam signis explicatis sequenti die exercitu omni illum in locum traducto, castra communiit. Omnibus maximam difficultatem oppugnatio habitura videbatur, arce ab omnibus partibus propter aquas inaccessa, opere præterea munita, anni tempore incommodissimo, quo pluuiis, frigore, gelu, quæ in propin-

M                      qua



qua expectatione iam erant, continuo miles transfere-  
tur: Samoscius non plane tamen desperandum puta-  
bat. Itaque quae ad oppugnationem pertinerent, admi-  
nistrare coepit. Erant e regione castrorum nostrorum  
tria propugnacula ingentis magnitudinis: extrema  
duo ex maximis robustissimisque trabibus contigna-  
ta: medium minus aliquantò: fenestris ad tormento-  
rum usus, quemadmodum & reliquorum laterum pro-  
pugnacula omnia apta. Haec quòd non cespite vestita,  
sed veteri more argilla incrustata erant, magnam in  
spem Samoscium adducebant, fore, ut decussa argilla  
& facillimè, ut materia veteri & arida, nulloque humo-  
re nutrita incenderentur: & incensa propter tantam li-  
gnorum struem quàm latissimè incendium propaga-  
rent. Alebat spem eius Saburovi, magna ob virtutem  
inter Moscos & apud Ducem autoritate viri, arcisque  
huius praefecti institutum; qui quòd vel pulverem tor-  
mentarium frustra consumi, vel militem fatigari no-  
lebat, summo silentio, quod non nisi in maximi metus  
significatione à Moscis fieri soleret, se suosque intra muni-  
tiones continebat. quamvis sub primum exercitus ad-  
ventum decem circiter pabulatoribus nostris, quos op-  
presserant, minutim concisis, atque ex arce iis praecipita-  
tis, terrorem aduentanti militi incutere ea immanitate  
conatus fuerat. Samoscius ratis interim, quae contis ad  
arcem adigeretur, militique ad oppugnationem tendenti  
transitum praerberet, Nicolao Vrovecio iungendae ne-  
gotium dat. simul munitiones fossasque à castris contra  
arcem duci iubet. quibus postridie magno opere perfe-  
ctis, tormenta mox constituta fuerunt: rateque interea  
temporis ex altiore quodam aedificio, quod reliquis in-  
censis solum hostes reliquerant, ab Vrovecio perfecta,  
primum tormenta complura, ab ea parte, qua angustis-  
simus lacus erat disposuit: e quibus rectis à fronte ieti-  
bus,

bus propugnacula, de quibus dictum est, ferirentur: a-  
lia deinde à latere, quo meridiem arx spectat; ne & per  
auerfam portam hostes erumpere, nostrosque pon-  
tem transgressos, ac à fronte arcem oppugnantes, cir-  
cumuenire possent; & simul, si qui in superioribus pro-  
pugnaculis constitissent, ut directis secundum latera  
ictibus tormentorum indè deiicerentur. quibus rebus  
administratis, oppugnationem ordiri constituit. Erat  
ab ima arcis radice acclivis versus eam ascensus, quem  
hostes vna altissimorum palorum sepe, binisque ingenti-  
um & acutissimorum ceruorum ordinibus, iusto inter  
singulos spatio relicto, obseperant. Contra ea haec Sa-  
moscius comparabat. quia lana destituebatur, cento-  
nibus stragulisque equorum per vniuersum exercitum  
conquisitis, quàm plurimos ex iis saccos implet. Docet  
militem, quia loci natura à maiorum tormentorum vi,  
quòd ea deorsum mitti non possent, satis illum defen-  
deret, contra scloppetos, postquam in aduersam ripam  
transiisset, saccos eos supra ceruos iniiceret; sub iisque de-  
litescens, fossas mox ab ea parte sub arce ageret; ex qui-  
bus deinde & hostem extra munitiones suas progressum  
reiiceret, & ignem in propugnacula inferret. His rebus  
ita constitutis, ratis ab eo loco, quo iusto à castris inter-  
uallo, instituta erat, contra arcem protracta; magnoque mi-  
litum concursu certatim in id omnibus incumbentibus,  
inter creberrimas, quae ex vtrisque munitionibus fiebant,  
eiaculationes, in aduersam ripam directa fuit. sed quòd  
breuior, quàm ut pertingere eò posset, reperiebatur, v-  
trinque tum ita discessum fuit. Christophori tamè Rosdra-  
seui, praefecti Lanciciensis, magne virtutis & nominis vi-  
ri casu non mediocre à nostris detrimentum acceptum.  
Hunc dum ratis applicaretur, ad tormenta, quòd recti-  
us sibi omnia administrarentur, curare Samoscius ius-  
serat; ille cum nihilominus procurrisset, globo ex ho-  
stium



stium munitionibus supra dextrum oculum excepto concidit. inde ratis ut corrigatur, à peditibus Polonis retrahitur. quos dum hostes continentibus tormentorum ictibus ex arce petunt, qui funem regebant, perculsi eum dimittunt. Id conspicati tres alij è proximo pedites, cum tenere illam aliter non possent, in ratem insiliunt; ventoque vehementiore abrepti ad hostium munitiones secundum proxima propugnacula deferuntur. Videntes hos Mosci aquis ab exercitu omni ex parte interclusos, nauigiis plerisque que in arcem omnia subduxerant, inscensis, magno numero ad eos contendunt. Hi acriter primum scloppetis, inde contis se defendunt, compluresque ex hostibus deturbant: tandem cum undique circumuenirentur, proximis cymbis è quibus hostes deiecerant, arreptis, in eas desiliunt, rateque relicta euadunt. Interim eodem vento in aduersam ripam ratis ferri coepit. inquam cum persequenda eius finem nondum hostis faceret, Samoscius equitibus aliquot summissis eam recepit. Rate eodem die resecta cum ex superioris temporis casu miles perterritus, quem antea præmiis ad promouendam eam Samoscius prouocarat, minus promptus iam ad ministeria hæc cum periculo obeunda esset, Nicolaum Vrouecium necessarium suum ratem conscendere, saccoque vno ex iis, de quibus diximus, ante se collocato, dirigere in aduersam ripam eam iubet. Vrouecius impigre imperata exequitur: aliquotque gregariis militibus post se collocatis, ipse ab anteriore parte easola, quæ demonstrata est, ratione tectus, creberrimosque globos obiecto sacco excipiens, stationibus hostium, quæ in extrema ripa excubabant, fuga in arcem se recipientibus, ad ripam ratem adigit. Miles & imprimis Vngarus confertim, quemadmodum iussus erat, pontem transgressus, sepe à ripa obiectam securibus primum scindebat: mox inde, quò celerius labore perfunge-

fungeretur, cum alienissimo anni tempore omnia pericula frigoris ac aeris iniuriis leuiora duceret, fassis incruos non iniectis, nullis fossis ductis, aut vlla re earum, quæ imperate erant, administrata, argilla necdum decussa, ad ignem propugnaculis admouendum conuertitur. Non obscuram iam timoris & trepidationis significationem hostes dabant. verum dum hi longo temporis spatio cruos moliuntur, quorum cum bini essent ordines, singulorum ordinum denum ad minus pedum latitudo erat: dum Georgium Sussium, qui faces ac ignes adferat, trans lacum mittunt: dum alia, que ei rei vsui sint, administrant, hostes recollectis interim animis, auersis omnibus portis erumpunt: integris curatisque corporibus nostros præ frigore & gelu ad rem gerendam penè inutiles circumueniunt: longissimis hastis, acutoque & falcato ferro armatis, bardeschos ipsi vocant, breuiore armorum genere, ac frameis saltem vtentes propellunt: pars cæditur: pars in turba mutuo se impellens in lacum præcipitata aquis mergitur. Samoscius & si deliberatum iam habebat, omnes potius acerbitates perferre, quam cceptam oppugnationem dimitteret: diei tamen huius successu territos plerorumque animos ratus, consilio habito, quid in quoque ad futura pericula animi esset, explorare constituit. Consilio eo habito, vix vnus repertus fuit, qui habendam rationem temporis, fortunæque concedendum, à quarum neutra iam subleuarentur, censeret. à reliquis omnibus vox nulla audita fuit, superioribus successibus suaque virtute indigna; principioque à Farensbekio facto, quiduis potius perferendum, quam infecta re ab obsidione discederent, omnes statuerunt. Misit mox Samoscius Georgium Sibricum cum literis ad Regem: ne incommodo hoc in oppugnatione, nimia militis propeparatione accepto permoueatur: ne ab obsidione se reuo-



cet: neu sua causa diutiùs Neuelæ subsistat, rogat; castra se posuisse ad obsidionem ducendam aptissima, cum loci natura ac munitione, tum circumiacentium regionum fertilitate & abundantia: nihil sibi vel ad maximas quasque copias hostium sustinendas loco tutissimo, vel in agro frumentis, pecore, materia, aquis abundante, ad omnium rerum usum deesse posse. Hærebat Rex adhuc Neuelæ loco, quòd superioribus stationibus & Kosakkorum direptionibus vastatus esset, quibus ex rebus commeatus ac pabuli inopiam existere necesse erat, imprimis incommodo. Sub idem verò tempus ab aëre etiam contagium quoddam, quod primum ex Orientis partibus profectum, in Italiam inde ac Galliam, aliasq; regiones perlatum fuerat, vniuersam quasi Europam peruagatum Cracouiam quoq; ac Vilnam, atque inde ad exercitum peruenerat. Erat id non tam lethali aliqua vi timendum, quàm progressu atq; celeritate, qua proxima quæq; loca complectebatur, admirabile. Primò inferiorem dorsi spinam horrore plerumque occupabat: inde in capitis grauedinem & languorem, quos corripuerat, resoluebat, pectori imprimis graue. quibus tamen intra quartum vel quintum diem non decessisset, eos in febrem degenerans interimebat. Iethale ferè iis, qui purgantibus medicamentis, aut venesectione utebantur. quod vtraq; respirationem grauiorem efficiebant: illa quòd humorem omnem à capite in pectus magna vi trahebant: hæc, præterquam quòd corpus refrigeraret, debilitaret etiam vires, quibus ad respirationem opus esset. Nomen vt nouo morbo certum nullum inuentum fuit. Rex ad eas copias, quas antè Samoscius habebat, nongentos equites Polonos, ac mille circiter pedites Vngaros cum Stephano Carolo ei adiecit, moxq; Vilnam mouit, Polotiæ eo, de quo dictum est, morbo, ipse etiam tentatus. Samoscius

scius interim, quæ ad oppugnationem pertinerent, summo rursus studio apparare instituit: ratem quamuis ex satis magnis trabibus in latitudinem contabularam, quòd latior tamen & expeditior ad arcem accessus militi esset, duplicari iubet. Nauigia cimbasq;, quòd pluribus circumfuis omnib. ex partib. oppugnatio administratur, viresq; præsidij quàm maximè distrahantur, per vicinas villas ac stagna magna diligentia conquirunt. Reliquis omnibus nauigiis subductis, vnum solum hostes reliquerant. Id cum Monachorum loci eius fuisset, ac ad maiorum retiorum usus comparatum octuaginta ferè hominibus capiendis idoneum esset, quia tamen vetustate vitium fecerat, rimarumq; plenum esset, neglexerant. Samoscius quà patebat partim recentibus coriis bubulis, partim musco obstructo, vt commodè nauigari eo posset, effecit. Iisdem temporibus, cum intellexisset, Ioannem Suiscium Petri F. Palatinum Plefcouensem cum exercitu ad Porchoviam confidere, Martinum Volscium veteranum præfectum cum expedito equitatu exploratum comisit. Suiscius, quòd de discessu Regis audiisset, neq; per anni hoc tempus alium exercitum expectaret, dimisso exercitu Plefcouiam se receperat. Itaque accidit, quod euenire necesse erat, vt in nulla periculi expectatione incuriosius omnibus agentibus, ac sine metu commeantibus complures Volscius opprimeret, missisque agrestibus, quibus parcere à Samoscio iussus erat, nobiles aliquot captiuos secum in castra adduxit. Rebus iis, quas diximus ad oppugnationem comparatas, decem omninò diebus perfectis, Samoscius maiori nauigio, quod relictum ab eo ostendimus, militaribus viris aliquot assumptis lacum inuectus, quibus partibus maximè opportuna oppugnatio futura esset, accuratiùs cognoscit. Tormentis tria, quæ contra castra esse diximus, propugnacula,



cula, quò & argilla deterfa magis incendio paterent, & materia dilacerata apertis quasi venis celerius ignem raperent, continuò quati iubet. Cùm peditatus propter tempeftatum etiam iniurias, contra quas minus tectus erat, nec animorum nec virium fatis habiturus videretur; nobilitas equis missis, coniuratione inter fe facta, ad arcem duci se flagitabat. Coniungebant se cum his pari studio, qui sub Farensbekio militabant equites, nobiles nonnulli Germani. Samofcius in media acie, qui cum facibus ac tædis ad incendenda mœnia expediti essent, collocatis, à dextro cornu, contra quod superius propugnaculum oppositum esset, Polonos & Germanos: à sinistro ad alterum propugnaculum Vngaros, qui vtrinque à media parte ignes inferentibus, contra eruptiones præsidio essent, constituit: Polonis Vrouecium præfecit, illique in omnes casus Andream Orehouium substituit. Cum Germanis Ottonem Vxkelium Farensbekius misit. Ratem ab vtroque latere fassis, de quibus ostensum est, contra transversos minorum scloppetorum ictus muniri iubet. Ea adducta inter confertissimas hostium eiaculationes in aduersam ripam applicatur; tempestatéque sub idem tempus commutata, post continentes imbres cum serenitate maius pugnandi studium omnibus incessit. Iam primi ratem transferant: simul navigia milite, tormentis ac facibus instructa, omnibus ex partibus prouolabant: interim ex vtrisque munitioibus: magno cum hostium detrimento crebrè ex nostris eiaculationes fiebant. Cùm subito regias literas conclamare hostes cœperunt. Samofcius superioribus diebus propterea, quod cum Lucensi expugnationi magna ex parte præfuisset, tanquam crudelitatis eius authoris nomen suum horrore esse hostibus intellexisset, regio nomine atque signo, quod pro Cancellariatus munere pe-  
nes

nes illum erat, literas ad obsessos hoc argumento dederat. Iussisse Regem omni studio Samofcium in oppugnationem incumbere: quod si tamen vltro in deditio- nem venirent, pro clementia sua conseruandos statuif- se, ab que omni iniuria prohibitos velle: quæ quò dili- gentius obseruentur, cubicularium suum se mittere. Li- teras hæc reiecerant primò. postquam quid in illis ef- fet, edocti fuerant, ad sua præsidia Regem scribere de- bere responderant: hoc non eius iuris esse, in quo regiæ literæ reciperentur. Eas literas tum primùm voce, inde præfectis aliquot scloppetariorum missis flagitabant. Data illis fuerunt literæ fidesq;. Misit simul Samofcius Ioannem Thomam Droicvium, præfectum Premissi- ensem, qui arcem in fidem acciperet, Palatinosque ad se adduceret. Hic primò non Palatinos modò, verùm mi- litum etiam magnæ partis animos dubios adhuc repe- rit: tandem cedentibus timori militibus, Palatini relu- ctantes ad Samofcium adducti fuerunt. Dediticiis fi- des seruata fuit. matronæ præterea aliquot, quæ Lukis captæ fuerant, quòd ne pudicitia earum in tanta itine- ris longinquitate ac militum multitudine negligentius haberetur, verebatur, à Samofcio condonate: miranti- busque Moscis, ac vltro fatentibus, se eius ætatis atque formæ matronas nostris reddituros non fuisse, post- quam causam, ob quam id à Samofcio fieret, intellexe- runt, tum verò minus etiam mirum videri debere dice- bant, si in tanta morum diuersitate, fortuna quoq; dif- similis esset. Ita arx & loci natura munitissima, & ab omnibus rebus ad defensionem paratissima, anni tem- pore, continuis imbribus, ac gelu hostes iuuante in- tegra recepta fuit. Globorum candentium ne in hac oppugnatione vsus esse posset, Saburovus excogita- rat. Aliarum enim oppugnationum euentu monitus, parietem, quæ crassior erat, interciderat, ac vno solo tra-  
bum



bum ordine, quibus contextus erat, relicto, interiorem partem eius satis lato aggere, quem cratibus continebat, vestierat. fiebat inde, ut globi per tenuem parietem subito transeuntes in aggere haerent, ibique sua sponte tandem supprimerentur. Memoria inde Samoscius tenens Regem proximo anno per ea loca in hosticum ulterius progredi in animo habere, tormenta & grauiorem militaris instrumenti partem Sauolociae deponere constituit; Stephanumque Carolum cum Vngarico milite in arcem traducere omnia iussit. Hic veteri ponte, quemadmodum ostendimus, ab hostibus interrupto; rate, qua in oppugnatione miles usus fuerat, infirmiore, quam ut tantae molis tormenta promoueri per eam possent, alterius etiam pontis tam exiguo tempore efficiendi summa difficultate proposita, tormenta firmissimis, iisque pluribus rudentibus apta, quod vno rupto alij subsidio essent, per lacum ipsum, quae durissimum solum & maxime argillosum explorarat, cohortibus aliquot vngarorum in aduersa ripa collocatis, in arcem a munitioibus nostris traduxit. In praesidio Georgium Sibricum cum vngari militis parte relinquit: Farensbekium cum mille circiter equitibus latiore circuitu capto Opockam versus proficisci, conuersoque ad sinistram per Nescerdam itinere ad Polotiam rursus occurrere sibi iubet. Nam quod infra ad Velikam amnem sita ea esset, quae natura fluminis esset, cognoscere: si etiam oppugnanda proximo anno foret, situm eius eodem magis praecipuum antea habere cupiebat, quod eodem in loco sub Sigismundo rege incommodum acceptum memoria teneret. Eadem futurae expeditionis cura itinera quoque reliqua omnia; flumina, item, si quae nauigabilia essent, pleraque, ut explorata antea haberet, operam dabat. maxime quod lacum Vsciam esse acceperat, ex quo eiusdem nominis fluuius se deriuans in Vsciam lacum

lacum influeret, indeque mutato nomine in Dryssam lacum effusus eiusdem nominis fluuium efficeret, earumque potissimum opportunitate Sokolam a Mosco commeatu, aliisque rebus necessariis prouisam: diligentissime omnes meatus exitusque eius cognoscebat. Itinere inde ob imbrium ac frigorum iniurias, siluarumque, per quas ibatur, magnitudinem, ac pontium plerisque in locis inopiam aliquantulum incommodiore, luc praesertim de qua dictum est, exercitum affligente, ut pacatis tamen circumcirca locis omnibus tuto per Polotiam, Vilnam ad Regem venit. Dum Rex hoc rerum successu expeditione Lucensi perfecta in Lituaniam se recipit, Moscus, quod animi tristitiam aduersis rebus collectam discuteret, repudiata priore vxore; quod ipsius moribus toties ei licet, quoties libet, iam sextum tum maritus delectu puellarum publico indicto nouam induxit; idemque ex proceribus etiam, & consiliariis suis quosdam facere coegit. Delectus eius quemadmodum ex nobili quadam captiua, quae ipsa in delectu eo fuerat, cognitum est, haec est ratio. Proceres nobilesque omnes, qui filias aut propinquas nobiles aliqua formae commendatione in potestate habeant, edicto proposito, certo tempore omnes adducere iubet. Ad diem praeparata iam antea cum in usum domo spatiosa & ampla, per singula caenacula duodenos lectos habentia totidem puellae distribuuntur. ipse vno sene comitatus omnia ordine circumit: ut quodque ingressus est, solio iam antea instructo confidet: puellae in magno omnium principi suo placendi, ac ad eam fortunam perueniendi studio elegantissime omnes ornatae, ad genua eius ordine singulae aduolutae, sudario auro ac vnionibus contexto in genua iniecto discedunt. quam ex his maxime probarit, ducit: caeteras vel agris, vel pecunia donatas dimittit. Rex Vilnae paucis diebus commoratus.



tus, Grodnam proficiscitur. ac iam de futura expeditione cogitans, quod tardius comitia sibi habenda, tributumque si quod in illis scisceretur, ferius exactum iri intelligeret, ne quod gerendæ rei tempus dimittere cogeretur, priuatas interim rationes mutue sumendæ pecuniæ iam tum inibat. Præter Marchionem Georgium Fridericum in Prussia Ducem, Augustum Saxonæ, & Ioannem Fridericum Brandenburgensem principes Electores de mutuo in bellum hoc præstando appellat, quo factò, duas simul res consecuturum se videbat, vt & suam erga illos omnibus in rebus fiduciam ostenderet: & eorum in re aliena studio ordines inuitatos ad perficiendi pro suis commodis belli voluntatem eò magis accenderet. Credita ab illis pecunia ad certum diem, exactisq; iam comitiis allata, ac vltèrius deinde die prolato, ad tempus soluta fuit. Interim Kosakki Nifovii cum Ioanne Orisovio ab altera parte in Moscoviam Starodubum vsq; populationibus progressi, omni agro longè lateq; vastato, opidum ac extimas munitiones arcis quasdam incenderunt; indeq; ad Pocio-pouam excursionem facta, ab arce repulsi, præda tamen magna acta se receperunt. Proficiscentem Grodna Regem, Rigensium nuncij secuti fuerunt. Ciuitas ea à Sigismundo Augusto in fidem iis conditionibus recepta fuerat, quæ ius ac maiestatem imperij in eam regij ferè eneruare, magisq; ad ipsius etiam ciuitatis splendorem quàm vtilitatem comparatæ videbantur. Cùm Rex iis legibus sociam eam, quam subiectam habere mallet, iam antè superioribus etiam expeditionibus, missis legatis, de certis subiectionis conditionibus cum Rege egerat: reque Drohicini tandem in hoc itinere transacta, missus à Rege Ioannes Demetrius Solikouius fuit, qui ciuitatem in fidem acceptam, iureiurando in verba Regis obstringeret. Cùm primis de portorio constitu-

endo

endo actum fuerat. Nam cùm omnis negotiatio Rigensis Dunæ fluminis nauigatione ferè contineatur, eaque iam magna ex parte superioribus victoriis Regis expedita esset: præterque Kokenhausium, Ascherotum, Lenouartum, quæ eo tempore in hostium potestate adhuc erant, quod morari eam posset, nihil reliquum esset: summæ æquitatis Rex iudicabat, vt quæ res tanto publico cum molimento, atq; impendio perfecta, ad ciuitatis priuatorumque omnium fortunas maximam accessionem factura esset, eadem Reipu: commodum aliquod afferret: nec alia conditione commercia eò transferri volebat. Homines prudentes cùm sine vectigalibus & tributis non posse subsistere Rempub. intelligerent: rectissimè autem in iis prouinciis ea constitui, quæ armis recuperentur, conuenerunt tandem, vt portorium maritimum omnium mercium constitueretur: eiusq; prouentuū duæ partes Regi sine vlla conditione: tertia ciuitati in portus, ac stationum refectionem cederet. Relinquebatur in ambiguo de bonis, quæ Archiepiscopalis quondam iuris fuissent: de vallo contra arcem à ciuitate obiecto: ac aliis rebus quibusdam earum omnium definitio in regis in illa loca aduentū reiecta fuit. Dum in Moscouia cum exercitu Rex erat, Ioannes Tertius eius nominis Sueciæ Rex ad Naruam classem miserat. verum integris tum adhuc ab ea parte rebus Moscouiticis, piscatoriis aliquot ædificiis in litore exustis, re infecta recipere se coacta ea fuerat. Interim Varsauiam ad comitia Rex venit. Ordines vt hunc rerum successum omnib. modis vrgeant, ac non letentur modò victoria, sed ea etiam vtantur hortatur: si vniuersam Moscouiam, ac amplissimum illud regnum vel appetendum vel sperandum non arbitrentur, cuius tamen maxima spes iam illis ostendatur, eòusq; saltem in armis maneat, dum Liouoniam vniuersam, quam ab initio iam præmium belli

N

huius



huius sibi proposuissent, dignam & laborum suorum mercedem, & ad posteros virtutis monumentum relaturi adiungant: magnum incommodum in eo esse docet, quòd ipse quotannis ad comitia tributi causa obeunda in regnum reuocetur: militem continuis itineribus confici: hosti respirandi suiq; colligendi spatium interim dari: quodq; tributa tardius exigantur, multas rerum gerendarum occasiones mora hac corrumpine-cesse esse. quibus incommodis quò obuiam eatur, vt biennale tributum sciscant, flagitat. Ordines tributum non recusare, à tempore, in quod flagitabatur, alieni videbantur. Priusquam autem ad vllam aliam rem accederent, capita rerum quarundam, de quibus leges perferri vellent, scripto comprehensa Regi offerebant, vtq; sancirentur, petebant. ita responsum fuit, vt que concedi posse existimabantur, concederentur: quædam interpretatione lenirentur: pleraq; in aliud tempus conferretur. Responso eo accepto, dierum aliquot spatium interiecto, idem quod antè iam scriptum tradiderant, nullis contra regiam declarationem rationibus aliis allatis, denuò tradunt. Rex ex senatu aliquot, pariq; ratione ex nuntiorum collegio aliis delectis, vt iis de rebus vtrinque moderatione adhibita dispiciant, negotium dat: quæ ab his communicatis sententiis proposita fuerunt, scripto comprehensa denuò nuntiis traduntur. ij diebus aliquot interpositis, idem quod antea fecerant, prius scriptum suum rursus Regi oblatum vrgent. Appetebat interim finis dierum comitialium legibus definitorum. itaq; certis conditionibus res tandem conuenit: constitutionesq; iis de rebus promulgatae fuerunt. Tributum indè primò simplex Regi permiserunt: postea Rege partim iis, quas ostendimus de causis, tum quòd præterea militi stipendium omne nondum solutum esset: apud Principes quos diximus, & alios

lios priuatos noua nomina fierent: nouum adhæc bellum administrandum esset, nulla ratione satisfieri eo sibi posse demonstrante, duplex ea prius conditione sciuerunt; vt si pax interim conuenisset, tributa quoq; cessarent: deinde iisdem argumentis à Rege illa refutata, vt collatis rationibus, quicquid stipendiis omnibus, ac ære alieno ob bellum hoc conflato, tum si quid deinceps in apparatus belli erogatum fuisset, exolutis, reliquum ex tributo eo futurum esset, in Rauense ærarium inferretur. Venerat huc, quemadmodum supra demonstratum est, legati Moscouitici, per vniuersam Poloniam tamquam in triumpho ducti. Hi nouis mandatis à Principe suo acceptis, denuò hinc ad colloquia admissi, primùm Neuelenses condiciones vrgent, quibus rei transigendæ à Lituaniis Senatoribus certam spem factam sibi dicebant. quibus cum aliis rationibus refutatis, tum quòd maioribus postea sumptibus à Rege factis, Sauolociaq; capta non integra amplius res esset, tandem more suo diu prius licitati eò descenderunt, vt ad alia, quæ antè obtulerant castella Liuoniae, vrbibus ac castris potioribus Felino, Derpato, Mariemburgo, Parnauia, ac Narua, Principi suo receptis reliquis omnibus Regi decederent. Rex nisi omni Liuonia, hostis decederet, alia conditione pacem sibi faciendam cum eo non arbitrabatur. Hæc sententia ordinibus proposita, publicè quoq; omnibus placuit. Adhibiti colloquio cum Moscis huic ex nobilitatis nunciis aliquot fuerunt, quòd tergiuersatione Mosci perspecta, tota de re ipsi plenius collegas suos edocere possent. Vtrisque in sententia permanentibus, infecta re à colloquio recessum fuit. Rex ita à comitiis discessit, vt biennij tributo ab ordinibus sancito, non prius pacem se facturum cum hoste polliceretur, quam is vniuersa Liuonia excessisset. Sub finem comitorum nuncij nobilitatis per Stanisla-



um Priemscium, quem à bello reuersum nobilitas maioris Poloniæ nuncium creârat, & tum nunciorum illud nobilitatis collegium initio comitiorum Marschalcum è more prodiderat, rege adito, vt remotis, quibus in senatum ingrediendi ius non esset, dicendi potestas sibi fieret, petebant; re impetrata, rogant operam dare Rex velit, vt ea expeditione bellum finiat: ita nobilitatem, maximè familias eius rusticas, quarum salutem sine suarum quisque fortunarum detrimento negligere non possit, tributis exhaustas, vt maioribus ferendis pares vix sint futuræ. Respondit Rex per Cancellarium; bellum pacis ac publicæ vtilitatis causa à se susceptum minimè ex instituto à se ali: hostem eò redactum, vt, si bellum continuetur, non adeò magno negotio confici possit: se tamen consentientibus ordinum studiis libenter concessurum: quàm primum que ad tradendam sibi Liuoniam hostem adduxerit, impetu que eius represso, reipub: otio ac securitati consuluerit, paci, quæ cum publica dignitate atq; vtilitate coniuncta sit, nullam moram facturum. Publicè indè more maiorum Regi valedicentes, vt de domesticis etiam rebus, ac intestinis incommodis sanandis cogitationem suscipere velit, rogant: nominatim de Regum eligendorum stabili aliqua ratione constituenda petunt; vt que iis de rebus, quàm primum commodo reipub: id facere possit, comitia habere velit. quò maius antea discrimen respub: adierit, cum partibus in diuersa studia scissis, in duos Principes Respu: distracta fuerit, eò nunc, postquam metu hoc liberata sit, ne idem periculum denuò subeat, diligentius prouidendum esse docent. Accedere huc controuersias, quæ inter sacrum & profanum ordinem intercedant; quarum & ipsarum non leuem rationem sibi ducendam, vt que omnes tandem tollantur, plurimum reipubli: interesse iudicent. Ostendit

dit Rex per eundem Cancellarium, non minori studio ad domesticas res rectè constituendas, quàm ad perficiendum ex sententia bellum se ferri: & qui bellicarum rerum laudem non aspernetur, eo maiori tamen domi benè constitutæ Reipu: quàm maximè diuturnæ memoriæ relinquendæ studio se teneri, quo sine hac ne superiorem quidem gloriam stabilem perpetuamq; esse posse perspiciat. De interregnorum ratione quoties cogitet, quanto in periculo superioribus temporibus Respub: fuerit, quibus electionum ac ambitionum studia ea tamquam fluctus quidam illam exagitarint; cum non minùs hanc, quàm in qua natus sit, omni studio sibi amplectendam, eò chariorem etiam habendam intelligat, quò maioribus honoribus atq; ornamentis susceptum se affecerit, cohorrescere se animo, agnoscere que non nisi singulari benignitate diuina in commodiorem statum eam peruenisse. Iam vt de certa electionū ratione deliberatio suscipiatur, intelligere se: si id fiat, quantum & in re ipsa difficultatis futurum: et si quod verendum videatur, occulta aliqua Reipublice vulnera ea nudet, incommodi indè metuendum sit: suam quidem operam atque authoritatem Reipu: ac ordinum voluntati non defutura. Idem de concordia inter Ecclesiasticum & ciuilem ordinem sese iudicare: nihil ea posse suscipi vtilius, atque ad Reipu: stabilitatem magis necessarium: sed vtramque ad rem consensu animisq; ob omni odio & affectione vacuis opus esse. Proinde sibi quidem summæ curæ ea fore: hortari autem ipsos quoq; vt animos ad deliberationes rerum harum sedatos, nulliusque alterius rei, quàm patriæ ac publicæ salutis & dignitatis studio deditos afferant. Hortatus indè quemadmodum & superioribus temporibus fecerat, vt per absentiam suam otio & tranquillitati publice pro se quisque studeret, ac animo ad quæuis pericula



excipienda parato esset, fausta quæq; ac felicia, utque utriusque, tam qui domi mansuri essent, quam qui in bellum ituri ita rem gererent, ut mox læta utrinque; gratulatione, in mutuos complexus ruerent, precatus iis fuit: ad quam vocem plausu à circumfusis excitato, Cancellarius eum ipsum plausum latum omen futuri successus, ac non diuturni belli Regem accipere intulit. Sub idem comitiorum tempus Sueciæ Rex, quibus partibus hac expeditione bellum orsurus Rex esset, per literas à Rege quærebat. Rex pro eo, quod antè ad bellum hoc maxime Sueciæ Rex hortatus se fuisset, ac mutua necessitudine celandum eum consilia sua non ratus, Plepscouiam se eo anno ire in animo habere ei ostendit: petentiq; legato eius, ut militem quem in Germania intercipiendæ legationis Moscouiticæ ad Principes Christianos missæ causa scripturus Sueciæ Rex esset, voluntate Regis per ditiones ac portus eius ducere sibi liceret, literas quarum authoritate id facere posset, dedit. Iisdem temporibus Philo Kmita qui Lucensi præsidio præfectus à Rege fuerat, ne miles otio ac desidia interim corrumpetur, Chelmam Moscouiticam, quod castrum supra Louatum fluuium situm est, Martinum Curtium & Gabrielem Holubkonem misit. qui cum ex captiuis cognouissent, opidum iam ante Moscos more suo incendiisse; ex eo vnam domum sub castro ad excubias agendas ab hoste relictam; noctu progressi, cum antequàm illuxisset, eò peruenissent, Curtio domum præteruecto ac à tergo excubiis se obiciente, fugaque in castrum interclusa omnes concidente, Holubko castrum incendit. Ab alia parte Sibricus Sauolocientis præsidij præfectus homines agri eius omnes ad sacramentum euocarat. quinque autem antiquitus territoria ad Sauolociam pertinent. Venerant in his Voronecenses aduocato, Polonico more sibi creato. Opidum

pidum autem Voronecia est supra Sauolociam ad Soucam flumen situm; propterque fluminis eius opportunitatem, quod in Velikam flumen, indeque sub Plepscouia in lacum Pelbam ac sinum Finlandicum influit, commercii ac habitatorum numero amplum olim fuit. Castrum quod adiunctum habuerat in tot vicinorum ac munitissimorum aliorum copia desertum à Moscis fuerat. Itaque cum opido nullo opere munito præsidium Sauolocientis facile potiturum cogitarent; quod id antè incenderent; maxime autem, quod opidani ad Sacramentum conuenerant, ut ad deterrendos alios omnia cruciatus exempla in eos ederent, copiis aliquot collectis repentina excursione opprimendi eius causa conuenerant. verum re ab aduocato cognita, cum ille in munere ac metu suo non inuigilans certiore mox Sibricum fecisset, hic profligatis Moscis, locum in quo castrum fuerat, cum Kiralio occupat; præsidioque ei imposito, corribus militaribus pro tempore communis; agrestibusque ipsis, quibus loca vicina nota erant, ducentibus, crebras inde ex hostico prædas egit. Philo Kmita Chelmenfis excursionis prouentu inuitatus eodem Sibrico ac vicinis aliis præsidiis sibi adiunctis, Priscam Russam quæ ad magnam Nouogardiam spectat, excurrit. Magna hoc loco Moscouiæ Dux salinarum vectigalia habet: frequentia item ac ampla commercia sunt. Opidum magis in salinarum ac negotiorum usus constitutum, utque loco à finibus remoto, nullo opere munitum sine negotio diripuit, repletumque militem præda reduxit.



# R. HEIDENSTEINII

## SEC. REGII DE BELLO MOSCOVITICO

*Commentariorum*

### LIBER QVARTVS.



**S**OLVTIS ADEVM, QVEM superiori libro ostendimus, modū comitiis, Rex militem, quanto in supplementum ad bellum opus erat, Samoscium quā celerrimē scribere, maturēque in Lituaniā adducere iubet. Ipse Grodnam re-ctā, indē Vilnam proficiscitur. Interim ad Christophorum fratrem Principem Transiluanīe de nouo equitum ac peditum Vngarorum delectu scribit. Germani militis conquirendi Farenbekio per literas negotium datur; qui militis in inferioris Germanīe bellis exercitati copiam se habere posse antē ostenderat. Samoscius, quō lectiorem peditatum haberet, Vroecium ala equitum, cui præerat, missa, peditem ex sola nobilitate scribere iubet. subleuabantur apparatus hi interim, dum tributariæ pecuniæ conferrentur, partim ea pecunia, quam à principibus acceptam suprā ostendimus, quamque præter eam Marchio in Prussia Dux subsidij loco miserat; partim propria Regis ipsius, maximē tamen equitum studio, quorum magnum numerum Samoscius euocarat; eaque ad bellum hoc alacritas erat, vt plerique nulla in auctoramentum accepta pecunia ad diem nihilominus conuenirent: complures in ipsis castris demum stipendiorum partem acciperent. Grodnam

nam iam Regē progresso, nuncius cum literis à Mosco ad eum venit: mox alios cum amplioribus mandatis, quibus conuenire pacem posse existimet, affore: Interim ne vllum exercitum Rex cogat, neue vlteriūsgrediatur; posse eum & impensæ & labori parcere. Veniunt legati: colloquium petentibus datur. Re diu more eorum ducta, atque vtrinque disputata, eò tandem descenderunt, vt Narua, Nevschlossio, Derpato, Adseuio, Nouogrodeco Liuonico, Nevhaus à Germanis dicto, exceptis, reliquam Liuoniā vniuersam vnā cum iis locis, quæ antea receperant, Veissensteinio, Felinio, Parnauia, ac aliis omnibus Regi permitterent. Ostenderrat Rex, nullam se prius pacis mentionē fieri passurum, quā vniuersa Liuonia Moscus cessisset. Urgebant legati, vt cum sui principis nomine ostenderetur, quid præstiturus esset, sibi quoque; quid de ablatis principi suo restituendis animi Rex haberet, demonstraretur. Repe- tebant autem vno Polotiensi agro excepto, qui pristinæ ditionis regiæ fuerat, reliqua quæ superioribus annis bello capta erant, omnia. Demonstratum fuit, ita Regem principi eorum illa restitutum, si præter Velisium, quod nulla conditione dimissurus Rex esset, castrum quoque Sebesium quod id penitus intra ditiones regias situm esset, quò certior ac stabilior pax esset, vel tradidisset Regi, vel demolitus fuisset; quod quominus recusaret, Regem vicissim Dryssam demoliturū; partis sumptus deinde in bellum facti nomine quadringenta aureorum millia Regi refudisset. Impetrarunt legati, vt ad principem suum referre ea sibi liceret; ac vt Regis nomine eadem ad illum scriberentur. Sub idem tempus Bochdanus Bilscius, cuius frater patruelis in amoribus Mosco erat, summamque; apud eum rerum omnium fidem obtinebat, ad Regem transiit. Miserat Moscus legatos ad Rodolphum Romanorum Imperatorem: ab  
eo vl-



eo ulterius deinde ad summum Pontificem Romam peruenerunt. Legatione ad summum Pontificem operam suam contra Turcam Christianitati pollicitus, & de Regis in se iniuriis questus perhibebatur; & vel secretò, ut ad pacem eum hortaretur, petiisse; aut iis tamen querimoniis, ut suas partes summus Pontifex interponeret, non nolle se fatis ostendisse. In Poloniam frequentibus nunciis afferebatur; cum Græcæ sectæ homines pedes summi Pontificis pro more deosculari diu recusassent, tandem tamen id ut facerent, adductos, summus Pontifex Antonium Posseuinum, qui vnà in Moscouiam cum illis iret, iis adiunxerat. Hic Moscis per regias ditiones itinere intercluso, ideoque per Germaniam Lubecam, ut inde Naruam traicerent, se recipientibus, de legatione sua per literas certiorè Regem fecit, ac si voluntate eius id sibi liceret, per Poloniam & Lituaniam iturum se ostendit. Rex non modò illi permisit, sed ipsius quoque Mosci legatis idem se permittere respondit. Hi tamen, ne quid præter præscriptum principis sui facerent, Lubecam se contulerunt; indeq; eodem quo venerant itinere in Moscouiam ad principem suum reuersi fuerunt. Iisdem temporibus nuncius mortis Christophori Transiluanicæ Principis Regis fratris allatus, cum Regi ipsi non leuem dolorem attulit: tum Moscum, qui auocato Rege rebus Transiluanicis sui interim colligendi spatium sibi datum iri cogitaret, ut pacem atque eas ipsas condiciones, quas paulò antè ab eo propositas fuisse ostendimus, iterum reuocaret, maxime animauit. Verùm Transiluanicis rebus ne à cura belli auocaretur, iam antè à Rege prouisum erat. Cogitans enim ultra incertitudinem rerum humanarum ætatem fratris prouectam: ipsum continuis articulo- rum doloribus confectum: antequam Varfauiam ad comitia iret, author fratri ac prouincialibus fuerat; ut  
filium

filium eius Sigismundum in omnes casus Principem designarent. Quibus de rebus cum legati Alexander Kenedius, & Vladislaus Somborius Varfauiam ad Regem venissent, ex eius autoritate, domum postea illis reuersis, communibus ordinum studiis Sigismundus in Principem electus fuerat: tristibus læta Christophoro Principi fortuna temperante, interque duo funera vxoris vnum, ac minoris natu filix alterum, principatum Sigismundi filii intericiente. Maximam in pacis spem omnium iam propè animi venerant. Nam nec propter quadringentorum illorum milliū conditionem, si Moscum non accepisset, communibus ordinum bellum finire volentium studiis defuturus Rex fuerat; nec Moscus, qui vniuersam quasi Liuoniam pacis cupiditate dimiserat, illorum quæ exceperat, castrorū causa bellum accepturus existimabatur. Itaq; inducias etiam ad certam diem, intra quam denuò Moscus responderet, Rex ei concesserat. Verùm intellectum mox fuit, iam tum legatos, quomodo à propositis conditionibus discederent, cogitare. Vincentius erat, de quo antè mentionem fecimus, in finibus Moscouiticis, qui ad Smolenscam pertinent, ductor Kosakkorum. Hic cum transgressis fines legatis sese adiunxisset, posteaque eodem itinere Vilnam cum illis profectus, familiarius inter eundem ad eos sese applicasset, sollicitare hominem, ut ad principem suum transfugeret, cœperunt. Ille constanter primò pernegarat; cum vrgeretur, tandem Vilnæ ad magistratū rem detulit; ex eius sententia simulat transitionem: quæ quò gratior principi eorum esset, nec sine pretio operæ ad illum veniret, ut aliquas magni momenti literas, quas ad eum deferret, sibi committerent, postulat. Illi polliciti, ut prius tamen aliquo argumento fidem eius exploratam haberent, ut in vna prius re conficienda operam suam sibi nauet, rogant; tempusque  
quo



quo profecturus Rex sit, quaq; iter facturus, exploret. Re ad magistratum delata, quò magis fides ei haberetur, iter regis ex fide descriptum datum illi fuit. quo à perfuga quasi pignore fidei accepto, literas ad principem suum perferendas ei tradunt. In iis vt magno animo sit, eum hortantur. Nam & paucas omnino à Rege copias cogi: & quòd mortuo fratre Transiluanicæ res præsentiam eius desideraturæ sint, maximè cum Turca iis imminere dicatur, minùs huic bello eum vacaturũ. Per idem verò tempus, & quod Vilnæ Rex substitit, Plefcouiam, quam hoc bello petitum iri sibi persuaserat, omnibus rebus Moscus firmat. muros vetustate neglectos magnis operibus reficit: nouas ad priores munitiones adiicit: præsidia ex aliis arcibus omnibus detracta vnum hunc in locum cogit. Ab altera parte Pontus Gardianus Gallus, quem Sueciæ Rex collocata ei in matrimonium filia naturali militiæ præfectum fecerat; extrema quædam Liuoniæ castella, quæ ad Osiliam & maritimam Liuoniam pertinent, occupat. Iam ab initio cum primùm in Poloniam Rex venisset, Sueciæ Rex per oratorem suum vehementer Regem ad bellum contra Moscum hortatus, fœderis ac societatis contra communem hostem mentionem intulerat. Miseratum iis de rebus ad eum Rex Ioannem Herbortum Castellanum Sanocensem: propositæque eæ vltro citroq; conditiones fuerant, vt Reualiam quoq; regi traderet; vtque quæ cis Naruam flumen essent, Poloniæ Regi cederent; quæ vltra Naruam Sueciæ finitima versus oceanum glaciale communibus copiis occuparentur, ad Sueciæ Regem pertinerent. cumq; bellum interim differendum sibi Rex non iudicaret; quo tempore Polotiam ibat, denuò Laurentium Goslicium Vilna ad Sueciæ Regem miserat; per quem in armis iam se esse ei ostendebat, & vt ipse à suis quoq; finibus in Moscouiam cum exercitu

xercitu irruptionem faceret, eum hortatus, auxiliorum & belli communicandi rationes quasdam proposuerat: ac ostendente tum Rege Sueciæ nolle se sibi præscribi, quas in partes copias suas mitteret, omniaq; occupantifore: Goslicius quemadmodum iussus fuerat, Liuonia tamen vt abstineret, postulârat; cuius causa & maximè bellum Rex suscepisset, & quam optimo iure pertinere ad se sciret: Regemq; ius in Liuonia reipub: & suum negligere non posse prædixerat. Nunc cum id accederet, vt Liuoniam ferè omnem per legatos Moscus ei detulisset, quo in statu res essent, cum Sueciæ Regem, tum militiæ præfectum eius iterum per literas certiorè Rex fecit; vtq; Liuoniam non hostis, sed suam opinione iam præcipientes, omninò ab ea sibi temperarent, ac aliis potius in partibus, si ita eis videretur, bellum cum hoste administrarent, postulauit. Vilna tormentis ac instrumento militari omni Postauam præmissis, ipse Disnam profectus fuit. Vbi de exercitu hostili ad Smolenscam coacto, eiusque in Mohilouensem, & Sclouensem agrum incursione cognouit. Erant in hibernis eorum locorum aliquot equitum turmæ. ex quibus cum Christophori Radiuili, & Martini Kasanouii turmæ, diuersis locis in palantes incidissent, secundisque aliquot præliis cum copiis iis conflixissent, non diu in nostro commoratae, mox intra suos fines se receperunt. Rex tamen nuntio hoc de incursionibus hostis allato, continuò Christophoro Radiuilo, qui tum Disnæ vnà erat, ad eas quas antea habebat, turmas equitum, alias Polonorum nonnullas, quæ iis in locis ad Borysthenem in hibernis erant, peditatusque ac leuium tormentorum, quæ nauibus Vitepsciam præmitteret, certum numerum attribuit. Ei mandat, vt rectà contra hostem tendat: dataque facultate prælium committat. si hostis iam recesserit, capto per Velisium medio inter Bialam

O & To-



& Toropciam itinere, ab ea quoque parte metum hosti ostendat. Eodem tempore Ioannem Thomam Droiouium præfectum Premislien. ad Turcarum Imperatorem misit. Causæ legationis hæ erant; vt quia fato Christianitatis sicut reliqua Vngaria, ita Transilvania quoq; stipendiaria Turcæ facta esset, verereturque Rex ne mortuo fratre Christophoro noui Principis imperium grauioribus conditionibus Turca premeret; postularet, vt quibus priores principes legibus principatum eum tenuissent, iisdem huic quoque eum permetteret; nec si quid contra ea fieret, Regem patriæ suisque deesse posse ostenderet. Præterea verò vt de Ianculæ Valachiæ Palatini iniuriis, quas frequentes is regiarum ditionum hominibus afferebat, quereretur; vtque illo amoto Petrus prior Palatinus in pristinum dignitatis locum restitueretur, peteret: Regemq; nec Ianculæ vicinitatem equo animo ferre, nec suorum iniurias, vt nec deberet, neglecturum profiteretur. Prius legationis caput mox obtentum; alterum in aliud tempus dilatum fuit. Sub idem autem tempus in Tartaris quoq; tumultuatum fuit. Deuletes Chiereius, qui nouissimè apud Tartaros imperitarat, plures liberos reliquerat. successerat huic in imperio, qui nunc rerum apud illos potitur, Mahometes Chiereius; qui cum præter alios fratrem haberet ætate proximum Adleum Chiereium magni & ipsum animi & apud populares virtutis opinione, interficere eum non ausus; cum aliàs instituto Turcico apud Tartaros etiam plerumque eius, qui in principatu succedit, securitatis causa cæteri principum liberi è medio tollantur; quò minùs tamen cupiditati eius loci relinqueret, Galgam creârat. Is summus militiæ præfectus est, eaque authoritate, vt & viuo principe proximam secundùm eum potestatem obtineat; & mortuo in imperio succedat. Adleo à Persis capto, ac interfecto,

cto, eadem ratione Halium Chereium alterum ab eo fratrem magistratu eo tradito, successionis spe sibi deuinxerat. Verum confirmatus postea ætate filij Saditi, amoreq; paterno impulsus, deiecto fratre, filium eius in locum suffecerat; veritusque ne iniuria hac irritatus cum altero minore fratre Salomete Chereio contra se conspiraret; ad parricidij crudelitatem, quam antè seu metu seu miseratione retentus intermiserat, redierat; priusq; quàm illi moliri quid contra se possent, interficere eos conatus fuerat. Hoc periculi metu profugere illi coacti, cum diu exagitati in finibus oberrarent, à Kofakkis excepti, adq; Michaëlem Visnouecium præfectum Cirkassiensem adducti fuerunt: à quo certior de iis Rex factus, vt in suum reditum retinerentur, iussit. Ipse instrumento belli grauiore primò per Disnam in Dunam, inde vltèrius per Dryssam flumen, nauigatione, quemadmodum ostendimus, iam antè explorata nauibus præmisso, Disnæq; parte aliqua exercitus recensita Polotiam venit. Ibi dum aliis copiis recensendis operam dat, Christophorus Dirsekus, qui petentibus legatis Moscouiticis, à Rege ad Moscum missus fuerat, cum literis ab eo redit. Longè alio eæ argumento, quàm superiores fuissent, scriptæ erant. quæ ab initio acta essent, multa & longa oratione repetita inuidiose omnia interpretabatur: quæ per legatos antè Regi obtulerat, irrita rursus faciebat: maximè quòd Neuelensibus conditionibus stare Rex noluisset: quòd vt Sebesium demoliretur; bellicique sumptus nomine pecuniam ab se flagitasset, exagitabat. quòd non in eodem statu rem esse, quo Neuelæ fuerat, ac interim in oppugnanda Sauolocia maiores sumptus se fecisse Rex diceret, cuius coactu, aut rogatu Sauolociam cepisset, interrogabat. potuisse eum supersedere labore hoc, non sua voluntate factum, vt eam occuparet: Pecuniam verò quòd fla-



gitaret, scire eum, nolle se tributarium eius esse: impensas autem belli imputare, aut earum nomine pecuniam postulare inauditum inter principes esse. Sebesium se puero, dum Sigismundus Rex rerum in Polonia & Lituania potiretur, conditum, eiusque perpetuo postea, etiam cum Polotiam in potestate Reges Poloniae haberent, in possessione se fuisse: praeterea ut maxime ille Sebesium, Rex Dryssam deleret: tamen cum visum esset, Dryssam iterum Regem restauraturum: denique semper aliquid reperturum, quod nouum a se postularet. Nobilitatis nuncios ad colloquium cum legatis adhibitos criminabatur; idque in inuidiam suam factum ferebat. Indignabatur & oratores nullos a Rege ad se mitti: Itaque se quoque nec post quinquagesimum aut quadragagesimum annum oratores ullos missurum confirmabat. Multa de Liuonico iure suo aspergebat. In Regem autem ipsum acerbissime inuehebatur, modo quod non regio genere natus esset: modo crudelitatem in victos, adipis detracti argumento, de quo supra dictum est, usus: modo in eosdem indulgentiam, qua ad transiitionem eos inuitaret, tum quod globis candentibus inusitata ratione Sokolam incendisset, fraudem ac dolos ei exprobrando. Rex literis hisce acceptis, ostendit legatis etsi iure gentium hostium loco habere eos posset, qui pacis petitione simulata, speculandi, circumueniendi que sui causa ad se venissent; nolle se tamen ob eorum perfidiam a perpetua mansuetudine atque lenitate sua recedere; itaque ipsi ad suum principem reuerterentur: literis eius per suum hominem se responsurum. Proficiscitur cum his Antonius Posseuinus; quem a Summo Pontifice ad Moscum missum supra demonstraui-  
mus. Ei praefectos, qui Velisij capti fuerant, Rex condonauit. Sauolociam inde, siluis ut in pacato non magna molestia superatis, pontibusque & latioribus viis  
iam

iam ante iussu regio Sauolocensium opera munitis, peruenit. Hic & si omnium fere aliorum opinione Plepscouiam sine vlla dubitatione hac expeditione eundum tamquam praedudatum iam videbatur, quod rectius tamen in re praesenti omnia statuerentur, ad consilium de eo Rex retulit. Valuit plurimum apud omnes fere cum vetus persuasio, tum ipsa rerum gerendarum series, bellique suscepti ratio, quod ea vrbe in potestatem redacta, Liuoniam simul vniuersam, quae tum vnica belli causa erat, ei accessuram inter omnes conueniret. Rex tamen, ac pauci cum eo an non magnam Nouogardiam rectius iretur, dubitabant: cuius etiam nobilitatis motus aliqui contra Moscum audiebantur. sed periculi plena res videbatur, relinquere a tergo urbem amplissimam, in quam omnes quasi hostiles copiae conuenissent: quae magnam & bene ad Nouogardiam gesta re ad reliqua perficienda moram: & si non tam bello, quam tempestatibus, contagio, aliisque incommodis in hostico offensum esset, grauem recipientibus se metum allatura esset. Derpatum vnus Veierus eundum censebat, cum eadem ratione, quod praesidij eius magna parte ad Plepscouiae defensionem deducta, facilius expugnatio eius futura videretur: tum quod per eam ipsam ad reliquam Liuoniam vniuersam, quae vna bello eo petebatur, aditus futurus esset. Vicit plurimum consensus, rerumque ipsarum continuus quasi ordo, qui primo Plepscouiam obieciebat, eum ut iretur. Et si enim per Louatum flumen, quod a Lukis Nouogardiam tendens magna ex parte in nostra potestate erat, regressus exercitui dari videretur; quod tamen naues omnes subtractae ab hostibus essent, nec aliarum fabricandarum tam exiguo temporis spatio in prouincia noua & dubia facultas data esset: flumen praeterea Louatus non per omne anni tempus nauigabile esset; hac quoque re non



multum iuuari posse exercitus videbatur. De castellis quæ à lateribus imminebant, diu Rex dubitabat, tendanda ne oppugnatio eorum sibi esset, priusquam Plefcouiam iret, an in aliud tempus differenda. Ex iis Krasnohorodam, cuius oppugnationem Sigismundi Augusti exercitus frustra olim tentauerat, & alterum Veliam Moscus, quòd teneri ea posse diffideret, tormentis prius apparatusque omni deportato, sub idem tempus ipse deleuit. Reliqua erant Sebesium, Opocka, Ostrova. Sebesium & si ad læuam Dunam versus à tergo relinquebatur, nauigationemque fluminis infestam reddere posse videretur: tamen quòd per siluas, locaque magna ex parte inuia, ac difficilia, iter illac esset, præstare visum fuit, vel in aliud tempus eam differre; vel si pax interim coiret, aliam quandam munitionem ei opponere, quam nunc maiorum rerum gerendarum tempus, siluis, viarumque difficultatibus superandis, ac ipsa tandem oppugnatione eximere. Opocka non ita viæ imminere videbatur, vt non commodè declinari posset: præterea flumen Velika supra Opockam nondum eius altitudinis erat, vt tormenta apparatusque bellicus demitti per eum possent; quam commoditatem vel maximè quidam spectabant; ac vt nauigabile esset, Plefcouienfi tamen oppugnationi mora vlla minimè interponenda videbatur. Accedebat huc, quòd ex propinquis præsidii Sauolocienfi & Voronecienfi facile excursiones eius prohiberi posse existimabantur. Interim opportunè accidit, vt sub idem tempus Kofakki Krasnohorodam à Mosco desertã, subitario opere communirent, quò prædis ex hostico agendis sedem in ea collocarent. Mittit eò Rex mox copias nonnullas cum leuioribus tormentis aliquot, locumque militaribus corribus dispositis diligentius communi, Sebesienseque & Opocense præsidia distineri indè iubet. Itaque Krasnohoroda, Sauolocia & Vo-

rone-

ronecia occupatis, è quibus non difficulter Sebesienses, & Opocenses contineri posse viderentur; illis omissis, Ostrovia sola quæ in ipsam viam Plefcouiensem incurreret, relinquebatur. Ad Christophorum Radiuilum, quem contra hostis ad Borystenem excursiones missum supra ostendimus, sub idem tempus Philonem Kmitam etiam, ac Lituanicos Tartaros à Vitoldo quondam Duce agris in Lituania donatos, Michaële Haraburda illis præfecto se coniungere, hostemque ancipiti metu distingere, mutuisque populationibus priores excursiones eius vlcisci iubet. literasque ea de re ad Radiuilum dat. Priusquam Sauolocia Rex moueret, tabellarium cum literis ad Moscum mittit. iis etsi nec illius criminationes quicquam de dignitate sua detrahere posse statueret: & armatum hosti maledicere infra animi sui magnitudinem iudicaret; ne tamen ille è silentio Regis, more suo maiores sibi spiritus sumeret, ad priores eius respondet. Quæ acta ante id in inuidiam à Mosco vocabantur, vt quæque gesta sint, ostendit: conditionibus Neuelensibus cur stare non potuerit, demonstrat: nihil per iniuriam, aut præter morem aliorum principum Christianorum ab illo se postulasse docet: vt Sauolociam oppugnaret, nullius precibus adductum se respondet. sed id vt faceret, pertinacia & iniuriis eius se coactum; quæ nec se quiescere, donec armis ius suum consequatur, patiantur: nec ipsum nisi armorum metu admoto animum ad æquitatem aduertere. Quantum in se fuerit, se fecisse, vt per Oratores eius aliquoties testificatus ei sit, quò diutius causam duceret, quoque ad maiores impensas tergiuersatione sua se prouocaret, eò grauiores postea conditiones se ei ferre necesse habiturum. Sumtus in bellum factos & aliorum principum Christianorum more ac exemplo se repetiisse: & nihil æquitati conuenientiùs esse, quam vt à quo iniuria profecta

O 4 fuerit



fuerit, ab eodem omnis iniuriæ causa præstetur. quod quoniam illi graue videretur, sciret posthac non de Li- uonia, aut belli eius sumtibus, sed summa rerum se di- micaturum. Quòd Sebesium puero se conditum di- ceret, qua maximè ratione ius suum ostendere se con- sideret, ea malam fidem eius maximè detegi. Nam cum regia Polotiensis ditio ad Dunam flumen semper pertinuerit, intraque eam nuper Sebesium excitatum fuerit, satis argumenti esse in alieno iniuste ædificatum fuisse. An autem ad priores conditiones, nouas subinde Rex adiecturus fuerit, si prius iis conditionibus, quas Rex tulisset, assentiendo periclitatus fuisset, tum certi aliquid asseuerare eum potuisse. Nuncios nobilitatis ex ipsius vtilitate ad colloquium cum legatis eius adhibi- tos fuisse, quò quæ conuenissent, maiorem firmitudi- nem haberent. Quòd Oratores ad eum non mitteret, non esse, quod se accusaret; neque enim legem vllam de mittendis oratoribus cuiquam perlatam, præter- quam vel vsus, vel voluntas cuiusq; vnicuiq; impone- ret: omninoq; iudicij potius quam necessitatis rem esse. Quòd facturum se negaret, vt nec ipse post quadragesi- mum annum vllos ad se oratores mitteret, facile ei cre- di: magnam hanc bono etiam viro ne dum Tyranno viuendi vsuram esse: non missurum igitur post quinqu- gesimum aut quadragesimum annum: at missurum for- tassit citius: Regem quidem nihil hac in re temerè sibi præscripturum. Docet & de Liuonico iure. Ad conui- tia eius respondet, neque se eum esse qui contumeliam vllam accipere possit; nec in Moscum, cuius turpitude & crudelitas omnibus nota sint, rectè hanc alios inse- ctandi personam conuenire. Regem se non tam mole- stè ferre non natum esse, quam gaudere, quòd virtute sua ad regnum peruenerit: quòd ea ratione ad hono- rem hunc euocatus sit, qua summus Pontifex à Cardi-  
nalibus,

nalibus, Imperator qui principem inter Christianos principes dignitatem obtinet, ab Electoribus Germa- niæ: qua multi alii reges ac Principes omnibus tempo- ribus à sui quisq; regni ordinibus. Interim præclarum sibi ducere priuato loco, nobilibus maioribus ortum, qui rebus Christianis egregiam sæpè operam nauarint, amplissimos honores gesserint, prouincias administra- rint, magnaq; virtutis & pietatis laude floruerint, cum maiores sui reges non fuerint, virtute tamen sua re- gnum se adeptum esse; cum illum, nisi ita, vt esset, natus fuisset, mores eius quemuis potius alium quam princi- pem facturi fuissent: minimeq; illi inuidere, quòd non plurimorum de eo hominum iudicium, aut spectata virtus eius potius, quam mulieris Glinscij Sigismundi quondam regis proditoris filia vterus, Moscouie domi- num imposuisset. Crudelitatem in detrahendo è non- nullorum cadauerib. adipe primum non à se profectā: deinde nihil in eo contra pietatis officium hominumq; Christianorum morem, qui vt viuis tanto rectius con- sulerent, ex medicorum disciplina, vel in minutissimas partes mortuos dissecarent, admissum: ridiculam au- tem misericordiam esse ipsius, qui cum in viuos omnia cruciatus exempla edat, mortuorum cura se affici præ se ferat. Eiusdem generis esse, quòd clementiam & le- nitatem erga victos suam criminaretur. Non satis enim sibi constare, qui modò crudelem, modò nimis le- nem quereretur; indignareturque, quòd non omnes, quos in præsiidiis expugnatis Rex cœpisset, excruciatos interfecisset. Quòd Sokolam inusitata ratione flammis à se deletam vitio sibi verteret, in eo non tam fraudem aliquam illum arguere Regis, quam detegere propriam inscitiam suam; quæ vt omnib. in rebus maxima esset, ita militaris rei multa præclara inuenta adhuc eum fu- gere. Respondet & aliis de rebus quam copiosissime:  
quæ



quæ omnia accuratius hîc commemorare , præterquam quòd epistola ipsa in manus hominum peruenit, non etiam nostri instituti est. Sub finem epistolæ ad singulare certamen eum prouocat: eamque Russicè & Latinè scriptam ei transmittit. neue nimis sibi placeret, quæque aliorum de se hominum iudicia essent, cognosceret, libros de immanitate eius passim per Germaniam editos vnà ei mittit. Sauolocia Voroneciam Rex progressus militarem disciplinam prioribus legib. partim emendatis, partim auctis accuratius eo loco sanxit; legesque de ea scriptas primùm senatoribus, deinde militi, præfectis omnibus differendi de iis facultate permissa publicè proposuit. Quibus ab omnibus probatis præfecti militares, vt ducem exercitus crearet, eumque magistratum, qui solennis apud maiores in repub. fuisset, restitueret, flagitârunt. Rex quòd partito in plures imperio militari, superiori anno nec satis disciplinam castrensem obseruatam, se rebus vel minutissimis quibusq; fatigatum, aliaq; incommoda nonnulla extitisse ex eo meminisset, vocato priuatim ad se Samoscio, cuius vtilem operam superioribus expeditionibus, multis maximisque rebus spectatam habebat, eum se magistratum hunc creaturum ostendebat. Samoscium magnitudinem eius, atque onus demonstrando, seque ab omnibus rebus, maximè autem muneris huius expectatione imparatum accessisse ostendendo, primò vt alij potius id traderet, aut ne sibi saltem tantum oneris imponeret, petere, postea vehementius etiam deprecari cœpit: vbi nihil Rex remitteret, obtemperaturum se tandem Deo, & illi seu ad gloriam seu periculum se vocanti recepit. Priuatim cum Samoscio re communicata, idem publicè deinde facit; consilioque conuocato, quid suæ sit sententiæ, declarat. Re ab omnibus probata, per Andream Sborouium palatii Marschalcum, qua

qui

qui superioribus temporibus imperio militari præfuisent, nominatim verò Ioannes Tarnouius maxima potestate fuissent, generalem exercitus Ducem perpetuum Samoscium creat. Hic quemadmodum antea fecerat, ita tum in publico quoq; præter oneris eius magnitudinem, quod per se grauissimum, maxima etiam cum inuidia coniunctum esset; non eo etiam apparatu instructum se venisse ostendebat; vt tantum munus sustinere posset, qui scriptis iis, quas Rex iussisset, copiis, eo animo profectus domo esset, vt quemadmodum superioribus expeditionibus fecisset, partem saltem aliquam belli susciperet: cui summa rerum administranda esset, oportuisse eum prius omnium ad summana belli pertinentium rerum cogitationem suscepisse: omnia explorata, cognita, parata antè domo attulisse: ipsum inspexisse: legatos, ministrosque iam antè domi delegisse; quos etsi haberet, non haberet tamen plures, quam qui copiis tantum, quas ipse scripsisset, ducendis administrandisque suppetent. Tandem quemadmodum antea priuatim, ita tum publicè magistratum accepit. Constitutis rebus iis, exercitum vniuersum recensere Rex instituit. Præ cæteris longè ornatissimæ in lustratione hac Polonorum equitum turmæ comparebant. cum longè plures ex amplissimis quibusque familiis, quam vlla alia superiorum expeditionum ad bellum hoc conuenissent. inter alios Samoscium ad priores copias suas, quas superiori ætate à se conductas, hieme in Samogitia contra hostiles in Liunioniam irruptiones mandato Regis collocarat, aliquot ornatissimorum equitum millia adiecerat. omnes hi ad ducis exemplum vt superiori anno atrato habitu vsi fuerant, ita tum cæruleum sumpserant. Par his suo genere peditatus erat: Vrouecianus præsertim ex sola nobilitate scriptus. Nec multum de proximi anni studiis & apparatu Lituani

quoq;



quoque remiserant. Itineris ratione à Rege cum Samoscio constituta, à dextra Lituani iuerunt; iis aulicus miles, qui ad Gedanum fuerat, perque absentiam Ioannis Sborouii à Christophoro Niscicio regebatur, attributus erat. partem copiarum aliarum cum Stanislao Tarnouio clarissimæ familie, senatoriique ordinis viro, que locum castris deligerent, Ostrouiam versus Samoscio præmisit. cum eodem Veierum & Vrouecium ire iussit. Tarnouius, quemadmodum iussus erat, castrum præteruectus in Plescouiensi via, qua præsidia in castrum ventura, nuntiique exituri expectabantur, confedit: quæque ad oppugnationem pertinebant administrare cœpit. Interim Samoscio aduenit; castraque ab inferiori parte ad Velikam flumen ponit. biduo post Rex ipse consecutus fuit. Sita Ostrouia est in insula Velikæ fluminis, quòdque nullos à terra aditus habeat, inde nomen id, quod insulam Slauica lingua significat, accepit. Muros ex lapide satis firmos: propugnacula item complura habet: vnum præcipue in septentrionali castri angulo, à qua eadem parte porta atque aditus in castrum est, insignis magnitudinis, adque nostræ ætatis propugnaculorum formam diligenter dimensum, eo positu, vt duo castri latera, vnum quod ad septentrionem, alterum quod ad orientem spectat, defendat. Cum de oppugnatione cum Samoscio Rex deliberaret, animaduertit, occidentale castri latus, ita modico flexu lunatum; vt nulli recta linea secundum id latus tormentorum ictus dirigi possent, atque ita nihil ferè ab ea parte à tormentis periculi militi metuendum videretur. Itaque duo propugnacula altera, quæ in meridiem conversa erant, tormentis verberare instituit; quòd iis à defensoribus nudatis, occidentali parte iam antè, vt ostensum est, innoxia, sine periculo ad oppugnationem iturus miles videretur. Vngaris orientalis anguli propu-

gna-

gnaculum, Polonis occidentale attribuitur; perfectisque biduo munitionibus, & tormentis intra eas constitutis, ex vtrisque muri quati cœpti fuerunt. Ab Vngaris propugnaculo, quod oppugnabant, inde proximo muro continuis tormentorum ictibus verberato, ruinis quibusdam, que tamen præcipitem aditum in castrum præberent, patefactus ab iis murus fuit. Poloni, curante apud eos tormenta Veiero, in fundamenta propugnaculi, & inferiores fornices tormenta conuerterant. cum quòd ab inferiori parte facilius in arcem aditus futurus videretur: tum ne superiore turris parte à se occupata, quod facere destinauerant, vt per fenestras eius scloppetis inde rem gererent, exque interiore castri parte hostem propellerent, puluere fundamentis subiecto circumueniri ab hoste possent. Vngari per ruinas, quibus ab eorum munitionibus murus apertus erat, irrumpere mox conabantur. Represso impetu illorum à Samoscio, qui militem, quòd ad maiores res integrior accederet, sine causa vulnerari volebat, cum rursus ab vtrisque munitionibus summa vi tormenta contra muros disploderentur, magisque murus ruinis aperiretur, hostes eodem die deditioem fecerunt. Iam nox appetebat. itaque cum præsidii adiunctis ulterius deduci non possent, atque interim separatim in locum è castro traducerentur, plebs rusticana Lucensis cædis memoria percussa, subito magna voce vltro in verba Regis se adigit. quo clamore aliquoties repetito, cum vimillis adferri Samoscio ratus accurrisset, narrabant iuratos se Regi, fidosque posthac fore; eòque clamorem tam altum sustulisse, quòd vel ab ipsis Moscicis exaudirentur. Ceteri, in iisque Nascokinus præsidij præfectus, eius, quem legatione ad Regem functum, posteaque captum supra ostendimus, propinquus, dimissi fuerunt. Rex antecursoribus præmissis Plescouiam mox ipse progressus fuit. In primo agmine Balthazar Andree fra-

P

tris



tris Regis filius cum Vngaricis, Palatinus Braslaviensis cum Polonicis aliquot copiis incedebant. Hi vbi ad Cerecham flumen, quod ab oriente in Velikam influit, venerunt, ex Vngaris quidam flumen transgressi in tres partes copias suas distribuerunt. Prima ex iis rectà Plefcouiam contendit: duę reliquę diuersis locis in insidiis confederunt. Ex iis primi cum hostium excubiis congressi, mox pedem referre cœperunt: hostes quod erat, insidias veriti, recedentes tamē secuti, postquam secundi ex insidiis consurrexissent, nihil amplius veriti, quod numero vtrosq; superarent, effuseq; insecuti, ad tertios protracti fuerunt: à quib. reliqui in fugam coniecti: tres Boiarici generis capti, ac in castra adducti fuerūt. ex quibus, quantum in vrbe virium esset, quid præsidij animiq. hostes haberent, cognitum fuit. Simili euentu Sigism: Rosnius, qui cum veteranorum Polonorum copiis, quas Lituanis adiunctas suprā ostendimus, missus fuerat, ac deinde Germani aliquot equites, inter quos Rhederus Silesius voluntarius erat, excursionem ad urbem facta, captiuos aliquos adduxerunt. Samoscus ipse primum Cerecha flumine, inde Plefcouia amne trāsito, situs cognoscendi causa urbem circūuectus fuit. accidit hic, vt cū Vrouecio vno assumpto, aliisq; subsequi se iussis, quò accuratius situm urbis è propinquiori loco cognosceret, sub ipsos quasi muros contra portam quandam successisset, conspicati eum hostes, alam equitum contra eum emitterent; eaq; cū intra teli iactū ad eum accessisset, Samoscusq; etsi periculum videret, non tamen se commoueret, illa etiam insidias vereretur, iustum temporis spatium ex aduerso neutris se cōmouentibus constiterunt. Interim qui tardarant accurrentes, impetu in hostes facto, in urbem eos reiecerunt. Rex vbi propius ad urbem accessisset, cognoscendi loci causa ipse quoq; cum Samoscio eam circumiit. Ciuitatis Plefcouien-

uensis in annalibus Plefcouiensibus, qui in Polotiensi Bibliotheca inter alios reperti, in manus nostras peruenierunt, circa annum ab orbe condito VI. M. CCC. XII. antiquissima mentio est; quo Thorium filium Rurici principis Russiæ Olgam ex ciuitate ea in matrimonium accepisse, ex qua Suentoslaus filius natus ei sit, memorant. Inde varia cum vicinis gentibus bella ei intercessisse narrantur: maximè tamen Ikolos populos, quorum ab eo tempore cum imperio nomen quoq; interuisse videtur, fœdere cum Novogardiensibus inito debellasset: cum Sudetibus, qui ea quondam loca tenuerunt, in quibus Derpatum nunc est, & cum Germanis Liuoniensibus frequentibus præliis contenderunt; cū vel à suis finibus eos prohiberent, vel intra eorum fines bellum gererent. A Germanis capta etiam vrbs circa annum VI. M. DCC. L. traditur. Ab Alexandro autem filio Iaroslai ex stirpe Monomachi haud multò post in libertatem rursus vindicata, qui profectus à Batti principe Tartarorum, auxiliisq; Tartaricis adiutus cū prælio Liuonienses superasset, ex pacto deinde urbem recepit. continentia tamen deinceps quoque bella cum iisdem ciuitati fuerunt. Illud satis apparet, eam & opibus plurimum olim valuisse, & priusquam à patre huius Basilio in seruitutem redigeretur, non modò propriis legibus magistratibusque vsam, sed quod eo in loco magis fortassis mirandum fuerit, egregie etiam iis temperatam fuisse. cū primis Posadniki, quod si verbum verbo interpretaris, assessores significat, ex quibus senatus constitutus fuerit, numerantur: in grauiorum rerum deliberationibus, legationibus audiendis, dimittendisq;: fœderibus fanciendis: eligendis principibus: pace denique ac bello suscipiendo: legibus ferendis, populi summa autoritas erat. qui in comitiis, Vicis ab iis dictis, quæ ad omnes per-



tinerent, vniuersus iubebat: Secundum Pofadnikos nobilitas erat honore iis proxima: tum verò diuerfarum societatum mercatorum, quorum & magnam multitudinem eo in loco fuisse, eorumq; commerciis maximè ciuitatem creuisse apparet, præfecti: qui magistratus etiam ius ac authoritatem habuerunt. Ditionem possederunt amplissimam; ad eamq; cum Magni Luki, & Isborkum, tum quicquid intra eas est, pertinebat. Prouincias hæc per legatos Palatinos ab ipsis dictos regabant. His omnibus magistratibus finita cum potestate princeps præerat. Eum seu ad vitandas factiones domesticas, seu quòd externo regnum occupare volenti, facilius restituros se existimarent, modò Russiæ, modò à Lituaniam magnis Ducibus certis conditionibus, ac vt secundum leges suas ius sibi dicerent, petebant. A Lituanis Dummunthum, Timotheum nimirum, postquam Christianus factus esset, appellatum circa annum VI. M. DCC. LXXIII. ac postea filium eius Dauidem accepisse memorantur: posterioribus etiam temporibus ab Olgerdo filium eius, qui sacris Christianorum initiari voluerit, Andreasque dictus sit, quosdam præter leges sibi imperantes ipsi remouebant. Tandem cum Russiæ magnis Ducibus conuenerunt, vt certis deinceps legibus eorum maiestatem colerent, principesque non nisi ab illis, qui tamen secundum patrias leges ciuitati imperarent, quiq; nominatim à ciuitate petiti essent, acciperent. A Basilij cæci filio Ioanne, primum Basilij Suiscius legatus, deinde Basilij filius Plefcouiensibus & Nouogardiensibus coniunctim princeps datus fuerat. Etenim sub idem tempus Nouogardienses subiugârat, Plefcouensium auxiliis adiutus; quæ illi partim ex fœdere, de quo dictum est, partim æmulatione Nouogardiensium miserant. cum paulò antè à Liouoniensibus bello petiti, à Nouogardiensibus

spreti

spreti atq; destituti, ab Ioanne adiuti fuissent. Atque in eo quidem statu ad annum VII. M. XVIII. ciuitas permansit. quo à Basilio Ioannis filio, eius qui nunc rerum potitur, patre libertate spoliata fuit. Imposuerat eis principem Basilij Ioannem Michaëlis filium Repkam, quem Naidenum postea appellârunt; vt qui non petitus, sed vltro quodammodo obtrusus eis esset. Contra hunc cum Nouogardiæ fortè Basilij esset, misit ad eum ciuitas legatos, qui querelas quasdam ad eum deferrent. Cum verò & Ioannes Nouogardiam ad Basilium accessisset, ipsius hortatu maiorem senatorum partem, quò præsentibus iis controuersias eorum minueret, euocat: in vincula deinde omnes coniicit; Plefcouiensibus denuntiat, vt consilium omne abrogent: campanam insignis magnitudinis, qua ad comitia obeunda ordines conuocabantur, ad se mittant: eaque vt facturos sciat, alios plures ex omnium ordinum hominibus obsides sibi dent. Plefcouenses partim amore suorum inducti, partim iis rebus præsentis periculo defuncturos se existimantes imperata faciunt: Obsides complures alios ad eum mittunt. Quibus acceptis, Plefcouiam ipse Dux die mensis Ianuarij vicesimo quarto Oximæ sacro venit, cui in memoriam rei benè gestæ templum deinde ibi consecrauit: primòq; in ædem saluatoris, inde Trinitatis, in cuius tutelam nominatim ciuitas se tradiderat, descendens, Vassiani Episcopi Columnensis, qui eò cum illo venerat, captamq; urbem pronuntiabat, oratione confirmatus, urbem diripit: Senatum omnem, magnamq; nobilitatis partem in vincula coniicit: nouisq; coloniis immisis in Moscouiam secum abducit; vt non pauci tum essent è nobilitate, qui ne patria mouerentur, religioni ac societati alicui religiosorum fratrum se manciparent. Ab eo verò tempore in durissima seruitute ciuitas permansit.

P 3

fit.



fit. Vrbs in longitudinem porrecta, qua ad occidentem spectat angustior, à meridie Velika flumine alluitur. qui eo loco non modò nomine, sed tot aliis fluminibus receptis, re ipsa magnus, quinq; infra eum passuum millibus in Pelbam lacum influit: à Septentrione Plescouiam amnem habet, qui non magno à Nouogardia intervallo ortus, urbem cui nomen dat mediam secans, in Velikam illabitur. Ipsa in tres partes diuiditur, quæ singulæ, diuersis interiectis muris inter se separantur. alteram, quæ occidentem spectat Sapskovam, tamquam ultra Plescouianam appellant: tertia & media inter has arx est, quæ & ipsa in tres partes diuiditur: exteriorem, quæ ad meridiem, atq; flumen Velikam pertinet Krse-mnoviam: alteram Domantovam: tertiam mediam dictam, non ad arcem, sed ad urbem ipsam, cuius quasi umbilicum tenet, appellatione relata. Septentrionale latus omnium longissimum ad octo millia passuum in longitudinem, muro omni ex lapide factò protenditur. Ad eum Moscus Polotia Lukiq; captis, alium ab interiori parte terra inter binos trabum ordines, quibus ea contineretur, latissima interiecta, adiecerat. Propugnacula ab omnibus partibus ex eodem lapidis genere firmissima habet. Cumq; veteris operis propugnacula non satis æqualia inter se essent, indeq; fieret, quominus directis ex vno versus alterum tormentorum ictibus mutuò se protegerent, ex angulis eorum parietibus nouis proiectis, iisdemq; altissimo cespite vestitis, fenestrisq; per eas dispositis, vt pari inter se spatio prominere, effecerat: ad eadē verò propugnacula, quòd partim angustiora, partim infirmiora viderentur, quàm vt maxima tormenta, eorumq; vim, cum disploderentur, continere possent; turre alias itidem ligneas ex firmissimis trabibus magno itidem opere factas opportunis locis ab interiori parte interiecerat, magnaq; maiorum tormento-

rum

rum vi compleuerat. Loci facies ab omnibus partibus amœnissima est, cum duorum fluuiorum confluxu, & quæ patentibus campis, quæ crebris collibus leniter affurgentibus, iisdemq; frequenti iunipero vestitis, quæ à Voronecia vsq; non secus ac si magna industria confita esset, huc excurrans, hortorum speciem loco circumdat: tum maximè monasteriorum vicinorum frequentia, quæ ultra quadraginta ex lapide omnia elegantissimè exstructa, passim per vicinum agrum constituta sunt. Celeberrimum ex iis Svatohorense est, cum religione, à qua sanctum montem locum eum appellant, tum loci munitione. In rupe enim durissima tribus circiter à Plescouia passuum millibus situm, firmissima præterea turri, mœnibusq; ad castelli modum munitum est. Moscus cum, quemadmodum antè ostensum est, Lukis captis ad Plescouiam moturum Regem minimè dubitandum sibi iudicaret, omnibus rebus, quæ ad sustinendam obsessionem pertinerent, diligentissimè eam instruxerat; magnaq; copia omnia comportari iusserat. Cuius rei ultra ea, quæ antiquitus ad defensionem vrbs comparata erant, hoc loco eò maiorem facultatem habet, quòd in eum locum per Naruam omnem è Germania aliisque occidentalibus regionibus bellicum apparatus conuenire necesse est. Itaque tantus omnium rerum ad bellum pertinentium apparatus in vrbe erat, vt superiori anno Moscus nec illi loco satis fidens maiorum tormentorum partem aliquam in vltiorem Moscouiam deportare institueret. quæ cum grauitate sua tardius promouerentur, Ilmeno lacu non procul à magna Nouogardia ea obruit. Præerat arci Basilius, & fratris eius Petri ad Vlam flumen à Nicolao Radiuilo sub Sigismundo Augusto cæsi filius Ioannes Suiscii, è Susdaliensium Ducum familia oriundi. Andreas Choroscinus; & Pleisceiovus. quo-

P 4

rum



rum Ioannes consilio, Choroscinus corporis ac animi robore magnam apud Moscum authoritatem habebant; indeq; etsi ætate Basilius Ioannem antecederet, summam tamen rerum omnium huic commiserat. Equitum in vrbe vltra septem millia: peditum cum iis, qui ex opidanis militares operas inter milites obibant, ad quinquaginta millia fuisse constat: Urbanæ multitudinis totidem. Inter peditatus ductores Kosetscius cum animi magnitudine, tum procera corporis statura Duci gratissimus, authoritatis ac virtutis præcipuam ferè opinionem habebat. Kosakki Nicolao Duce in regia ditioe Circassii nato, sed qui diu Mosco operam nauarat, hoc consilio aliquot eò venerant; vt ex instituto militiae suæ per agros palantibus excipiendis, prædisq; agendis infidias ponerent. Ad id enim militiae genus vsu assuefacti, nullis armorum vix contra cœli iniurias vestium indumentis tecti acinace & hastili vno, plerique tamen etiam scloppetis rem gerentes, ad singulos circumfistendos, opprimendosq; itinera, loca, res hostiles explorandas: flumina cymbis ac trabibus trananda: densissimas siluas, ac inuia quæque penetranda cum leuitate armorum, sitis, famis, ac laborum tolerantia, tum vsu atq; exercitatione plurimum valent; cæterisque ferè omnibus præstant. verum eos Suiscius conuiuio in vrbem acceptos intra mœnia retinuerat. Rex rebus iis cognitis, munitionibusq; vrbis perspectis, facilè intellexit, non sine ratione ab initio iam plerisque eò potissimum eundum contendentibus, assensum se non fuisse, longèque minora quàm præsens ipse cognosceret, de statu vrbis eius atque munitionibus sibi renuntiata fuisse: se nec à peditatu, quem, si summa vi vrbem oppugnare vellet, triplo maiorem adducendum sibi fuisse intelligebat; nec à puluere tormentario ad oppugnandam vrbem satis instructum accessisse videbat.

debat. Qui enim Susæ depositus fuerat, negligentius igni ab iis, qui in præsidio erant, habito, conflagrarat: alterius autem vt præcepta iam opinione pacis nec ab initio satis magnam copiam quæstores pararant: accedenteque insigni subuectionum difficultate, qua à flumine relinquebantur, vix cum ipsum, quem paratum habebant, aduchere potuerant. Itaque varia animo agitati præstare aliquando videbatur, si Plesecouia relicta, vel magnam Nouogardiam rectà contenderet, quam nonnulli minus munitam putabant: vel ad vicina castella Porchouam & Vdouam se conuerteret; iisq; in potestatem redactis, obsidione ex iis vrbem premeret. quorum illud inter Nouogardiam & Plesecouiam situm magnam ad intercludendam à subsidiis & comeatu Plesecouiam facultatem habere putabatur: hoc Iuanogrodensi arci, quæ portum Naruensẽ efficit, imminabat, Priori consilio cum eæ, quæ antè demonstratæ sunt, rationes, & à Plesecouia metus, tum ipsius Nouogardiensis vrbis fama, quam & ipsam non exiguas ad resistendum vires habituram constabat, itineris deniq; longinquitas, præcipitante iam æstate, ac tempestatum expectatio locum non relinquebant. Alteram obsidionis rationem, ac viciniorum castellorum oppugnationem, præterquàm quòd indignam susceptæ expeditionis fama futuram putaret, hosti etiam animos addituram iudicabat. Itaque cum animi magnitudine, ac virtute militis, qua pleraque alia consecutus esset, eas quoque difficultates superare se posse non desperaret, de loco castris capiendõ dispicere cœpit. Constituerat ab initio à Nouogardiensi via, qua Plesecouia fluuius in vrbem, indè infra eam in Velikam illabitur, quòd ad excludenda ab vrbe subsidia, subuectionesq; arcendas cum primis opportunum videbatur, castra facere. sed id vt dimitteret consilium, longitudo lateris eius, quòd quem



quemadmodum ostensum est, ad octo millia passuum patet, latissimi que ab ea parte ac patentes circum circa campi faciebant. In quibus cum subsidia equitum nulla tuto collocari posse viderentur, nec verò propter continuas hostilium tormentorum eiaculationes propius castra admoueri; verebatur ne peditatus, qui in opere ac munitionibus futurus esset, si nullum illi è propinquo ab equitatu subsidium ferri posset, in tanta equitatus ac peditatus hostilis tot locis simul erumpentis multitudine, maximè si ancipiti prælio subsidiis à Nouogardia missis, & eruptione ex vrbe facta pugnandum ei foret, vndique circumueniretur. Ostendebat Samoscius, qui vt nihilominus in sententia permaneret, Regem hortabatur, circa flumen Plesecouiam sinus non nullos sibi videri, in quibus iustæ equitum copix sub tentoriis collocari possent; quæ in tempore deinde contra excursiones hostium auxilium nostris ferrent: hac ratione castris eo loco quàm latissimè Nouogardiam versus explicatis, ab omni subsidio & comœatu, sine frequentibus excubiis, quibus si ab altera parte castra ponerentur, continuis defatigari militem necesse esset, multò commodius obsessos intercludi posse: accedere, quòd ab ea parte solum penè esset molle; ab aliis ferè omnibus rupes durissimæ id exciperent; quæ & opus moraturæ, cuniculos autem omninò exclusuræ essent. Rex tamen quòd priorem salutis, quàm victoriæ rationem habendam iudicaret, ab orientali latere oppugnare urbem statuit. quo in loco & peditatus, qui in opere futurus esset, à sinistra Velika flumine defenderetur; & castra proximè munitiones hostium promoueri possent. quòd ab ea parte frequentes colles exurgentes ab hostilium tormentorum ictibus frontem tutaturi essent: angulus præterea, in quem ab ea parte vrbs muris coibat, ipse etiam maiorem rei bene gerendæ facultatem

tatem dare videretur. Itaq; transgressus flumen Cerecham, castrisq; tum ibi metatis, iisdem Lituanicas copias, & veteranum Polonum equitem, quos à dextra ire iussos diximus, recepit. Eòdem Farensbekius Germanicum peditem, cum quo sub id tempus venerat, adduxit. in quibus etsi erant aliquot, qui in Belgio stipendia fecerant, propter tamen & temporis breuitatem, & quòd Lubecenses minus comes in concedendo delectu se præstiterant, plerique ex vicinioribus etiam Germaniæ locis, ii que tyrones, raptim scripti erant. Iisdem temporibus Bartholomæus Budlerus à Duce Churlandix cum aliquo militum numero, qui superioribus expeditionibus cum aliis in locis bellum Rex administraret, ad Liuoniæ fines in stationibus contra hostes fuerant, in castra venit: Voluntarij præterea aliquot, cum ex Prussia, inter quos in primis Fabianus Dhonanus: tum præter Rhederum, de quo supra dictum est, alij etiam ex externa iuuentute nonnulli fama expeditionis huius exciti. Rex cum vniuerso exercitu flumen transgressus, sub eos, de quibus dictum est, colles, castra posuit. Vngari à sinistra ad Velikam flumen, Litvani à superiore parte ad Porchoviensem viam confederunt: medio inter hos spatio Poloni triplici carrorum ordine circumiecto, ea de qua antè ostensum est, ratione, ab utraq; riuu illi hac labentis parte castra communiuerunt. qui inter hos & Lituanos tamquam angulus relinquebatur, Germanis attributus fuit. Venit sub idem tempus in castra à Turcarum Imperatore legatus, grauis ætate homo. Hic Tartaros, quos supra profugisse ostendimus, ex fœdere, quo vtrinq; perfugæ reddi iuberentur, repetebat. Ostensum fuit, quia nondum Rex eos vidisset, nec quid dicerent, audiuisset, vbi in Poloniam rediisset, causa cognita Principi eius responsurum. Etsi minor peditatus erat, quàm pro amplitudine susceptæ oppu-



oppugnationis requirebatur: erat tamen & numero, & genere ipso militum ac armorum non contemnendus: equitatus autem, quemadmodum supra ostensum est, ornatio ferè, ac instructior, quàm in vlla antehac expeditione fuisset. Itaq; per frequentissimam castrorum partem barbarus ductus, castrorum magnitudinem, equitum, quos obuios habebat, ornatum, equorumq; præstantiam, ac vniuersi exercitus speciem admiratus, faceret Deus inquit, vt isti principes, Regem ac suum Principem designans, coniuncti inter se animis essent; ne orbis quidem terrarum consensui eorum resisteret. Interim Vngarum militem propius urbem, vt locum munitionibus dirigendis caperet, progressum hostes conspicati, eruptionem mox in eum fecerunt. sed fortissimè ab Vngaris ad portas vsque eos insequentibus, nonnullis vtrinque desideratis, in urbem reiecti fuerunt. Munitiones mox Vngari ab ea parte, qua castra habebant, contra Pochrouiensem, quam appellabant, turrin, penes Velikam flumen: Poloni non longo ab his interuallo contra Sviniensem turrin agere instituunt; prius militaribus corbis locis aliquot iusto interuallo communitis, equitumque ac peditum stationibus in iis collocatis, que militi in munitionibus occupato contra eruptiones hostium, si quas fortè facerent, propinquo è loco subsidium ferrent. Magno labore eo loco propter soli duritiem, quod intra cubiti altitudinem in rupem desinebat, fossæ ducebantur. Nihil tamen ea res Vngari militis impetum morabatur; qui ingentibus saxis securibus excisis, indefesso studio opus perfecit, non tam multorum iactura, quàm insigni vnus Petri Kendij iuuenis claro in Vngaria loco natus, qui cum noctu more suo vigilias Moscis citantibus, ad fremitum eorum procurrisset, è maiori tormento traiectus interiit. Cæterum Vngari, quia ab ipso flumine nullo

ne nullo ambitu capto breuiori spatio rectà versus urbem munitiones suas dirigebant, perfectis iam fossis aduersam turrin quaterere cœperant; exiguoque tempore propugnaculo conuulso proximi muri partem aliquam strauerant. Polonis magno impedimento erat, quòd ab eo, de quo dictum est, loco, longiore interuallo munitiones versus urbem institute illis erant: latera quæ Vngaris ab vna parte Velika flumen, ab altera Polonorum munitiones tuta præstabant, ne circumuenirentur, vineis & subsidiis contra hostium impressiones munienda: indè perfectis tandem munitionibus, curante apud eos tormenta Veiero, prius ex plerisque turribus, ex quibus ab omnibus ferè partibus petebantur, defensores deiiciendi erant: quòd deniq; in fundamenta, ac imam partem muri, iis quæ antè demonstrate sunt, causis, tormenta conuertebant. quas ob res cum ab eorum parte tardius murus perruptus fuisset, Vngari nihilominus, quâ ab ipsis murus stratus erat, irrumpere conabantur. Samoscius cum de eo ad Regem referret, ostendebat, longè & ad securitatem & spem victoriæ certius sibi videri, si dum è Polonorum quoque munitionibus aditus in murum patefieret, irruptio sustineretur: interim & pluribus locis mœnia verberarentur, ruinæ, quibus contra Vngarorum munitiones murus apertus esset, ampliores fierent, qui per eas in urbem aditus esset, cognosceretur: omnibusq; rebus diligenter exploratis, que ad oppugnationem pertinerent, antè prepararentur. Timebatur ab altera parte, ne tempore interposito, spatium sui muniendi, nouasq; fossas obiciendi hosti daretur: maximè verò quò minus consilio huic locus esset, difficultas pulueris tormentarij faciebat; vt necessariò prius tentandum aliquid videretur; quam omni consumpto vnâ cū puluere urbis ipsius potiunde spes decederet. Descenditur eò, vt mittantur, qui locum



locū inspiciant, ac an quæ transgressos fossæ difficultatē sue excepturæ essent, explorent. Deliguntur ex Germanis quinquaginta circiter; quòd erant inter hos, qui in aliarum urbium oppugnationibus assiduè antea versati fuerant. Hortatur simul Samoscium Rex, ut quæ ad oppugnationem pertinerent, administraret. ne si de aditu non incommoda renunciata essent, vel minimum temporis spatium differretur. Interim Vngaricus Decurio quidam missu centurionis ad os, quòd ab Vngaris, quemadmodum dictum est, in muro patefactum erat, profectus omnia facilia ac aperta renunciat: aditum latum: descensum expeditum: exiguas ab interiori parte fossas obiectas. Quo tempore cum è primariis Senatoribus quidam differri non nihil adhuc irruptionem suaderet, ne inter Polonicam & Vngaricam nationes æmulatione aliqua oriretur, si Vngarus prior irrupisset; ostendisset quòd; Samoscium, cur à Polonis aditus tam latus patefieri nondum potuisset, is vnāquamque selem pro se venari respondit. Samoscium itaque; ad munitiones profectus, Polonis Germanos adiungit; quæque oppugnationi vsui sint, administrari iubet. Vngaris Bornemissa præficitur. Rex sub ipsam fluminis ripam, ad quam Vngarorum munitiones pertinebant, progressus, militemque; ad irruptionem paratum, paucis, quæ tempus ferebat ad virtutem cohortatus, è propinquo euentum oppugnationis expectare instituit. Iam antè autem tormenta aliquot Velikam translata fuerant, abque; inferiori parte muri, per quem ad oppugnationem iturus miles erat, ita collocata, ut aduerso muro à fronte deterso, relictis indè secundum vniuersum id latus interiori ictibus defensores peterentur. Eques ex instituto militari idoneis locis supra munitiones, circa urbem, atque; vias, in omnes casus disponitur. Non poterat latere hostes, quid in castris pararetur; quòd in omnes partes latissimus ex urbe

vrbe despectus erat. Itaque ipsi quoque; muros frequentes complebant. Samoscium primum ex Polonico pediatu viginti expeditissimos delectos per aduersam fossam muros succedere, quisque ab eo loco in urbem aditus sit, explorare iubet. Renunciant illi fossam ab ea parte esse, supraque eam pontem aliquantò depressiorem, per quem non difficulter tamen fossa superari possit. Mittit inde è Germanis quinquaginta eos: mandat his, ut quàm proximè muros subeant; si superare ruinas possint progrediantur, signoque; quod acceperant, dato, alios, quos quamprimum iis summissurus sit, expectent; si non patere per eas aditum intelligant, sine ignominia se recipiant. Interim si illis successisset, signumque; quod conuenerat, datum ab iis fuisset, quæ illis subsidia summittat, disponit: primò eiusdem nationis militem, quod qui præmissi fuerant, id postularent: indè Polonum partim equitem, qui Georgio Mniscio præfecto Sanocense, Stanislao Stadnicio, Procopio Penonscio, Andrea Orsechovio, ac aliis quibusdam authoribus, equis missis, vltro operam suam detulerat: partim peditem. Primo loco Penonscium & Orsechovium cum turmalibus eorum, qui hastis rem gererent, locat. Indè Vrouecium cum pixidariis. Post hunc Stanislauum Stadnicium cum altera equitum turma. Huic rursus Vibranouiium & Syrneum cum suis quæque cohortibus in subsidiis esse iubet. Vltimo & separato loco Georgiū Mniscium cum iis quos ductabat, equitibus constituit; partem ad tormenta munitionesque retinet. Germani cum ad fossam successissent, Ioannesque; Garonna Galus progressus primus aditum tentasset, graui casu ab hostibus illo deturbato, cæteri cum angustiore ruinas, quàm ut commodè transiri per eas posset esse existimarent, conferti ad fossam constiterunt. Poloni qui à tergo vrgebant, cum non dari sibi locum viderent, per me



dios illos penetrant; hostes turri lignea, munitioneque quam tignis in angulo turris, quæ cum muro coiens efficiebat, ea de qua supra dictum est, ratione contabulauerat, cespitesque vestiuerant, deiiciunt: in turrim magno ipsi labore euadunt; principesque Vibranouius ac Syrneus in summa turri signa figunt. Germani ad os, quod contra Vngarorum munitiones erat, quod per id latiore aditum esse viderent, signa conuertunt. Prescriptus idem, qui supra demonstratus est, ordo, & Vngaris fuerat, missusque; eius rei causa ad eos Franciscus Veselinus, primarius cubicularius regius. Verum apud Germanos primum eo turbato, Vngari quoque, cum Polonos iam irrumpere cernerent, signo prius a Rege accepto, per ruinas in turrim euaserant; primi que Thomas Dercenus, & Matthias Kerekesius signa in ea constituerant. Hos Gabriel Bekefius arrepto signo, equitem, cui præerat, secum trahens, secutus fuerat; moxque pluribus aliis signis illatis, cum ulterius inde in urbem contendere vellent, fossa iam antè ab hostibus ducta, lignæque munitiones nonnullæ præter opinionem obiectæ impetum eorum tardabant. Hostes ab initio nostrorum in subeundis muris impetu perterriti, suos è propugnaculis pulsos, signa diuersis in locis fixa iam videntes fugam circumspectare cœperant. Interim Ioannes Suiscius passim equo Saucio volitans, modò minis, modò precibus, tandem ploratu & misericordia: ab altera etiam parte Episcopus urbis sacra & simulacra obtendens, dum in occupandis muris nostri retinentur, fugam pauoremque suorum sistunt. Primum tormentis ac saxis petere nostros cœperunt: nostris vicissim tela in eos adiicientibus, compluribusque vtrinque faucibus, turri, quam à Polonis occupatam supra ostendimus, puluerem subiiciunt; nullamque in partem milite se commouente, binis aliis vicibus id repetunt. Quo turri tandem correpta nostri ferre ignem

re ignem diutiùs non valentes primum descendere: ad extremum etiam cum ex propugnaculo Velikano, quod è nostris tormentis tam breui tempore sterni non poterat, ipsi transuersis hostilium tormentorum ictibus ferirentur, recipere se coacti fuerunt. Inde in Vngaros omnes conuertuntur; qui cum eas quas diximus illis obiectas munitiones, superare se non posse intelligerent, cum diu hostium impetum sustinuissent, ac nox immineret, cæsis omnibus prius sublatis more militari se receperunt. Desiderati eo die sunt ex nobilitate Polonica ultra quadraginta: ex Vngaris non pauciores, ac præcipui inter eos nominis Gabriel Bekefius. Magnum hostes quoque detrimentum acceperunt: cæsi complures; in quibus primarij peditum ductores, Nicolausque Cirkassius præfectus Kosakkorum: plurimi vulnerati. Itaque literis, quas ad præsidium Vdouense dederant, quæ exiguo postea tempore interiecto interceptæ à nostris fuerunt, magnum terrorem ostendebant; utque sine mora iis de rebus princeps certior fieret, subsidiaque sibi mitterentur, petebant. Samoscius militi ob eius diei laborem ac aduersitatem consulendum ratus, equitem, qui cum Georgio Mniscio præfecto Sanoense in subsidiis collocatus fuerat, integerque adhuc erat, quod conturbato postea ordine res ad eum non peruenisset, circa tormenta munitionesque excubare iubet: vniuerso autem peditatui ac munitionibus Vrouecio in oppugnatione concusso, Stanislaum Penkoslauium præficit. Altero die consilio habito, ante omnia de tormentario puluere conquirendo cogitari cœptum fuit. Mittitur ad Ducem Churlandiæ, Rigenses aliaque vicina loca. Exempla literarum Plescouensium, quæ interceptæ fuerant, passim describenda Samoscius dat; quibus, si quis forte grauior de aduerso oppugnationis exitu rumor in Poloniam perlatus esset, hostium incom-



modo perspecto is deleretur. Proponit eodem tempore Regi, quò minus casus aliquis, qui obsidionem eos relinquere cogeret, interuenire posset, optimum è re nata sibi videri, si integro adhuc exercitu castella, per quæ miles distributus, longinqua obsidione, ac commeatus inopia premere urbem posset, aliquot communiantur: iis perfectis, quòd voluntarius miles diu moram laturus non esset; commeatus præterea difficultatem reliquo exercitui aucturus videretur: nec dignitatis Regis futurum esset, vt voluntariis dimissis immينو exercitu remaneret, ipse in Poloniam, ad comitia obeunda, supplementum scribendum excurreret; se cum exercitu reliquo ad urbem relinqueret. Si hiems expectaretur, voluntarios incommodis obsidionis, atque hiemis iniuriis adactos, missionem flagituros: reliquum militem nullis rebus preparatis, commeatu omni consumto minus animi & virium habiturum; castella verò eo tempore vel muniendi vel exstruendi nullam rationem fore. Regi cum aliis multis de causis, omnia prius, quam ad id consilium descenderet, tentanda videbantur; maximè tamen, quòd cum Posseuinus, qui in Moscouia erat, de animo erga pacem Mosci significaturum se ostendisset, verendum intelligebat, ne, si priusquam ille rediret, eorum quid susciperetur, hostis defendendæ urbis spe illi aucta, si fortè de tradenda sibi Liuonia consilij quid iam suscepisset, id tum commutaret. Dum hæc geruntur, puluisq; ac apparatus bellicus expectatur, cuniculis interim munitiones hostium tentare placuit. Bini è Polonorum munitionibus versus fossam instituti, à rupe dura atq; aspera excepti perducere non potuerunt. Vngari per summum solum fossa ducta, eademq; crateribus intecta, vnum eo modo perduxerant. Is cum latere hostes non posset, qui vt minus eum vidissent, ex eo ipso tamen, quòd ab oppugnatione tam diu cessaretur, conie-

coniecturam de consilio nostrorum capiebant, alium secundum vniuersum id latus in longitudinem, ex quo nostros obseruarent, egerant; ac tum cum puluere subiecto intercipiebant. Iisdem temporibus subsidia è Moscouia per Vdovam obsessis mitti cognitum fuit. quæ cum per Pelbam lacum, ac Velikam flumen nauibus ventura Samoscius intellexisset, primum nauibus aliquot conquisitis continuas arbores cuneis ferreis in singulas impactis, per eosq; catenis transmissis, ea qua flumen erat latitudine connectit: alias à superiori parte fluminis, qua venturus hostis erat, secundum aduersam ripam alligat; ita, vt cum hostium naues transissent, funibus adductæ regressum ab ea parte hosti clauderent: alias ab inferiori parte versus urbem ita obiicit, vt cum cum in locum peruenissent, irretitis vtrique nauibus, nullam in partem effugium pateret. In naues, quas contraxerat, Germanos, qui earum administrandarum peritiores credebantur, imponit: Vniuersæ rei Vrouecium præficit; cum eoq; secundum vtramque ripam expeditum peditem disponit. Aduenerant commodum sub id tempus Albertus Resaiscius Castellanus Varfauienfis cum centum circiter & quinquaginta: Stephanus Bilaius cum septingentis equitibus: Nicolaus Korffius & Vilhelmus Platerus cum Liuonibus aliquot equitibus. Eos cum extra castra adhuc versarentur, Suatorhoram versus confidere, ac quò tutiores contra hostiles incursiones essent, fossa castra communire iubet. Hostes nauibus silenti nocte progressi, cum in insidias, ac nostras naues incidissent, ac ne primum quidem impetum nostrorū ferre potuissent, mox in ripam se eiiciunt; ibi ante lucem palantes excepti, ducentiq; circiter Boiarici generis capti, ac in castra adducti fuerunt. Haud multò post aliud à Derpatensibus subsidium obsessis mittitur. Verum id, cum appropinquanti ma-



turius miles se ostendisset, celeriter se recepit. Aliquanto deinde tempore interiecto Nicolaus Chostovus inter peditū ductores secundum Kosceciū præcipuæ apud Ducem authoritatis cum septem millibus subsidio obsessis venire ab exploratoribus nunciabatur. Itaque Samoscius, quod vereretur, ne superioris subsidij casu fama ab hostibus cognito, aliò iter auerterent, totum locum cum, qui à castris Suatohoram vsq; vltra duo milia patebat, excubiis complecti statuit. Erant militares ante hac excubiæ à castris ad flumen Plescouiam vsq; positæ: ab eo verò ad Suatohorensē viam, quòd maximum interuallum esset, ne miles in tot excubiis distractus nimium defatigaretur, Lituani voluntarii vltro eam ad rem operam suam Regi deferebant. Chostovus cum diu in insula quadam Pelbæ lacus hæssisset, ac de priori subsidio, quod nauibus aduenerat, intercepto intellexisset, in terram exercitu exposito, noctuque devio per siluas ad sinistram itinere capto, Plescouiam contendit. noctu maior militum pars dilabi ab eo cœpit, vt ex septem millibus vix trecenti penes eum manerent: ipse vt diffugientes vel vi contineret, extremum agmen cogebat. Itaque cum superiorum noctium excubiis Lituani fatigati, simul quòd interea temporis nondum hostis venisset, de diligentia remisissent, præterque morem excubiarum aëris iniuriis coacti ignes excitassent, Daniel Islenovus, qui in primo agmine incedebat, cum iis, quæ supererant, copiis, cuius locis iis, in quibus ignes cernebantur, in urbem euasit. Chostovus, qui in extremo agmine, vt dictum est, erat, ac præterquam quòd totius noctis maximo in sistēda fuga suorum labore confectus erat, corporis insuper mole homo procera statura tardabatur, cum è siluis egressum lux oppressisset, herbis per aliquot horas cæteris dilapsis se textit; ibique ab equitibus Andreae Vjsnouecii Palatini

latini Voliniensis, qui tum eius diei excubias excipiebant, repertus, ac ad Regem adductus fuit. Qui cum defuerant, partim cæsi, partim magno numero capti fuerunt. Aliquot diebus post Theodorus Mesceodovus itidem cum copiis aliquot subsidio obsessis missus fuit. Hic cum iam ferè excubias Lituanicas præterisset, extremum agmen à Gabriele Cirkassio deprehensum fuit: qui cum impetum in id fecisset, & clamore sublato Bilaius quoque cum suis accurrisset, centum circiter & quinquaginta concisi, ad sexaginta capti fuerunt, ceteri ad trecentos cum Mesceodovo in urbem penetrarunt. Dum ad Plescouiam hæc geruntur, Sueciæ interim Rex in aliena victoria suam prædam facit; eoque quem in Germania ac Gedani, iis de quibus dictum est literis adiutus, militem conquissuerat, quemque è suis præterea ditionibus contraxerat, per militiae præfectum suum Pontum Gardyanum Naruam occupat. Opidum id ad Velikam flumen situm est, quod qua Pelbam lacum relinquit, mutato in Naruam nomine, opidoque à se appellato triginta circiter infra id passuum millibus in mare influit; eo alueo, vt ad urbem ipsam maximæ onerariæ naues appellant, eademque vltius Plescouiam vsq; non incommodè agi possent, nisi supra lacum Plescouiam versus viginti circiter cubitos altæ cataractæ cursum earum interciperent. Dum in Magistrorum ordinis, præscorum Liuoniæ Principum potestate erat, propterea quòd omnes merces Moscouicæ Derpatum primò deuehebantur, indè per Reualiam aut Parnauiam in mare exonerabantur, minùs vel à cultoribus frequens, vel munitum erat. Postea Ioannes superior in aduersa ripa aliam multò munitiorem è regione illi arcem Ivanogrodum ab illo, à Liuonibus Russicam Naruam ad suæ, quam Germanicam appellabant, discrimen dictam, tam propinquo ab ea spatio excitauit, vt cum



cum veteri Narua ponte coniungi, abque utroque loco telum in alterum adiici posset: ex ea cum Moscus profectus Liuonica quoque Narua potitus fuisset, cum Germanicis aliisque vltamarinis & occidentalibus nationibus commerciorum in ea sedem collocaret, omniaque eò negotia & merces transtulerat. Sub famam expeditionis ad Plescouiam regiae, quemadmodum ex aliis arcebus, ita illa etiam maiorem praesidii partem ad Plescouiam tutandam contraxerat. Gardyanus cum tormentis quater muros coepisset, ac Mosci, qui in Ivanogrodenfi praesidio erant, Liuonicae Naruae, cui metuebant, tuendae studio, pontem transiissent, tormentaque pleraque secum traduxissent, ac verò irrumpente iam in opidum milite, territi, retrocedere coepissent, Itali aliquot, qui cum Hieronymo Cagnolo in Suetico exercitu erant, victoriam subito conclamantes, cumque reliquo milite ad portas usque eos infecuti, magnum eorum numerum conciderunt. Hac re, caeteri, qui in arcem euaserant, territi, simul tormentis, quibus se defenderent, quae paulò ante Naruam transtulerant, destituti, exiguitateque ipsa sua de defensione desperantes, deditionem fecerunt. Eadem praesidiariorum consternatione Iamorodum quoque & Koporiam vicina castella in potestatem redegit. quibus rebus perfectis in penitentiorem Liuoniam, ut per reliquas arces, quae à Moscis tenebantur, arma circumferret, cum exercitu regreditur: primoque Veisensteinium castrum alioquin natura & opere munitissimum, in ea Moscorum trepidatione, praesidii exiguitate, nulla, dum Plescouia obsidetur, auxilii spe in deditionem accepit. Inde Parnauiae exercitum admouet. Post captam Naruam literas à Principe suo ad Regem mittit, quibus is ad priores Regis literas, quibus multò ante, ut à Liuonia tanquam alieni belli praemio abstineret, amicè hortatus eum Rex fuerat, cir-

rat, circumducto die rescribebat; ac suum cuiusque iudicium, quibus in locis bellum cum hoste gerere, quasque ditiones eius inuadere vellet, esse debere significabat. Magna spes Regem tenuerat, fore, ut aequitate priorum postulationum suarum perspecta, locum eis Suetiae Rex relinqueret; non modò quòd Liuoniam vniuersam iam olim in fidem Regum Poloniae venisse eò minus ignorare Sueciae Regem sciebat, quòd superioribus temporibus, cum frater eius Ericus Reualiam occuparet, nullo iure id ab eo fieri propriis literis suis testatum fecisset; verum etiam, quòd, postquam ipse maximo labore ac impensa ad legatos de pace mittendos, vniuersam Liuoniam primò cedendam, inde deferendam pene hostem adegisset: ad paratam à se victoriam Sueciae Regem accessurum expectandum sibi non arbitratur. Quare etsi iniuria hac non parum commoueretur, in praesens tamen differendam iudicabat. Iisdem temporibus à regibus quoque Praefectis simili fortuna castra nonnulla Moscis in Liuonia adempta fuerunt: A Duce Magno Kirempesium occupatum: Fabianum subitario opere munitum: à Byringio Pyrchelium: Thoma Embdano Salium captum: A Dembinio Lenouardum & Ascherotum; quae vtraque Dunae flumini imminabant, peditatu aliquo à Rigensibus, quibus grauis hostilium praesidiorum vicinitas erat, accepto, Scotoque milite, qui ad Regem ibat, retento, expugnata. Iamque Kokenhausium quoque castrum munitissimum, ab eodem Dembinio obsessum commeatus inopia breui in potestatem nostrorum, peruenturum videbatur. Suprà demonstrauimus Christophorum Radiuilum ad vltimas hostis in Mohilouensem & Sclouensem agrum excursiones cum parte exercitus Moscouiam versus missum à Rege fuisse; eique Philonem Kmitam ac Haraburdam cum Lituanicis Tartaris coniungere se iussos. Kmi-



fos. Kmita cum duobus circiter millibus equitum, Tartarisque, qui sub Haraburdæ ductu erant, Lukis egressus, octo circiter ultra Toropeciam millibus ad Nemesam flumen, ac monasterium quoddam, aduentum Radiuili expectare instituerat. Sub idem autem tempus Moscouiæ quoque Dux, qui non procul inde Stariciæ tum erat, cum de nostri exercitus aduentu nondum cognouisset, Michaëlem Nosdrouatum, & Petrum Boratinscium cum tribus circiter millibus militum eodem consilio miserat, ut metu undique quam maximo facto, qui e suis in Regis fidem venerant, direptionibus ac populationibus vexarent. Eorum exploratores temere vagantes cum in pabulatores nostros incidissent, duo ab illis excepti, ac in castra adducti, ostendunt quindecim inde millibus passuum ad Salesam exercitum confidere. Contra quem cum Radiuilus, qui iam tum aduenerat, Bochdanum Ogniscium septingentis circiter magna ex parte leuis armaturæ equitibus ex diuersis turmis ei attributis misisset; ducenti circiter præter imperium pugnandi auiditate cum stationibus hostium congressi, ad diuersos pontes, circa quos scloppetarios hostes in insidiis disposuerant, pertracti aliquot ex suis amiserunt: verum aliis subsecutis, ac Gabriele Holubkone suis, ut de equis descenderent, scloppetisq; rem gererent, mandante, summotis per hos à ponte hostibus, nostri hostium equites in fugam effusos ad quindecim ferè millia passuum insecuti, aliquot ex iis ceperunt. Radiuilus cum cognouisset ad Resouam aliam exercitus hostilis partem confedissee, versus eam via impeditiissima, quâ nulli ante eum exercitui iter fuerat, cum exercitu progressus, triginta à Resoua passuum millibus substitit, inde Sukopsciam Iamam, quo nomine locum in quo diplomata iter facientibus dari solent, appellant, se conuertit; ac ad flumen Volgam castris metatis

Halim-

Halimbekum cum Tartaris, quos circa se habebat per flumen Stariciam versus contendere, populationesq; ac incendia quam latissimè in hostico circumferre iubet. Satis constat Moscouiæ Ducem, qui, quemadmodum supra demonstratum est, Stariciæ tum euentum obsidionis Pleseouensis expectabat, cum aduentantem exercitum, fugas agrestium, ignes passim sublatos ipse magna ex parte cerneret; ac, quemadmodum ex Possuino, qui tum apud illum erat, cognitum postea fuit, non ultra septingentos milites circa se habebat, summa in trepidatione versatum; delectum ex omni genere hominum promiscuè habuisse, fugamque iam circumspicere. In præsentia mittit, qui agmen nostrorum speculentur, quamprimùmque de eo sibi renuncient. Hi cum ad Okomeciam alterum diplomatum locum, in quo Tartari pernoctabant, quinque millium passuum interuallo accessissent, diligenterque à nostris excubias agi, loco præterea munito eos confedissee ex agrestibus accepissent, ad latus conuerso itinere paludesque quæ iis in locis erant, transgressi, ex Nohaiensibus Tartaris ac pabulatoribus nostris aliquot oppresserunt. Interim Daniel Murfa ex iis, qui in mensæ ministerio apud Moscum versabantur, ad nostros transit: qui cum de numero exercitus eadem ferè, quæ antea fama, ac captiuorum sermonibus acceperant, ac inflatus pleraque prædicasset, orationiq; eius tanti principis inueterata potentia fama facillè fidem faceret; et si memorabilis facinoris, si Stariciam processissent, patrandi spes nostris ostendebatur: iis tamen viribus, quibus potentissimi principis vitam ac salutem septam esse credi debebat, minimè pares se futuros rati; Dunam indeq; Dubnam magnis itineris difficultatibus conflictati se recipiunt. Ex itinere, temerè ab agrestibus rumore tradito, com meatu Toropeciam laborare, ad eam deflectunt,

R

exerc-



exercitumque ei admouent. verum paucis diebus post cum falsa de statu praesidij delata ad se cognouissent, se receperunt. Radiuilusque Chelmam recta, inde praesentem Russam versus contendit. Collocata ad Opakam contra Nouogardiam Kosakkorum manus aliqua fuerat: quae partim praedis ex hostico agendis hostem distineret, partim subuectiones subsidiaque, si quae Nouogardia Pleseouiam mitterentur, obseruaret. Hi cum continue praedas ex hostico agerent, magnisque incommodis hostes afficerent, Tartari Moscouitici, parte eorum negligentius agente, parte ex instituto ad praedas agendas profecta, repentino aduentu, eos qui in statione relictis erant, oppresserant. Tartaris a ceteris reuersis rursus deiectis, Mosci alias suas duobus locis ad Russam & Misziagam stationes ab Nouogardia nostris Kosakkis opposuerant. contra eos igitur, qui ad Russam erant, Radiuilus Kosakkos, quos penes se habebat, ipse subsequens, praemisit. Hi hostibus fama aduentantis exercitus iam ante territis, ac primo aduentu eorum in fugam conuersis Obalinscium ac Boiarici generis aliquot capiunt. Eo deinde ex loco ad Regem & reliquum exercitum Radiuilus reuenit. Iam ante Antonius Possuinus etiam, quem a summo Pontifice legatum ad Moscum iuisse supra ostendimus, cum mox post discessum a Volga Radiuili dimissus fuisset, ad Regem venerat; turmis aliquot equitum, quas a Nouogardia de aduentu eius certior Rex factus, obuiam illi miserat, in castra deductus. Afferebat hic, Moscum & si in ea & sua trepidatione, & belli aduersitate cum primis pacis cupidus esset, nullis tamen aliis conditionibus eam accipere obstinatum habere, quam quas iam ante Polotiae per legatos suos proposuisset. Nam quod hiems, quae saeuissima iis in locis frigora adferre solet, instaret; militem, quem ne primas quidem iniurias eius toleraturum sibi persuadebat,

debat, per hiberna distributum iri: Regem superiorum annorum consuetudine ad comitia obeunda in regnum se recepturum: interim urbem obsidione, se metu solutum iri, facileque quamuis aliam sustinendi belli impetusque regij rationem deinceps se reperturum confidebat. Rege contra Possuino ostendente, nec se prius exercitum ab urbe deportaturum, quam vel urbe potitus esset, vel vniuersa Liuonia Moscus decessisset; hortabatur nihilominus eum Possuinus, ne omnem tamen spem pacis praecideret; locumque colloquio constitui pateretur, in quem vtrinque legati conuenirent, ac de pace inter se agerent: quod cum Rex permisisset, literas per expeditum equitem ad Moscum dat. his eo omnino animo Regem esse ostendit, ut non prius abscessurus, aut vllum belli finem facturum sit, quam vniuersa Liuonia Moscus excedat. Quare ne nimium ea in re poneret, quod frigoris saeuitia coactum abscessurum tandem exercitum existimaret; videre se obfirmato ad perferendam eam omnes animo esse; tum ut obsidio sustineretur, debere eum tamen tot subiectorum sibi innoxiorum calamitatibus atque miseria commoueri; qui cum pro ipsius salute nullum periculum ac cruciatum recusent, summam eum iniquitatis condemnari debere, nisi ipsorum vitam suis commodis ac obstinatione potiorrem habeat. Eos autem neque propter frigoris vim in siluis iam latere: nec iis ipsis, quod paludibus omnibus frigore concretis, peruiam breui nostris futuram essent, amplius protegi posse: eorumque iis ipsis diebus, quibus in castra venisset, magnum numerum partim concisum, partim captum se vidisse. Sub id enim aduentus eius tempus, subsidia, quae cum Mesceodovo venerant, quemadmodum supra ostensum est, excepta fuerant. Proinde ipse sibi consilium caperet: se quidem, ut serio tandem animum ad pacem applicaret, authorem ei esse



se; egisseque hanc ob causam cum Rege, vt ne omnem tamen de pace agendi facultatem tolleret: impetrasse, vt legatos eius certum in locum, qui Mosco videretur, accedere, cumque suis legatis de pace agere se passurum Rex receperit. Moscus literis iis acceptis sine mora nuncium vnà cum suo tabellario, literisque ad Posseuinum remittit. Pagum Sapoliam nonaginta passuum à Plefcouia millibus, in diplomatum vsus & ipsum constitutum, ad conuentionem deligit, publicæq; fidei literas, legatis suis mitti postulat. Mittuntur literæ: locus accipitur. Exercitus interim, qui ad Plefcouiam erat, maximis cum hiemis, tum obsidionis diuturnæ incommodis afficiebatur. Ita que cum & à voluntariis palam missio flagitaretur, conditionesque pacis passim sermonibus agerentur; non deerant, qui remittendum potius Mosco de Liuania aliquid censerent, quam cum exercitus incommodo diutiùs obsidionem ducendam. quod vt summi Pontificis autoritate persuadere Regi conaretur, Posseuinum etiam tacite hortabantur: idque quò commodius perficeret, cum sententias senatus de conditionibus dicturus esset, eum vocari, præsentemque illo sententias dici debere censebant. Spargebatur in vulgus, Regem vt maximè Liuiam vniuersam adiunxisset, omnem in Vngaros, vel fratrum suorum filios diuisurum. Ita que stipendiarius etiam miles sermonibus tentabatur; cur pro alienis commodis suo cum periculo depugnaret: pro prouincia, ex qua nec ad ipsum, nec ad rempub: fructus vllus peruenturus esset, vt alij dicerentur, vitam sanguinemque suum ipse in discrimen adduceret. Resistebat rebus hisce summa constantia atque animi magnitudine Rex: maximè voluntarios obtestabatur, ne suo discessu exploratæ penè victoriæ, aut honestæ pacis spem corrumpere. Præter Regem Samoſcius omni contentione in id incumberebat. Ostendebat publi-

publicè, ad omnia priùs se descensurum, quam infecta re, aut non tali pace, qualem in superioribus comitiis Rex atque nomine Regis ipse ordinibus promississet, discederet; quòd si maximè necesse esset, eòsq; tamen, dum comitiis habitis noua ab ordinibus mandata acciperet, se perstiturum. Vt Posseuinus in senatum vocaretur, contra morem maiorum esse differebat. Virum enim prudentem, & in primis grauem & si nihil curiosus in aliena repub: facturum sciebat; ne tamen vel interrogationibus atque studiis aliorum, vel suo pietatis atque pacis in eam sententiam pertraheretur, vt ipse quoque cum aliis remittendæ Mosco partis Liuiæ author esset, verebatur. quamuis eandem sententiam suam hac etiam ratione apud Posseuinum deinde excusabat; quòd cum ex instituto reipub: omnium aliorum Principum legati publicè audiantur, solius summi Pontificis nuncij priuatim Reges conueniant, ne exemplo suo Priuilegium minueret, illum ipsum vitaturum fuisse, existimasset. Consilio deinde iis de rebus habito, due omninò manendi rationes proponebantur. vt vel ex castris atque munitionibus, quemadmodum hæcenus factum esset, obsidio vrgeretur: vel castellis extractis, in iisque milite collocato, diuturna fame, ac comæatus inopia vrbs premeretur. Vtramque cum hiemis iniuriis, tum soli frigore iam astricti duricie, quæ nec militem sub pellibus diutiùs versari, nec opus vllum fieri paterentur, omnes ferè refutabant. Lituanii priuato etiam iisdem de rebus consilio inter se habito libellum Regi offerebant. in quo cum & ipsi manendi consilium omne reiecissent, id petebant, vt quò hibernorum incommoda, quæ superioribus annis continua pertulerant, cuitarent, in agro Moscouitico miles haberetur. Interim diem certam Regi præfiniebant; intra quam nisi pax facta esset, nulla conditione diutiùs remanere



integrum sibi esse ostendebant. Non poterant latere hæc hostem: quòd propter voluntariorum nullo imperio se suosque coërceri patientium licentiam ex calornibus, ac eo hominum genere, quotidie aliqui ab hostibus excipiebantur: iisque, ipsis diebus Saba quidam cum eius de quo dictum est, libelli exemplo ad eos transierat. Maxima inter hæc flagrabat inuidia Samoscus: illum vnum sententiæ eius esse authorem: hominem à pueritia literarum studiis deditum, atque in Italiæ Gymnasiis versatum consiliis atque obstinatione sua vniuersum exercitum perditurum: legatum cum exercitu in hostico relicturum: ipsum extra metum periculi ad Comitiam pro Cancellariatus sui munere obeunda in Poloniam rediturum. Etenim iam conuentus nobilitatis Rex edixerat. Per eos quo loco res esset, literis nobilitati ostenderat: neue vel exercitum reducere, vel ipse ab obsidione comitiorum habendorum causa discedere cogere, vt in iis conuentibus noua tributa, & que alia ad perficiendum bellum necessaria essent, sciscerret, hortatus nobilitatem fuerat; in omnes nihilominus casus, si res non teneretur, literas, quibus comitia indiceret, simul miserat. Augebat Samoscio inuidiam disciplinæ militaris tuendæ studium, iam ab eo tempore, quo militem habere cœperat, contraque illos potissimum ab eo susceptum, quorum quòd illustrior fortuna esset, peccata etiam, & peccatorum ad deterrendos alios pœnas illustriores esse dicebat. Fremebatur non iam quòd in mulieres, quæ castra irrepserant, grauissimè animaduerti iussisset: nonnullas capitis supplicio affecisset; sed quòd aulicum regium, qui in leges militares aliquid commisisset, in vinculis haberet, nec totius exercitus precibus condonare vellet: quòd pueros nobiles, qui licentiùs in castris versati fuerant, ad palum alligatos publicè spectandos præberet: turmæ præfecti

fecti vicarium suspendio affecisset: ex nobilitate quosdam propter mundiciem castrorum negligentius habitam claua pulsasset. Itaque carmina etiam in eum spargebantur, quibus scholastica vita illi exprobrabatur. His ita non mouebatur, vt cum semel licentiæ fenestra aperta in alios libelli iacerentur, iactataque ea res in senatu fuisset, ostenderet, nisi priùs in seipsum iniuria ea incurrisset, quæstione habita auxilium suum minimè denegaturum iis fuisse: iam cum ab iisdem ipse priùs læsus esset, verendum sibi esse, ne pusilli animi putaretur, si sub aliena persona proprias iniurias vlcisci videretur; rectiusque facturos eos, si suo exemplo contemnendo potius ea diluerent, quàm vindicando vltro authoritatem iis tribuerent. Signa militaria huiusmodi plerunque dabat, quibus modò desidiam, metum, avaritiam domum properantibus vltro exprobrando: modò ad perseuerantiam & constantiam nobili homine dignam eos cohortando à desidia ad tolerantiam, si qui minùs alacres essent, binis vt plurimum verbis reuocaret. Tentarat sub initium motus eius veteranus miles, qui ad Gedanum fuerat, cœtus inter se agitare, quòd de communi re maximè autem de stipendiis debitis de liberarent. Edixit mox, qui priuatas coitiones fecissent, contra disciplinam ac imperium militare fecisse eos iudicaturum, legeque in eos animaduersurum: quòd si quid de commodis suis agendum existimarent, vel se appellarent, vel præsentem se de iis agerent. Itaque ad tentorium eius conuenerunt. Hic cum ille angustiis ærarii demonstratis, è contra quid amor patriæ ac reipublicæ postularet, quid constantia boni haberet, concionatus fuisset: tandem non legatum se ad exercitum relicturum, sed ipsum toto obsidionis tempore remansurum pronunciaisset, vtque idem ipsi facerent, vniuersos hortatus fuisset: initio à Ioanne Sborouio facto, reliqui



liqui omnes, quòad ipse maneret, se quoq; perseveraturos promiserunt. Samoscii consilium manendi secretò amici improbabant: monebant, videret, quam in se rem susciperet, cum periculi plenam, tum quæ si secus caderet, magna cum invidia eius superiorum rerum gloriam ipsius omnem corruptura esset. Iis vnum ille respondebat, existimare se bonum Imperatorem, eundemque bonum ciuem non suæ sed publicæ dignitati studere debere: si re infecta ab obsidione abscedendum sit, è re nata commodius futurum, ad se peccati eius opinionem recidere, quàm ad regem aut rempub. vniuersam. Allato iam antè à Duce Churlandiæ & Rigensibus puluere; ante Regis discessum denuò oppugnationem tentare visum fuit. Ab ea parte, qua Poloni antea è munitionib. suis muros quassauerant, hostes crebra propugnacula lignea obiecerant, eademque fossis communiuerant. Itaq; in superiorem aliquantò partem ad dextram munitionib. translatis, inde rursus tormentis muros percutiebant. Sed eo quoq; loco nouum propugnaculum, tormenta verò adeò grandia hostes opposuerant, vt, cum quoddam septuaginta, alterum octuaginta pondo globos iacularentur, trium aggere repletarum corbium militariū, vt ex ordine positæ erant, feriem, vno ictu penetrarent. Vngari quòad aditum in turrim, quæ ad Velikam flumen, & munitiones eorum pertinebat, satis latum patefecerant, modò ipsi per ruinas eas hostes propellebant, modò ab illis pellebantur. Conuersi etiam ad muros ea ex parte à Velika flumine dolabris & securib. subruendos fuerunt. à quibus cum primùm aqua picèq; feruenti, aliisq; ignibus in eos effusis, auertere eos conati hostes fuissent, Vngari nihilominus è processissent, vt parte muri inferiori egesta, superiore tanquam testudine tegerentur, lediq; amplius ab illis, quæ in eos mittebantur, non possent, hostes ligna iustæ

iuste crassitudinis, ferreis aculeis vndiq; horrentia catenis ferreis ad prælongam sudem aptata ex vrbe supra muros, ad quos Vngarus subruendos constiterat, ita vibrabant, vt ex ea iactatione verberare subtus detorto tanquam flagello, qui in opere erant, verberarentur, magnisque incommodis afficerentur. nec tamen Vngarus remisit, quòad maiorem eius muri partem strauisset. ad extremum, quòad ab ea quoque parte noua propugnacula contra turrim hostes collocarent, fossasque duxerant, oppugnationis consilium omninò dimissum fuit. Erat triginta circiter à Pleseouia passuum millibus via, qua in Liuoniam & Rigam itur, imminens monasterium Pezzyra à Moscis, quasi sepulchretum dictum, Diuæ virginis, cuius eo in loco ex arbore enatam effigiem repertam colunt, religione, sanctitatisque ac miraculorum quorundam fama clarissimum; ob eamque plurimis ac amplissimis prouentibus, de Nouogroda Liuonica agris nonnullis detractis, ei que assignatis à Moscouiæ Duce ditatum. Huic Mosci præsidium imposuerant. Magno id incommodo in ea vicinitate nostris erat. Nam & pabulatores nostros frequentissimè excipiebat: itinera infestabat; eoq; ipso tempore impedimenta à nonnullis præmissa, tum mercatores quosdam Rigenses excusserat. Ad quos damna ea pertinebant, quorum non erant pauci, maximè verò, qui impedimenta sua præmissuri illac erant, vt id potestatis suæ faceret, à Rege contendebant. Proponebatur ab altera parte, milite ex oppugnationis tam diuturnæ, ac irritæ laboribus nondum recreato, nouam vllam tentari non satis tutò posse. Rex multorum continuis precibus victus, Farensbekium eò mittit. Huic mandat, vt situ loci cognito, quid sui consilij sit, certiore se faciat, si non magno negotio potiturum se eo existimaret, militem tormenta que illi summissurum; si difficiliorem, quam



quàm vt eo tempore fufcipi deberet, expugnationem futuram iudicaret, integra re ad fe rediret. Farensbekius paucis cum equitibus eò profectus, in itinere in hostium equites longè plures qui Pezzvra contra pabulatores nostros egressi, sub id tempus redibant, incidit. quorum aliis cæsis, cæteris profligatis, prælii huius proventu inuitatus, & quòd nec fossa adeò magna, nec propugnaculis aut situ magnopere munitum cerneret, vtque homo militaris benè de successu oppugnationis speraret, oppugnationem fuscipit. Mittit illi Rex Germanum militem cum tormentis aliquot maioribus. qui cum actis prius munitionib. muri partem aliquam strauisset, per ruinas irrupere conabatur. iamque Wilhelmus Ketlerus Ducis Churlandiæ fratris filius, Gaspar & Reinoldus Tisenhausii, ac alij quidam in turrim proximam euaserant; atque in imam eius partem per scalas se demittebant. Iis ab insequentibus fractis, ac per ruinas etiam, cum propter angustias earum, tum quòd hostes omnes conferti contra eas se obuenterant, nulla irrupendi facultate militi relicta, qui in ima turri remanserant, ab hostibus capiuntur. Mittit iterum Rex ad eas, quas antè miserat copias Germanorū, Bornemissam cum quingentis Vngaris peditibus, & maioribus tormentis aliquot: Polonicum militem ad castra Samoscius omnem retinuit. Vngari cum ab eadem parte, à qua Germani oppugnabant, inferiori tamen loco læuam versus muros quaterere cœpissent, iamque aliquam muri partem diruissent, Thomas Solandius manu aliqua calonum & Kosakkorum Polonorum facta auersam à Germanorum & Vngarorum munitionibus turrim, vt hostem distineret, scalis admotis scandere cœpit. iis iam repulsis cum Germani per ruinas muri, iterum irrupere tentassent, omni hostium multitudine in eos conuersa, reuiciuntur. Eodem successu cum donec Ger-

nec Germani se recepissent, cessassent, ab Vngaris quoque irruptio tentata fuit; hostibus rem miraculo, nostris incantationibus & magicis artibus tribuentibus. verum animaduerti hinc potuit, non minus sæpè in leuioribus munitionibus negligentia, quam in firmissimis difficultate offendi: quòd in his magnitudo periculi, ac ex eo natus metus virtutem militum plerumque acuit: in illis exiguitas rei contentionem animi ac curam vt plurimum remittit. Non dubitandum enim aliqui existimabant, si coniunctis viribus, ac vno tempore incubitum in oppugnationem fuisset, non adeò magno negotio expugnari potuisse: Interim dum singuli per se, primùm Germani, inde Vngari successissent, & hosti in vnum locum vires omnes suas conuertendi facultatem datam: & nostrorum impetum imminutum. Recipientibus se nostris Scoti milites, qui haud multo antè ad Regem venerant, opportunis locis subsidio collocati, si qui è muris telis aut scloppetis nostros petebant, certissimis ictibus conficiebant. Antequam discederet Rex, legatos, qui de pace cum Moscicis agerent, Ianusium Sbarasium Palatinum Braslauiensem ab regno Poloniae, Albertum Radiuilum, Palatii Lituani Marfchalcum à magno Lituaniæ Ducatu designat. His Michaëlem Haraburdam hominem ingeniosum, & Moscouiticarum rerum cum primis peritum, more maiorum, scribam adiungit. Cum de conditionibus, in quas pacem fieri placeret, ageretur, vrgebant proceres Lituani, vt magni Luki, qui proximo anno capti ab hoste erant, quòd facilius pax conueniret, hosti redderentur. Ostendebat Samoscius, etsi quantum ad Lituaniam tutandam momenti tam opportuna vrbs, ac ea fertilitate, omniumque rerum copia abundans ager haberet, animaduerneret: quò minus tamen id fieret, non vsque adeò se repugnare, quod non ea religione eius retinendi,



tinendi, cuius nulla in comitiis mentio facta esset, qua recuperandę Liuonię obstrictus ordinib. esset: molestę tamen se ferre, ante tempus hęc nullo cum fructu, non nullo autem, ne ad hostes efferrentur, periculo iactari. Itaq; Rex priuatim re cum Samoscio communicata, pacisq; constituendę arbitrio ei permissio, cum quid ab eo fieri vellet, quid cum in regnum venturus esset, ipse procuraturus esset, ostendisset, optimę spei & fiducię plenus discessit. reliqui ferę omnes ex præteritis obsidionis incommodis, ac imminentis hiemis difficultatib. de reliquę obsidionis euentu iudicantes, simulq; imminuti ac attriti exercitus opprimendi tempus nullum hostem prætermitturum cogitantes, non secus ac si extremum, quos relinquerent, visuri essent, periculum eorum miserabantur. vt non deessent ex primariis senatoribus, qui Regi Balthafarem, Andreę fratris sui filium cum Vngaro milite in castris relinquenti, ne id faceret, persuadere conarentur. Cum Rege vniuersus comitatus aulicus ac voluntarii ferę omnes proficiscebantur. itinere igitur per Ostrouam & Krasnohorodam capto, indę Ludsenium, & Rosittenium, quę hostilibus præsiidiis adhuc tenebantur, sine impedimento prætergressus fuit. sequebantur reliqua agmina properantius, omnibus ad Dunam flumen præuertere annitentibus. Itaque & si subsidia contra eruptiones à Radiuilo disposita fuissent; iis tamen dilabentibus, aliquot nostrorum carri abrepti à præsiidiariis Moscicis fuerunt. Transmisso indę ob nauigiorum inopiam non sine difficultate ad Duneburgum Duna flumine Vilnam Rex venit. In castris Polonicus miles stipendiarius omnis cum Samoscio remansit; tam is qui ab initio cum eo ad Pleseouiam accesserat, quàm quem à Stariciensis excursionis cum Radiuilo reuersum receperat. Lituani cum Martino Curtio legato sexcenti; qui ab eadem excursionis in castra venerant; & quò

& quò ab eius incommodis se reficerent, vt in vicinis pagis Porchouam versus collocarentur, à ductoribus impetrauerant. E voluntariis Poloni aliqui non multi tamen remanserunt.

## R. HEIDENSTEINII

SEC. REGII DE BELLO

MOSCOVITICO

*Commentariorum*

## LIBER QVINTVS.



**S**AMOSCIVS PROPECTOR castris Rege disciplinam imprimis militarem, quam aliàs magna cura tuebatur, quò inter tot difficultates in hostico omnia diligentius circumspicienda sibi videbat, eò accuratiori studio sanxit. Ex præfectis, qui ætate, ordine, ac vsu rei militaris ceteros anteedebant, ad quos de secretioribus quibusq; ac grauioribus rebus referret, sex delegit. Senatorij ordinis Stanislauum Tarnouium Radomiensem: Stephanum Grudfinscium Naklensem Castellanos: Ex aliis Ernestum Veierum, Martinum Kasanouium, Ioannem Lesnouolscium, Sigismundum Rosnium: cæteris in rebus omnes ad consiliũ adhibebat. Interim quemadmodum Rex cum illo constituerat, eam in rem omni studio incumberebat, vt si pax cum hoste non conuenisset, ad obsidionem quàm diutissimè continuandam fameq; ac omnium rerum inopia ad deditiõem urbem adigendã instructa omnia ac parata haberet. De huius autem rei successu non dubitan-

S

dum



dum sibi existimabat. quò quantum in vrbe virium, apparatus bellici, commeatus ac rei frumentariæ esset, ex Sturna scriba Suiscii; qui in excursionem quadam vna cum fratre captus fuerat; seu quemadmodum ipse, postquam in potestatem nostrorum peruenisset, præ se ferebat, transfugerat, exactè cognitum habebat: subductisque rationibus, si omnes ad importandos in urbem commeatus ac subsidia aditus præclusisset, non multum ultra mensem Maium sustineri obsidionem posse reperiebat. Itaque sic se comparabat, vt vel ex iisdem statiuis, quemadmodum eò vsque factum fuerat, obsidione urbem premeret; aut si hiemis sæuitia, ac commeatus, qui antè omnis ferè ab exercitu consumtus fuerat, angustia, quò minus id facere posset, prohiberetur, recreato interim prædis ex hostico agendis milite, Pezzuræ peditatum omnem, ac tormentorum partem admoueret; quam ob causam & quæ antè eò missa fuerant, tormenta non deduxerat: eaq; occupata simili ratione Porchouam ac Vdouam vicina castella oppugnaret; præfidiisque iis impositis hostes intra mœnia compulsos contineret. si plus difficultatis oppugnationem eorum, quam vt tentandam putaret, habituram perspexisset, ligneis castellis ex vicinarum villarum edificiis constructis, opportunissimas quasq; vias, maximè verò, quæ à Vdoua, Porchoua, & Plescouia ad Nouogardiam pertinet, occupare. cumq; parte exercitus ipse Nouogardiam versus in Prebusio Simeonis supra Ilmenum lacum sub tectis consistere: partem dum glacie concretus lacus esset, in prisca Russa, & Ostaskoua continere: iisque ex locis omnibus tam Plescouiam, quam Nouogardiam premere, latissimeque supra Nouogardiam versus Tueram & Moscouiam vastitatem circumferre cogitabat. Ita tamen, vt quòad liceret, primam rationem atq; Plescouiam quam diutissime retineret:

nec

nec nisi hiemis aut commeatus difficultatibus adactus ab ea moueret. Militem, quem circa Svatohoram supra Plescouiam ad Vdouensè iter obsidendum loco opportunissimo collocatum antè ostensum est, minimè interim dimouendum arbitratus, ne tamen repentina impressione opprimi ab hostibus posset, maiorem peditatum, ac minora tormenta aliquot, Stanislaumque Penkoslauium ei adiungit. Si hostis incursionem in eos faciat, die vexillum militare, quo proposito quam primum ad opem iis ferendam accurri possit: nocte ignem tollere eos iubet. Simul ne discessu regio metu omni liberatum se hostis putaret, in omnes rei gerendæ occasiones intentus erat. Quæ cogitanti ex superiorum temporum pabulatorum licentia, qui partito in duos imperio militari, magna præterea voluntariorum parte nullam imperij necessitatem recipiente, sine metu vel imperij vel hostis vagabantur, nec rarò sub ipsos muros succedebant, accidere posse facultatem rei gerendæ ratus: die D. Nicolao sacro, qui vel maximè à Moscis obseruatur, idoneis locis milite in insidiis collocato, carros aliquot propinquo à mœnibus spatio agi iubet. verum diei religione quamuis obiectam prædam hostibus spernentibus idem altero die fieri imperat. Confederant partitis insidiis in vicinarum fossarum, quæ imbrium casu factæ erant, vna Vngari equites; in altera Stanislaus Solkeuius adolescens, & Ioannes Kretkouius Priemscianæ turmæ legatus cum Polonis. Hostes ad primum prædæ aspectum mox erumpunt: protracti in locum insidiarum ab Vngaris celeriter confurgentibus profligantur. Poloni, qui remotiori ab iis loco erant, propterque præruptum per oppositos colles ascensum, ambitum capere cogebantur, confligendum cum hoste facultate non data, à dextra impetu in eum facto, inclinatum in effusiolem fugam præcipitant;

S 2

con-



coniunctimq; cum Vngaris ad mœnia vsq; insequuntur. Et si qui primo loco confederant Vngari, lectissimi equites, essent, ac in his Petrus Bathoreus, Georgius Sibiricus, ac Ioannes Kallaius, omnesque generosissimis equis Thracicis veherentur: Moscouiticorum tamen equorum, quamuis ij magnam partem parui ac deformes sunt; pernicitatem, assequi vix potuerunt. primo tamen impetu triginta circiter interfecti ac duodecim Boiarici generis, in iisque maximè strenuus, ac militaribus facinoribus aliquot notus Petrus Goltouiscius, capti fuerunt. Incommodo hoc accepto Suiscius a uersa porta maioribus aliquot tormentis magno labore, ad imas muri & propugnaculorum fenestras demissis, locoque opportuno non procul à fossis vrbis magna scloppetariorum manu occultata, subinde viginti circiter equites, qui nostros cis flumen Plescouiam in stationibus positos lacefferent, atque in insidias pertraherent, emittebat. verùm cum excursionem hostium nunciata Samoscus ipse cum tribus turmis equitum flumen transisset, qui que in insidiis confederant, ad primum vnius equitis conspectum, quem propius ad locum insidiarum accedere Samoscus iusserat, scloppetos ad vnum omnes in cassum explosissent, sola fere vrbis propinquitas, & fossa equiti obiecta quò minus conciderentur, hostes texit. Dum hæc ad urbem geruntur, aduenerunt interim legati à Mosco ad colloquium missi Demetrius P. Filius Ilcius, Romanus B. filius Olphirionis; proque scriba illis adiunctus Nicolaus Bafforekus. Iis Possuino cum præsidio Polonico vltra Porchouam obuiam profecto, ac mox nostris quoque legatis subsecutis, paulò post initium agendi de pace factum fuit. Ab initio de Sueciæ Rege fœdere comprehendendo propositum fuit. Et si enim præreptarum articulum iniuriæ non parum animum Regis alienassent: quòd

quòd tamen superioribus comitiis Annæ Reginae precibus adductus, quæ sororis suæ Sueciæ Reginae amore, ac assiduis literis victa genua Regis amplexa, ne sine Sueco pacem faceret, orarat, daturum se operam vt pace comprehenderetur, pollicitus ei fuerat; ac Possuinus quoque homo inter principes Christianos pacis conciliandæ cupidissimus, hoc idem summo studio contendebat; vt actionum de pace initium ab eo fieret, legatis mandauerat. Qua in re dum hæretur, Bochdanus quidam omnium legationis eius arcanorum conscius à legatis Moscouiticis ad Palatinum Braslauiensem transfugit; ab eoque ad Samoscium statim mittitur. ab eo hæc legatos mandata habere Samoscus cognoscit: Si Regem exercitumque à Plescouia discessisse intelligerent, quacumque causa interposita colloquium tollerent: si obsidionem obstinatè continuari sentirent, sine fraude de pace agerent: Eam autem hoc ad extremum concluderent, vt si Rex Lukos aliaque quæ superioribus annis cœpisset, præter Velisium ac vniuersum Ducatum Polotensem, quæ Regi concedebat, sibi redderet, vniuersa Liuonia ei decederent. Legati cum Regem quidem discessisse, obsidionem nihilominus vrgeri animaduertent, accesserant ad conditiones aliquas pacis: sed cum ob sæuissimas hiemis iniurias, commatusque omni vicino agro vastato angustias subinde incommodū aliquem rumorem de exercitu expectarent, varias interim moras interponebant; deque leuissimis quibusque rebus ad principem missitabant. scripserat exitinere ad Samoscium Possuinus, ostendisse sibi legatos, magna cupiditate Moscum alicuius vel exiguæ saltem portionis agri Liuonici ad titulum Liuoniæ vsurpandum retinendæ teneri. Samoscus Nouocastrum, Serenescum, Nouogrodecum, deserta nec magni fructus castella ea conditione relicturum se illi rescripserat, vt



rat, vt penes Regem Luki, Sauolocia, Neuela remanerent. Cum illi de Lukis nulla se mandata habere renuntiassent, sine Lukis ne palmum quidem terræ in Lioonia se ei permissurum ostendit. Interim Samoscium cum copias quasdam, quæ Plescouiensibus subsidio mitterentur, Nouogardiam contrahi rumor ad exercitum perlatus fuisset; Spitkonem Iordanum virum strenuum, cuius cum aliâs, tum in pugna Derfauiensis præclara opera extitit, turmis aliquot equitum ei attributis commisit. Hic stationibus hostium, quæ non procul à muris se ostenderant, cum trepidatione intra mœnia compulsis vrbi ipsi, omniq̃ vicino agro magnum terrorem intulit. Eundem opportuno deinde inter Porchothiam & Nouogardiam pago considerare iussit; cum ad subuectiones subsidiaq̃; si quæ Plescouiensibus ab hoste summitterentur, prohibenda; tum ad pabulationes laxiores nostris faciendas: maximè autem metum vndique hostibus ostentandum. Supra eum verò Kofakki, quos ad Opakam collocatos fuisse antè ostensum est, ad Saionskouium vltra Russam à Samoscio deinde translati omnia infesta reddiderant. Iamq̃; antè eandem ob causam ex Kobilogradensi etiam castello, quod ad stricto glacie lacu Pelba, qui ad Plescouiam, Derpatum, & Kobilogradum pertinet, ex Derpatensibus præfidiariis aliqui infederant, Simonem Charlenscium deicere præsidium iusserat; indeq̃; ad Prebusium supra Plussam flumen, quâ lacu concreto iter ex Derpato, & Vdoua versus Nouogardiam erat, eum collocarat. vnde deinde vltèrius populationes proferebantur. quibus rebus fiebat, vt quod ab initio sibi proposuerat, nec ipse Plescouia propter commeatus difficultates auocaretur; quòd in omnes ferè partes liberè pabulari nostri possent: & populationibus, quâ supra priscam Russam ac Nouogardiam versus Tueram, quâ ad Volchodam flumen

flumen, ac Lahodam lacum longè lateq̃; factis, cum opportunissimis viis occupatis vndique grauissimè hostes premerentur, indies metus eis aueretur. Miserat ad Samoscium Iordanus duos nobiles Moscos repentina excursione oppressos. Ex iis de Ioannis maioris natu principis filii morte cognitum fuit. Hunc cum pater opum suarum magnitudinem ac thesauros iactasset: ille verò iis Regis thesauros virtutem ac animi fortitudinem prætulisset; quibus etsi illis, quibus pater abundaret, inferior esset, nihilominus ditio-nes eius igni ferroq̃; vastaret, magnâque parte regni eum exuisset: vel vt quidam dicerent, cum obstinatius à patre exercitum, quo cum regio exercitu dimicaret, flagitasset; iratus verò illi pater, scipionem in caput impegisset, non multò post, siue ictus, siue animi doloris vi, in paroxysmos epilepticos, atque inde in febrim incidisse, ex eaq̃; deinde extinctum narrabant. quæ res supra reliquas fortunæ aduersitates eò maiorem dolorem Mosco attulit; quòd hic etsi imperio patris priori vxori, cum qua optimè illi conueniebat, nuncio remisso, aliam duxerat, sine liberis tamen decesserat: alter verò filius Theodorus iunior natu, mentis vitio ad regnum atque omnes adeò res inutilis censeretur. Ab altera parte Suiscius, quòd immensam frigoris vim cerneret, febresq̃; passim ex ea in castris vulgari è transfugis intelligeret: propter vehementiam enim hie mis, quò minus aliqui transirent, fieri non poterat; ad seruatae vrbis famam, quomodo castrorum captorum, ac deleti exercitus gloriam aduiceret, querebat. Erat ter-  
tia ferè pars castrorum morbis implicata; cum vt quisque frigoris ea immensi prope asperitate correptus esset: quod qui effugeret, nemo erat: febri etiam statim corripere: ita tamen vt pauci omninò ex ea morerentur. Non minùs autem Samoscium, cum in tanta aë-



ris inclementia, cum hoste potius, quam cum frigoris iniuriis conflictari militem cupere cerneret, prælio dimicandi facultatem sibi dari expetebat. Eiusque rei, ut extra muros atque munitiones hostem pertraheret, cum varias rationes quæreret, omnia consilia eius vehementer frigoris, quam diximus sæuitia impediēbat. Tanta autem eius vis erat, ut ubi quis extra tabernaculum vix pedem protulisset, omnibus ferè membris, iis potissimum quæ maximè aëri patebant, naribus, auribus, atque facie, gelu astrictis emoreretur; quodque de Moscouitici cœli natura cum miraculo nonnulli prodiderunt, eiusmodi in iis locis frigora esse, ut aquæ casu ipso dum funduntur, congelentur, id experiendo multi cognouerint. Maximè autem quod necesse erat euenire, excubiæ sæuitia hac frigoris vexabantur; raræque omnino obibantur, ex quibus non plures plerumque aliqua corporis parte mutilata referuntur. Memorabilis cum primis ex turma Sigismundi Rosnii nobilis equitis casus fuit; cui cum utrumque crus planè iam frigore emortuum esset, isque in febrim inde ac mentis alienationem incidisset, interim verò medicus, ferro crura resecasset, ubi ad se rediit, non secus ac si partem aliquam ornatus requireret, de pedibus amissis interrogare cœpit. Alius quidam ludicro penè euentu, maximum tamen & ipse periculum adiit. relictus à Basilio Surannicio in primis excubiis non procul à fossis vr̄bis concubia nocte fuerat. cumque frigore planè obriguisset, atque equus ut fieri solet ex frigore subito grauius se concussisset, is qui nec equum, nec se in equo planè iam enectus continere posset, de equo decidit: pedesque ferramentis, quæ ab ephippio dependent, retento, sub ipsas portas equo incitato magna voce alienam opem, cum ipse explicare se non posset, implorans, pertrahitur. Mittit mox Samoscius, qui cum eripiant; quod si sine periculo facere non

non possint, ne ipsi temerè periculum adeant, mandat. Hostes qui in muro constiterant, fraudem subesse rati vtrò irridebant; fatisque iam fraudum ac dolorum esse, nec ea ratione amplius se capi posse exprobrabant. Ita incolumis hic à nostris recipitur. Id autem tum tempus anni erat, quo intensissima iis in locis frigora esse, vulgari sermone Moscorum ostenditur; qui Nicolai & Christi frigora appellant, cum maxima designare volunt. Moscouia autem omni sub ipsis ferè trionibus posita, nullo ferè loco, nisi iis fortè, quæ ad glaciale mare pertinent, quàm in Pleseouienſi agro vehementiora frigora existere solent. Itaque & animalia pleraque omnis generis, quæ cæteris in locis nigro aut fusco colore sunt ut corui cum primis, noctuæ, gallinæ siluestres, vrsi, lupi, lepores, aliaque eius generis, seu cœli natura, seu frigoris vi, candida hic esse vulgò animaduersum est: Noctium verò eam longitudinem esse, ut cum longissimæ sunt, diei non quinque omnino horarum spatium sit. Magna tamen in omnibus hisce incommodis tolerandis militum constantia erat: Samoscius etiam, quantum eius fieri poterat, ratione ac diligentia ea subleuabat. Excubias quaternis vicibus permutabat: earum ternas per alios obibat. sub crepusculum autem ac primum diluculum, per Stanislaum Vlodekonem affinem suum, quem Sbarasio Palatino Braslauienſe ad colloquium cum Moscis misso, sibi legarat; quod eo tempore eruptiones hostium maximè expectandæ erant. Quò pauciores autem frigoris incommodis afficerentur, pro superiorum temporum consuetudine paucos admodum, qui non tam eruptionibus hostium resisterent; quàm de aduentu eorum certiores cæteros facerent, in stationibus & excubiis collocabat. Etenim iam antè toto eo tempore, ex quo exercitus vr̄bi admotus fuerat, motum hunc Samoscius obseruârat; ut vel diligentissimè excu-



excubiis dispositis, in ipsis nihilominus castris contra repentinas eruptiones subsidia parata haberet: alboq; circum castra misso per vices semper aliquot eam ad rem describeret. Hinc etsi, quod in obsidionibus fieri solet, non rarò eruptio tentata esset, sæpiusque se hostis ostenderet; nulla tamen vnquam in castris trepidatio orta, aut vnquam omnino ad arma, nisi semel fortè mox à discessu regio, cum ad acuendam militis diligentiam ex industria tumultum Samoscius auxisset, conclamatum fuit. Ii enim, ad quos cuiusque temporis vices pertinebant, cum conscensis equis hosti obuiam progressi fuissent, cæteris prope ignaris cum reiiciebant. Tum verò eò accuratiùs obseruandum id sibi existimabat; quò propter frigoris sæuitiam, ne ea miles affligeretur, pauciores excubitores ponebat; cum vt maximè firmiores posuisset, aëris tamen iniuriis ad rem gerendam penè inutiles futuros cerneret. Itaq; in ipsis interim tabernaculis, quæ partim è vicinarum villarum ædificiis, partim cauernis in terra effossis, cratibusq; ac palea intectis, contra cœli incommoda ex tempore sui quisque vsus causa parârat, more stationum per vices semper aliquot excubare, equosq; quos statim inscenderent, atque arma expedita habere iubebat: qui eruptione aliqua nunciata recētes, ac ab iniuriis aëris illæsi, conscensis mox equis hosti occurrerent. qua re & securitati castrorum & militis quieti, atque commodis maximè consulebatur. Stationum igitur ea exteriorum in frequentia, ac numero adeò earum ex transfugis à Suiscio cognito, castrorum oppugnandorum, stationibus priùs repentina eruptione oppressis, consilium cœpit. hunc in vsum septingentos circiter equos, quos obsidionis incommoda reliquòs fecerant, conquiri, ad eosque promptissimum quenque rescribit. Binæ contra urbem à castris stationes erant; vna vltra Velikam flumen

men, quæ Pezzurensem viam obseruabat, altera cis flumen supra castra. Ex altera parte, qui ad Svatohoram erant curabant. Suiscius trecentos circiter equites delectos vltra Velikam contra eos, qui ad Pezzurensem, vt ostensum est, viam, in stationibus erant, eo consilio, quem admodum ex captiuis postea cognitum est, mittit, quòd illis occupatis, si quod futurum præuidebat, qui à superiori castrorum parte custodias agebant, statione sua relicta flumen glacie concretum ad ferendam suis opem transirent, castra nudatum iri, sibiq; nullo obfistente repentina eruptione ea inuadendi locum futurum cogitabat. Obuenerant diei eius stationes Sborouianæ turmæ. quæ cum trecentis equitibus constaret Thomas Oriniscius cum quadraginta circiter eorum vltra Velikam flumen positus erat; cum cæteris Laurentius Scarbecus turmæ legatus supra castra cis Plefcouiam flumen excubabat. Iam antè autem ea in vniuersum custodiis omnibus mandata Samoscius dederat, vt erumpenti hosti nulla pugnandi copia facta ambitu capto, versus castra statim se reciperent; non modò quò subsidium illis propinquiori è loco faciliùs ferri posset, verum hostis etiam longiùs ab vrbe ad pugnandi necessitatem pertraheretur. Id igitur cum Oriniscius fecisset, Suiscius peditatus partem statim vrbe emittit; qui quòd locus is omnis conuallibus interseptus esset, valle quadam occupata receptuque intercluso vehementer scloppetis eos premebat. Interim Samoscius Scarbecum, qui quemadmodum ostensum est, in superioribus stationibus erat, flumen mox transire, impetumque in hostes dare iubet: simulq; ipse equo conscenso, iis qui in subsidiis, de quibus antè dictum est, confederant, vt se sequantur, imperat. Scarbeco promptissimè flumen transgresso, Suiscius vbi primùm stationibus nudata castra animaduertit, mox reliquum pedita-



ditatum ac equitatum omnem diuersis portis ad castra oppugnanda mittit. Interim qui ex instituto, quem admodum ostensum est, in tabernaculis excubabant, se quiq; à Samoscio iussi fuerant, ad certamen iam se expeditant; primiq; Vngari, qui eam ad Velikam flumen castrorum partem tenebant, inde Ioannes Kretkouius, cum turma Stanislai Priemscii: Sarnacius cum Hieronymi Gostinii, quarum legati erant; post hos alii tanta celeritate procurerunt, vt eodem quasi in vestigio, vno conflictu, atque impetu trecenti circiter ex hostibus caderent, caperentur vltra sexaginta: magna verò eorum pars vulneraretur. Suiscius qui è proximo muro euentum eruptionis expectabat, cædem hanc & fugam suorum cernens, reuocatos intra urbem mox recepit. Desiderati & ex nostris prelio eo aliquot fuerunt, cum valle ab hostibus occupata circumuentis auxilium ferri ab aliis non potuisset. Piontkouius nobilis eques captus, ac ab hostibus abductus fuit. Oriniscius cum diu fortiter hostes sustinuisset, globo è superiori loco per humerum & intestina traiecto, periit. Petrus Grudfescius cum per hostes manu viam sibi patefecisset, adq; nostros iam & ipsa penè castra in tutum penetrasset, è muro tormenti cuiusdam maioris ictu interemptus fuit. Ex Vngaris equitibus Franciscus Kobor & Barrabas Balog viri militares ceciderunt. Quod nisi subsidii iis, qui cum Oriniscio circumueniebantur ferendi causa, celerius à castris progrediendum nostris fuisset, facile vniuersas copias hostium ad ipsa castra pertrahi, iisque deletis debellari ferè tum potuisse, minimè dubitandum videbatur. Erat is quartus mensis Ianuarii dies. sub noctem Samoscio, quòd maximè omnes Moscos cupidissimos suorum humandorum sciret, Nicolaum Vrouecium in loco prælii excubare, ac si fortè hostibus ad tollenda corpora egressis, gerendæ rei facultas accideret in omnes occa-

occasiones intentum esse iubet. Ea nocte nullam in partem se commouerunt. Altera Martino Lesnouolscio notæ virtutis præfecto negotium dat; qui cum quibusdam vrbe egressis, ac proxima, quæ ad eam iacebant, cadauera subtrahere incipientibus vnà cum altero equite se ostendisset, celeriter in urbem refugerunt; semperque postea intra mœnia se continuerunt. Samoscio rei gerendæ nullum amplius locum futurum, quodq; pietati ac humanitati deberi arbitrabatur, vltro hosti offerendum ratus, ad obsessos mittit: potestatem se illis mortuorum facere; ac vel per militem conferri corpora, ac tradi iis iussurum, aut si ipsi per se tollere ea velint, fide publica integrum id illis futurum ostendit. qui in muris erant, laudibus hanc eius pietatem Christianique animi sensum magnopere extollabant; reque cum Suiscio communicata, vt sequenti die circa meridiem ad se redeat, quo ea de re constitui posset, rogabant. Ad tempus Stanislaus Solkeuius adolescens singulari ingenio præditus, Melchior Sauifsa stabuli Samoscij præfectus, alijque nobiles iuuenes Thracicis generosissimis equis vecti splendidissimeque omnes ornati iniussi vnà proficiscuntur. Agnoscit ex transfugis Solkeuium quidam: ostendit hostibus, præterquam, quòd propinqua cognatione Samoscium contingeret, multorum etiam secretorum conscium esse. solebat enim Samoscio, quòd præter ætatem, eximiam in eo indolem ac ingenium perspiceret, in secretioribus rebus ad Regem referendis ipsius plerumque opera vti. Hac re Mosci inducti, mutato consilio, ac pietatis in defunctos officio, præsentem quod ostendebatur, commodo posthabito, verbis rem extrahunt; interim maiores scloppetos complures, & quingentos circiter scloppetarios in muro clam disponunt. Solkeuius cum variè rem duci animaduerneret, vt tandem



dem se explicent, eos hortatur: continuo vnus è scloppetariis coortus scloppetato in Sauissam irruens, irrito tamen propter armorum firmitudinem ictu eum ferit: simul cæteri scloppetos omnes vno tempore displodū. Solkeuius, quiq̃ue cum eo erant conuersis equis celeriter se recipiunt. eis è muris alios mox scloppetis, & quò longius prouecti essent, eò maioribus indè tormentis hostes persequuntur. incolumes nihilominus in castra nostri redierunt; quòd tantum globorum nimbū eua fissent, omnibus mirantibus. Iam antè Ioannes Ostromecius, qui ad tormenta cum aliis curabat, huiusmodi rem ad Samoscium detulerat. In arca ferrea duodecim tubos scloppetarios, quò citius rumperentur, ex industria tenuatos, ordine disposuerat; eosdemq̃; subtilissimo puluere, ac arcam ipsam implebat. in medio eam scloppetati partem, quæ rota atque incumbente filice ignem ad puluerem incendendum elicit, tensam paratamq̃ue constituerat. arca ea in ligneam cistam imposita, fibulam, quæ attracta rotam luxare, ignemq̃; excitare solet, duabus chordis, vna ad inferiorem lignæ cistæ fundum, altera ad ipsum ferreæ cistæ operculum alligarat; ea ratione, vt siue ferream arcam ex lignea quis eximeret, seu ipsius ferreæ tectum moliretur, necessariò vtraque re puluis inflammaretur, tubisque atque arca ferrea fracta astantes percellerentur. Hanc si ita ad Suiscium misisset, minimè sibi obtemperaturum, quin eam excuteret seque ipse in fraudem indueret, existimabat. Noluerat tum Samoscium permittere, vt huiusmodi artibus contra hostem res gereretur. Iam publica fide ab illo prius violata, Solkeuioque ac aliis omnibus qui in consilio Samoscio aderant, vrgentibus, vt eius in se perfidiam ea ratione vlcisci sibi liceret, Ostromecio rem totam permisit. Hic captiuum hominem idoneum nactus, per aliquot dies benignè habitum

tum, tamquam magni secreti conscium facturū iuramento adigit, fidemq̃; eius sibi obstringit. Fingit Ioannem Mollerum quendam se esse: cum Farensbekio quondam apud Principem Moscorum militasse: postea etiam illo ad Regem se conferente, authoritatem eius fecutum; ac & si aliquo apud Regem loco esset, pristinam tamen Moscorum principis in se indulgentiam requirere: eamq̃; ob causam interfecto prius imperatore exercitus, cum pro artificio suo rei tormentariæ remotis arbitris communicaturus cum eo esset, ad illum rursum transire in animo habere. Interim cistam eam, vt ad Suiscium perferat rogare: in eam pretiosissimas quas suas ac alias magni momenti res se coniecisse; breui ipsum, opera prius ea, de qua dixisset, principi Moscorum nauata subsecuturum: magni autem sua interesse, ne priusquam ipse veniat, cista resignetur. In eandem sententiam ad Suiscium literas perferendas illi dat. Moscus duplici laticia elatus, quòd & libertatem recuperaturus, & tam gratum nuncium ad Suiscium perlaturus esset, perque excubias ab Ostromecio traductus ad Suiscium peruenit. qui cum eo tempore aliis rebus occuparetur, cæteros qui ad consilium tum fortè conuenerant, nullo ad cognoscendum sibi spatio sumpto, aperire statim cistam iubet. concurrunt complures rei nouitate, atque innata hominibus curiositate ducti. Ferocissimus omnium Andreas Chorostinus alter Palatinus, & æmulus Suiscij, quemadmodum postea cum ex Alexandro qui pace facta ad Plefcouenses à legatis missus fuit, de quo infra dicetur, tum pace facta ab aliis multis compertum est, pede in cistam ligneam imposito, ferream manu sua ipse extrahere nititur. Interim fibula convulsa, puluereq̃; inflammato, arca ferrea ac tubis disiectis, non modò astantes omnes dissipantur, verum tecti etiam pars aliqua vi ignis ac fracto-



rum ferramentorum conuellitur. præ cæteris maximè insignes, Andreas de quo dictum est Chorostinus, & Kofecius periêre. Erat & de Suiscio suspicio, cum ex ægritudine per continuos aliquot dies copiam sui non fecisset: maximè autem apud nostros opinio hæc confirmabatur; quòd cum assiduè antea in muro versari, perq; stationes volitare solitus fuisset, nunquam postea se ostenderet. Verùm hac de re cõtumeliosæ postea literæ scriptæ à Suiscio ad Samoscium fuerunt: ab iisq; ad singularis certaminis prouocationem descensum inde fuit. Verùm Samoscio constituto die cum demonstratis antè insignibus in designatum locum progresso hostis non prodiit. Disputabatur nihilominus interim, quemadmodum supra ostendimus, ab vtraque parte de conditionibus pacis. De Sueciæ Rege ab initio iam Mosci responderant, non recusare principem suum, quò minus pacem cum illo faciat, verùm debere cum more maiorum ad Nouogardiæ Palatinum mittere, qui de conditionibus pacis acturus cum illo esset: præter exempla institutaq; maiorum nihil omninò faciendum sibi esse. qua de sententia cum deduci non possent, inde ad summam Liuoniæ, cæterarumq; arcium vtrinque reddendarum conditionem ventum fuit. Plurimum de hac controuersia fuit; cum prouinciam, quam nouem & viginti annorum bello, multoque sanguine suo vix peperissent, ac in qua multi Russici generis nati essent: plurimi etiam domiciliis constitutis inueterassent, non minus ægrè quàm si de Moscouitico solo ipso ageretur, relinquerent. Ad extremum de Derpato atque Nouogrodeko Liuonica, cum reliquis vrbibus, atq; castellis ferè omnibus cessissent, vehementer resistebant, quòd in illam religionem suam iam inuectam, Episcopumq; in ea à se constitutum: hanc Diuæ virginis matri Pezzurenfi sacram dicerent. Tandem cum præter

præter expectationem suam, minus ad voluntatem ipsorum ad Plefcouiam res fluere; ac ne summam quidem cum aliarum rerum ferè omnium tum frigoris difficultatem ab obsidione nostros reuocare: iamque maxima hiemis parte exacta mitiora tempora instare intelligerent: maximè autem Possuinus, qui quòminus suspecta fides sua apud Moscos esset, cum illis diuersabatur, ne villo cum fructu in re tam pia tantum elaborasset, summa apud vtramque partem libertate in pacem incumberet, res conuenit. Pacti vt vasa sacra Derpato ac Nouogrodeko tollere sibi liceret, nec Episcopus sacerdotescorū contumelia afficerentur, vniuersa Liuonia, quam in sua potestate princeps eorum haberet, decesserunt: Regis nomine è contra Lukis, Sauolocia, Neuela, aliisq; castellis nonnullis, quæ superioribus annis ab hoste cepisset, Velisio ac Polotienfi agro omnirecepto, illis cessum fuit. De Narua aliisq; castellis quæ à Sueco occupata erant, diu disceptatum fuit; cum nostri Moscorum tergiuersione, in potestatem Sueci venisse eas dicerent: Mosci nihil ad se præstationem eorum pertinere contenderent; quæ nec antè à se inter arces Liuonicas, quas Regi obtulissent, nominatæ fuissent: nec nunc tenerentur. Tandem cum in eo hæreretur, ita controuersia suspensa, vt iuri suo in Naruam reliquasq; arces, quæ à Sueco tenerentur, minimè Regem defuturum legati testatum facerent; Veisensteinio autem, quod iam antè Regi Moscus obtulisset, diserte legati eius decederent, de captiuis deinde actum fuit. Cum Mosci vtrinque captiuos sine pretio reddi vellent: Regis nomine, quòd ex Moscis primarios homines complures, illi ex regiis captiuum insignem nullum ferè haberent, Sauolocia, Neuela, ac Sebesium, ac extremo loco Sebesium pro captiuis posceretur; Moscus verò non tantam hominum, quantam possessi-



onum rationem habendam sibi iudicaret, in aliud tempus, quo ad exigendum in pacem à se mutuò sacramentum legatos vtrinque missuri essent, tota hæc res dilata fuit. De tormentis ac apparatu bellico, quæ in præsiidiis essent, ita conuenit; vt relictis, quæ cum quæque caperentur in arcibus fuissent, quæ vtrinque illata essent, secum quisque deferret. Iis igitur conditionibus decennalis pax perfecta fuit: Cum nec Moscum in eo amissarum prouinciarum dolore opportunioribus temporibus per motus aliquos interregni aut alias occasiones ablata recuperandi spes deferret: & Rex tanta clade atque vastitate Moscouiæ illata, quæ tam paucorum annorum spatio refarciri nullo modo possêt, si Prouincia Liuonia omnibus interim necessariis rebus à se firmata bellum Moscus redintegrare vellet, maiores res gerendi facultatem sibi non præcidi non moleste ferret. Legati iuramento statim eas firmarunt; de principum iuramento, vt maiores legati exigendi sacramenti causa primùm à Rege ad Moscum, indè à Mosco ad Regem mitterentur, constitutum fuit. In literis fœderis conscribendis, per aliquot etiam dies controuersum fuit. quòd Mosci ab initio vniuersæ Russiæ Ciarium: postea cum de eo iam decessissent, secundùm Moscouiæ & Vlodimiræ aliosque complures titulos Astrakanensium tamen & Kafanensium Tartarorum Ciarium, principem suum appellari volebant; nostri præter morem maiorum nihil se illi tributuros contenderent. Iam paulò antè autem Parnauiam, quæ à Suecis obsidebatur, commeatus inopia vehementer laborare, ac vix quatuor septimanarum spatio tolerare Moscos posse, per Thomam Embdanum, aliosque quorum diligentia in cognoscendis rebus hisce utebatur, Samoscius cognouerat. à Ioanne Sborouio præterea, qui maximis vadimoniis, necessariisque suis ac familiæ suæ nego-

negotiis coactus in Poloniam redierat, certior factus fuerat, ad res nouas Liuones sollicitari, rumoresque spargi, Regem si Liuoniam recepisset, inter Vngaros vniuersam distributurum. Quod cum ii fieri non posse, nisi ipsi omnes sedibus suis euerterentur, perspiccerent, non parum ea re multorum animos commoueri necesse erat. Proponebantur eodem tempore Sueci nomine edicta, quibus suorum cuique bonorum, & quas pristinis temporibus, maiores cuiusque beneficiario iure tenuissent, possessionum restitutio promittebatur; adque possessionem bonorum adeundam, ad quos ea pertinerent, inuitabantur. Inter alios Byringius, qui aliquot castella regia in potestate habebat, vt ex Moscis Parnauia decedentibus cognitum postea fuit, literas ad Moscos dederat; quibus si diutius sustinere obsidionem non possent, vt Sueciæ potius quàm Poloniæ Regi eam dederent, hortatus eos fuerat. In hoc igitur Liuoniæ amittendæ discrimine, etsi vel vi tandem, si subsidia sibi à Rege quemadmodum cum eo constituerat, summissa fuissent: aut saltem Mense Iunio, vltra quem obsessos non toleraturos, perspectum habebat, fame atque commeatus inopia in potestatem Plescouiam venturam Samoscius non desperabat: ad pacem tamen animum tandem aduertendum sibi iudicabat. Venerat sub idem tempus in castra à Suecis missu præfecti Naruenis mercator quidam; qui de iniuriis, quas finibus suis à milite nostro, qui supra Vdouam in Prebusio collocatus erat, illatas dicebant, quereretur. cui cum præter opinionem Suecorum benignius responsum fuisset, venit postea ad Samoscium à Ponto Gardiano Laurentius Cagnolus Italus; cuius in Narua occupanda maxime insignis opera extiterat: honorificisque verbis pro Rege Samoscio salutato, ac literis ad Regem à Ponto scriptis illi redditis, vt ad legatos Moscouiticos ipsius



voluntate proficisci sibi liceret, petebat. Samoscius etsi que in Liuonia agerentur, non ignorabat: comitatis tamen sue apud exterum hominem, rationem sibi habendam ratus, in presentia humane ad postulata ipsius respondit: non potuisse in mentem venire Regi, cum presentim tandiu in castris fuisset, nec quisquam a Sueciae Rege ad se venisset, deinceps legatum vllum missum iri: atque ita nec Regem vlla hac de re mandata sibi reliquisse, nec se sine Regis mandato, ac voluntate quicquam ei permittere posse: literas vel per tabellarium ad Regem missurum: aut si ipse ad eum ire vellet, presidium se ei adiuncturum. Cagnolus responso hoc accepto, tabellarioque cum literis relicto ad Pontum se recepit. Eum, tabellario ad Regem a castris nondum profecto, perfectae pacis nuntius in Liuoniam consecutus fuit. Iamque Alexander qui de pace facta Plescouiensibus renunciaret, a legatis Moscouiticis Sapolia missus ad Samoscium peruenerat. quem cum ad prandium Samoscius inuitaret, maximi beneficii loco habiturum se respondit, si ad urbem quam primum aditus sibi permetteretur. Nam dum ipse epulaturus ibi esset, obsessos interim sanguinem bibituros: his enim verbis utebatur: pransurum se apud eum, vbi laeto pacis nuntio suis impertito, reuersus ad eum fuisset. Samoscius presidio ei adiuncto, ad urbem perducere iussit. Cum sub Pochrouiensem turrim, quae ad Velikam flumen pertinet ab Vngaris tormentis, quemadmodum ostensum est, quassata erat, successisset, ac quis esset ostendisset, tanta eorum, qui in muris constiterant, laetitia, atque gratulatio extitit, ut subito sublimem raptum in muros extollerent; nullaque vel suorum vel nostrorum circumfusorum verecundia prohiberi se paterentur; quominus ad pedes eius proiecti eos oscularentur, Archangelumque ac pacis nuntium laetis acclamationibus ap-

bus appellarent. ad nostros deinde conuersi fratres eos appellabant, utque sine metu propius iam ad se accederent, libereque vagarentur, inuitabant. Altero die idem Alexander cum aliis nonnullis ex nobilitate ad Samoscium in castra redit: quia pax iam conuenisset, ut lignatio sibi libera permittatur, ipse vero quam primum exercitum deducat, petunt. Respondit Samoscius, etsi de pace transactum esset, literas tamen in quibus conditiones pacis perscriptae essent, nondum ad se allatas: multo minus qui praesidia traderent, a principe eorum venisse. conuiuio deinceps eos excepit. Quod cum lautissime instructum fuisset, qui maxima apud nostros comitatus inopia laborari sibi persuaferant, omnium non modo necessariorum rerum, verum plurimarum quas nunquam ipsi cognouissent, apparatus eò magis admirati fuerunt. Etenim Samoscius quemadmodum superiori anno fecerat, ita iam initio etiam expeditionis huius, praeter puluerem tormentarium, quo perditatus, quem conscripserat, uteretur, apparatusque bellicum, comitatus quoque maximam copiam, nonnullam etiam elegantioris victus, externorum hominum excipiendorum causa contraxerat: partemque eius, quam Gedani & Rigae compararat, a Duce Churlandiae, ciuitateque Rigensi iumentis conquisitis, supra Kokenhausium, quod tum in hostium potestate adhuc erat, exposuerat; indeque aduerso flumine Disnam, ac ulterius Sauolociam nauibus deuexerat: aliam carris deportarat. In eo vero prandio cum cistae quoque ad Suisium missae mentio facta fuisset, cum de Chorostino, ea quae supra demonstrauius, Alexander praeseferat, tum nisi pax interim conuenisset, ne ingenio a nostris superati viderentur, vicissim se illis trecenta aurea poma obiekturos fuisse dicebat. Id satis apparebat, nullam ferè rem aegrius eos ferre: iamque ante priusquam  

pacis



pacis condiciones conuenissent, Vngaris propius ad muros succedentibus, sæpiusq; cistam illis exprobrantibus. adeò eo commoueri se testabantur; vt cum iidem in flumine glacie adstricto cistam aliquando illis obiecissent, crebris tormentorum ictibus doloris ac iracundiæ suæ flammæ in eam eiacularentur. eodem autem modo frequentius deinde ad Samoscium ventitabant; à quo cum semper benignè habiti fuissent, ac verò captiuorum quorundam permutandorum causa in Procopium Penonscium turmæ præfectum conuiuium tum fortè agitantem incidissent; qui antea commeatus ac rei frumentariæ difficultate coactum, vltro Samoscium exercitum reducturum existimârant; vt non modò Imperatorem ipsum, verùm exercitum vniuersum in maxima copia versari videbant; sequenti die Theodorum Mesceodouum aliosq; frequentes ad Samoscium mittunt; vt pace facta exercitum tandem abducat, obsidioneq; urbem liberet, petunt; quod nisi intra triduum faciat, nolle se pace teneri ostendunt. Respondit Samoscium, existimare se pace iam facta non ex animo hæc ab illis dici; quam non ingrati illis accidisse, gratiorem quidem, quàm generi hominum ex stipendiis viuenti sciret; exercitum cum commodum futurum esset, se abducturum. Interim Palatinus Braslauensis ipse in castra venit; nec alia conditione pacem conuenire potuisse, quàm vt nulla mora interposita exercitus reduceretur, docuit. reddendarum quoque arcium eas condiciones placuisse, vt aulici ab utroque principe ad arces, quæ restituendæ essent, quàm primùm mitterentur; qui vbi aduenissent, rusticorum ac agri possessio statim traderetur. Interim ab iis, qui possessionem adirent iumenta decedentibus ad res suas deportandas præberentur; quæ si præbita essent, tum octauo ab aduentu aulicorum die, præsidio ipso quoq; decederetur. si quæ

ex vi-

ex vilioribus rebus deportari commodè non possent, eæ consignatæ interim deponerentur, ac primo inde tempore iis, quorum essent restituerentur. Videbat Samoscium magnam hisce in rebus difficultatem. Nam cum in regione continuis bellis vastata, magnam iumentorum paucitatem existere necesse esset, in Moscorum ferè potestate fore intelligebat, pro suo arbitrio restitutionem extrahere. Vt tamen quid animi haberent, periclitaretur, ac fiduciam simul suam iis ostenderet, Ostrouiam antequàm dies reddendæ eius venisset, tradi illis iussit; ac licet ea sola in re cum recipiendæ reliquæ Liuoniæ, tum pacis stabilitatem omnem positam intelligeret, vt obsidionis ac exercitus metu in fide Moscos contineret: ne tamen à se violati iurisiurandi legatorum initium profectum iactare possent, reuocatis omnibus ex partibus pabulatoribus, peditatum omnem cum tormentis, ac grauiore belli instrumento, Nouogrodekum versus, quo in castello deponere ea cogitabat, octo dierum itinere antecedere se iubet. inde diuersas alias turmas ad recipiendas arces Liuonicas sigillatim præmittit. eas agmen quod agris præsidio erat, sequebatur: post id impedimenta agebantur. Ipse cum reliquo exercitu die vj. mensis Februarii Plefcouia mouit. spectabant transgredientes copias, partim ex muris atque propugnaculis urbis, partim è ripis fluminis aliisque eminentioribus locis frequentes Mosci. maximè vltimam hanc exercitus partem admirabantur; quæ cum ad viginti quatuor millia equitum accedere videretur, magis tamen ferè splendore, ornatuq; atque eorum præstantia quàm numero ac multitudine eos in se conuertebat: ita plerisque integris, vt nihil vel parum omninò ex hiemis ac diuturnæ obsidionis incommodis decessisse illis videretur. Hoc ordine ad Seskelium interim aliosq; vicinos pagos supra Derpatum consilio



consilio exercitum traducit; quòd eo ex loco & in Moscouiam, si pacis conditionibus à Moscis non satisfaceret, facilem se receptum habiturum, & in Parnauiam intentum se esse posse iudicabat; ac si Suecicæ copiæ, quemadmodum iis denunciârat, ab ea non decessissent, extempore & re ipsa consilium capere. Etenim iam antè, mox à facta pace Ioannem Lesnouolscium aliquot cum turmis equitum miserat; qui vrbi ac arci præesset; Gardianoque si obsidionem nondum soluisset, vt ab ea tanquàm regii iam iuris vrbe abstineret, denunciaret. Mosci etsi Ostrouam iam recepissent: dies etiam, qua Nouogrodekum se reddituros constituerant, lapsus esset: ex industria tamen moras interponebant. seu quòd in exercitum, si fortè dilaberetur, intenti essent; seu quòd è remotioribus præsiidiis ad extremas oras, finesque ipsos Moscouiæ omnes sui interim conuenirent, tutoque res suas deportare possent; ne si primis recedentibus vltimi, qui Kokenhausii, Parnauiæ, ac in longinquirib. aliis locis erant, tardarent, iniuriis ac vexationib. nostrorum paterent. Quam moram maximo suo atque exercitus cum incommodo fieri Samoscius videns, Vrouecium iam antè cum tormentis Nouogrodekum versus à se præmissum aditum in castrum querere iubet. Hic cum aditum aliquem amicitia ad præfectum sibi fecisset, familiariter deinde commeare ad eum cœperat. Itaque aliquantò post Samoscius ipse, qui interim aduenerat, cum Palatino Braslauenfi, ac sexaginta circiter militib. sigillatim sequentibus, rogantique ex more portitori, centurionem venire nostris respondētibus, castrum ingreditur. Venerat sub id tempus Petrus Volkouiscius. Hic cum Palatinum Braslauensem ex colloquio ad Sapoliam, cui ipse etiam Volkouiscius interfuerat, agnouisset, incusassetque præfectum; quòd cum centurionem se recepisse diceret, Palatinum recepisset: respondit

spondit Palatinus, non se modò verum Samoscius ipsum adesse. Qua re turbatum eum Samoscius videns; tu quidem inquit castrum hoc iam principi tuo perderas, nisi ex conditionibus pacis vltro id tradere deberes: nullumque ea in re dolum à se quæsitum, sed vt castrum quod principis sui esset, videret, ingressum se ostendit: vtque decederet, hortari hominem cœpit. Illo iumentorum inopiam incusante, ex iis equis qui tormenta trahebant, certum numerum ei dat; quibus subleuatus rebusque omnibus exportatis, castrum tradito excessit. Est Nouogrodekum amplitudine quidem non magnum, sed cum vicinitate Moscouiæ clarum, tum ob eam ipsam opere, maximè autem triplici muro, crebrisque turribus ac vno insigni propugnaculo diligenter munitum. Inde Sesselium recta Samoscius venit. vbi cum per aliquot dies substitisset, dum an Derpatum Sigismundo Rosnio, quem ad accipiendam urbem pro legato miserat, redditum à Moscis esset, cognosceret; posteaquam ne iumentis quidem acceptis, quæ in magna iumentorum inopia à Duce Magno ac aliis conquisita non paruo numero Samoscius eò miserat, decedere Moscos intelligeret, Derpatum ipse contendit: inque proximum ad urbem Monasterium diuertit. Inde Nicolaum Sebridouium, & Stanislaum Solkeuium filium ad præfectum mittit; vt mox se recipiat, urbemque ac arcem vt conuentum erat, tradat, postulat; quod nisi intra tertium diem faciat, continuo se exercitum in Moscouiam reducturum ostendit. Aduenerat iam à Mosco Basilii Halouinus, ex primariis aulicis ipsius. Hic gemitum ducens meminisse se eius temporis dicebat, quo Moscis etiam ferocibus esse licuisset: moræ tamen causam esse, quod à iumentis atque carris nondum satis paratus esset: Itaque, vt ad tridui spatium vnum solum diem adiici pateretur petebat. Cum ex propriis



iumentis ducenta circiter Samoscius illi adiecisset, Derpatum quoque XXIII. Mensis Februarij die recepit. Vicesimum nonum iam annum Derpatum Moscus tenuerat. Itaque vt ab ea, in qua geniti magnam partem essent, vel adoleuissent, maximo cum dolore atque lachrymis plerique diuellebantur. In primis foeminae ad suorum partim maritorum, partim liberorum, parentum, ac propinquorum sepulturas concursantes naenias suas more suo decantabant. Est enim omnis gens Moscouitica, si quaequam alia in sepulchrorum ac mortuorum cultu cum primis superstitiosa. Diuersum autem hac in re ab aliarum gentium institutis hoc maxime habent, vt non statim mortuos sepeliant, sed per annum vnum loculis conditos in fornicato aliquo canaculo asseruent; ac exacto demum anno multis cum lachrymis ac planctu terra condant. Fuit Derpatum amplissima olim Liuoniae vrbs; quod vel hodie adhuc publicorum priuatorumque aedificiorum cultus indicat. Agrum etiam Liuonia Derpatensi meliorem feracioremque nullum habet. Priusquam Germani in Liuoniam immigrantes religionem Christianam, linguamque suam ea in loca inferrent a Sudetibus gente barbara omnis is tractus a mari supra Pelbam lacum Plefcouiam vsque tenebatur: qua cum Russis frequentia bella intercessisse Moscorum annales narrant. Postquam a Christianis ora ea coli coepit, Episcopis vsque ad Hermannum Vesselum paruit. Hunc cum post captam Naruam ac Neuhausium vna cum Derpato in deditioem Moscus accepisset, postea contra fidem datam in Moscouiam deportarat; non minori in viuum Episcopum perfidia, quam odio in mortuos vsus; quorum nimirum ibidem paulo post & cadauera e templo sepulchrisque eiecit. Vrbs aliquandiu deinde a Liuonibus & Moscis aequo iure habitata fuit: aliquanto tempore interiecto cum Liuones iniuriis

riis Moscorum coacti in necem eorum conspirassent, Liuonibus vt maiori Moscorum numero non difficulter ab iis superatis, ac plerisque interemptis, caeteris in Moscouiam deportatis, Moscos solos deinde incolas habuit. Iam ante Nouogrodeko discedentes Mosci ignem fundamentis subiecerant; qui mox a nostris deprehensus, suppressusque fuit. Derpati, quod praecipua aedificia duo sunt; arcis alterum, in quo prius Episcopus, postquam in Mosci potestatem venerat, Vladica habitabat: alterum ad principis vsus factum; quod Dux ipse priuatis aliquot primariis domibus occupatis, moreque suo exornatis pro se exstruxerat; cum existimarent, in arcem Samoscium diuersurum: eorum enim moribus capitale est, in principis aedibus quenquam habitandi causa esse: arci diuersis in locis pulueres subiecerant; quorum aliqui intra viginti quatuor horarum spatium, partim intra quadraginta octo absumptis funiculis incensi post illorum digressum tollerentur. Samoscius cum in principis domum recta diuertisset, rusticorum quorundam, qui in purganda arce occupati erant, nece periculum redemptum fuit. Hosti nihilominus diligentissime fides conseruata fuit: ac non modo in nullos, qui reliqui e Moscis in Liuonia erant, hanc ob causam vindicatum; verum cum puer etiam quidam Plefcouii Derpatensis Palatini propinquus, non tam interceptus a nostris, quam more puerorum pueriles quasdam voluptates sectatus vltro ad eos se contulisset, vehementerque ea re Plefcouius perturbaretur, magna diligentia conquisitum reddi eum iussit. Haud alia vero ratione reliquae etiam pleraeque arces a caeteris praefectis receptae fuerunt; Moscis initio, priusquam de Derpato reddito iis constaret, dexteritate potius atque ingenio nostrorum ex iis deiectis, quam de cedentibus. Derpato recepto ad regiones quoque praefectos,



Etos, qui Sauolocia, Lukis, ac aliis castellis Moscouiticis præerant, vt Moscis eas traderent, literæ datæ fuerunt. Ad hanc enim diem nulla à nostris quoq; possessio præter Ostrouam tradita Moscis fuerat; tum autem ex fide omnes redditæ. Interim Gardianus quoq; postquam Lesnouolscius, quæ supra ostendimus, à Samoscio ei denunciasset, finibus obiter pro arbitrio ei demonstratis, obsidioneque soluta exercitum Parnauia abduxerat; eque campis contractum per præsidia distribuerat. Eodem autem tempore de Veissensteinio quoque Ernestum Veierum, & Michaëlem Konarscium ad eum Samoscio misit; qui Veissensteinium à Mosco Regi cessum ostenderent, ac an possessionem eius impediturus esset, quærent. Respondit iis Regem suum ipsum legatos ad Polonia Regem de controuersis hisce misurum. Atque hic quidem exitus belli fuit, minori animo à Mosco gesti, quam quo vel in prioribus quibusdam vsus fuerat, vel id ipsum susceperat; pristinaque eius potentia fama requirebat. Præterquam enim quòd in siluis fluminibusq; superandis exercitum impeditum, cum facillimè id facere posset, priusquam in aperta Moscouia ac viscera regni eius penetraret, transitu prohibere ne conatus quidem omninò sit; nullam etiam iustis viribus pugnandi potestatem vnquam ab eo factam non paucis mirum visum est. Id ea ne de causa fecerit, quòd legatorum missionib. suis rei gerendæ tempus eximere se posse, ac inanibus interim sumtib. vires Regis minutum iri sibi persuasisset; an quòd superiorum temporum fortuna edoctus, parum in acie suis se committere posse statueret: seu etiam quod solet facere Deus, vt quos pro scelere eorum punire velit, iis consilium prius, ac animum eripiat, ipsum quoq; perpetuus crudelitatis comes & vindex metus nihil in rebus suis ratione prouidere, aut fortiter suscipere siuerit non affirmarim.

Hoc

Hoc fatis constat, & ab initio, facillimo momento inter siluarum paludumq; ac fluminum eas difficultates, Regis, exercitusque impetum vehementer reprimi potuisse: ac si in summum discrimen rem adduxisset, haud ferè maiorem cladem accipi ab eo potuisse, quam dum de summa rerum sollicitus, certamenque omne defugiens diuersis in locis singulos suos à multitudine exercitus circumuentos nostris obiicit, accepta ab eo est. Omni enim Moscouia à Borysthene supra Starodubam ac Radohostiam ad Cernihouam vsque: à Duna deinde flumine, quàm Stariciam vsque, quàm supra Nouogardiam ad Lahodam vsque lacum longè, lateq; vastata, tot præsidis expugnatis, multis in deditioem acceptis, trecenta circiter millia hominum interiisse: ad quadraginta capta constat; vt aliquot vicibus instaurari bellum tanto hominum numero potuisse videatur. puero- rum quidem quanta multitudo capta sit, ex eo conici potest, quòd priuatus ex nobilitate nullus ferè sit, qui non vnum atque alterum: multi qui plures in seruitute habeant. quod quidem incommodum specie, quàm superius, minus re ipsa maius est. Iuuentute enim e quibusdam prouinciis maximè autem Lucensi, Sauolocienti, Pleseouienti, ac Nouogardiensi omni ferè sublata, quæ nunc ab adultioribus coluntur, mox sobole omni deficiente vltro desertum ferè iri apparet. Opida ac castella, quæ ipse in potestate habebat, vltima hac pactioe ad octodecim dimisit; Derpatum nimirum, Felinum, Laiisium, Mariemburgum, Kokenhausium, Parnauiam, Volmariam, Rumburgum, Hasselum, Nouogrodekum, Marienhausium, Ludsenium, Rossittenum, Trikatum, Bersonum, Landescum, Sefuegium. Veissensteinij autem cum id à Sueco teneretur, ius atque repetitionem: quæ verò bello antè capta à Rege tenebantur, numero non pauciora, Po-

V 3

ra, Po-



ra, Polotiam, ac in eodem Ducatu Suffam, Sokolam, Krasnam, Vfuatam, Sitnam, Ieserisciam, Kosianum, Nescerdam: supra Vitepsciam, antiquioris possessionis Moscicæ Velisium, cuius ad centum viginti millia passuum ager patet: in Liuonia Vendam, Lenouartum, Duneburgum, Pirkelium, Salium, Kirempesium, Elfenum, Fabianum; cum ipse ex iis, quæ à Rege armis parta possidebantur, Lukos, Sauolociam, Ostrouam, Neuelam, Chelmam, tum ab ipfomet deleta castella, Krasnam, Krasnohorodum, Voronecium, Veliam sola reciperet. Quibus tamen in omnibus detrimentis nullum fortassis maius censerit debeat, quàm quod portibus cunctis Balthici maris amissis, à Borysthenis autem nauigatione iam antè Turcarum armis exclusus, à mari ferè omni præterquàm glaciali importuosissimo, ac periculosissimo, atq; aliarum ferè nationum occidentalium, ac meridionalium commerciis in penitiorem Moscouiam tamquam relegatus; compedesque quò minus liberè vagari possit, iniectæ ei videantur.

R. HEIDENSTEINII  
SEC. REGII DE BELLO  
MOSCOVITICO

*Commentariorum*

LIBER SEXTUS.



PACATO EVM AD MODVM, quem superiore libro demonstrauius, Mosco, nihil prius Rex habuit, quàm vt prouinciæ constituendæ causa, ipse in Liuoniam Rigam vsque procederet. Quam cum XII. Mensis Martij die ingref-

gressus fuisset, postridie Samoscius ad eum venit. Iam antè autem alij etiam senatores Polonici aliquot, ac Lituani fati frequentes comitati eò Regem fuerant. Ad eos Ducem Churlandiæ ac ex nobilitate Liuonica quàm frequentissimos literis Rex euocat; quæque ad prouinciæ eius statum pertinere videbantur, cum omnibus ijs communicatis, vt scripto sententiam suam explicarent, hortatus eos fuit. Erant, de quibus deliberabatur, capita hæc potissima: de templis cultuque diuino instaurando: de Episcopo restituendo: prouincia ordinis iudiciorumque causa in partes certas diuidenda: magistratibus ac ærario publico constituendo. de quibus cum quid quisque sentiret, ostendisset, Rex et si non ignoraret, à maioribus suis etiam sine ordinum authoritate prouincias ab iis partas priuato consilio constitutas: quò tamen gratius beneficium suum esset, si cum omnes operam studiumque suum ad eam prouinciam recuperandam contulissent, ex omnium consilio certa eius formula describeretur, in comitia totam rem distulit: legatos tantum partim ex comitatu suo, partim ex nobilitate Liuonica designauit; qui prouinciam vniuersam inspicerent: agros redditusque eorum omnes, ac iura describerent, omnibusque iis de rebus ad se referrent; quò rectius deinceps in comitiis statui de iis posset. Possessionum autem omnium quatuor genera faciendæ iudicabat. quorum primum esset, quod ad publicam securitatem pertineret, finitimarum arcium; quæque ad illas, vt ex propriis prouentibus muniti, omnibus necessariis ad defensionem rebus ornari, retinerique possent, adiciendæ essent: earum alterum, quibus tum Episcopatus cultusque diuinus, tum ærarium publicum stabiliretur: tertium earum esse debere statuebat, quæ priuatis certo iure deberentur, aut cum iisdem, si hæreditariæ possessiones eorum reipub: causa



restitui iis non possent, permutarentur: Extremum quibus benè meriti & quorum præ ceteris in hoc bello opera eminuisset, virtutis causa donarentur. Inde militibus magistratus præfecturæq; quæ vacabant collatæ: quibusdam stipendia assignata fuerunt. In toto autem hoc bello id à Rege obseruatum fuerat, vt si qui in eo periissent, qui publicas possessiones iure aliquo tenerent, easdem liberis eorum quamuis infantibus, partim etiam puellis confirmaret. multis etiam ex plebe cum superioribus expeditionibus, tum maximè hac ob præclara facinora aliqua nobilitatis ius datum fuit; qui cum plerique à Samoscio in insigniorum communionem recipi se peterent, viris fortib. non inuitus tribuit, vt cum ipsi antè virtute sua nobilitate dignos se fecissent, à se gentis suæ insignibus non indigni iudicarentur; iisq; aliqua re auctis, vel minutis, aut aliquantum immutatis, qui id à se petiissent, plerosque donauit. Quibus ita constitutis cum Rigensibus de iis rebus, quas in aduentum Regis reiectas supra ostendimus, actum fuit. Occuparat ciuitas à morte Archiepiscopi Vilhelmi, cum sedis ac templi Archiepiscopalis possessionem, tum omnia quæ ad id pertinerent, iura ac prouentus; adq; Augustanæ confessionis formulam omnia templa reuocarat. De hoc capite ita conuenit, vt D. Iacobi, & quæ proxima ad illam est, D. Mariæ Magdalenæ ædes ad catholicæ religionis vsus cum omnibus, quæ antiquitus ad eas aliquo iure spectassent, prouentibus redirent: penes ciuitatem curia, quæ Archiepiscopi fuisset, prope muros vrbs sita vnâ cum domibus canonicorum, ac arces desertis, quæ ante id collatæ non essent, permanerent; cum verò census aliqui annui percipi olim publicè iis ex locis soliti fuissent, vt eorum nomine certam pecuniam annuam D. Iacobi ædi eiusdemque sacerdotibus ciuitas penderet. De vallo, quod contra ar-

cem

cem ciuitas obiecerat, assensum à Rege fuit, vt eo quo nunc esset loco maneret; cumq; se quoq; ab omnibus partibus arcem vallo circumdaturum ostendisset, id solum adiectum fuit, vt ad eius modum, quo arcem muniturus esset, vrbs quoque vallum æquaretur: ab eademque arcis parte in muro vrbs porta aperiretur. Inter Churlandiæ etiam Ducem, ac ciuitatem de navigatione, ac portorio controuersia erat; cum ille per fluuium, qui ex ditione eius infra Rigam in Dunam illabitur vsus portus Rigensis, merciumq; exportandarum ius ac immunitatem sibi defenderet; ciuitas negaret. Eos vt inter se componerent, hortatus Rex fuit; quod, si conuenire non posset, in comitiis cogniturum de ea se ostendit. Venerat Rigam & Magnus Dux. Hic eius quam possidebat, Liuoniæ partis confirmationem petebat; ad que homagium accipiendum, ac iuramentum præstandum sese offerebat. Ostensum huic, more maiorum non nisi in comitiis id fieri posse. Vltimo loco nobilitas desideria sua ad Regem detulit. Quæ cum ad vniuersæ prouinciæ statum pertinerent, responsum & huic fuit, humanitatem ipsam postulare, vt cum ordines regni tantum laboris, atq; sumtus in prouincia ea liberanda suscipissent, ne sine eorum authoritate iis de rebus statueretur. Angebatur potissimum animo Rex, ne cum Moscuscus, qui in finibus Liuoniæ ex præsidiis Liuonicis, quæ deduxerat, non contemnendas copias coactas habebat, Naruam iis oppugnaturus diceretur; si minus forte paratus tum Suecus esset, minusque ad resistendum virium haberet, vtrique eas perderet. Itaq; mox Petrum Visgerdum Lituanum cum literis ad Moscum mittit; ostendit, accepisse se ex legatis suis, quos Sapolia habuerit, pacem inter eos, atque ipsius legatos certis conditionibus conuenisse: eam se ratam habere: cum autem arces Liuonicas, quæ à Sueco tenerentur in conditionibus



tionibus præteritas intelligeret, si à Mosco oppugnantur, ius suum ac reipublicæ, quod semper excepisset, negligere se non posse: id se pro sua fide ac religione dissimulare non debuisse: hortari ne fortè ea res pacem turbet, vt dum maiores legati, qui pacem vtrunque firmaturi sint, ac si quid dubitationis in conditionibus adhuc sit, de eo cum illo conuenturi, ad eum perueniant, omnem vim ab illis absteineat. Constituerat iisdem de rebus Regina ad sororem Sueciæ Reginam, per Christophorum Varfaucium literas dare. Cum tardaret, Rex qui in ea, cum voluntatis Mosci, tum aliarum rerum incertitudine nullam moram interponi volebat, non dubitandum sibi existimabat, quin Dominicum Alamannium Culinæ præfectum, quàm primùm ad Suecum mitteret, præ cæteris idoneum ad legationem hanc ratus, quòd ab eo iam tempore, quo primùm de matrimonio inter Regem Sueciæ Ducem tum Finlandiæ & Reginam Catharinam per Ioannem Baptistam Thencinium potissimùm actum fuerat, Alamannius, qui in familia Thencinii tum fuisset, omnium rerum conscius & sequester fuisset; indeque tam Regi quàm Reginæ notus esset; Reginæ etiam, apud quam potissimùm negotia hæc propter summam cum regno Poloniae necessitudinem, & quòd non parum apud maritum posse existimabatur, agenda videbantur, non ingratus putaretur. Summa legationis erat, vt repetitis iis, quæ ab initio belli vtrunque intercessissent, tertii anni bellum nullam aliam ferè ob rem, quàm solam Naruam ac vt communi pace Suecus comprehenderetur, à Rege susceptum ostenderet: reliquam enim Liuoniam ferè omnem legatione Vilnam ad Regem missa iam antè Moscum cessisse; eò magis contra opinionem Regis accidisse, quòd dum ad Plescouiam cum exercitu Rex esset: quòd iturum se pro mutua necessitudine amicè antè ei aperuisset,

ruisset: hostemque ab omni auxiliij suis in Liuonia ferendi facultate exclusisset, cum ab aliis potius partibus in Moscouiam illum irrupturum expectasset, non modò Naruam, ac vicina castella, præfidiario milite, quem Plescouiam, ex præfidiis omnibus hostis contraxerat, nudata, commeatuque, ac omni spe auxiliij destituta; sed Veissensteinium quoque, quod iam hostis cessione Regis esse sciuisset, dissimulatis literis regiis, ac iis ferè copiis, quas Gedani magna ex parte ministri eius conquiesuerant, occupasset; Parnauiam obsedisset: potuisse Regem, si id tentaturum eum præsciuisset, & sumtu & labore eius anni belli supersedere: iam verò & cursum rerum præclarè contra Moscum geri coeptarum, & obsidionem Plescouiensem, cuius cum grauiorem partem iam superasset, facile reliquam etiam superaturus fuisset, interrumpere, ac sine ipso etiam pacem facere necesse habuisset; ne dum pro eius commodis laboraret, maius in Liuonia incommodum, de qua sola bellum tum erat ab eo acciperet. pro quibus iniuriis omnibus vt Regi rei que publicæ satisfaceret, postulare iussus fuit. Secretò mandatum ei fuit, vt cum hæreditatis Sigismundi Augusti: pecuniarum ei creditarum: dotis ab eodem promissæ, nec dum numeratæ, aliarumque rerum quarundam petitionem Suecus relaturus existimaretur, ostenderet quidem, aliam earum rerum petendarum rationem esse, certumque; de iis ius, ac morem iudiciorum antiquissima regni consuetudine receptum: aliam iniuriarum, quibus ab illo Rex affectus esset; quæque cum iis rebus nihil commune haberent: si tamen ita animatum videret, vt de Reualia quoque ac omni iure Liuonico simul decidere paratus esset; dotis & mutui, quod peteret, solutionem sine vlla exceptione ei promitteret: reliquarum controuersiarum disceptationem communibus arbitris Regem permissurum: vt communi etiam pace



pace comprehenderetur, apud Moscum elaboraturum ostēderet. quòd si ne iis quidem conditionibus permoveri se pateretur; vel pacem cum Mosco certam opera Regis ei fore, vel mille equites in bellum Moscouiticum, sumptu suo Regem ei præstiturum reciperet: ex eorum nimirum genere, qui beneficiis Sigismundi Augusti ornati, haud inuiti in militiam eam conuenturi essent, idq; pro libertate gentis Polonicæ salua pace publica suo arbitratu facere possent: stipendio autem ac sumtu Regis tandiu futuri apud eum essent, quòd ad eadem pace, quam cum Rege haberet, ipsum quoq; Moscus comprehenderet. quòd si eo tempore de Liuonia, quam teneret, vniuersa trāfigere Suecus alienum existimaret, docere iussus fuit, non recusaturum Regem, quo minus communium amicorum interuentu quicquid inter eos esset controuersie, componi pateretur: si quid etiam debere illi videretur, præstaret: modò de Narua interim in omnes casus vtrique satis prospiceretur: ne dum ipsi inter se de ea disceptarent à Mosco occuparetur. Id ea ratione commodissimè fieri posse, si Regis præsidium in eam immitteret. Cùm enim Moscus propter pacem, quæ cum Rege ei esset, si præsidium regium Narua receptum fuisset, oppugnare eam non posset, non modò Naruæ, sed aliorum etiam præsidiorum suorum Liuonicorum, quibus Narua obiecta esset, securitati sine incommodo ac molestia sua eum consulturum: simulque omnibus copiis suis coniunctis, ad defendendam Finlandiam longè futurum paratiorem; si nec arces controuersæ contra vim hostilem defendendæ ei essent, nec copiarum in diuersa præsidia distrahendæ. Interim de arbitris inter se conuenturos: & vel minutum controuersias omnes eorum interuentu iri; vel si tolli eæ non possent, Regem Naruam illi redditurum, aliasq; iuris sui persequendi rationes initurum. ne verò fraudi ei esset,

ei esset, quòd propter commune periculum, Naruam sibi tradidisset, idoneè in eum casum ei cauturum. Profecto iam Alamannio, Varfaucius cum literis à Regina Rigam venit. Dedit & huic Rex eadem ferè, quæ Alamannio data fuerant, ad Sveciæ Regem mandata. Iussit autem, vt si priorem legatum aliquid constituisse intellexisset, non exposita legatione reciperet: si infecta re dimissum comperisset, ostenderet; quòd maiores legati eo ipso tempore in Moscouiam à Rege mitterentur: comitia etiam breui indicturus Rex esset; summam illum, & vt pace à Mosco comprehenderetur, & de aliis rebus suis cum ordinibus agendi facultatem habiturum: hanc causam fuisse Regi, vt etsi iam antè iisdem de rebus legatum ad eum misisset: tamen & Reginae coniugis suæ precibus, & mutua necessitudine adductus, denuò se ad illum mitteret: hancq; explicandarum omnium harum controuersiarum opportunitatem ei significaret. In conditionibus nihil, quemadmodum ostensum est, mutatum fuit. Antequam Riga Rex discederet, maiores legatos, de quibus dictum est, in Moscouiam designauit, Ioannem Sbarasium Palatinum Braslauiensem, Nicolaum Taluossium Castellatum Samogitiæ, Michaëlem Haraburdam. Mandata hæc iis data fuerunt, vt iuramento in pacem à Mosco exacto, de Sueciæ præterea Rege eadem pace comprehendendo agerent. De Narua autem, ac aliis castellis Liuonicis, quæ à Sueco tenerentur, si tentaturus ea Moscus esset, quemadmodum per literas Rex iam ostendisset, non defuturum iis Regem, vel etiam pacem, si id fieret, ratam habiturum testificarentur. De captiuis quia antè Moscus postularat, vt vtrinque pariter captiui redderentur, non parem vtriusque captiuorum rationem esse ostenderent, cùm in Regis potestate præcipui ipsius ductores essent, ille ex Regis



giis insigniorem nullum: ex nobilitate paucos: reliquos ex promiscua plebe haberet. Itaq; vt vel Sauolociam ac Neuelam, aut alterutram saltem carū Regi pro illis permitteret, postularent; cū antè integriorib. adhuc reb. suis pro pauciorib. captiuis Vsuatam ac Ieserisciam obtulisset, quarum hæc nondum tum in potestatem Regis venisset; vel cū ipse antè Sigismundi Augusti temporibus certa pretia in singula capita exigere solitus fuisset, eodem exemplo suo suos nunc redimeret. Reuenit sub idem tempus Rigam à Mosco ad Regem Posseuinus, multis incommodis & ærumnis peregrinatione ea perfunctus. Laborarat hic potissimum apud Moscum de dissensione, qua à Romana Ecclesia, sicut ceteri orientales pleriq; ita Moscus quoque dissidet tollenda: adq; ecclesiæ communionem eodem reducendo: tum pro suo in rempub: Christianam studio fœderis contra Tartarum cum Rege sancienti vtrò mentionem intulerat; quidq; animi Moscus de coniungendo contra barbaros bello haberet, explorarat. De extremo hoc ostenderat Moscus, pacem iam cum Tartaro se fecisse. Venere vnà cum Posseuino legati, ad Summum Pontificem ac Rudolphum Rom: Imper: à Mosco missi: alter item quem Constantinopolim cum muneribus, quibus cædem filij expiaret, ad patriarcham Constantinopolitanū ablegarat. Vtrisq; literæ commeatus publici datæ fuerunt. Remisit iisdem etiam ferè temporibus ad Regem Matthiam Preuostium; qui cum literis, quibus ipsius Rex respondebat, de quibus supra dictum est, Sauolocia ad eum missus fuerat: & mercatores, quos per tempus belli retinuerat. Ad literas paucis respondit; intelligere se, eas in medio ardore belli ad se datas, asperius aliquantò scriptas esse: iam cū pax atque amicitia vtrinq; restituta sint, ad eas, quas bellum tum non nihil exasperarit, pacis tēpore respondere necesse sibi non arbitra-

bitrari; quòd eum etiam, qui literas attulisset, tandiu retinuerit, cū propter bellum armis viæ omnes obsessæ fuerint, fieri aliter à se non potuisse. Dimissis legatis, quos ad describendam prouinciam designatos supra ostendimus, Vilnam Rex profectus fuit. Ibi legationem Tartaricam, audiit, quæ à Mahomete Chiereio Tauricanorum Tartarorum principe haud multò antè venerat. Petebat donatiua: de Kosakkorum iniuriis & vexationibus querebatur; quæ quidem etsi extiterant non infrequentes: augebantur tamen ex industria à Tartaro; quò domestici metus, ac vicini periculi simulatione longinquam Persicam militiam effugeret, in quam à Turcarum principe sub idem tempus euocabatur. Responsum à Rege fuit, donatiua more maiorum datum iri; iisdemque quibus antea fuisset, legibus, pacem cum illo futuram. De Kosakkis idem etiam, quod antè aliquoties ostensum; manum hominum ex diuersarum gentium colluie coactam, vagam, ac nullis certis sedibus consistentem; nullius etiam in potestate esse: vt tamen quantum fieri eius posset, ab iniuriis & infestatione prohiberentur, sedulo ac cum fide operam datum iri. Insolentiùs id à barbaris acceptum fuit, responsoque audito, princeps legationis in ipso quasi discessu publicè testificatus est; vt omnia fierent, nisi tamen Kosakki in officio continerentur, pacem se non seruatuos. Iam antè minoris Poloniae, ac Russiae nobilitas, legatis missis, de tributo in suis conuentibus à se decreto certiore Regem fecerat. Hoc verò tempore priùsquam Vilna Rex discederet à maioris quoque Poloniae, Masouiticæ item, ac Podlasicæ nobilitatis legatis aditus, de simili tributo in illis quoque conuentibus sancito cognoscit. Gratia vtris-



que actæ, deque animo in rempublicam Regis optimè sperare iussi fuerunt; cuius constituendæ ac Liuoniæ simul, quam communi omnium consilio, ac ope partam, communi etiam ordinum iudicio Rex reseruasset, ordinandæ causa intra eum ipsum annum comitia Regem habiturum in responso vltimis hisce dato adiectum fuit. Quibus de causis, quibusque cum mandatis tum ad Moscum Visgerdus Lituanus, tum ad Sueciæ Regem Alamannius à Rege missus fuerit, supra ostendimus. Moscus literis Regis, quibus, vt à Narua cæterisque Liuonicis præsiidiis abstineret, hortatus eum Rex fuerat, statim assensus fuit. Apud Suecum ingrata legatio fuit: nec multum in Regina etiam ad mitigandum animum eius præsidij fuit; cum præterquam quòd iracundia eius omnes ad placandum eum aditus omnibus obsepserat, de iniuriis, quibus ob non præstitam dotem hæreditatemque fraternam, ac non comprehensum pace maritum affectam se existimabat, vltro quereretur. Itaque cum ea Alamannius indè renuntiaret, ex quibus istas quoque res vltra superiores iniurias magis exasperatas appareret, Rex, qui Vilna Grodnam iam venerat, senatoribus plerisque eò euocatis, ex illorum sententia comitia eò maturius indicenda statuit; in quibus de Sueci etiam iniuriis ad ordines referret. Interim in Liuoniam ad magistratus & præfectos, quo loco res essent perscriptum; vtque viderent, ne per negligentiam detrimenti quid acciperetur, moniti fuerunt; cum Lituanis actum, vt si quis præter opinionem in vicina Liuonia motus accidisset, suppetias ferrent: cum Duce item Prussia; vt finitimo & ipso Liuoniæ principe per Reinoldum Heidensteinium eadem communicata fuerunt.

cum

eumque maiores legati ad Moscum missi, quibus mandata de pace Sueciæ Regi apud Moscum conficienda, data supra ostendimus, in itinere iam essent; ne vllam eius rei mentionem facerent, & ipsum rem suam agere permitterent, per celerem tabellarium significatum iis fuit. Grodna sub mensem Augustum Varfauiam Rex processit. eò Varfaucius quoque è Suecia eodem, quo Alamannius, legationis exitu ad eum venit. Ibidem verò dum comitorum diem expectat, Iancola Valachiæ Palatinus in potestatem eius venit. Hic quemadmodum supra demonstratum est, è Saxonibus Transiluanicis, loco humili & obscuro ortus, Valachiæ principum genus ementitus fuerat; Achmetis autem Bassæ opera prouinciæ eius principatum nactus, cum ab initio statim, quo animo erga Regem futurus esset, ostenderat; præterque decessorum suorum morem nullos vnquam legatos ad Regem miserat; tum postea variis iniuriis Regem, hominesque eius affecerat: literas regias ad Turcarum Imperatorem aliquoties interceperat: resignarat: resignatas remisit: Regem senatumque regni omnibus modis in odium ac inuidiam adducere conatus fuerat: in finitimas aliquot villas nobilium latrociniis, ferro, ac incendiis grafsatus fuerat: homines regios, qui rerum suarum repetendarum, iurisque obtinendi causa ad illum venissent, pulsatos in carcerem coniecerat. quibus iniuriis cum Rex permotus, quemadmodum antè ostendimus, Turcarum Imperatorem de iis appellasset; vtque illum à Valachia, à finibus molestiam hanc amoueret, ex dignitate alioquin sua consilium capturus, postulasset, res dilata fuerat. Hoc tempore in aulam Turcicam successore ei summisso euocatus, compilata prouincia, omnibusque rebus conuasatis, ac manu aliqua hominum facta in Cæsareæ ditionis Vngariam transfugere constituerat. quæ rectè transeundum illi erat, à



Transiluanis obsessas vias existimabat. itaq; cum ambitu capto per Pokutiam Polonicae ditionis provinciam percurrere conaretur, atq; ab ea parte Nicolaus Iaslouecius praefectus Sniatinensis, aliiq; nonnulli ex ditionibus regis fama fugae eius exciti eum persequerentur, ab iis captus Leopolimq; perductus fuit. Scripsit mox Rex ad Nicolaum Seniauium, qui finitimae militiae in Russia praerat, ac Nicolaum Herbortum praefectum Leopoliensem, ut iure gentium supplicium de eo fumerent: bona publicavit: misitq; quaestorem Palatii Hiacynthum Mlodseuium, qui in publicum ea redigeret; uxori & liberis alimenta annua constituit. Appetit interim tempus comitiorum. Ea in ante tertium Mensis Octobris Rex indixerat. Nam cum in aduentum tantum maiorum legatorum, quemadmodum Rex postularat, oppugnandae Naruae impetum suum repressurum se Moscus promississet, ne si maiores legati idem tenere non potuissent, ad consilium pro tempore capiendum imparatior esset, non committendum sibi arbitratur, quin primo quoq; tempore ad ordines de eo referret. Praeterea vero provincia Liuania magistratibus, ac legibus fundanda, praesidiis, comitatu, instrumento omni bellico, aliisque, contra repentinos casus ad defensionem necessariis rebus providenda erat: munitiones collapsae instaurandae: nouae instituendae; quae & in regione partim continuo tot annorum bello vastata, partim ab hoste ita tradita, ut quae armis ab inuitis exprimuntur, tradi solent, omnia deerant: & Rex ex omnium ordinum sententia quemadmodum supra ostendimus, constituenda sibi existimabat. Adhaec non nihil Tartari etiam, de qua supra dictum est, bellum denuntiantis oratio eum commouerat. Ad quam cum crebri etiam rumores ex Russia de tumultu allati accessissent, ita ut in procinctu iam Tartari esse nuntiarentur, iam ante quidem viginti duas

duas turmas equitum, qui ad Pleseouiam stipendia fecerant, ad Seniauium praefectum militiae Russicae praemittere Samoscium iusserat. Ut vero in praesentia arma ab illis non fumerentur: quia tamen facili momento impelli eos videret. ut in ditiones suas transfirent, dignitatis nihilominus suae esse statuebat, ut pro fama rerum a se gestarum ea consilia susciperet, quibus illos suis quoq; rebus timere faceret, remq; publicam non modo ab incurSIONIBUS eorum, sed metu omni vastationum in perpetuum liberaret; rationesq; quibus id salua pace Turcica fieri posset, proponere, de iisque, cum ordinibus agere in animo habebat. Stipendia praeterea militi soluenda erant. Etsi enim in conuentibus particularibus tributum hanc in rem decretum fuerat: longe minus tamen ex illo redigebatur, quam in ea ipsa, ac alia debita nonnulla sufficeret; resque per se opinione minor, exactorum praeterea quorundam seu negligentia, seu culpa, quod vel minus quam deberent, vel tardius ea inferrent, minui dicebatur. de quibus & ipsis ut cognosceretur, necessario ad ordines referendum existimabat. De certa interregnum ac electionum ratione stabilienda, etsi quid publico nomine superioribus comitiis a se postulatum fuisset, & ipse recepisset, memoria teneret: hoc tamen tempore, quo superiorum interregnum vulneribus nondum plane cicatrix obducta esset, ad eas res accedere, quae sine eorum vulnerum attrectatu agitari non possent, intempestiuum ei videbatur. Etsi autem idem maioribus quoq; senatoribus plerisque, cum pro more per literas prius sententias eos rogasset, videretur: quod tamen prioribus comitiis enixe id a se nuntiis nobilitatis petentibus relaturum se de eo recepisset, non posse se iam a priori promissione sua recedere existimabat. eademq; cum de concordia etiam inter sacrum & profanum ordinem tentanda sententia ipsius fuisset, ut ab



cuius temporis ratione alienam tractationem eam existimaret; iisdem quas ostendimus, de causis, id tamen caput etiam ferendum ad ordines suscepit. Addidit his, si quid iudiciorum rationi deesse videretur, aut quam illa emendationem desiderarent, operam suam hac quoque in re reipublicæ non defuturam. quæ quia magis, ut ordinum studiis, ac suæ in eos voluntati satisfaceret, adiecerat, summam deliberationum omnium, ad ea quæ priori loco recensuimus, capita referebat. Hæc postquam primò ad senatores, inde ad conuentus nobilitatis, qui in singulis Palatinatibus ante comitia ex more haberi solent, delata fuerant; non eodem ab omnibus animo accepta fuerunt; iidemque ferè animorum motus, ac hominum sermones renati, quos in superioribus comitiis nonnullis extitisse ostendimus. Alii quòd suffragio suo in electione Regem subleuassent, cum regnum ipsum eum sibi debere existimarent, minus vel se expectatione sua, vel quæ ipsi concupissent, alios consecutos dolebant. Non pauci ad hos diuersarum partium supererant, qui in superiorum interregnum contentione victos se meminissent. Quidam qui in concionibus, ac conuentibus nobilitatis plurimum hæcenus potuerant: nomen gratiamque in vulgus ac opes inde parauerant, omnia præmia in milites conferri mussitabant: iis artibus, quibus ipsi plurimum pollebant, nullum amplius locum relinqui molestè ferebant. Vniuersæ verò nobilitatis animi, ut qua quisque re maximè permouebatur, ita variè afficiebantur. Alii non id agi iactabant, ut de modo aliquo electionis tractaretur, sed ut successor priuato consilio imponeretur; interim cum regio imperio alienæ potentia vicarius ac adiutor constitueretur, Samoscium notantes: huc deuinctos beneficiis milites spectare: retentos in pace ex iisdem non paucos à Samoscio

moscio, ut oppressa per metum nobilitate per vim ac arma regnum occuparetur. Diuersum de religione sentientibus libertatis eius imminutio, circumscriptionisque metus obiici. Iudiciorum emendatione non correctionem aliquam à Rege quæri, à nonnullis disputabatur; sed quò cum in vniuersum ea sustulisset, ad se denuò ea transferret: omniaque secus omninò accipiebantur; ita ut alia eiusdem rogationis capita, quæ regiis opponerentur, detorto ad metum iniiciendum sensu in vulgus à quibusdam ederentur: erumpente nonnihil inter hæc inuidia etiam in Samoscium. Publicè quidem plerique honores Vngaris collatos exagitabant; Landskoronam ferè designantes, quam vidua Gasparis Bekessii marito, qui in castris ad Polotiam ob virtutem iure nobilitatis Polonicae donatus fuerat, ac fratre eius Gabriele, qui in irruptione Plescouiensi perierat, amissis, vnà cum orbis liberis tenebat; & sub id tempus Francisco Vesselinio nupserrat. Interim non deerant, qui Regi, si de successore agi vellet, operam suam vtrò deferrent; cumque Rex, etsi ita de Republica se meritum sciret, ut non minus, quam aliorum Regum, suæ quoque familiae ratio haberi deberet: ab hoc tamen tempore id tentare alienum, studiaque ordinum vtrò potiùs expectanda sibi existimaret; spreto se rati, ac aliorum opera confici id posse Regem sperare, eò magis incendebantur. Nobilitas etsi quid maximis Regis in se ac Rempublicam beneficiis deberet, agnoscebat: libertatis tamen aliarumque charissimarum quarumcunque rerum metu iniecto hæsitare; cunctantiusque agere: omnia denique suspecta habere. His igitur animis cum in comitia ventum esset, Samoscium promunere Cancellarii verba nomine Regis faciens orfus à voto, quod cum ex superioribus comitiis discederetur, ipsi fecissent, quòque ut saluus atque incolumis ab expeditione



peditione ea Rex ad se rediret, ac ipsi lætis animis in mutuos amplexus ruerent, optarant; quod à Deo contenderant, ita cumulatè iis præstitum ostendit, vt non modò incolumem saluo exercitu, sed re etiam benè gesta, immortaliq; gloria parta, reuersum ex hostico Regem viderent: quòd in ipsorum potestate totum fuisset, vt mutuis gratulationibus, ac fraterna beneuolentia se exciperent, certorum hominum maleuolentia impeditum ait. quorū opera id factum sit, non arbitrari nunc sibi inquirendum: videre autem iam Petilios in Republica quosdam existere: optandum ne mox Catilinæ etiam aliqui existerent. quæ præfatus, domesticarum rerum nihil aliud hisce comitiis proponendum sibi Regem statuisse docet, quàm quæ ipsi non modò viuentē adhuc Sigismundo Augusto, ac superioribus comitiis Andreiouiensibus, vt ferrentur, sanxissent: sed postea etiam cum sæpe alias, tum in proximis comitiis efflagitassent: Itaque illorum precibus Regem adductum de modo liberæ ac ordinatæ electionis referre. Cùm de ratione certa eligendorum Regum statuere eos debere diceret, non id dicere, vt de relinquendo iure electionis, ac patrimonio hoc libertatis, quo nihil à maioribus eorum relinqui iis potuerit præstantius, cogitarent: sed quomodo eam, quàm maximè integram conseruarent, & in perpetuum munirent. quæ cogitatio num necessariò ab illis suscipi debeat, non aliorum exemplis confirmandum sibi existimare: eos ipsos, si superiorum interregnorum actiones, ac grauissimum discrimen, in quod respublica adducta tum fuerit, secum perpendant, æstimaturos: nullam hinc Regis rem agi, sed propriam ipsorum: optare tamen se, ne huic suo tempori defint, superiorumq; annorum benignitate diuina, qua mirabiliter Rempublicam conseruatam intelligant, ad futurorum potiùs consiliorum spem se erigant, quàm

ad secu-

ad securitatem ac negligentiam abutantur. Quòd si artibus quorundam in suspensionem mentes eorum adductæ, quemadmodum ægri salutare cibos, ita ipsæ sana consilia concoquere non possint; totum in ipsorum potestate futurum; seu statuere quid hac de re velint, seu omninò eam relinquere. Eandem de altero capite, concordia inter ordines facienda, quod secundo loco proponendum Rex iudicasset, sententiam eius esse. Optimè ipsos meminisse, quo studio & in Andreiouiensi conuentu, vt deinceps de eo referretur, egissent, & quanto pere postea idem à Rege contendissent. In communi omnium ferè regnorum, ac horum temporum fato nos præcipua tamen fortuna vsos, vt concordiam ciuilem egregiè hucusq; tutati simus: hanc hisce rebus ferè retineri, vt ab iniuriis & contumelia vtrinque abstineatur: iure ac causa cognita non vi aut extra ordinem quid statuatur: maximè verò, vt quod cuiusq; est, omnibus tribuatur: Id autè tam ad bona, quàm ad honores etiam ac prærogatiuas pertinere: hac vna re iusticiam perfici: Iusticiam fundamentum esse Reipublice & qua illa contineatur concordia. Nemini dubium esse, quin duobus hisce ordinibus ecclesiastico & ciuili respublica hæc potissimum subsistat. Proinde ipsi, quorum res ageretur, viderent, suscipiendamne an relinquendam huius rei deliberationem existimarent. Iudiciis num quid deesset, omnium optimè ipsos, qui in iis versarentur, iudicare posse: non posse sanè dissimulari, ita breui tempore calumnias in iis creuisse, vt non pauci grauioribus studiis relictis, totos se causidicis ac captionibus excogitandis, quibus alios irretirent, dare dicantur. Regem operam suam, si qua in re emendatione opus habeant, iis detulisse: qua, si placeret, vterentur: inuitis Regem eam non obtrusurum. Ingressus deinde in orationem de Liuonia, statuq; omni eius demonstrato, quid

que



quæ cum Mosco hætenus de locis, quæ à Sueco tene-  
rentur, actum esset, commemoratisque Sueci iniuriis  
eò potissimum incumbit, vt quo nullum in ea vicinum  
inueterascere patiantur, iis persuadeat: omnem societa-  
tem imperii infidam: in prouincia nuper parta, dum a-  
nimi hominum adhuc dubii, nondum legibus ac insti-  
tutis caoluerint, periculi plenam: neminem prudentem  
in nouam prouinciam eiusdem præsertim cum indige-  
nis linguæ ac nationis vicinum admisisse; aut qui admi-  
serit, non cum statim pœnituisse. Inde de Tartari minis  
Kosakkorumque, qui subinde bellum Reipublicæ con-  
flarent, iniuriis refert. Fuisse superioribus comitiis roga-  
tionem latam, qua extraordinaria Iurisdicção ad cer-  
tum tantum tempus permissa Regi fuerit: aut illos in  
officio continendos, aut de bello cum Tartaris suscipi-  
endo cogitandum. Extremum de stipendiis militum fu-  
it. Scitum quidem superioribus conuentibus tributum;  
id num in stipendium, ac nomina apud externos Princi-  
pes facta dissoluenda: in defensionem Liuoniæ: bellum  
Tartaricum sufficere: per quos item steterit, vt tardius  
& minus quam deberet, illatū fuisset, ipsi inquirerent:  
in erogando quidem & fidem, & diligentiam summam  
reperuros: ita milites meritos ait, vt ante omnia ipsis  
consulere debeant, qui pro gloria ac dignitate nominis  
Polonici non modò cum ferocissimo hoste, vrbeq; om-  
nib. rebus munitissima, sed in regione trionibus expo-  
sita, cum sæuissima hieme, cum aëris cœlique iniuriis,  
ac natura ferè ipsa ab omnibus rebus imparati, ac se-  
minudi ferè propugnarint: Nihil hîc se de Liuonia di-  
cturum prouincia olim florentissima, ac nunc etiam o-  
mnibus opportunitatib. abundante per ipsorum con-  
stantiam parta. quantum apud externos nomen ipso-  
rum virtus omnibus pepererit, eos ipsos testes esse pos-  
se, qui quæ post discessum Henrici, cum Tartari metu  
ac tre-

ac trepidatione omnia complerent, auctoritas eorum  
apud externos fuerit meminissent; & quæ nunc de virtu-  
te eorum existimatio omnium sit, intelligerent; post-  
quam potentissimo hoste superato, amissas aliquot pro-  
uincias recuperârint, nouas adiunxerint. Nec tamen  
pluris hæc à se fieri, quam quem iis ipsis parandis simul  
reipub: acquisiuisset, plurimorum fortium virorum in-  
æstimabilem thesaurum; qui ita iam & animis parati,  
& in armis exercitati sint, vt nullum tantum pericu-  
lum existere possit, quod non promptissimo animo pro  
reipub: suscepturi ij sint: Horum spem ne destituerent,  
qui ne dignitatem nominis polonici iacere paterentur,  
fortunas omnes suas, sanguinem vitamque ipsam pro-  
fundere non dubitârint: deniq; non alienis hominibus  
beneficium præstituros, sed necessariis, fratribusq; quæ  
virtuti ac laboribus eorum deberentur, stipendia perfo-  
luturos. Hæc esse de quibus referendum Rex existimas-  
set, viderent nunc ipsi, num cum iis, quæ alieno nomine  
in vulgus à nonnullis sparsa essent, conuenirent. Con-  
uersus deinde ad Regem, optare se, inquit, vt pro tantis  
eius rebus gestis, vel ea gratia ei referretur, quæ in bene-  
morata, ac grata ciuitate pro multò minoribus non Re-  
gi, ac tam amanti reipub: Regi, sed cuicumq; exercitus  
Duci referri soleret: non egere tamen animi magni-  
tudinem eius consolatione sua: plus enim in illa præsi-  
dij ad quoscunq; fortunæ impetus, ac malcuolorum  
iniurias perferendas esse, quam in illis ad eam frangen-  
dam virium: Non esse dubitandum has ipsas quorum-  
dam hominum iniurias illustraturas magis laudem at-  
que nomen ipsius: Quem enim, qui ipsius res gestas o-  
lim cognosceret, non magis, quòd in tot à quibusdam  
obiectis difficultatibus, tantas res gerere potuisset,  
quam quòd omninò eas gessisset, admiraturum? esse  
animi magnitudinis eius, ne iniuriis quidem absterreri  
se pati,



se pati, quò minùs quemadmodum perpetuò fecisset; porrò benè de repub: mereri pergeret. Milites allocutus, non debere eos existimare ostendit, tam ingrati animi notam, tantamque iniuriam in tam fortibus ac bonis ciuibus hærere posse: Ultimo loco nuntios hortatus fuit, vt cùm primis publicæ dignitati, atq; vtilitati studerent. Optare se inquit, adesse alios, integros ac bonos etiam ciues, quorum magna præter ipsos multitudo esset, qui domi liberis suis educandis ac domesticæ rei operam darent: facillè se iis persuasurum, nihil vt reipub: commodis potius haberent: eorum omnium partes illos suscepisse, tantoque magis in omnes res intentos esse oportere, quibus reliqui, qui domi remansissent, non suam modò ac suorum, verum, reipub: etiam salutem commisissent. Peracta rogatione, sententiæ à Senatoribus dici cœptæ fuerunt. vt de ratione electionis, cæterisque, quæ proposita fuerant, perferretur, omnes ferè statuere; duobus tantum exceptis, quorum alter, nullis hominum consiliis à Deo regna mandari; alter, non posse vlla è repub: ac ne oportere quidem ambitum excludi censebant. In nuntiorum nobilitatis concilio principiò Cancellarij oratio exagitata fuit; maximè vero, quòd iam Petilios nonnullos esse dixisset, videntum ne mox etiam Catilinæ existerent. Cùm contrà ab aliis ostenderetur, non vniuersum ordinem, sed certos homines, ac ne homines quidem sed vitia notata; à quibus qui abesse se intelligeret, orationem quoq; eam ad se non pertinere sciret, res discussa fuit. Negotium inde Suentoslao Orfescio datum, qui totius nobilitatis nomine pro benè gesta repub: gratias Regi ageret; de que sermonibus, qui contra dignitatem eius à nonnullis habiti, aut in vulgus sparsi dicerentur, ei satisfacere. qui cùm in huiusmodi orationem ingressus fuisset, vt in auctores eorum Regem inquirere, ac cognita causa animadu-

maduertere debere diceret, aduersò quorundam collegarum murmure, ac mox conuitio penè exceptus fuit. De re ipsa, maximè de electionis forma certa constituenda variæ inter eos sententiæ fuerunt; quibusdam omninò ferri de eo oportere negantibus; quòd in re, qua maximè libertas contineretur, quoties aliquid fieret, quò minùs late ea, quàm antea, pateret, libertas ipsa semper minueretur, angustioribusque quàm antea fuisset, finibus circumscriberetur: alij contrà, ita maximè libertatem electionis stabiliri disputabant, si fraudes atq; ambitus legibus excluderentur: præterea tamquam affecta iam re, ac contracta superioribus comitiis tractatione, in primis Andreiouiensis fœderis religione obiecta eam vrgebant: plerique suscipi quidem eam, non finiri tamen volebant: vt quæ de ea dicerentur, ad suos referrent, quò rectius sequentibus deinceps comitiis ex vniuersæ nobilitatis sententia statui de ea posset. Dum inter eos disputationibus hisce tempus extrahitur, interim primis octo comitorum diebus, quibus capitalium rerum causæ noua lege iudicantur, elapsis, ad aliarum causarum cognitionem Rex accessit. Adeunt eum nuntij: ostendunt multos contra leges in regiam euocari: vt ex senatu nonnullis negotium Rex det, qui cum aliis ex suo corpore, quos ipsi iis adiuncturi sint, de euocationibus cognoscant, quæque in ea causa sint, vt aboleri debeant, aboleantur, legitimis ratis manentibus, petunt. Respondit Rex esse magistratus, ad quorum curam hæc pertineant, qui si muneri suo deesse doceantur, non recusare se, quò minus eò, vt alios illis adiungat, descendat: interim quemadmodum cœperat, porrò cognitionibus operam dare pergit. Prima Stanislai Carnkouij causa ob non relata in thesaurum instrumenta quædam causæ Brunsvicensis, quæ à Sigismundo Augusto in Germaniam missus acceperat, in iudici-



um adducta fuit. Collocata in matrimonium fuerat Henrico Duci Brunsvicensi à Sigismundo Augusto Sophia soror eius, deq; rebus dotalibus in euentum non susceptorum liberorum restituendis pro more stipulatio interposita. Soluta morte Henrici paulò antè excessum Sigismundi Augusti sine liberis matrimonio, missus ad sororem ab Augusto Carnkouius fuit, qui res isthïc inspiceret, consilioq; viduam iuaret. quam in rem cum instrumenta pactorum dotalium tradita ei fuissent, penes se ea retinuerat. Obiit haud multò post Sigismundus Augustus: creatus fuit Rex Henricus: idem mox ex Regno excessit. Mortua interim Sophia, sorores Anna Poloniæ, & Catharina Sueciæ Reginae, successione hæreditatem petere cœperant. Cum aliquot annos à Iulio Duce Brunsvicensi ducerentur, animaduersum postea fuit, non in ea causa hæreditatem eam esse, vt successorio iure peti deberet; sed ad Reges Poloniæ, remq; publ: pactis, ac interposita stipulatione pertinere: missusq; iuris eius persequendi causa ad Ducem Iulium, Laurentius Goslicius Decanus Plocensis, cum monumenta ea, quemadmodum iussus erat, tradere ei Carnkouius noluisset, nihilq; præter pauca quædam exempla, quæ ex tabulario Varfaviensi exceperat, proferre Goslicius potuisset, in eo ferè fuerat, vt non satis petitionem suam probare posse videretur. Itaq; cum iam non modò de re, sed existimatione etiam publica ageretur; eò acrius illa à Carnkovio primum per literas, inde petente Samoscio per Stephanum Grudinscium Castellatum Naklensem speciatim eam ob causam ad eum allegatum repetita fuerunt. Cum lenitate sua nihil profici Rex videret, per procuratorem fisci in ius vocari eum iussit. Hæc igitur dum agitur, haud multò post altera eiusdem causa in cognitionem venit. Ea res ita se habet. Carnkouius hic nobili ac claro loco natus, pluri-

plurimum in nobilitatis conuentibus, apudq; nobilitatem vniuersam gratia ac autoritate poterat. à Sigismundo Augusto ad Referendarij munus prouectus sub excessum eius Plocensem Præfecturam acceperat; ac quamuis Anselmus Gostomscius Palatinus Rauensis perpetuas controuersias de ea cum illo haberet, possessionem tamen eius retinuerat. Post discessum Henrici, Stephano Rege in regnum iam ingresso, ac plerisque ad Regis auctoritatem se adiungentibus, diuersarum partium legatione suscepta, ad Maximilianum Imperatorem in Germaniam iuerat: Cum Cracouiam Rex venisset, instarentq; apud eum ordines, vt in vnum atque alterum, quorum insignior ac præcipua pertinacia esset, exemplum statueret, præfectura Plocensis Stanislao Kriscio Palatino Masouie collata fuit. Comitibus postea Thorunium à Rege indictis, cum in iis cognitionibus operam dare Rex necesse haberet, more autem maiorum ita comparatum fit, vt secundum Cancellarios referendarij munere in iis Reges vtantur, Carnkouiusq; nondum rediisset, Nicolao Firleio, qui et ipse Cæsarianarum partium fuerat, vnà cum Castellatu Becensi referendariatum Rex contulit. Aliquanto tempore interiecto, reuocatus ab amicis, maximè fratre Alberto, qui Maiori Poloniæ Præfectus tum erat, literis Regis ab eodem ad fratrem impetratis, in Poloniam Carnkouius rediit: benigneq; à Rege acceptus optimè de Regis erga se animo sperare iussus fuit; eiusq; quam fecisset, iacturæ, à largiore liberalitate Regis cum accessione compensationē expectare. Interim Roma ad Regē scribitur, coadiutoria Archiepiscopatus Gnesnensis confirmationem, quam certo iure sibi vindicaret, in scio Rege, exteris nonnullis principibus sequestris, à summo Pontifice eum petere. Accedebat huc, vt dum ad Poloniam Rex esset, in conuentu Lublinensi, qui primus tum



Iudiciorū appellationis à nobilitate habebatur, nouas res à quibusdam tentatas, præcipuumq; earum auctorem Carnkovium fuisse, certissimis indiciis ad Regem deferretur. quæ res non mediocriter rursus animum Regis illi immutauerat. Mortuo interim Iacobo Vchanfcio Archiepiscopo, Stanislaum Karnkouium Episcopum tum Cuiaiensem, à quo inauguratus Rex fuerat, vt promisso suo inaugurationis tempore ordinibus à se facto satisfaceret, in illius locum Rex nominauit. Etenim cum in dissensione electionis Vchanfcij, eiusq; exemplum secuti cæteri Episcopi præter Cuiaiensem omnes ferè diuersas partes secuti fuissent: ille ad inaugurationem etiam vocatus parere noluisse: itaq; à Karnkouio coronatus Rex fuisset; petiit ab eo nobilitas, vt deiecto Vchanfcio Karnkovium in locum eius prouheret. Respondit Rex, si dissensionis Vchanfcij causa id peteret, malle se, quod consecuturum se non diffideret, lenitate eum adiungere: si alterius ornandi, post mortem Vchanfcij, quæ homini ætate decrepita non longè abesse posset, rectius illis præstiturum, quod nunc incommodiori tempore repræsentari vellent. Carnkouius interim Sninum possessionem Archiepiscopalem tenebat; eamq; cum dimittere nollet, in ius ab Archiepiscopo ad Regem vocatus fuit. comparere iussus, respondere primum nolebat. dictum fuit, ostenderet, quo iure in possessione esset: nam si coadiutoriam ipsam sibi vindicaret, nemini dubium esse, quin de iure regio Regis solius cognitio esset: si priuato titulo bona ea occupata possideret, ad tribunalia terrestria, quæ de rebus soli ordinariè cognoscerent, remissum iri: petiit interim procurator eius diem ad monumenta producenda, quam qui petit, iure, quo vtimur peremptorium terminum propria submissione ac sponte sua præfinire sibi putatur. Ad diem non integrum esse sibi illam pro-

ferre

ferre excipit; quòd Romæ ea sint, copiamque exhibendorum non habeat. Inter hæc nuntii rursus Regem addeunt: rogant vt euocationes omnes in regiam, exemplo Sigismundi Augusti, qui citationes omnes, quæ in causis fisci editæ fuerant, vno decreto sustulisset, inducat. Postulatum, docerent, quæ eæ essent; nolle Regem contra leges cuiquam negotium fieri: neque etiam æquum esse, sine causa iudicium quenquam subterfugere: quòd si vrgerent, quod antè ipsi petiissent; permittere Regem, vt ex senatu & ipsorum collegio conuenirent, qui legitimas ab illegitimis euocationib. discernere. Illi nihil ad hæc respondent: secretū saltem cum senatu petunt. Potestate à Rege facta, idem in senatu faciunt: postulāt, vt quemadmodum dignitate reliquam nobilitatem præirent, ita in adducendo ad æquitatem Rege, tuendoque iure nobilitatis principes cæteris antecederent. Responsum, ostenderent, quos contra ius euocatos, aut qua omninò in re Ius nobilitatis minutum putarent; si quid contra leges susceptum probarent, non defuturum senatum muneri suo. Qui verba faciebat, publicam causam se agere; debere singulos, qua in re priuatum iniuriam sibi fieri existimarent, pronuntiare dicebat. Procedit in medium Carnkouius: se contra leges in regiam pertractum ait. Ostensum, quod ad primam causam pertineret, non posse eam vlla ratione seiungi à Republica: repeti instrumenta ab illo fidei eius commissa; quibus debitum Reipublicæ doceretur: repeti eo iure, quo quiuis priuatus erga eos, qui in ministerium se illi tradidissent, vteretur: qui æquo iure libertatis cum alia nobilitate vti vellet, cui molesta hæc in regiam euocatio videretur, posse eum intra modum vitæ priuatae se continere: domi viuere: abesse à ministeriis regis; quibus qui se illigasset, indignum esse eum postulare, ne rationem quidem eorum, quæ vltro susce-

perit,

Y 4



perit, reddat. deteriorique conditione in publica re Regem esse, quam quemlibet priuatum in sua; qua tamen de re constitutio Sigismundi primi esset, cuius sententia eò pertineret: repudiari denique totum à publica utilitate. quæ si in rebus, quæ moram nullam patientur, non prius respublica ius suum consequi possit, quam longo temporis intervallo comitia habeantur, sæpè maximum periculum aditura sit. Alteram maluisse senatū ad comitia euocatam fuisse; iam verò postquam procurator eius diem ad monumenta petierit, vltro ipsum omnem sibi præscriptionem Iudicii vitandi præcidisse. Ad hæc ille, ad ordines prouocasse se, cum ad monumenta prouocaret: hæc se viua monumenta Reipublicæ existimare. ad senatum deinde redeunt: vt à singulis se præsentibus sententiæ dicantur, petunt. Dictæ huiusmodi sententiæ ferè omnes fuerunt; non rectè facere, qui constitutionem Sigismundi Augusti de causis fisci ad regias causas omnes traherent: esse constitutionem, qua actiones, quæ ad personam principis: ad maiestatem imperii: ius denique ac possessiones regias pertinerent, diserte à causis fisci, ac vectigaliū interuensorum discernentur: videndum quæ ex sint, ac num omninò fieri possit, vt promiscuè omnes Rex tollat; cum hac ratione non modò suum ac reipublicæ, sed aliorum quoque ius, in causis quæ ad delationem quorundam susceptæ ad eorundem utilitatem pertinerent, quod in ipsius potestate non esset, voluntatibus petentium ista condonaturus esset. Nuntii in suo proposito nihilominus persistebant; perq; complures dies disputatione hac extracta frequenter in concilio suo tumultuabantur. Demonstrabat iis Rex, quamquam iniquum esset, ne discerni quidem inter legitimas ac illegitimas euocationes eos velle; videre præterea etiã se nulla eos hac de re agendi à suis mandata accepisse: permittere tamen

tamen, vt ad suos referret; quò in proximis conuentibus certi aliquid statui de eo posset: interim rem integram se iis seruaturum, neq; vllas alias causas, præter Carnkouianas duas, quæ in iudiciū adductæ iam essent, cogniturū. Erant qui ab Archiepiscopo ob templorū sacrorum quæ violationem euocati fuerant; qui eò vehementius sibi metuebant, quòd rumor per dies eos sparsus fuerat, constituisse Regem seuerissimè ius de iis dicere; opinionemq; eam Rex auxerat, quòd dum in venatione non procul à possessionibus Archiepiscopi esset, Louicium ab Archiepiscopo inuitatus ad eum accesserat, familiariterque per aliquot dies cum illo fuerat. non pauci etiam aliis ex causis euocati cum nuntios, quòd facilius iudicio se subducerent, creati se passi fuissent, omnia etiam tentanda sibi statuerant; quò antequàm periculum causæ dictionis ad se perueniret, sub Carnkouii persona iudicio omnes eriperentur. Itaque etsi liberabantur metu eo, cum præter Carnkouianas causas, nullas alias iudicaturum se Rex ostenderet; quia tamen semel ita in causam ingressi fuissent, vt existimationis de se aliorum causa non temere recipere se possent, ne hac quidem ratione ab instituto suo deduci se patiebantur. Alii sermonibus eorum permoti, vt in metu grauissimarum rerum, in quibus libertas agi prætenderetur, tempus aliud quod interponi, dum certius de eo cognosci posset, non moleste ferebant. quidam cum in re nihil periculi esse intelligerent, opinionem metuebant; ne tamquam auctores libertatis destituisent, in vulgus traducerentur. Fiebat hinc, vt qui omninò ista improbabant, cum ab aliis impugnarentur, ab aliis non iuuarentur, in tanta diuersa sentientium multitudine ipsi nihil possent. Late nihilominus sententiæ contra Carnkouium fuerunt. prima iam multò antè, qua monumenta restituere iussus fuit, in qua causa ne ab ipsis quidem nuntiis magno pere



pere contendebatur. Altera causa cum variè adhuc duceretur, ad id nonnullis decurrendum videbatur; quòd post discessum Henrici coadiutoriam impetrasse diceretur; ei que rei fidem faceret, quòd alterius Posnaniensis Episcopatus nominationem à discessu Henrici in illum collatam, Regi ipse exhibere non dubitaret. quare cum Varfauienti fœdere, qui ab absente Henrico quicquam petiisset, contra rempublicam facturum cum iudicatum esset, conuentionis eius vi vrgendum censebant. Rex vltimo comitiorum die decretum tulit: coadiutoriam sustulit; de possessione, quæ ab illo tenebatur, cognitionem ad ordinaria nobilitatis iudicia, in quibus quo iure eas possideret, doceret, remisit. Hunc ad modum stato comitiorum tempore extracto, ingenti cum omnium dolore, Samoscio præsertim omnes obtestante, Liuoniæ saltem Russiæque curam susciperent, ne vel illam magno labore, ac sanguine suo partam omni ope nunc destitutam rursus amitterent; vel hanc Barbaris diripiendam proderent; Constantino etiam Ostrogia Duce, Palatino Kiouienti recentissimos quosque nuntios de Tartarorum expeditione proferente, nihil tamen actum fuit. Appellatus per eos dies frequenter à Lituanis Rex fuit, vt Liuoniam Lituanicæ formulæ faceret. Vbi nec in senatu, nec in concilio nuntiorum magnopere à quoquam illis contradicebatur: in hoc potius non deessent, qui quò Lituanis adiutoribus facilius, quod contendebant, à Rege extorquerent, non inuiti decessuri illis de ea viderentur; Surrexit Samoscus; reliquosque intuitus suo suorumque commilitonum periculis Liuoniam hosti ereptam dixit; de quo si qui ambigerent, ad Moscum ipsum se prouocare: non dubitare, se vel hostis ipsius professione id euincere: ea igitur ne à regno seiungeretur, si à nemine contradiceretur, se tamen pro omnibus intercessurum. Venerant ad  
comitia

comitia Legati Moscouitici, vt iuramentum in pacem à Rege acciperent; quemadmodum regii iam antè ipsorum Principem iureiurando obstrinxerant. Præstitum id à Rege maxima omnium ordinum corona fuit, ara in comitio ad id constituta, Archiepiscopoque, postquam tabulæ fœderis à scribis lectæ fuissent, in verba ei præeunte. Præter Iuramenti exactiorem, vt de captiuis vtrinque permutandis agerent, mandatum habebant, quod cum tenere non potuissent, vt in locum certum captiui comportarentur, redimendi que eos potestas, quorum essent, fieret, impetrarunt. Referebant nonnihil & de finibus controuersia ex eo potissimum ortæ, quòd de Velisiensi agro, ne à Polonicis ordinibus, à quorum copiis captus erat, vindicaretur, in Sapolienti fœdere à Lituanicis scribis adiectum fuerat; vt, quemadmodum olim is ad Palatinatum Vitepsciensem pertinisset, ita posthac pertineret: Mosci que ab eo tempore, quo in potestatem eorum Velisiu venisset, magnam partem Toropeciensis agri ad eum adiectam contenderent. Placuit vt vtrinque legati ad fines regendos mitterentur. De castellis Liuonicis, que Suecus occuparat, iam antè per Boiaros Moscouiticos cum legatis, quos à Rege in Moscouiam missos dictum est, conuenerat, vt per totum pacis tempus à cis Naruanis Moscus, ab vltra Naruanis Rex vtrinque abstinerent. Excepti inde conuiuio fuerunt more maiorum, splendidissime que habiti; hominibus elegantioris cultus ferè rudibus cum epularum magnificentiam, tum apparatus varietatem; multò magis tamen Regem ipsum admirantibus. In tam insigni publicarum rerum perturbatione, seu potius negligentia præ cæteris tamen militum conditio maxime miserabilis videbatur. Plerique enim non modò tanquam ad paratum stipendium, cuius spes facta illis erat, sed ad magnam honorum, vt bene gesta re  
agro-



agrorumque spem, ii præsertim, qui nobilitate ob virtutem donati, præsidia etiam ista, quibus nobilitatem tuerentur, ac alia præmia sperauerant, omnium rerum egentes, ac nudi alienissimo anni tempore eò venerant; ut non pauci è nobilioribus etiam, ad Plescouiam occubuisse se malle dicerent, quàm ad tantam egestatem, atque omnium rerum difficultatem redigi. Iisdem autem temporibus Ioannes Suiscius etiam, quem in defensione Plescouiæ egregiam operam nauasse supra ostendimus, à conspectu principis sui abiectus in luctu ac ægritudine erat. sed militum difficultatibus conquistata undique pecunia, cum ab aliis destitutam ferè Rempubli- cam à se tamen deserendam Rex non existimaret, quò- ad eius fieri potuit, occursum fuit; agenteque cum iis Samoscio tanta animorum alacritas innata iis fuit, ut nò modò diem solutionis ad Penthecostes proferri paterentur, sed dum modò certo aliquo loco collocarentur, ex quo commeatus sibi suppeterent, si interim Tartari irruptionem facerent, etiam sine stipendio, quocumque ducturus eos Samoscus esset, ituros se pollicerentur. Solutis comitiis cum iam nuntii discessissent, Rex cum senatu Liuoniæ etiam, quantam potuit, curam impendit; initioque à diuinarum rerum cura factò, quòd pleriq; in Prouincia ea Episcopatus temporum ac bellorum iniuria suppressi essent, Vendam, quam potissimum ad accipiendam nouam sedem Episcopi idoneam iudicabat opidis, castellisque aliquot ac possessionibus ad eam adiectis, Episcopatui attribuit; àque S. Pontifice, ut Episcopatum authoritate sua ibi fundaret, petiit. Prouincialibus etiam iura certa, ac forma prouinciæ, ut aliquam tamen sui curam habitam cernerent, pro tempore descripta fuerunt. Venerant à nobilitate legati Varfauiam: alij præterea frequentes priuati suarum quisque possessionum, è quibus se, vel maiores suos à

Moscis

Moscis deiectos dicerent, recuperandarum causa. Summa publicorum postulatorum erat, ut pacta inter Sigisf. August: ac prouinciæ eius ordines, quo tempore se in potestatem illius dedissent, conuenta, rata Rex haberet. Eorum hæc ferè erant capita, ut non nisi Germanicæ gentis in prouincia ea magistratus essent: Possessiones quas tum singuli haberent, aut postea consecuti fuissent, quo vnquam optimo iure possedissent, possiderent: Iura ac Priuilegia singulorum integra conferuerentur. Addiderunt ad hæc ipsi, ut iudiciorum certa ratio constitueretur: ne castella demoliri, quemadmodum Rigæ à Rege imperatum iis fuerat, cogerentur: ut in captiuis suis recuperandis à Rege iuuarentur. Responsum fuit: quòd ad vetera à Sigism: August: concessa iis Priuilegia pertineret, tenere eos memoria, quid ab eo tempore, quàmque varia intercessissent: quid etiam huius temporis esset, pro sua prudentia perspicere: debere eos se credere iudicio Regis, qui cum salutis eorum author fuisset, ornamentorum, ac commodorum prouinciæ eius non minorè curam se habere ostensurus esset. Sigillatim verò, quòd præcipuæ authoritatis in illa Prouincia magistratū Germanicæ gentis peterent, cum ab honore eo ex prouincialibus, si qui ad eum idonei futuri essent, neminè exclusum Rex vellet; eò futurum acerbius, si ipsi propriæ salutis libertatisque authores à dignitate tam præclaræ victoriæ remotos vellent: daturum operam Regem, ut eum Prouinciæ præficeret, qui ex æquitate, ipsorumque iure ac legibus omnia administraret: tum verò in prouinciali publico consilio constituendo, iudiciis, cæterisque officiis præsidium, Succamerariorum, & reliquorum præcipuam vetustæ quoque nobilitatis Liuonicæ in Prouincia ea rationem habitum iri. Inter iura ac priuatas singulorum possessiones id discrimen factum: ut, quæ à superioribus Liuoniæ Principibus,

Z legit-



legitimisq; eius magistratibus vsq; ad Gvilhelmū Marchionem Brandeburgensem Archiepiscopum Rigensem profecta essent, iure ipso rata haberentur; quæ à posterioribus collata essent, quòd ea tempora inde consecuta fuissent, quibus multa non ordine fierent, prouinciaq; nullo ferè certo Imperio teneretur, de iis Regem ex publicis Prouinciæ commodis, cuius vt opibus ac neruis contra omnes casus muniretur, præcipua ratio habenda ei esset; & cuiusq; meritis; genere denique ipso possessionum statuturum; ad eaque cognoscenda primo quoq; tempore conuentum Prouincialibus editurum, in quo sua quisq; Iura exhiberet. Cùm autem superiori tempestate amisisse pleriq; Priuilegia sua dicerentur, eos quos, & à quibus, quoq; tempore, & sententia literas habuissent, aperire debere, eaque omnia suo idoneorumq; testium iuramento comprobare. Iudiciorum forma iis, de quib. supra ostensum est cõstitutionibus descripta, tradita illis fuit. Castellorum demolitionem hoc potissimùm consilio Rex imperarat, ne vires Prouinciæ, quemadmodum superioribus temporibus factum fuerat, distraherentur; eandemque ob causam, ex suis quoque non pauca deiecturum se edixerat. Idem hic iis responsum fuit, non debere eos detrectare, in re qua publicam potissimùm prouinciæ salutem Rex spectaret, quò minus eius exemplum imitarentur. In captiuos redimendos certus Boiarici generis numerus promissus iis fuit. Magnus Dux cum difficultatibus quibusdam suis, quemadmodum Rigæ à Rege monitus fuerat, ipse comitia obire non potuisset, legatos miserat; per quos eadem ferè quæ Rigæ, proposuit. quæ cùm sine præsentia eius explicari non possent, ad sequentia comitia necessariò dilatus fuit. Quibus rebus confectis, crebris nuntiis de apparatu Tartarorum Varfauiam allatis, Varfauia Cracouiam Rex

Rex proficiscitur. venientem Legatio à Tartaro adiit: quæ, nisi continuò conditiones quas ferebat Rex acciperet, iisque satisfaceret, bellum denuntiabat. Ad eam Sinan Bassa literas adiunxerat; quibus Turcam etiam iniurias Tartari non neglecturum ostendebat. Iam antè autem, quemadmodum ostensum est, iustam equitatus partem in Russiam Samoscus præmiserat; ad eam quàm potest maximum numerum militum adiicit: quos addictos adhuc habebat, omnes contrahit: nouos suis stipendiis alios conscribit: ex nobilitate nominatim fortissimum quemque euocat: Præter eos Constantinus Ostrogia Dux suas copias, quas non contemnendas è clientibus suis coactas habebat, promptissimè Reipublicæ offerebat. Itaque in Russiam Samoscium contra Tartaros Cracouia Rex mittit.

## FINIS.

## Emendanda.

*Folio 5. ver. 23. debebam leg: deberem. fol: 9. ver: 31. Pernauiam, leg: Parnauiam. fol: 14. ver: 18. Sbarasso, lege, Sbarasio. Eundem ad modum sequent: locis, leg: quibus nomen hoc occurret. Eodem fol: ver: 26. Ciaflauiam, leg: Sallauiam. fol: 32. ver: 18. regis, leg: regis. fol: 35. ver: 15. Chorossino, leg: Choroscino. ad eundem modum in sequentib. fol: 37. ver: 17. Milecium, leg: Mielcium. eundem ad modum in sequentib. locis omnibus, e nimirum ad i. addito. fol: 40. ver: 31. Disne, leg: Disnæ. eodem fol: ver: 18. 19. Trocensis maxime & Polotiensis Palatinorum Castellani: item Polotiensis, leg: Stephani Sbarasij maxime Trocensis, Nicolai Dorohostaiscij Polotiensis Palatinorum, Georgij item Senouicij Castellani Polotiensis. eodem fol: ver: 25. 26. quo eo celerius, leg: quò celerius eodem fol: ver: 31. Radosuicio, leg: Radoskouicio. fol: 50. ver: 7. Nysa, le: Niscia. fol: 66. ver: 31. crurotenus, le: crurotenus. fol: 69. ver: 9. quorum, le: quarum. fol: 75. ver: 2. Nysa, le: Nisciam. fol: 75. v: 31. Drucam, le: Druam. fo: 77. ver: 19. Cernkouiam, l: Cernihouiam fol: 78. Nouogrodensem le: Nouogrodecensem. fol: 82. ver: 1. fit, leg: sit. fol: 93. ver: 29. Nafokinum, leg: Nasciokinum. eodemque modo sequent: fol: 98. ver: 29. et sequent: Hisc loco pharetra, & Corythi bicubitalia scloppeta ad humeros*



*meros aptarat, breuiora ex cinctu suspendenda dederat, le: Hisce loco Co-  
ryti bicubitales scloppetos ad hum: apt: breuiores ex cin: suspendē-  
dos. fol: 101. ver: 3. & 4. maiores alias, le: alias. fol: 102. ver: 21. demendata, le:  
demandata. fol: 113. ver: 12. qui, le: quod. fol: 114. ver: 29. Viechouum, le: Vici-  
chouum. fol: 125. ver: 2. Viechouus, leg: Vicichouus. fol: 126. ver: 2. comittat.  
lege committat. fol: 127. ver: 31. Demetrio Ceremesino, lege Damiano Cerc:  
fol: 133. ver: 1. Sauolocia, leg: Sauolociam. fol: 149. ver: 6. quo, leg: quod. fol:  
159. ver: 20. Dirsssekus, le: Derissekus. fol: 170. ver: 23. assumpto, leg: assumpto.  
fol: 171. ver: 11. debellasset, leg: debellasse. fol: 188. ver: 8. duo millia, leg: octo  
millia. fol: 190. ver: 23. Iamorodum, leg: Iamhorodum. fol: 206. ver: 3. Su-  
turna leg: Sutura. fol: 208. ver: 10. Goltouiscius, le: Koltouiscius. fol: 212. v:  
17. referentur, le: referrentur. fol: 216. ver: 8. Gostinij, le: Gostomscij. fol: 218.  
ver: 6. alios, le: alijs. fol: 221. ver: 20. eas, le: ea. eod: fol: ver: 22. nominata, lege  
nominata. fol: 232. ve: 2. eas, le: ea. eod: fol: ver: 3. nulla, le: nullius. versu 4.  
prater Ostrouam, le: praterquā Ostrouia. fol: 236. ve: 30. arces, le: arcis. fol:  
237. ver: 29. eas, le: cam. fol: 239. ver: 16. habuisset, le: habuisse. fol: 212. ver 20.  
sufficere, le: sufficeret. fo: 255. ve: 32. Carnkouij, le: Ciarnkouij. addito i. eun-  
dēque in modum sequentib: locis, quoties hoc nomen cum litera C. occurrit. Reliqua  
si quae sunt, quae non possunt esse magna, lectoris iudicio permittuntur.*

**R E G I S T R U M**  
**A B C D E F G H I K L M N O P Q R S T V X Y Z**

*Omnes sunt terniones, prater Z,  
quod est duermio.*

Cum gratia & priuilegio S. Regiē M.

CRACOVIAE,

*In Officina Typographica Lazari,*

*Anno Domini*

1 5 8 4.



std/0015351



Biblioteka Jagiellońska

Mc 8230

*Kios Polon.*

*spec.*

*p. 24.*



